





拟

精響編

圖書在版編目(CIP)數據

儒藏. 精華編. 二/北京大學《儒藏》編纂中心編. 一北京:北京大學出版社,2009.7 ISBN 978-7-301-11720-0

I. 儒··· II. 北··· III. 儒家 IV. B222

中國版本圖書館 CIP 數據核字(2007)第 113378 號

書 名: 儒藏(精華編二)

著作責任者:北京大學《儒藏》編纂中心 編

責任編輯:蕭雪

標 準 書 號: ISBN 978-7-301-11720-0/B • 0406

出版發行:北京大學出版社

地 址:北京市海淀區成府路 205 號 100871

網 址: http://www.pup.cn

電子郵箱: dianjiwenhua@163.com

電 話:郵購部 62752015 發行部 62750672 編輯部 62765691

出版部 62754962

印 刷 者:北京中科印刷有限公司

經 銷 者:新華書店

787 毫米×1092 毫米 16 開本 39 印張 482 千字

2009年7月第1版 2009年7月第1次印刷

定 價:500.00元

未經許可,不得以任何方式複製或抄襲本書之部分或全部内容。

版權所有,侵權必究 舉報電話: 010-62752024

電子郵箱: fd@pup. pku. edu. cn

教育部哲學社會科學研究重大課題攻關項目

北京 大學「九八五工程」重點項目國家 社會 科學 基金 重大 項目 目「十一五」國家重點圖書出版規劃項目・重大工程出版規劃



《儒藏》精華編第二册

首 席 總 編 纂 季美林

項目首席專家 湯一介

湯一介 龎

總

編

纂

本

册

主

編

劉大鈞

林忠軍

樸 孫欽善

安平秋 (按年齡排序)

儒藏》精華編凡例

則的 爲儒 典籍的叢編。 家經典和反映儒家思想、體現儒家經世做人原 、中國傳統文化以儒家思想爲中心。 收書時限自先秦至清代結束。 《儒 藏

一、《儒藏》精華編爲《儒藏》的一 部分,選收《儒

藏》中 的精要書籍

互見。 寫者一律收其釋文文本。 已收入入選的個人叢書或全集者,僅存目録,並注明 漢文寫作的儒學著作,編爲海外文獻部類 分類法分類,大類、小類基本參照《中國叢書綜録》和 土文獻。 中國古籍善本書目》,於個別處略作調整。 三、《儒藏》精華編所收書籍,包括傳世文獻和出 出土文獻單列爲一 傳世文獻按《四庫全書總目》經史子集四 韓國、日本、越南儒學者用 個部類,原件以古文字書 凡單書 部

> 編,不改編,保持原書的完整性和獨 四 、所收書籍的篇目卷次,一仍底本原 立 性 貌 不選

爲主,酌校異同。 勘價值的版本爲校本。 確定内容完足、精確率高的版本爲底本,精選有校 五、對入選書籍進行簡要校勘。 校記力求規範、精煉。 出校堅持少而精 以對校爲主, ,以校正誤

例,進行規範化標點。 六、根據現行標點符號用法,結合古: 專名號除書名號用 籍 角號(《》) 標 點通

外,其他一 落。正文原已分段者,不作改動。 七、對較長的篇章,根據文字内容,適當劃分段 律省略。 千字以

内

的

短文

般不分段

及其他有關情況。 及整理時所確定的底本、校本(舉全稱後括注簡稱 出 介紹作者生平、該書成書背景、主要内容及影響,以 現 順序前詳後略。 八、各書卷端由整理者撰寫《校點說明》,簡要 重複出現的作者,其生平事蹟按

九、本書用繁體漢字豎排,小注一 律排爲單行。

《儒藏》精華編第二册

周易正義〔唐〕孔穎達

周易集解[唐]李鼎祚

經

部

易

類

261 1

鳴

謝

本焕法師

《儒藏》精華編惠蒙善助,共襄斯文, 謹列如左,用伸謝忱。

壹佰萬元

北京大學《儒藏》編纂中心

本册青任編委 李峻岫本 册 審 稿 人郭 彧 孫通海

周

易正義卷第十三 …

……… 二三九

目録	小畜 五一	比 四八	師 四四	訟 四〇	卷三	蒙 三三		坤 一九	卷二	乾 一	卷一	周易集解序 一	李氏易傳序	四庫全書提要 一	校點説明		目録		
	大畜 一〇六	无妄 〇三			剥 九六		觀	臨				豫七四			同人 六五	否 六二	泰 五八	卷四	履 五四

夬 一六二	卷九	益 一五七	損 一五三	解 一五〇	蹇 一四三				明夷 三七										頤 一〇九	周易集解
節 []]	<u> </u>	卷十二			旅	豐 二〇五	歸妹二〇二	漸 一九九	卷十一	艮 一九五	震 一九二	鼎 一八八	革 一八四	井 一八〇	卷十	困 一七五	升 一七三	萃 一六九	姤 一六六	

目録		李氏易傳後序 三三四	周易雜卦 三二九	周易序卦 三二一	周易説卦 三〇四	卷十七	周易繫辭下 二八八	卷十六	周易繋辭下 二七一	卷十五	周易繋辭上 二五四	卷十四	周易繋辭上 二三七	卷十三	未濟 二三三	既濟 二三〇	小過 二二七	中 界
----	--	------------	----------	----------	----------	-----	-----------	-----	-----------	-----	-----------	-----	-----------	-----	--------	--------	--------	------------

 \equiv

周易正義

〔唐〕孔穎達 等撰

周

易正義卷第十三 …

……… 二三九

校 點 説 明

注 王弼、 正 道、重義理而不輕象數的「糾偏」學術 實,欲使信而有徵。」足見孔氏等易 爲 正 爲 學館學士、國子博士、國子司業、國子祭酒等職,爵 五 遠的影響。 最重要的易學典籍,對唐代及後世易學産生了 當 過 義 宗,義理可詮,先以輔嗣爲本。 義序》云:「今既奉敕删定,考案其事,必以 曲阜縣男,後爵爲子,卒賜太常卿。 經,兼善算曆,尤通王弼《易》。 字仲達),冀州衡水(今河北衡水)人。孔氏 》雖 程中有選擇地吸收了幾十家前代易學家的 時「儒學多門、章句繁雜 晉韓康伯 周易正義》是唐初《五經正義》之一,採 然爲王、韓之注 孔穎達(五七四 注本,由孔穎達等人作疏,是 作 疏,但 一的 學 是孔氏等 六四八),字沖 入唐後,歷任 術狀況。 去其華 學 傾向,力圖 試 所撰《周 置 人在 而 融 仲 周 取 滙 唐 用 疏 易 尼 觀 釐 儒 其 易 文 明 代 遠 深 魏

增

行了一次大總結 釋 點,並提出了「不可一例求之,不可一類取之」的 原則,對兩 漢、魏 晉、 南北朝以來的 易學 成 進 詮

明。 全書》本(簡稱「四庫本」)。 印本,簡稱「阮本」),並參校以影印文淵閣《四 校刻《十三經注疏》《上卷,中華書局一九七九年影 (十四卷單疏本,係日傳鈔本,簡稱「嘉本」)和阮 本。 傳,傅增湘先生在《宋監本周易正義跋》中已 「此宋槧之最古者」(翁方綱跋語)。 義》的校點整理,以北宋端拱元年(九八八)孔維等 補。 敕校勘、國子監刊 疏各單行,南渡以後始有合刻本。 校本則採用劉 又據傅先生推斷,此本爲南宋紹興年間 羣經注 疏,以單疏本爲最古。 承幹嘉業堂叢書《周易 刻的十四卷單疏本爲底本, 原書無目録,今據正 南宋以前,經 關於該本的 此次《周 正 有 易 義 文 庫 説 流 元

奉

注

校 點 人 趙榮波

五經正義表

濟四溟 之紀 以 風,闡儒 異,莫不開兹膠序,樂以典墳,敦稽古以 后,火紀建極之君,雖步驟不同,質 誡 道 化之丹青。 歌明得失之跡 於百 彰八 分焉; 書浮於温洛,爰演九疇,龍圖出於祭河 馬鄭迭 臣 卦。 王, 五始六虚, 貽徽範於千古。 无忌等言: 臣 雅 乃人倫之隱括。 知周萬物。 醇 以立訓,啓舍靈之耳自,❶ 進,成均之望鬱興; 德既醨,六籍之文著矣。 故能範圍天地, 埏埴陰 姬 ,雅頌表興廢之由。 孔發 揮 所以 聞 於前 混 七教八政,垂烱 昔雲官司契之 元 ",荀孟 初 闢,三 蕭戴同昇, 抑 寔刑政 陽,道 於是 費神 文 極之 詠 於 弘 有

> 華。 宿麗。 絲綸,更令刊定。 國子孔穎達,宏才碩學,名振當時,貞觀 也。 其道 中,奉勑修撰。 莫袪五日之惑。 競生别見,後進争出異端,未辨三豕之疑 賾,妙理深玄,訓詁紛綸,文疏 道,坐玄扈以裁仁。化被丹澤,政洽幽陵。 史不絕書。 照金鏡而泰階平,運玉衡 三秀六穗之祥,府无虚月,集囿巢閣之瑞 經邦,藴九德而辨方軌物。 乘天地之正,齊日月之暉。 渠之業愈峻。 伏惟皇 彌 而垂拱无爲,遊心經典,以 尊。 可謂鴻名軼於軒昊,茂績冠於 一帝陛 斯 乃 雖 故祭酒上護 歷夷險其教不隊,經隆 下得 邦家之基,王化 加討覈,尚有未周,爰降 一繼明,通三撫運 敷四術 軍 御紫宸 踳 爲聖 曲 草縣開 之本 而 一教 而訪 而 緯俗 先 年 景 替

「自」,依文意當作「目」。

約,右 史上 書左僕 禄大 通 賈公彦,朝散 子博士臣王德韶 子博士弘文館學士臣劉伯 奭,前諫議大夫弘文館學士臣谷 開 夫侍 或 或 或 7,大學 教臣· 直直 臣 史上 公臣 或 公 公臣 夫守 柱國 中 臣 范義頵,朝散大夫行太常 勑 郎大 内 史士 護軍 志 兼 射 无 太 助 率 中 河 季 尉 寧,尚書右僕射 兼 太 忌 學博 教臣 府 南 弘, 輔 曲 書令監修國史上騎 子 太子少 一, 司 揚 大 長 阜縣 ,光禄大夫吏部尚 州 郡開國公臣褚遂良, 少 夫 宣德郎守大學 土 鄭 空上 史 保 都 行大學博士 朝散大夫行大學博 祖 臣 弘 開國 監 師 督 玄 齊 文館 柱 監修 修 監 威, 公臣 或 徵 或 兼太子 修 英 莊 直 史 或 事 宣 或 行成,光 國公臣 學 郎 上護 史上 史上 博 弘 德 博 朝議 都 士: 守 書監 少 文 郎 士 +: 那律 大 尉 柱 傅 臣 臣 館 銀 軍 臣 守 大 勣 夫國 學 青 蓨 禄 薛 FL 或 柳 直. 臣 修 監 或 或 助 伯 學 臣 柳 子 或 光 或 縣 大 志 官 修 燕 尚 趙

> 永久。 <u></u> 恭,業慙張 之膏肓,翦古文之煩亂,探曲 臣 守 天象,與七政 連山之玄言,囊括 教 王真 不 聞,伏增戰越。 四 臣 門 隨 筆削已了,繕寫如 務]助教臣 德素, 儒等,上禀宸旨,傍摭 郎守 禹, 而長懸,方之地軸,將五 大 徵 李玄植 雖 學 事 罄庸淺 謹言 百家,森羅 助 郎 教 守 儒林 臣 兀 前。 周 門 郎 乖 玄 臺之奥 羣 萬有 博 守四 臣等學 典 書 達 士 正 釋 門 承 臣 (趣,索 謝 謹 一嶽 比 左 務 趙 助 伏 之 氏 教 郎 君 而

督上柱國趙國公臣无忌等上、永徽四年二月二十四日太尉揚州都

周易正義序

窮,風 亂。 益 與於此乎? 故能 效四 歷三古。及秦亡金鏡,未墜 傷於澤,則「十翼」彰其用。 其性,行必叶陰陽之宜,不使一物受其害。 以 而 也。 百 仰 1物和 觀 彌 時 故王者動必則天地之道,不使一 夫易者,象也。 聲所以不朽。 若夫龍出 以 俯察,象天地 綸宇宙,酬 八儒雅。 生萬物。 , 若行之以逆, 則六位傾 斯乃乾坤之大造,生靈之所 其傳《易》者,西都則有丁 於河, 若用之以順,則 酢 非夫道極玄妙,孰能 而育羣品,雲行雨 爻者,效 i神明。 則八卦宣其象; 業資九聖,●時 斯文,漢理珠 宗社所以无 也。 而 兩 物失 議序 五. 人 疄 行 有

> 相祖 是陽氣剥盡之後,凡經「七日」始復,但陽 既背其本,又違於注。 氣 云:「陽氣始剥盡至來復時,凡『七日』。」則 復,所歷七辰,故云『七月』。」今案: 輔嗣 陽氣從五月建午而消,至十一月建子始 日來復」,並解云:「『七日』當爲『七月』,謂 説,斯乃義涉於釋氏,非爲教於孔門 教有」。 若論住内住外之空,就能就所之 復「玄之又玄」,至於垂範作則,便是「有 者罕能及之。 見古今,❷所以江左諸儒並傳其學,河北 辭尚虚玄,義多浮誕。 一、京、田、東都 述,非 建午始消,至建戌之月陽氣猶 :有絶 其 江 南 則有 倫 唯 荀、劉、馬、鄭,大體 義疏, 魏 至若《復》卦云「七 原夫易理 世王輔嗣 十有餘家,皆 難窮, 之 注 一, 何 也。 注 而 雖 學 獨 更

^{■「}九」,嘉本同,阮本作「凡」。 阮校云:毛本、足利本、

[「]見」,嘉本、四庫本、阮本均作「冠」。

乎? 前,諸 用 氏 又云「甲 故後之三日。 甲令、乙令也。 輔 説 : 定,考案其 此,而又不 庚三日」,輔嗣 若此,康成之説遺跡 得 七日來復」。 一卦,卦主六日七分,舉其成數言之, 也, 辛 之説,以爲甲者宣令之日,先之三 用 稱 嗣注云「甲者創制之令」,又若漢 也、欲取 建戌之月,以陽 事,至建子之月,陽氣始生,隔此 取 又《蠱》卦云「先甲三日,後甲三 七月來復」? 儒背之於後。 其 庚皆申命之謂 顧其注妄作異端。 事 丁 改 又《巽》卦云「先庚三日,後 仲尼之《緯》分明,輔嗣 9 寧 注 輔嗣又云「令洽」、「乃誅」, 辛之義, ●後之三日 之義。 云「申命令謂之庚」,輔 必以仲尼爲 氣 故 可尋。 考其義理 鄭 既 也」。 王氏 康 盡 成引《易緯 ,建亥之月, 諸儒 注意 輔 宗 今既 嗣 ¬, 其 注之於 義 奉 本 世之時 同 日月, 勑 可 之注 日 於 而 純 而 学之 如 通 删 鄭 嗣 用 而 云 陰

> 庶望 智覆 使信 與 附之卷首爾。 十六年,又奉勑與前 助 朝 教臣 先先 而 博士上騎都尉 散 上裨聖道 更詳審,爲之《正義》, 能 而 以 大夫 趙乾叶等對共參議 有 通 輔 徵 嗣 行 仍恐鄙 爲本。 大學博士臣 其文簡 ,下益將 臣蘇 才 修 , 其 德融: 短見,意 疏 其 來。 理 人及給事郎 華 詳 馬嘉 等對 約 凡十 故序其大略 而 其 未 運、守大學 寡 取 勑 可 有 其 周 而 使 否。 盡,謹 實, 四 制 趙 守 弘 四 至 欲

^{● 「}案」,嘉本同,四庫本、阮本作「察」。

周易正義卷第

開國子臣孔穎達奉勃撰國子祭酒上護軍曲阜縣

自此下分爲八段

第一論「易」之三名第二論重卦之人第三論三代《易》名第五論分上下二篇第六論表子「十翼」第六論表子「十翼」第六論集子「十翼」

第一論[易]之三名

) 「爛」,嘉本、阮本同。 阮校云寫本作「炯」。

必專者 位 也。 《易贊》及《易論》,云「易」一名而含三義。 之門户邪」,又云「夫乾,確然示人易矣,夫 時 乾坤定矣。 時變易,出 柔相易,不 屢遷,變動不居,周流六虚,上下无常, 從」,此言其易簡之法則也。 坤,隤然示人簡矣。 故《繫辭》云「乾坤,其易之緼邪」,又云「易 父坐子伏,此其「不易」也。 ·易」者,謂生生之德,有易簡之義;「不易」 易簡」一也,「變易」二也,「不易」三也。 也。 更廢 ,言天地定位,不可相易,「變易」者,謂 ,剛柔斷矣」,此言其張設 覲、 敗,此其「變易」也。 天在上,地在下,君南面,臣 人移動者也。又云「天尊地 劉 可爲典要,唯變所適」,此言 臣 卑高以陳,貴賤位 貞 取 象,變節 簡 等並 易則易知,簡 相 鄭玄依此義作 移 用 示 又云「爲道 布列不易者 %能 矣。 此 易」者,其 義云: 消 動静 北 者 則 卑, 易 有 別 也

> 之道。 本實 爲 名,待奪之義。 故今之所用同鄭康成等。 之言,所謂用其文而背其義,何不思之甚。 相形,皆得相易。 不顧《緯》文「不煩不擾」 德也」,或没而 張氏、何氏並 者,相變改之名,兩有相變,此爲「變易」。 有體,无常无體,是「不易」之義。「變易」 皆是「易」義。「不易」者,常體之名,有常 簡子云「易」者,易音亦也,不易也,變易也 擾,澹泊不失」,此明是「易簡」之義,无爲 生生之道 「易」者易代之名,凡有无相代,彼此相易, 難易之音,義爲簡易之義,得《緯》文之 也 故「易」者易也,作難易之音。 蓋「易」之三義,唯在於有 變而 用 不論,或云德者得也。 相續 因於《乾鑿度》云「易者其 此義云:「易」者,换代之 ,皆以《緯》稱 「易」者易也,音 萬法 煩 而 唐

0

^{「□」,}四庫本、阮本無空格。 阮校云:寫本「簡」上

言之存 存乎道 言之存 是 言之 之存乎其 辭》云「形而上者謂之道」,道即无也, 本以垂 无,而易象唯在於有者,蓋以聖人作《易》, 循之不得,故曰『易』也」,是知易理備包有 渾 形 從 而 未見氣 太易,有太初,有太始,有太素。 也 者 下者謂之器」,器即有也。 沌 而 之 无 始也。 未 存乎其性, 生於无形,則乾坤 出 而 乎陰 體 相 乎 也。 且「易」者象 未 教,教之所備,本備於有。 理 神, 離謂之渾沌。 以以 相 精 則 陽, 太素者,質之始也。 義 太初者,氣之始也。 離 包 以生成言之存 有言之存乎器 也。 以 无 以質言之存乎爻象,以 以邪言之存乎其情, 0 人言之存乎景 也 視之不見,聽之不聞 故《乾鑿 ,物无不可象也。 渾沌者, 言萬物 安從 用,以 故以 乎其易, 而 度 生 氣、形、質 》云「夫 行, ? 太始者。 太易者, 變化言 无言之 故《繫 以 故有 此 以 ,「形 真 等 教 氣 相 有

> 民 作 所 各安其性。」此其作《易》垂教之本意也 陰陽以正君臣、父子、夫婦之義,度時制宜 通 法 衣 易》 爲 於 食 乃治、君親 卦、建五氣以立五常之行,象法乾坤、 以 神 地,中觀萬物之宜,於是始作八卦,以 上古之時,人民 罔罟,以佃 斷天地,●理人倫而明王 明之德,以類 器用之利,伏 所 以 垂 教 以尊,臣子以順,羣生和 者, 以漁、以贍民 犧 萬物之情。 即 无别, 羣物 勞 $\stackrel{\cdot}{\approx}$ 乾 仰觀 鑿 度》云 象 用。 道。 故『易』者, 於天,俯 未殊,未 於是人 是以 孔 順 畫 有 子

弗二論重卦之人

天應以鳥獸文章,地應以河圖洛書,伏犧之。」又《禮緯含文嘉》曰:「伏犧德合上下,《繋辭》云:「河出圖,洛出書,聖人則

「斷」,嘉本、阮本同。明錢叔寶本《乾鑿度》作「繼」。

0

夏禹及 皆在其 爲夏禹 則 其 破 犧重卦,鄭玄之徒以 通之理猶自未 正、然後畫 是則伏犧雖得 肅 人,諸儒 卦有六爻,遂重爲 因而重之,爻在其 費 有 中矣」是 、姚信等 而 於神 案《説卦》云: 蓋 象之, 其言神農 也 文王 重 中。 取 不同,凡有 神 明而 諸 卦,史遷等以爲文王 乃作 並云: 卦。 也 農 益 重 故《繋辭》曰「八 以 重卦 河圖 與 生蓍。」 卦者,案《繋辭 備, 伏犧 八 雖 噬嗑,●以此論之,不攻自 後 「昔者聖人之作《易》也 伏犧 卦。二 六十四 故 有 四 中矣」是也。 亦未爲得,今以 便 復 説 萬 初 爲神農 因 凡言「作」者,「創造」 是 須 故 物 畫 得 其 述脩, 卦 仰 王輔嗣 孔 之 河 八 八 也。 觀俯 土 安 象,其 卦 圖 卦 重 》,神農之 一重卦。 或 卦 成 而 不 而 《繋辭 等以 然重 察以 萬物之象 更重之。 馬 (萬 可謂之 孫盛 諸文驗 融、 其言 物 易 爲 桂 相 ₩ E 時 之 在 參 以 伏 Ŧ

> 成卦。」 《易》也,將以 又非 占。」此之四事皆在六爻之後,何者? 尚 有 <u>궁</u> 鑿度》云: 因 畫之時未有「彖」、「繇」,不得有「尚其辭」。 曰仁與義,兼三材而 曰 之後、非三畫之時。 聖人作《易》,十八變成卦, 作也 望人 其 陰 卦 而 變, 與陽, 「四營而 矣。《 神農始 重 之道 既言聖人作《易》「兼三材而 之,始有變動,三畫不 以制器者尚其象,以卜筮者尚 則 「垂皇策者犧。」上《繫》 説 立 兀 重 成易 幽 順 地之道 卦》又云:「 焉 一卦矣。 贊 性命之理。 ,十有八變而 用 以言者尚其辭,以 蓍」謂 伏犧 兩之,故《易》六 曰 又上《繫》云: 柔 用蓍, 昔者 與剛,立 伏 明用 是以 犧 成卦。」 動,不 矣。 聖 立 蓍 即 論用 天 伏 在 兩之」, 「《易》 之道 得 動者 之 既 六 其 有 道 作 交 乾 已

[「]諸」,嘉本同,四庫本、阮本無「諸」字。

子,竟不及神農,明神農但有蓋取諸益 農,其爲功也,豈比《繫辭》而已哉 犧 諸 卦矣。 重卦矣。 《易緯》等數所歷 之《三墳》上是也。 重三成六,能事 結繩之政。」又曰 有 古結繩 書」,❶明三皇已有書也。 犠結 繩 而 爻之後,三畫不得有「尚其 以制器者尚其象」亦非三畫之時。 尚其變」。 夬。二 夬卦矣。 氏之王天下也,始畫八卦,造書契以代 自重爲六十四卦爲 加 既象夬卦 又《周 故今依王 治,後世聖人易之以 爲罔罟,則是制器,明伏犧 揲蓍布 故孔 禮》 畢矣。 而 三聖,但云伏犧、文王、孔 「伏犧、神農、皇帝之書 安國《書序》云:「古者 又八卦小成,爻象未備, 小史「掌三皇 造 爻方用之卜筮, 輔 書契、伏犧有書 嗣 若言重卦起 得其實。 台。 以 下《繫》云:「上 伏犧 書契,蓋 自 其 重 既 五. 蓍 然 畫 自 帝 |契則 今伏 何 中 己 起 伏 因 謂 之 神 取 閒 重

以明之。
德不如古,爻象不足以爲教,故作《繫辭》,尚質素,畫卦重爻足以垂法。後代澆訛,之意備在《説卦》,此不具叙。伏犧之時道

第三論三代《易》名

周普,无所不備。」鄭玄雖有此釋,更无 《歸藏》,周曰《周易》。」鄭玄又釋云:「『連 无用,今所不取。 據之文。先儒因此遂爲文質之義,皆煩 萬物莫不歸藏於其中,『周易』者,言易道 山」者,象山之出雲連連不絕;『歸藏』者 玄《易贊》及《易論》云:「夏曰《連山》,殷 春云:「《連 連 山》,二曰《歸藏》,三曰《周易》。」杜 案:《周禮》「太卜」、「三易」云: 「一曰 山》,伏犧; 案《世譜》等羣書: 《歸藏》,黄帝。」 所 子 鄭

● 「小史」云,嘉本、阮本同。據《周禮》,外史「掌三皇五

六

通。 餘代。 普徧之義。」雖欲无 儒更不别解。 先儒又兼取鄭説云:「既指周代之名,亦是 之文、《連山》、《歸藏》无以言也。 演六十四卦, 正 則《周易》稱「周」,取岐陽地名。 (周易》。]以此,文王安「周」字。 周易》,其猶《周 周 周」,别於殷。 在 藏 原 美里, 其《易》題「周」,因代以 膴 氏 連 故《易緯》云「因代以題周」,是也。● 膴」,是也。 Ш 周 氏 既 (1, 亦曰 著七、八、九、六之爻,謂之 德未興,猶是 唯皇甫謐云: 連山 以此,文王 書》、《周禮》,題「周」以 所遐棄,亦恐未 又文王 」、「歸藏」並是代 列 山 氏 殷 「文王在羑里 所演,故謂 稱「周」,是先 作《易》之時, 世 毛《詩》云 黄 其《繋辭 也,故 帝 可 盡 别 題 之 日

第四論卦辭爻辭誰作

其《周易・繋辭》凡有二説。一説所

以卦 明夷」,武王觀兵之後,箕子始被 文王爲王。 爲驗爻辭多是文王後事。 準驗此諸文,伏犧制卦、文王繫辭、孔子作 犧,卦道演德者文,成命者孔。』《通卦 《易》者其有憂患乎?」又曰:「《易》之興 又云:「蒼牙通靈昌之成,孔演命明道 與紂之事邪?」又《乾鑿度》云:「垂皇策者 有憂患乎」。鄭學之徒並依此 也,其當殷之末世、周之盛 辭》云:「《易》之興 云「文王囚而演《易》」,即是「作《易》者其 王用亨於岐山」。 一十翼」,《易》歷三聖,只謂此 王用亨於岐山」,武王剋殷之後,始追 辭 爻辭並是文王 若爻辭是文王所制,不應 又《明夷》六五 也 一所 一其於 作。 德邪 案《升》卦 中古 知 也。 説 ? 者 也。 囚奴, ··· 乎 「箕子之 當文 故 史遷 經。 二以 云 號 四 王

0

有。」其底本日本足利學校所藏寫本無此「周」字。「周」,阮本同。嘉本無此字,校勘記云:「周字不當

王不宜豫言「箕子之明夷」。 五「東鄰殺牛不如西鄰之禴祭」,說者皆云 西鄰謂文王,東鄰謂紂」。文王之時,紂 又《既 濟》 九

抗君之國,遂言東西相鄰而已。又《左傳》 尚南面,豈容自言己德受福勝殷? 又欲

之德。」周公被流言之謗,亦得爲憂患也。 韓宣子適魯,見《易象》,云:「吾乃知周公

以

驗此諸説,以爲卦辭文王,爻辭周公。馬 績等並同此 説,今依而用之。 所以

无主,故設 案《禮稽命徵》曰:「文王見禮壞樂崩、道孤 只言三聖不數周公者,以父統子業故也。 禮經三百、威儀三千。」其「三

明文王本有此意,周公述而成之,故繫之 百」、「三千」,即周公所制《周官》、《儀禮》。

文王

然則《易》之爻辭,蓋

亦是文王本

義

,故《易緯》但言「文王」也。

第 五論分上下二篇

位之正· 則上下二篇,文王所定,夫子作緯以釋其 者,所以明戒慎 者,男女之始、夫婦之道 終萬物、故以坎、離爲上篇之終也。 所以法陰也。 乾、坤者,陰陽之本始,萬 下篇之始而 日,坎爲月,日月之道,陰陽之經,所以 之祖宗,故爲上篇之始而尊之也。 象陰陽也。 也。 夫婦,所以奉承祖宗爲天地之主,故爲 象陽也。 案《乾鑿度》云:「孔子曰:陽三陰 也。」故《易》卦六十四,分爲上下而 夫陽道純而奇,故上篇三十所 陰道不純而偶,故下篇三十四 貴之也。 而 全 王道也。 既濟、未濟爲最終 也。 人道之興 以此言之, 咸、恒 離 四 始 必 物 爲

七

八

第六論夫子[十翼]

多家。 《彖》二,上《象》三,下《象》四,上《繫》五 則區 子所 亦依之。 九、《雜卦》十。 鄭學之徒並同此説,故今 下《繫》六,《文言》七,《説卦》八,《序卦》 故一家數「十翼」云:上《彖》一,下 域各别。 作,先儒更无異 其《彖》、《象》等「十翼」之 既文王《易經》,本分爲上、下二篇 《彖》、《象》釋卦亦當隨 論 但數「十翼」亦有 解,以 經而 爲 孔

第七論傳《易》之人

子 後 本受《易》於孔子,以 授 傳授 江 孔 東 子既作「十翼」,易道大明, 東馯臂子弓,子弓授燕周 不絶。 武 孫 虞子乘,子乘授 案《儒林傳》云: 授魯橋庇子庸,子 齊 醜 「商瞿子 田 自 子家, 何 子 瞿

> 嗣 此 田 臨 元 莊 融、荀爽、鄭玄、劉表、虞翻、陸續等及王 皆著《易傳》數篇。 同子中及雒陽周王孫、梁人丁寬、齊服生, 禁,故傳授者不絶。 也。 ,叔元傳京房,京房傳梁丘 前漢大略傳授之人也。 王孫,孫授施犨,犨授張禹,禹授 ,臨授御史大夫王駿。 及秦燔 《易》爲卜 同授 漢 興,田何授 其後丁寬又别授 菑 筮之書 其後漢 川 賀,賀授 楊 何,字叔 則 彭 東 獨 宣。」 有 武 得 馬 王 不

第八論誰加「經」字

前 經」,是孟 誰始。」案:前漢孟喜《易》本云「分上下二 有『經』字,『經』字是後人所加,不知起自 」字雖起於後,其 故《禮記 但《子夏傳》云: 喜之前 經解》云:「絜静精微 已題「經」字。 稱「經」之理則久 「雖分爲上下二篇,未 其 篇 在 於

外承乘之象,人《經》别釋,此未具論也。《書》、《禮》、《樂》並合稱經。 而《孝經緯》、《樂》並合稱經。 而《孝經緯》、一四爻,運機布度,其氣轉易,故稱「經」在。但《緯》文鄙僞,不可全信。其八卦方中四爻,運機布度,其氣轉易,故稱「經」理。案、《經解》之篇備論六藝,則《詩》、理。既在《經解》之篇,是《易》有稱「經」之也。」既在《經解》之篇,是《易》有稱「經」之

周易正義卷第一

計五千三百六十七字

九

周 易正義卷第二

開 國 子 國 子 酒 臣 孔 上 穎 護 軍 達 奉粉撰 曲阜縣

乾,元亨利貞。 Œ 義 日 「乾」者・ 此

皆陽畫成卦 此乾卦本以象天,天乃積諸陽氣而成天,故此卦六爻 卦之名。 教人、欲使人法天之用、不法天之體、故名「乾」不名 者,「天」者定體之名,「乾」者體用之稱,故《説 六畫,備萬物之形象,窮天下之能 萬物之象,於萬物變通之理猶有未盡,故更重之而有 云「八卦成列,象在其中矣」是也。 地、雷、風、水、火、山、澤之象,乃謂之卦也。故《繫辭 氣,未成萬物之象,未得成卦,必三畫以象三才,寫天、 物象以示於人,故謂之卦。」但二畫之體,雖象陰陽之 乾,健也」,言「天」之體以健爲用。 謂之卦者、《易緯》云: 也。 此既象天,何不謂之「天」而謂之「乾 「卦者,掛也。 事,故六畫成 但初有三畫,雖有 聖人作《易》,本以 言懸 战卦》云 卦 也 掛

萬物 之初。 之事會合萬物,令使 也; 之。 也。 行善道以長萬物,物得生存而爲「元」也。 四 有其利,又能使物堅固貞正得終。此卦自然令物 然能以陽氣始生萬物 是乾之「四德」也。 要。」韓康伯注云「不可立定準」是也。「元亨利 故名有隱顯,辭有踳駮,不可一例求之,不可一類取 事,不可包萬物之象,若限局一象,不可摠萬有之事。 象,乃以人事而爲卦名者,即家人、歸妹、謙、履之屬是 卦名者、即乾、坤之屬是也,如 者,若否、泰、剥、頤、鼎之屬是也,或以象之所用 之,則君也,父也。 以教人事。 物成務、云爲不已、「終日乾乾」無時懈倦 自然之理,故聖人當法此自然之象而 「天」也。 種使得其所,故謂之「四德」。 利,和也; 故《繫辭》云:「上下無常,剛柔相易,不 所以如此不同者,但物有萬象,人有萬事,若執 ·使物各得其理而爲「利」也。 但聖人名卦,體例不同,或則以物象而 天以 於物象言之、則純陽也、天也。 貞,正也。」言此卦之德有純陽之性,自 健爲用者,運行不息, 以其居尊,故在諸卦之首 開通 《子夏傳》云:「元,始也, 而得元始亨通,能 而爲「亨」也。 此之類多矣。 言聖人亦當法 又當以貞固 應化 施 使物性 又當以 人事, 所 無 又當 窮 於 Ü 爲 「貞」者 可 雖 和諧 以 此 爲 人 大 此 協和 取 卦 易 事 卦 而 天象 天 典 名 而 此 通 物 理 言 爲

德」,故曰「元亨利貞」。其委曲條例,備在《文言》。使物各得其正而爲「貞」也。是以聖人法乾而行此「四

然也。 以言「初」,不言「一」與「下」也。 勿用,陽在下也」,則是,初有「下」義。 言「下」。 位言「初」,第六位當言「終」,,第六位言「上」,第一 於雷澤:舜之時當堯之世,堯君在 唯隱居爲泗水亭長,是「勿用」也。 强,禍害斯及,故誠「勿用」。 之時,若其 云: 龍德,於此時唯宜潛藏,勿可施用,故言「勿用」。 「末」義。」故《大過・ 始盛,陽氣潛在地下,故言初九二 者,變化之物。 末」義。 初」,以其陽爻故稱「九」。 「以道未可行,故稱「勿用」以誡之。」於此小人道盛 比「潛龍」始起在建子之月,❶於義恐非 聖人作法、言於此潛龍之時、小人道盛、聖人雖 且第一言「初」者,欲明萬物積漸 六言「上」,則初當言「下」,故小《象》云「潛龍 所以文不同者,莊氏云「下言「初」則 九,潛龍勿用。 施 用, 言天之自然之氣起於建子之月,陰 則爲小人所害。 彖》云「棟橈,本末弱」,是上有 若漢高祖生於暴秦之世 「潛」者,隱伏之名,「 正義曰: 六言「上」者,欲見位 潛 諸儒皆以爲舜始漁 寡不敵衆,弱不勝 上,不得爲小人道 龍 互文相 居第一之位故 ,從无人有,所 一也,此自 也 通 位當 上 第一 張氏 然 龍 有 有 之 氣 稱

> 稱《周易》以變者爲占,故稱九、稱六。 元凱 九,老陰數六」者,以揲蓍之數,九遇揲則得老陽,六遇 老陰數六、老陰、老陽皆變、《周易》以變者爲占。 其數「九」,陰不得兼陽,故其數「六」,二者,老陽數九, 説有二:一者,乾體有三 先儒之説,理當然矣。 度》云:「垂皇策者犧。」據此諸文,皆是用蓍以求卦 莫大乎蓍龜,是故天生神物,聖人則之。」又《易乾 卦,發揮於剛柔而生爻。」《繋辭》云:「成天下之亹亹 贊於神明而生蓍,三天兩地而倚數,觀變於陰陽而 卦爲蓍之末。 定爻,累爻而成卦,因卦以生辭,則蓍爲爻卦之本,爻 也者,效此者也」,聖人畫爻以做効萬物之象。 必皆論聖人。 出、處託之。 居 云"後代聖人以「易」占事之時,先用蓍以求數,得數以 六爻之辭,但乾卦是陽生之世,故六爻所述,皆以聖 卦上,故不言「六」與「末」也。 注襄九年《傳》「遇艮之八」,及鄭康成注《易》,皆 其餘卦六爻,各因 今案:《説卦》云:「聖人之作《易》也,幽 他皆放此。 然陽爻稱「九」,陰爻稱「六」,其 畫,坤體有六畫,陽得兼陰,故 謂之「爻」者,《繫辭》云「爻 象明義 此 初 九之等,是 所以「老陽 · 隨 義而 故杜 一發,不 先儒 乾 之

● 「比」、嘉本、阮本作「此」。

萬象,所託多塗,義或然也 陰,不可復畫陰爻,故交其錢,避八而稱六。但《易》含 陽七數,故稱「九」也。 長。今有九之老陽,不可復畫爲陽,所以重錢,❶避少 陰,文而從變,故爲爻之别名。 氏以爲: 八爲少陰,質而不變,爲爻之本體。 則 得 老 陽數有七有九,陰數有八有六,但七爲少陽 陰。 其 少陽 稱 八爲陰數而 七 少 且七既爲陽爻,其畫 陰 稱 九爲老陽,六爲老 畫陰爻,今六爲老 八 義 亦準 此。 已 張

也。 之與二俱爲地道,二在一上,所以 成之説,皆以爲九二利見九五之大人,其義非 是「大人」,爲天下所 君位、君之德也」、是九二有人君之德、所以 云「九二德博而化」,又云「君德也」,王輔嗣注云「雖非 泗,利益天下,有人君之德,故稱「大人」。案:《文言 田之時,猶似聖人久潛稍出,雖非君位而有君德,故天 \mathbb{H} 可營爲有益之處,陽氣發在地上,故曰「在田 位,故曰「九二」。 衆庶利見九二之「大人」。 是自然之象,「利見大人」,以 九二,「見龍」至「大人」。 嗣又云「利見大人,唯二五焉」,是二之與 陽氣發見,故曰「見 「利見」也。 故先儒云: 若夫子教於洙 人事託之。 而褚氏、張氏 稱「田」。 正義曰: 龍 言龍 稱 見 田 也 同 「大人」 是 陽 五俱 見 龍 且 地 處 康 在 在 H

> 物,故 之德」者 非君位」者,二爲大夫,❸已居二位,是非君 下,其心一等,是「居中不偏」也。 普徧。「居中不偏」者,九二居在下卦之中,而 耕稼,利益及於萬物,盈滿有益於人,猶若聖人益 嗣之注,意唯取地上稱 於地上,❷所田食之處唯在地上,所以稱「田」也。 道,三、四爲人道,五、上爲天道。 二在一上,是九二處 但《易》含萬象,爲例非一。及其六位,則一、二爲地 與 「出潛」至「五焉」。 「君德也」,是九二有人君之德也。 先儒以爲重卦之時,重於上下兩體,故初與四相 故輔嗣注謂「九二」也。是「大人」非專九五。○注云 人」,又《蹇》卦「利見大人」,此「大人」之文施 大人」之文不專在九五 (五相 稱 應,三與上相應,是上下兩體論天地人各別。 ,以德施周普也。《文言》云「德博而化」,又云 「田」也。 「德施周 正義曰:「處於地上,故曰在田」者 「田」,諸儒更廣而稱之,言田之 與九二,故《訟 普」者,下小《象》文謂 不偏則周普 「初則不彰」者,謂 当人 位 云 也。 也。 「利 處廣矣 於上於 應,二 周 於 見大 「雖 君 而 輔

❶ 「錢」,阮校云:閩、監、毛本「錢」改「體」。下「故交其

❸ 「夫」,嘉本、阮本作「人」。

臨一 无别。 月尚 來。 但 此不殊。 但 氣僅存,何極之有? 之月,羣陰既盛,上九不得言「與時偕極」。 之月,爲陰氣始殺,不宜稱 見,則九三爲建辰之月,九四爲建午之月,九五 非唯二、五也。 已,故《訟 謂 或 潛隱不彰 有出者,即是陽氣發見之義。 氣漸生,似聖人漸出,宜據十一月之後,至建巳之月已 卦,❶故云「唯二、五焉」。 自 |陰陽二氣共 亢 (躍」者,謂進退懷疑也。 極。 此乾卦初九、九二只論居位一爻,无羣陰見象,故 卦既有羣陰見象於上,即須論 .有陰存,所以六律、六吕,陰陽相間,取象論 明當爻之理。② 此九二當據 何以復、臨二卦與此不同 乾之初九則與復卦不殊,乾之九二又與臨 顯 》卦、《蹇》卦並云「利見大人」。 所以施 利見大人,唯二、五焉」者,言 也。 成 諸儒以爲:九二當太蔟之月,陽 歲 建 「三則乾乾」者,危懼不 丑. 功,故陰興之時仍 爲此 諸儒此 、建寅之間、於時、地之萌牙、 ,與臨、復不同。 於别卦言之,非唯二、五 「上則過亢」,過謂 「飛龍在天」。 説 乾卦之象,其應然 於理稍乖。 者,但《易》論象,復 卦之象義,各自 有陽在、陽 安 上九爲 此 也。 此乾 於此 據 過 乾 爲 四四 義,與 甚,亢 處 生之 之 之陽 建 氣發 時 建 也。 廣, 初 卦 而 陽 戌 申 則

九三,「君子」至「无咎」。 正義曰:以陽居

不 若在天位,其尊自然安處,在上卦之下, 居其上體之下,故九四注云「居上體之下」,與此別 未可以寧其居」者,田 上,其尊未安,故云「未可以安其尊」也。 居四下,未入上體,但居上體之下,四則已入上 體之極」者,極,終也。 人事明其象。 也,厲,危也。 竟此日後至向夕之時,猶懷憂惕。 終竟此日,健健自强,勉力不有止息。 位故稱「君子」。 云「履重剛之險」。 云「履重剛之險」者,上下皆有陽爻,剛强好爲險難,故 「无咎者,善補過也」。 能 三位故稱「九三」,以居不得中故不稱「大人」,陽 極」也。 在田,故不得安其居。「純脩下道則居上之德 如此戒慎則无罪咎,如其不然則有咎,故《繫辭》云 又云「居上體之下」者,四、五與上是上體,三 言尋常憂懼,恒如 ○注「處下」至「之災」。 在憂危之地,故「終日乾乾」,言每 云「上不在天,未可以安其 是所居之處,又是中和之所,既 三是上卦之下,下體之極 此一爻,因陽居九三之位 傾危乃得无咎。 「若厲」者, 正義曰:「處下 「夕惕」者 「下不在田 雖在下卦之 (尊」者, 若, 體,但 一,故云 謂 而 廢 也 既 如 恒 得

^{● 「}此據」,嘉本同,阮本作「範模」。

❷ 「理」、嘉本同、阮本作「地」。

所居之處,實有危厲。 夕,恒懷惕懼猶如未夕之前,常若厲也。 之下,其禮終竟空曠。 謂空曠,言已純 壞,言其太卑柔 者,言若 脩居下卦之上道 又《文言》云「雖危无咎」,是實 「夕惕猶若厲也」者,言雖 ,以自驕矜,則 案: 此 卦 處 九 上 至 於 卦

今且依「如」解之。 有危也。 以「若」爲「如」,「如似」有厲,是實无厲也,理恐未盡 據其上下文勢,「若」字宜爲語 「因時而惕,不失其幾」者,「因時 辭,但諸 儒並

謂因可憂之時,故《文言》云「因時而惕」,又云「知至至

之,可與幾也」,是「因時而惕,不失其幾」也。 三處下卦之極,其 勞」者,「若厲」是 「故竭知力而後免於咎」者,王以九三與上九相並,●九 位猶卑,故竭 「雖危」、「終日乾乾」是「而勞」也。 知力而 免咎 「雖危而 也。

得

也; 猶 勝於上、卑勝於尊。 九在上卦之上,其位極 疑 《或也。 「躍」,跳躍也。 九四,或躍 躍在於淵,❷未即飛也。 在淵 言九四陽氣漸 尊,雖竭 、无咎。 知力不 進,似若龍 此 正義 自然之象,猶 · 免 E : 亢極。 「或」, 體 欲 言下 飛 若 疑

> 及也。 以 也。 者 下體之極」。 尊位, 道 退无常之時」者,《文言》云「上下无常」、「進退无恒」是 地,中又不當於人,上下皆无定住所處也。❸ 所 上,故九四云「中不在人」,異於九三也。云「而无 人」者、《易》之爲體,三與四爲人道,人近在下不近 上體是乾道革之時。云「上不在天,下不在田,中不 此 下體之極」者,離下體入上體 以 物所不與,故有咎也。 见别也。 謂 而居王位,但逼迫在下,羣衆未許,非己獨躍 事 不得安居,故遲 處」者,九四以陽居陰,上既不在於天,下復不 ·紂也。 「欲進其道,迫乎在下,非躍所及」者,謂欲 志欲 公欲 故「无咎」也。 云「乾道革之時」者,革,變也,九四去下體 静 静其居,居非 注九三云「處下體之極」,彼仍處九三,與 其居處,百姓 注「去下體」至「无咎也」。 疑 若其 猶 若周西 豫,未敢決斷 所 貪利 既未離 安,遲 但在下體之上,故云「去 務 伯 進,時未 内 疑 禍 執 猶 患, 其 王心、外率 豫,未 志 須 可 Œ 當 而 行 義 敢 「斯 苟 拯 日 而 所 進 進 救 決 行 能 己 誠 在 定 諸 也 志 一去 進 位 於 則

即

進

也。

云「无咎」者,以其遲疑進退,不即果敢以取

位

漸

尊

高、欲

進於王

位

猶

豫遲

疑,在於故

位,未

² 0 王」,阮校 云 閩、監、毛本「王」作「正

在於」,阮本作「於在」。

住」,嘉本、阮本作「位」。

錯謬者,若宋襄公與楚人戰而致敗亡是也。致敗亡,若疑惑以爲思慮,則不錯謬於果敢之事。其果謂果敢,若不思慮,苟欲求進,當錯謬於果敢之事而是進不在私也。「疑以爲慮,不謬於果」者,謬謂謬錯,「用心存公,進不在私」者,本爲救亂除患,不爲於己,

謂王位,以聖德之人能興王 拘在羑里,是大人道路未亨也。 聖人有龍德居在天位,則大人道路得亨通。 有聖德之人得居王位,乃能 瞻覩,故天下 猶若聖人有龍 九五陽氣盛至於天,故云「飛龍在天」。 此自然之象, 「亦宜乎」。 而无其位,是德不能以位 九五,飛龍在天,利見大人。 正義曰: 正義 利見此居王位之大人。〇注「不行」至 德飛騰 日: 「龍德在天則大人之路亨」,謂若 而 居天位,德備天下,爲 叙也。 叙其聖 位 也。「德以位叙」者,謂 「夫位以德興」者,位 一德。 若孔子雖有 猶若文王 萬物所 聖 言

굸 也。 在 似聖人有龍德上居天位,久而亢極,物極則反,故有悔 上而極盛,●故曰「亢龍」。 朝、是以有悔、未大凶 「悔吝者,言乎其小疵也。」故鄭引堯之末年,四凶 純陽雖極,❷未至大凶 上九,亢龍有悔。 也。 此自然之象,以人事言之, ,但有悔吝而 正義曰:上九亢陽之至天 凡「悔」之爲文、既是小 己。 《繋辭

> 之也。 有非大聖而 大聖之人本无此悔。 言》云「知進退存亡而不失其正者,其唯聖人乎」,是知 復、无祇悔」之類是也。 其「悔」雖亡,或是更取他文結之,若《復》卦初九「不遠 「悔亡」,言其悔 「有悔」,謂當有此 疵,不單 稱「悔」也 居者,不能不有驕亢,故聖人設法以 已亡也 上悔,則 一必以 但九五 但聖人至極,終始无虧,故《文 ,若《恒》卦九二「悔亡」是也 此經是 餘字配之。 天位,有大聖而居者,亦 也。 其「悔」若无,則言 其「悔」若在 一,則言

也。 爲天德也。 德」者,言六爻俱九,乃共成天德。 首,吉」也。○注:「九,天之德也。」正義曰:「九,天之 「羣龍」之義,以「无首」爲吉,故曰「用九,見羣龍,无 見羣龍」者,此一 若體「乾元」,聖人 用九、見羣龍、无首、吉。 句説「乾元」能用天德 能用天 德 則見「羣 非是一爻之九,則 正 義曰:「用 也。 龍」之義 九,天德 九

子所作《彖》解,統論一卦之義,或説其卦之德,或説其《彖》曰,「大哉」至「咸寧」。 正義曰:夫

- 「天上」,阮本作「大」。
- ② 「雖」,嘉本作「進」。

潛則 以 之。 統論一 生 時 乾能用天之德,使雲氣流 《彖》釋乾與元亨利貞之德。 德大明,曉乎萬物終始之道 始,六位時成」者,此二句摠結乾卦之德也。 布成形,各得亨通,无所壅蔽,是其「亨」也。 「雲行雨施、品 形之物,以其 者,以其至健而 者,釋其「乾元」稱「大」之義,以萬象之物皆 又以元大始生萬物,故曰「大哉乾元」。 元」而各得始生,不失其宜,所以稱「大」也。 「乃統天. 元德配乾釋之。 四德,意各不同。 「彖,斷 卦之義 乾」與「元」也。 而 御天」者,此二句 而 殺,應 成。 潛, 「大哉乾元,萬物資始,乃統天」者,此三句 卦之體 7,或 也,斷 可 若其不明終始之道 飛則飛 殺 説 而 其 至 物 定一卦之義,所以 ,明其所由之主。」案:褚氏、莊 生, 爲物始,以此乃能 「大哉乾元 卦之名, 健, 流 「乾」是卦名,「元」是乾德之首,故以 今案: ,是明達乎始終之道,故六爻之位 '申明「乾元乃統天」之義。 六位 形」者,此二句釋 能 摠統有形,是「乾元」之德 不 莊氏之説 故《略 行,雨澤施布,故品類之物 以 ,始則潛伏,終則 但 一者,陽氣昊大,乾體 應潛而 時 例》 諸儒所説此《彖》, 而 明爲「彖」也。」 於理 成 統領於天。 云: 也。 飛,應飛而 「亨」之德也。 彖 「萬物資始 稍密,依 「時 者 以乾之爲 「大明 氏 乘 飛 資取「乾 天是有 言乾之 並 何 潛,應 躍, 六 廣遠, 摠釋 而用 但 也 云 也 紁 言 依 流 可 此

君位 之,聖人亦當令萬物資始,統領於天位而「雲行雨 事 下,故前經云「无首 衆物之上,各置君長以領萬國 言聖人爲君,在衆物之上, 也。 是也。 道」。 然 陽剛暴,若无和順 合會大和之道,乃能 剛柔、遲速之别,「命」者人所禀受,若貴賤、夭壽 物卒化者,各能正定物之性命。「性」者天生之質,若 忽然而改謂之爲「化」。言乾之爲道,使物漸變者, 後來改前 元」、「資始」之義。 天」也。「乾道變化,各正性命」者,此二句 云「乃統天」也。 降謂之六龍 即六位之龍 爲 既 養萬物之道,此二句論聖人上 德,以 詳, 宣尊 「首出庶物,萬國咸寧」者,自上已來皆論 「保合大和,乃利貞」者,此二句釋「利貞」也。 言乾卦之德自然通物,故云「乾道 故此 依 高, ,以漸移改謂之「變」也。「化」謂一有一 時 也。 也 文「聖 乘駕 故 於 以所居上下言之謂之六位 上文以 此明乘駕六龍各分其事,故 則物不得利。 六爻之陽氣以 此 人以 ,吉」也。 道體无形,自然使物開 利 云「首 貞於萬物。 人事 「至健」、「元始」摠明 ,最尊高 出 但前文説「乾用 象 於); 故 乾 庶 控 又失其正,以 一於文略 法乾德,生養萬 萬國皆 於 言萬物 物」者 御 物。 於天 世。 也。 [得寧 得 也 以 、體,「六 更申 通,謂之爲 也,陽 天德 頭 利 云以 乾 也 首 乾 而 能 以 「變」謂 明「乾 德,故 之屬 氣升 施 須 出 貞 保 龍 物 无, 自 正 安 御

情也 也; 今據有識 天之情也。 也。 專,其動也直,是以大生焉。」韓康伯 時則正直不傾邪也。故上《繫辭》云:「夫乾,其静也 謂乾之爲體,其静住之時則專一不轉移也,其運動之 无累? 故云「豈非正性命之情者邪 不息,故云「而御大器」也。 「大器」謂天也,乘此潛龍 器」者,乘變化則乘潛龍、飛龍之屬是也,「而御大器」, 各憂性命。而天地 也者,物之累也。 任用羣賢以奉行聖化, 終始之道 布 象乾而立化」。○注「天也」至「者邪」。正義曰: 卦之義 散 「豈非正性命之情者邪」,以 恩 ,剛正也。」「不失大和」,則下文「保合大和」是 所禀生者謂之性,隨時念慮謂之情, 見其无累,則知「至健」也。 統用之者至極健哉? ,體例不同。 而言故稱日 使 使 不 天本无情,何情之有? 可 天地、四 兆 庶 凡有形之物以形爲累,是含生之屬 事 衆 雖復有形,常能永保无虧,爲物之 繁説。 物 「情」也。 時、貴賤、高下 莊氏以爲,凡有一十二 各 使物各正 飛龍而控御天體,所以 流 「静專動直,不失大和 」,謂物之性命各有情 莊 布其形。 氏 夫子爲《彖》之體 若非 云「《彖》者發 乾能正定物之性 性 而物之性命,各有 至健,何能 命。 各以 注云:「專,專一 「乘變化 又大明 此 時 无識 聖 而 體,今則 乎 首 而御大 一人所以 使 成。 无情 盛 則 運動 天形 夫形 非 命, 明 又

> 心不曉 具説 若一一比並,曲生節例,非聖人之本趣,恐牽者之徒 先或後,故上下參差,體例不同,或難具解,或易 亨,利涉大川」,非二之所能也。 義。 同 人・彖》云「同 大有」之例是也。 同人」、《大有・彖》云「柔得尊位大中而上下應之,曰 名結之者,則《同人・彖》云「柔得位得中而應乎乾,曰 之時義大矣哉」之類是也。 「同人日」,注又别釋。 美卦」者,則 至哉坤元」,以乾、坤德大,故先歎美之,乃後詳説 或有先疊文解義而後歎者,則《豫卦・彖》云「豫 日」。 也。 此等之屬爲文不同,唯同 此《乾· 人曰: 今皆略 或有特疊卦名而 彖》云「大哉 同 而不言,必有其 其餘諸卦之《彖》,或詳或略 人于野,亨」,注云「同 或有先釋卦名之義後以 是乾之所行,故特 乾 元」,《 稱其卦者 人之《彖》特 義,於卦下 坤 桂 人于 ,則《同 略 ; 或 解。 而 劵 稱 \exists 卦 其

之象。今夫子釋其卦之所象,故言「象曰」。天有純《象》,釋爲物之體,自然各有形象,聖人設卦以寫萬物大《象》也。「十翼」之中,第三翼摠象一卦,故謂之大《象》曰,「天行」至「不息」。正義曰:此

「牽」,嘉本、阮本作「學」。

八

兩體 也,坤 訓。 皆有衰怠,唯天運動,日過一 剛 者,「天與 震」也,「隨風,巽」也,「習坎,坎」也,「明兩作,離」也 或直舉上下二體者,若「雲雷,屯」也,「天地交,泰」也 體,又摠包六爻,不顯上體、下體,則乾、 凡六十四卦,说象不同:或摠舉象之所由,不論象之實 義,「思」在《彖》而 兼 健 天地不交,否」也,「雷電,噬嗑」也,「雷風,恒」也,「雷 ·作,解」也,「風雷,益」也,「雷電皆至,豐」也,「洊雷 表云「詳其名」也。 人」也,「上火下澤,睽」也 故 ,故云「天行健」。 Щ 》在《彖》後者,《彖 |是其訓,三者並見最爲詳悉,所以尊乾異於他 「行」者運動之稱,「健」者强壯之名,「乾 而 今大《象》不取 取 -則云「地勢坤」。 有 結義 艮 而 兩 健 水違 俱言也。 也,「 體 用 也。 相合, 行, 麗 今 取 訟 不 澤, 兑」也。 畫 或 雖上下二體 兩體俱成 餘 「健」是乾之訓 在《象》,有 取兩體 也,「上天下澤,履」也 > 詳 純 然則「天」是體名,「乾」是用 健爲釋,偏説「天」者,萬物壯 此不言「天行乾」而言「健 陽 而《象 之卦 上下 ,或有直舉兩體 度,蓋運轉混没,未曾休 凡 凡此四 一,共成 》略 以 由 此一 相 比 而 也。 也。「順 承 擬 然 一卦。 十四四 卦,或取兩 而 次之,故 也。 是以「過半」之 坤二卦 爲 卦 卦 」是衆健 「天行 」者坤之訓 或直指 上 也,故 謂 皆摠 下相 與火 是也 之 體 土 名 象 兩 健

雨

違

也。 上,觀 與 中 Ш 遯」也,「山 有 下象,義取下象以 上象,亦意取上象共下象而成卦 有 鼎」也,「山上有木,漸」也,「澤上有雷,歸妹」也,「山 也,「山上有火,旅」也,「木上有水,井」也,「木上有 卦名也。 凡此十五卦,皆先舉上象而 上,涣」也,「水在火上,既濟」也,「火在水上,未濟 人」也,「澤上於天,夬」也,「澤上於地 在天上,大壯」也,「明出地上,晉」也,「風自 也,「火在天上,大有」也,「雷 體 天下雷行, 山上有雷,小過」也。凡此十二卦,皆先舉下 地上有水,比」也,「澤上有地,臨」也,「山上有澤,咸 八澤則 有火,革」也。 水,師」也,「山下有風,蠱」也,「山 水,蹇」也,「澤上有水,節」也,「澤上 而 謙 其 爲 也,「山 也, 稱 上 文者,若「 體是天,天與 亦 「中」也。 下有澤,損」也,「天下有風 澤中 无妄」也,「山下有雷 有雖意在上象而先舉下 附 ·有雷,隨 凡此十 於地、剥」也,「 雲 成卦 或 上 一於天 有 山 義者、「山下出泉、蒙」也、「 三卦 雖 則 」也,「地中生木,升」 需 稱 先舉下象, 連於下,亦意取上 出地 皆 下」也; 澤滅木,大過 也, 也。 先舉上 奮, 頤 風 或先舉上 ,姤」也,「地中有 象以 也,「天下 下有火, 賁_ 豫」也,「風 若上 有風,中孚」也 稱 行 體 在 天上, 出 體是 後 上象之下 」,「風 上象 也 火 也、「澤 明 一象以 象而 象以 、出,家 地,地 小 下 行 行 火, 也 者 也 Ш 畜 中 # 出 立 地

后以

育萬物」、《涣

王以

省

方觀民設

建萬國」、《豫》卦稱 也,所以諸卦並稱「君子」。 也,位卑者象卦之義少也,但須量力而 地者。凡言「君子」,義皆然也。 者,謂君臨上位,子愛下民,通天子諸侯兼公卿大夫有 君子之人用此卦象,自彊勉力不有止息。 然之象。「君子以自彊不息」,此以人事法天所行,言 假而爲義,故謂之「假 者,若「天在山中」,「風自火出」,如此之類,實无此象, 等象辭,或有實象,或有假象。 而言之,其間委曲各於卦下别更詳之。先儒所 地中,明夷」也,「澤无水,困」也。 人,摠謂之「象」也。 「天行健」者,謂天體之行晝 復》卦稱「先王以至日閉關」、《无妄》稱「先王以 ·兼包在下者,則言「先王」也。 一象之下,亦義取下象以立卦 |也,「地中生木,升」也,皆非虚,故言「實」也。 [而復始无時虧退,故云「天行健」。 財成天地之道」、《姤》卦 對 教」、《噬 復」也,「天在山 稱 「先王以作樂崇德」、《觀》卦稱「先 也。 先王以享於帝 嗑》稱「先 若卦體之義唯施於天子, 雖有實象、假象,皆以義 也。 實象者,若「地上 稱「后以 但位尊者象卦之義 若《比 是先舉下象 中,大畜」也,「 所論之例者皆大判 王以 立廟」、《泰》卦稱 学 施 行,各法 明罰 此謂 命誥 稱「先王 言「君子」 勑 天之自 四 而 궁: 有水, 其其 茂對 方。 夜 假象 法 稱 明 以 多 不 示 此 在 人 陽氣也。 也。 道。 皆有自然之象,舉初以見末。 爻象辭,第 上九而致亢極,有悔恨也,故云「盈不可久」也。 不可久」者,此亦人事言之。 辭》皆上下爲韻,則姚信之義,其讀非也。「亢龍有 姚信、陸績之屬皆以 聖人之在王位。 「飛龍在天,大人造」者,此亦人事言之。 進則跳躍在上,退在潛處在淵,猶聖人疑或而在於貴位 是覆能合道也。 合道也。「覆」謂從上倒覆而下,居上卦之下能不憂懼 事言之,「君子終日乾乾」,自彊不息,故反之與覆皆合其 若比九五,則猶狹也。「終日乾乾,反復道. 在世,道德恩施能普徧也。 田 在下也」。 釋六爻之象辭,謂之小《象》。 稱「后」兼 不可久」。 , 德施普」者, 此以人事言之, 用龍德在田, 似聖人已出 心所欲 「反」謂進反在上也,處下卦之上能不驕逸,是反能 此一爻之象,專明天之自然之氣也。 諸侯 經言「龍」而《象》言「陽」者,明經之稱「龍 一爻言「陽在下」,是舉自然之象,明其餘 進,意 「造」,爲也,唯大人能爲之而成就也 「或躍在

息,周

比

者,若「雷

在地中,

正義曰: 也,自外卦 自此以下至「盈不可久」,是夫子 並稱「君子」。 潛 龍 至

以初九陽潛地中,故云

見

龍

在

」,

五爻並

論人事,

則

初

淵,進无咎」者,此亦人事言之。

比初九「勿用」,是其周

也

」者,此

亦以

在於公,非是爲私,故

進

无咎」

也

「飛龍在天」,猶

「造」爲「造至」之「造」。今案:《象

九五是盈也,盈而不已

則

但

此

六 至

五

爻 爻

=

已下 四節; 亨 乎」,此 德」之義,爲第五節; 勿用,陽氣潛藏」至「乃見天則」,論六爻自然之氣,爲 用」下至「天下治也」,論六爻之人事,爲第三節,自 用 飾 以爲《文言》。」今謂夫子但贊明易道,申 釋之。莊氏云:「「文」謂文飾,以乾、坤德大,故特文飾 諸 者,是夫子第七翼也。 利貞」,明乾之「四德」,爲第一節,從「初九」曰 華彩,當謂飾二卦之經文,❶故稱《文言》。 卦及爻皆從乾、 至「動 此第 論乾之「四 自「乾元者」至「天下平也」,此一節復説乾元之「四 一節更 「《文言》曰」至 而有悔」,明六爻之義,爲第二節, 節 論乾之「四德」也。 (廣明六爻之義,爲第六節。 德」。 坤而出,義理深奥,故特作《文言 自「君子以成德爲行」至「其 但乾之爲體是天之用。 以「乾、坤,其易之門户邪」,其餘 「利 貞」。 「元者,善之長也 正義曰:《文言 説義 今各依 白一潛 從此至「元 理,非是文 凡天地 潛龍 唯 潛 文解 聖 龍 運 人 龍 開 勿 勿

> 於人也。 行此「四德」,言君子之人體包仁道,汎愛施生,足以 言也。「君子體仁足以 之氣唯少土也、土則分王四季、四氣之行非土不載、 「貞」爲事幹、於時配冬、冬既收藏、事皆幹了也。 則夏也,「利」爲 也;「亨」是通暢萬物,於是配夏,②故下云「合禮」、「禮 是物始,於時配春,春爲發生,故下云「體仁」,「仁」 濟。」莊氏之意,以 事之幹」者、言天能以中正之氣成就萬物 和」者,言天能利益庶物,使物各得其宜而 暢萬物,使物嘉美之會聚,故云「嘉之會」也,「利者義 以設教也。 德」,垂教於下,使後代聖人法天之所爲,故立天 化,自 [元者善之長]也,[亨者嘉之會]者,嘉,美也,言天能 性生養萬物,善之大者莫善施生,元爲施生之宗,故 之名也? 豈 造 「元亨利貞」之德也? 然 而 「仁」則善也,謂行仁德,法天之「元」德也。 但聖人以人事託之,謂此自然之功爲天之「四 爾, 莊氏云:「第 因 和 此四 无 義,於時配秋,秋既物成,各合其 而 生有 [句明 長人」者,自此已下,明人法天之 一節「元者善之長」者,謂天之體 也, 无爲 天之德也。 天本无名,豈 而 自 耐 爲。 和 造 配四 同也"「貞者 使物皆 「元亨利 天本 時: 於五 「四德 充 宜 則春 元 得 貞 心 通 言

^{● 「}飾」、嘉本、四庫本、阮本作「釋」。

❷ 「是」,嘉本同,阮本作「時」。

爲道 知也 萬物, 類 更无所言,欲見乾之「四德」无所不包。 有「四德」。 會、二象相成皆能有德,非獨乾之一卦,是以諸卦之中 盡其極也,「君子」行此「四德」各量力而爲,多少各 子」,使諸侯、公卿之等悉皆行之。但聖人行此「四德」能 《易》,稱「元亨利貞」之德,欲 皆幹濟,此 禮,謂法天之「亨」也。 會足以合禮」者,言君子能使萬物嘉美集會,足以 德」則與天同功,非聖人不可。 元亨利貞二,以君子之人當行此四種之德。 行此四事並須資於知,且 也,「亨」則禮也,「利」 「貞固足以幹事」者,言君子能堅固貞正,令物得成,使 得 孚,元亨利貞,悔亡」也 是 則更有餘事,以「四德」 也。 但乾卦象天,故以 「悔亡」也。 廣爲垂法,若限局聖人,恐 一,故略「 使 物 亦有「四德」之上即 法天之「貞」也。 但 各得其 知」不言也。❷ 一餘卦 有 宜,足以 四四 「四德」 則義也,「貞」則信也。 [德 「利物足以 此「四德」皆爲天德。 狹劣,故以餘事繫之,即 《乾鑿度》云「水土二行兼信與 者 由 有劣於乾, 「君子行此四德者,故曰 和 施於五事言之,❶「元」則 即 「乃孚」之後有「元亨利貞」・ 論餘事,若《革》卦 使君子法之。 唯云「君子」者,但「易」之 合於義,法天之「利 乾、坤、屯、 不逮餘下,故摠云「君 和義」者,言君子利 故乾卦 其餘卦「四德」之 臨、隨、无妄 是以文王作 直云「四 但行此 不論智者 但陰陽 云一巳日 坤 配 有其 乾 合於 也 四四

> 吉, 也。 也。 而言「德」者則不數之也。若《需》卦云「需,有孚,光亨貞 者、皆於經文挺然特明「德」者乃言之也,其 亨 過、震、豐、 有「一德」者,若蒙、師、小畜、履、 言之,或在事後言之,由後有事乃致 蠱、漸、大畜、升、困、中孚,凡七卦。 貞」者,以有餘事乃得「利貞」故也。 貞」乃得「亨」也。 或摠稱「三德」於上,更别陳餘事於下,若離、咸之屬 咸、萃、兑、涣、小過,凡六卦。 故 革 「亨,小利貞」,雖有三德亦不數也。 ·履虎尾,不咥人,亨」,由有事乃得「亨」。以前 有「四德」乃可也。 七卦是也。 也。 雖有「亨、貞」二德,連事起文,故不數也。 就「三德」之中,上下不一,離則云「利貞亨」,由 「四德」具者,其卦未必善也。 或多在事上言之,或在事後 節、既濟、未濟,凡十五卦, 亦有 亦有先云「亨」,更陳餘 其 故隨卦有「元亨利貞,乃得无咎」是 卦 非 善 而 就「三德」之中,爲文不 有 泰、謙、噬嗑、賁、復、大 四四 亦有「三德」者 此「二德」故也。 此「二德」或在事 有「二德」者,大 《旅》卦云「旅,小 德 者, 皆 」者,以 事乃始云「利 3《履》卦 有因 德 所論 《遯》卦 心也,並 其 事 桂 相 德 利 凶 亦 上 是 連 是 云

[「]五」,嘉本同,阮本作「王」。

[「]知」,嘉本同,阮本作「而」。

[「]者」,嘉本同,阮本作「言」。

唯配 亨,旅 事,故《比》卦 之屬是也。 妹,凡十一 時曲變,不可爲典要故也。 卦下詳之。 亦有全无德者,若豫、觀、 亦有卦善而德少者,若泰與謙、 言之,故亦不數。 心,亨」、《損》卦云「无咎可貞」,此等雖有一德,皆連 不數之。 利君子貞」,雖有「貞」字,亦連他文言之,又非本卦德,亦 利建侯」、「利見大人」、「利君子貞」。 (比)卦 利」亦非獨利「貞」,亦所利餘事多矣,若「利涉 元」之與「利」, 利」是利益 利」配「貞 「亨」、「貞」,俱爲「四德」。 「元」 雖配「亨」,亦配他 貞 云「原筮,元永貞,无咎」、《否》卦云「否之匪 吉 《同人》云「同人于野,亨」、《坎》卦云「有孚 卦也。 」**,** 雖 凡「四德」者、「亨」之與「貞」,其德特行,若 亦有卦善而无德者,晉、解之屬是也。 也,①合和也。 云「元永貞」、《坤》六五 雖 配 則 有 大略唯有凶 所以然者,但易含萬象,事義非 他事爲文,「元」是 配 亨、 連他事。 剥、晉、蹇、解、夬、姤 貞」二 以當分言之,各是其 其有意義,各於卦下詳之。 卦无德者,若剥、蹇、夬、姤 復之類,雖善,唯 德, 其意以 亦 元大也,始首也 如此之屬,是 「黄裳元吉」是也 連 「元」配「亨」,以 他 事 井、艮、歸 不 一德也。 一德也。 大川」、 各於 一, 數 「利 事 也 而 維

> 皆於爻下言之,其利則諸 爻皆有。

謂

日

己則行之,心以爲憂己則違之。 其義 起「无悶」之文。 陋,不見是而无悶」,此因見世俗行惡,是亦无悶 成就於令名使人知也。 德隱居者也。「不易乎世」者,不移易其心在於世 雖逢險難,不易本志也。 德而隱者也」,此夫子以 雖逐物推移,潛隱避 拔,此是「潛龍」之義也。 逢无道,心无所悶。 ,雖不見善而心亦无悶。 也 也 者,九二 此 ,假設問辭,故言「潛龍勿用何謂也」。 」者,此夫子疊經 初 第二節釋初九爻辭 九日 正 居中不偏,然不如九五居尊得 義曰: 「潛龍勿用」至「潛 「樂則行之,憂則違之」者,心以爲樂 此釋九二爻辭。 初九爻辭,故言 世,❷心志守道,確乎堅實 「不見是而无悶」者,言舉 人事釋「潛龍」之義 「遯世无悶」者,謂逃 「不成乎名」者,言自隱默,不 也。 九二 上云「遯世 「初九日『潛 「確乎其不可 曰「見龍 子曰 「初九 龍 无悶」,心 也。 龍 子曰 位 日 ,聖人有 龍 勿 」至「君 故 遯 拔」者 德 用 避 故 但 其不 處 世 方釋 而 正 世 俗 云 再 僻 皆 龍 龍 何 義

非 雖

少,故「黄裳元吉」及「何天之衢,亨,小貞吉,大貞凶

字所施處廣,故諸

に非

唯

1 性下

有之,亦於爻下言之。

但爻下其事

稍

卦謂他事之「利」,不數以

爲德也

德

身

可

⁰ 0 潛隱」,阮本作「隱潛」。 利 益 嘉 本作「益 利」。

³²

功業宜云「居

也。

其間

有

「脩辭

其誠

實,内

外

相

成

則

「進德」,下復云「進

一解」謂

文教、「誠

一謂

其德日進,是「進

德

「進德」之事。

業,故「終日乾乾」,匪 也,「脩業」則「知終」,存義也。 「見龍在田」」,未是君位,但云「君德」也。 ,利見大人」,君德」者,以其異於諸爻,故特稱 「子曰:君子進德脩業」者,「德」 雖危无咎矣」。 」者,言防閑邪惡,當自存其誠實 廣博而變化於世俗。 也」。 ,從始至末,常言之信實,常行之謹 推忠於人,以信待物, 「終日乾乾」者,欲進益道德,脩營 行以化於俗 「知至至之,可與幾」者,九三處一 」之文,故避其脩文而 也。 善 有 德」; 誠實也。 「庸 漸化之是也。 懈也。 於世 功業可 「修辭 言之信, 上云「脩業」,下變云「居業 而 「進德」 外則脩 也。 不 居、故云「居業」 立其誠 「忠信所以 自 正 庸 義曰: 「《易》曰:「見龍 伐 若舜漁於雷 行 初爻則全 則 理 其 人則 謂 ,所以居業」者, 之謹」者,「 知 功。 文教,内則立 云「居業」,且 德行,「業」謂 進德」者,復 此釋九三爻 親 至 「德 九三日 也 而尊之, 也。上 」,將進 隱 澤, 《易 遯 博 庸 慎 功 在 陶 澼 而 咎 時。 上 其意不同。 位 上 極。」褚氏云:「一體之極 時 務 理 不 體 知終」也。 知終終之,可與存義」者,居一 注 幾欲進,故不可憂也。 既能知其自全,故可存義。 可與 犯 云「知夫至至,故 之極,方 者,九三以此之故,恒 處一 X 咎,是 共論幾事。 至上卦之下,是「至」也。 既 「知 能

辭也。 功業。

九三所以

君子」至「

田

於河濱,以器不窳,民

世,二爻則

漸見德

化

」者,言德能

閑邪存其誠

而不伐」者,謂

爲

也

知 而

龍

德

而

正

中 者

中

庸

常也

退,兩意並行。「是故居上位而不驕」者,謂居下體 是『至』也」者,莊氏云:「極即至也,三在下卦之上是至 而不憂」者,處上卦之下故稱「下位」,以其知事將 之欲進「知幾」也,或使之欲退「存義」也。 義。「義」者,宜也,保全其位不有失喪,於事 卦之下、「至」謂至上卦也。」下云「在下位而不憂」、 而心懷惕懼,雖危不寧,以其知終、知至,故「无 位而不驕也,以其「知終」,故不敢 ,明知在上卦之下,欲至上卦,故 此九三既知時節將至,知理欲到,可 體」至「知終者乎」。 以九三處進退之時,若可進則進,可 至」也。 知 此 不憂」,此以 「幾」者 終竟是 「故乾乾因其 是「至」者,是下卦已極,將 乾 既 ,去无人有,有 乾 能 終盡之時,可 然九三唯是一爻,或 也。 體之盡 知是將 正 人事言之。 義 因其 懷驕 「不憂」,是知將 曰:「處一 既 時 至, 而全其終竟,是 居 八已終、 而惕 慢。 與共營幾 理 則 上 與 得 進一 而 是 卦 「在下位 ,雖危 體之極 保 已 宜。 未形之 之下 識 至之 退 幾 退

至

> 則 使

其

至

无

前,「知 之咎 者,謂 文便 務,既 之體 也 極 事 也 能 鮮 成 分 若利」者,「利」則隨 可 卦 而 上 知夫至至,故不憂」者,解 至 之極 守 爲 卦。 克有終」者,見利則行,不顧 之物,不妄興 而 許之事,不謂 利 文,莊 也。 成 動,不妄求 何 而言之也。 ,則是知事之將 正 懈 識 三近上 大失時 若 終」在後, 動故也。 其 義 事之先幾, 怠 可 若失時 懈 業,是 莊 日 説 則 至 怠 氏 曠 卦 則 非 也 驕 之説 「明 事. 進。 此 廢 也。 動 「鮮 「存物之終者 者 0 逸 不 此經 人共彼 注「處· 之將 幾 可 者, 夫終敝, 則 進 故 何須 故 既 至。 克 直 處 而 與 先 則 功 進 處 謂 有 利 發, 云 至 以 事 與 業 解 事 幾 物速 「 故 事」至「无 相 終」。 不 一,能 下 之至 成 空 知至 幾 見「利」 務 知 極 在 故不驕」者 與 及 卦 其 可 疾,義 也 曠 也。 廢 在後,是「靡不有初」,不 以 下 義 終」,後 上 極 事 與 利不及 而 0 闕 禮 掛 也。 也。 所 則 極 務。 成 「進 注 則 不 知 咎 之上 以 是 終 所 不如利 是 務 犯 屈 _ 行 「明夫」至 知, 乾 解 「與」猶 物之速者 至 也 以 前 咎」, 義」者,保全 也。 」者,「務 解知 而 故靡不有 體,是 極 正義 「乾 知 乾」也。 當 經「知至」在 不 至 是「知 儻 「義」者 保守 由 觸 至」者,隨 乾 許 曰: 終」也 者 處 犯 「不憂 无 義」静 義 也 Ė 須 事 謂 據 上 上 初 至 终 進 之 處 己 依 不 卦 卦 +

覩以 感衆物,衆物 九四 子 者 非 退 也。 形 此 角 物感應 應」已下至「各從其 退者仍退在淵,是「脩業」之謂 業」則欲下、欲退 衆 非 云「及時 曰 時 其 動 苟 進 象 而行,和光俯仰 離羣」者,何氏云: ,是无常也。 則 據爻也。」所 一於前, 子曰: 者 結 德脩業欲 欲離羣也。」何氏又云: 是 類也」。 相 或 廢 之也。 也。 故 聲 感 躍 二,但 解 氣 廣 進多於九三,故云「欲及時」也。 水 知 至「故 相 同 應之, 上下无 陳 「可與言幾」而 流 至」也 及時」者,「進德 感 同聲 衆物 謂 正 意在 氣 於 也。 也。 並同於衆,非是卓絶 非 相 義 地 所 類」也。 常, 无 求」者 相 相 曰 「所以 於公,非是爲 進 先 「水 以 離 咎 感 : 懈 應」者, 非 者棄位 就 羣」者,言雖進 **應**,以 此 利 怠 流 爲邪 濕處,火焚其 ,若天欲 己。 明 則 「飛龍在天」者,言天 濕, 「言上下者, 進 見 九 也。 曠 大人」。 若 IE. 欲 則 退 者, 明聖人之作而 火 五爻之義。 九 彈 義 躍, 解 无恒」者,時 其意與 邪 就 欲 宫 日 雨 五 上 知 是 也。 燥 上 獨離 而 而 退 因 而 日 進 終 據 此 薪 者, 宫 无恒 柱 欲 欲 一進 「大人」 九 德 明 位 應, 先 礎潤 羣 躍 飛 也 進 九三 此 同 三同。 之謂 九 也; 退 就 下 也。 使 龍 也; 彈 萬 四 燥 是 之然 无 者以 九 與 能 聲 則 依 進 角 物 也 而 爻 「脩 處 恒 也 至 几 瞻 衆 廣 相 不 但 君 羣 退 辭 而 欲

ДЦ

之屬; 類因 數事 乎天者親上,本乎地者親下」者,在上雖陳感應,唯明 之也。 性 各從其類」者,言天地之間共相感應,各從其氣類。 亦運動,是親附於上也。 伯》有「天産」、「地産」、《大司徒》云「動物」、「植 感於天氣偏多者,有感於地氣偏多者,故《周禮 聖人有生養之德,萬物有生養之情,故相感應也。「本 此同 石 本受氣於天者是動物,含靈之屬; 云:「天地絪緼,和合二氣,共生萬物。」然萬物之體,有 之名,本明於此,是有識感有識也。 此 以次言之,漸就有識而言也。「聖人作,而萬物覩」者: 風生,是「風從虎」也。 之獸,「風」是震動之氣,此亦是同 飛龍在天」也,「萬物覩」則 引 二句正釋「飛龍 聖 而已,此 氣水火皆无 ... 地體凝滯,植物 「龍」吟 「雲從 人感 之器,非 琥 珀拾芥, 萬物以 則景 則 龍 廣 ,風 唯同 識 在天,利見大人」之義。「聖人作」則 雲 解 同 從 而 蠶 出 天 類 類, 亦不移動,是親附於下也。 虎 相 吐 此二句明有識之物感 相 地之間共相感應之義。 , 是 感,先明自 絲 本受氣於地者是植物, 一者,「龍 感,亦 故以 「雲從 而 「利見大人」也。 商 同 有 弦 龍 天體運動,含靈之物 類相感,故虎嘯則 類言之。 」是水畜,「雲」是 異 絶 然之物, 也。 類相 此亦同類相 銅 「虎」是 Ш !感者。 其造化之 陳上 崩 故 无 發 而 識,故 大宗 莊 无識 物。 一數事 洛 威 若磁 「則 初 感。 此 氏 言

> 非唯近 也。 不論 也。 子曰 云 德」之事。 者,故自發問而釋之,以乾體當分无功,唯統 德」之主、《文言》之首,應先説「乾」。 然 應 在下位而无輔」者,賢人雖在下位,●不爲之輔助也 非片言可悉。 爲漢高之應,漢時黄星,後爲曹公之兆。 ○注「處上」至「其義」。 E 君子以自强不息」、「行此四德 是以動而有悔」者,聖人設誠,居此之時不可動 也。 其類 乾,元亨利貞」。 「亢龍」至「有 君子以自强不息行此四者」,注意以「乾」爲 「乾」也。 「高而无民」者,六爻皆无陰,是「无民」也。 「貴而无位」者,以上九非 事則 感者動也 煩多 行此「四德」乃是「乾」之功,故《文言》先 相感,亦有遠事遥 美難 但能 今意在釋理,故略舉大綱而已。 應者報 悔 四德 言 0 正義曰:「夫乾者,統行四事者 也。 既 也,皆先者爲感,後者爲 正義 皆冥理 備,「乾」功自成,故下 「位」而上九居之是无位 相感者: 者」。 E: 自 此明上九爻辭也 故先言之,發 而先説 若周時 然,不知其所以 感應之事廣 行 门四德 獲麟,乃 「賢人 此 作 四四 應 也 九 四四 首 説

「潛龍勿用」至「天下治也」。正義曰:

● 「下」下,阮本有「而當」二字。

之也。 能也 上位 字不可獨言,故舉「元」德以配 者、《易》經上稱 災,災則悔 不定,故云「自試 近五 龍勿 直,更无餘 至」、「知終」之事 田」,是時之通 云「乃見天則」,此一 人不知其惡,識之爲難。 見龍 放遠善柔 九」德而天下治。 此 理 注 明之」者,下云「陽氣潛 而治理 用,下 位,不敢果決 ,未之能也」。 者, 「此一章」至「可知也」。 「乾元」摠 「夫能 在 節 田 是《文言》 以「乾 陰。 一謂 也, , 時 也」者, 也。 全用 舍也。 放棄善柔之人,善能柔諂,貌恭心 非 舍」者,「舍」謂 包 柔善之人,堯尚病之,故 「用九」,「用九」之文摠是乾德,又「乾 元 「亢龍 也。 也。 爲大禍災也。 第 六爻,觀 用 剛 而 九五止是一爻,觀見事狹,但云「上 「夫識物之動 言 直 章但云「天下治」,是皆 進、唯 九 「或躍 「終日 聖 「飛龍 節 |有悔,窮之災」者,言位窮而 一人於此 放 此「用 藏」,又云「乃位乎天德」,又 説 六爻皆陽,是「全用 遠 見事闊,故 漸漸自試,意欲前進,遲 乾乾, 在 正義曰: 六 在天,上治」者,言聖 善柔,非天下至 「乾」也。 淵,自試」者,言聖 通 潛 爻 九 「乾元用九、天下 舍,九二以「見 行事」者 人 三純 龍 則其所以 事 心之時, 陽 「此一章全以 云「天下 所 言此 云非 者,是 治之義。 言 在卑下 然之 以 「乾元」用 理, 行 剛 治」也。 全用 天下之 人 恨 此 理 直, 事 未之 人居 龍 人 治 , 使 知 也 岡 説 疑 逼 皆 致 在 潛

> 九二 舍 潛, 者明。❶ 「仲尼旅人,則國 爲 於人,則知國 主 位 輔 謂 物 可 一河知 爲時 嗣以 德,不爲妄者」,言龍 之動」,謂龍 知 識龍之所以潛、 可見則見,是不虚妄也。 者,經唯云「時舍也」,注云「必以 一既見而 者 矣」。 通 」者,爻居其位 此 在田,是時之通舍之義也。 解「舍」,「舍」是 欲 君无 「主」則 之動 明 司 在 所 道,令其羈旅 知 也。 下 以 時 矣」,「國 龍 ,猶若人遇其時,故「文王明 靈異於他獸,不 見,然此之理皆可 也,謂 則 潛、 其所以然之理皆可 見 通 「見而 之義。 當 義 亦 出 時 也。 時 外。 在 无 也 時之通舍」者 故 初九潛 田 妄舉 道,故 ,若見 「以爻爲人,以 一、必以 引文王、 張 知 氏 動,可 也。」「 仲 明 云: 藏不見 時 知」者 尼 傷 仲 羈 夷則 之通 龍 「識 潛 也 則 尼 旅 則 之

者,陽 「與 不 節 行 息 是《文言 也。 時偕行」者 終 氣在 潛龍 日 偕」, 田 》第四 自 一,始 勿用」 戒 此 俱 者 也。 節 生 以 同 天道 萬 明六爻天氣之義。 至「見 諸 物, 於 儒 天 釋 故天 以 時 爻象也,所以九三「乾乾 天 爲,建辰之月,萬物生 ·, 生 下有 則 物 __ 不 文 息,言 章 正 一天 而 義 下 曰 「與 光 明 文 時 此 明 也

❶ 「明」下,嘉本、四庫本、阮本有「龍潛龍見之義」六字。

然,故云「乃見天則 之位,言 不有 物不息 月,三陽用事,三當生物之初,生物不息 人上體,故云「乃革」也。 「乃位乎天德」者,位當天德 ·乃見天則」者,陽是剛亢之物,能用此 止 ,故言「與時 息,與天時 九 五. 陽居於天,照臨 而 偕行」也。 俱行。 若以「不息」言之是 「乾道乃革」者,去下 廣大,故 純剛,唯天乃 云「天德」也 ,同於天時 建 寅 生 之

貞」,及「利建侯」、「利涉大川」,皆言所利之事。 美善之道 亨」既連始,「貞」又連利,舉始舉利則通包「亨」、「貞 説始而亨、利、貞之義。 情也」者,所以能 之,欲見乾、元相將之義也。以有「乾」之「元」德,故. 爲物之始而亨通 是第 元也。 始而亨者也」,以「乾」非自當分有德,以 乾始,能 「不言所利,大矣哉」者,若《坤》卦云「利牝馬之 「元」是「四德」之首,故夫子恒以「元」配「乾」而 Ŧī. 節,復明上初章及「乾四德」之義也。 乾元」至「天下平也」。 「能以美利利天下」,解「利」也 以美利利天下,不言所利,大矣哉」者,此復 利益天下 利益 也。 也。 此解元、亨二德也。「利貞者,性 於物而得正者,由性制 「乾始」,謂乾能 不復説「亨」、「貞 正義 ,謂能以 始 日 : 元亨利貞 生萬物,解 」者,前 「乾元者 於情也 此 生長、 此直 文 能 爲 言 節

柔愛剛 爻發散 者,言乎變者也」,故合散屈 則不能久行其正。 通物之始」。其實,「坤元」亦能 元德,雖能始生萬物,德不周普,故云「不爲乾元,何 曰:乾之元氣,其德廣大,故能徧通諸物之始。 其利而均平不偏陂。 美此「乾」之義。 「雲行雨施,天下平」者,言天下普得 情 發越也,「揮」謂揮散也,言六爻發越揮散,旁通萬物 情」者性之欲也。 文言》論「乾元」之德,故注連言「乾元」也。 靈,故云「純粹精」也。「六爻發揮,旁通情」者,「發」謂 故云「剛健中正」。 剛强,其行勁健。「中」謂二與五也,「正」謂 也 乎,剛健中正,純粹精 所 云利 也。 故直 `何能久行其正」者,「性」者天生之質,正 不利,此「貞」亦无所不貞,是乾德大也。「大哉 而已,故云「不言所利 ,旁通萬物之情。 ,體與情反,質與願違。 「時乘六龍以御天」者,重取《乾・彖》之文以 貞」,不言所 云「大哉乾乎,剛健中正」,謂純陽剛健,其性 其六爻發揮之義,案《略例 言若不能以 利之事,欲見「无不利」也 六爻俱陽是純粹也,純粹不雜是精 ○注「不爲」至「性情也」。 」者,此正論乾德,不兼通 輔嗣之意,以初爲无用之地 ,大矣哉」。 伸與體相乖,形躁 是爻者所以明情 性 通 制情,使其 諸 其實此 物之始。 而不邪; 五與三也 情 「不性其 好静,質 「利」爲无 非 若餘 》云「爻 如 以 唯 Œ 性 此 元 止 費 能 卦 之

一八

應,若俱陰俱陽爲无應。 求者陽也。」一與四,二與五,三與上,若一 陰居爲「失位」。《略例》云:「陽之所求者陰也,陰之所 位,故《乾・彖》云「六位時成」。二、四爲陰位 上爲盡 論此四爻。 繋解 得位」,陽居爲「失位」, 》,於此略言之。 末之境,其居 初、末雖 无正位 位 者唯 三、五爲陽位,陽居爲 此其六爻之大略,其義具於 , ●統 而論之,爻亦始 四 五,故《 陰一陽爲有 《繫 、陰居爲 一得 辭 位, 末之 唯

辭。 幽 宣 解「潛龍」之義。 也,不應潛隱。 令其德行彰顯,使人日可見其德行之事,此君子之常 義,故先開此語也。 或當然也。 第六節,明六爻之義,摠屬第六節,不更爲第七節。]義 廣明「乾」與「四德」之義,此「君子以成德爲行」,亦是 節是《文言》第六節,更復明六爻之義。 潛」也。 見,所行之行 周氏云"「上第六節「乾元者,始而亨者也」,❷是 ,行又未成,是君子於時不用。 君子以成」至「弗用也」。 「潛之爲言也,隱 「君子以成德爲行」者,明初 未 所以今日「潛」者,以時未可 此經中 可成 言君子之人,當以成就道德爲行. 就。 「潛龍」之言,是德之幽隱 而未見,行 「是以 君子 以逢衆陰,未 而未成」,此 弗用 此節明 正義 九「潛 E: 見,故須 初九爻 三龍 」之 夫子 可 而 此 用 既

> 則言,以「潛」、「見」須言其始,故豫張本於上。 「亢之爲言」也。 德,未是君位。 者,既陳其德於上,然後引《易》本文以結之。《易》之 當用寬裕之道居處其位也。 「九三」、「九四」,其九五全不引《易》文,上九則 上不發首云「初九」、「九二」,此九三、九四則發首先 所云是「君德」,「寬以居之,仁以行之」是也。 心行之被物。 進,未在君位,故且習學以畜其德。 此復明九二之德。「君子學以聚之」者,九二從微 也。 有未了,更詳問其事以辯決於疑也。「寬以居之」者 未必文相對。 成」,是行亦稱「成」。周氏之説,恐義非 行」者,言君子成就道德以爲其行,其「成德」、「爲行」, 被於人,在外之事,故云「爲行」。」下文即云「行 此明九三爻辭。 周氏云: 「《易》曰「見龍在田,利見大人」,君德 「德出於己,在身内之物,故云『成」, 「君子學以」至「君德」。 上下不爲例者,夫子意在釋經,義 「九三重 上之初九、九二皆豫 剛」至「无咎」。 「仁以行之」者,以仁恩之 「問以辯之」者,學 也。 陳其 正義曰: 「成德爲 但有 發 德。 首云 正 而 四 言 便 於 義 君 而 未

[「]末」,嘉本同,阮本作「上」。

❷ 「六」,阮本同,嘉本作「五」。

前

進

稍

中之事。 故九三不云「中不在人」。九四則上近於天,下遠於 俱陽,故「重剛」也。 四爻是有位,故不云「言」,義或然也。 定,故疑之也。 釋經「或」字,經稱「或」是疑惑之辭,欲進欲退猶豫不 地,非人所處,故特云「中不在人」。「故或之」者,以其 近於地,上遠於天,九三近二是下近於地,正是人道 其「重剛不中,上不在天,下不在田」,並與九三同 上下无定,故心惑之也。「或之者,疑之也」者,此夫子 「中不在人」者,三之與四俱爲人道,但人道之中,人下 「言」者,褚氏以初、上居无位之地,故稱「言」也。 云「潛之爲言」,上爻云「亢之爲言」,獨二爻云 上九亦前章備 危惕,其憂深也。 」至「故无咎」。 「乾乾夕惕」,戒懼不息,得「无咎」也。 「故乾乾因其時而惕,雖危无咎矣」者,居危之 「上不在天」,謂非五位,「下不在田」,謂非二 剛 九五前章已備,故不復引《易》,但云「大人」 故但疑惑,憂則 中」,恐其 九三中 顯,故此直言「亢之爲言」也。 「不中」者,不在二、五之位,故「不 義 雖 九四 同,故 在 正義曰:此明九四爻辭也 淺 人,但 也 則 並 陽德漸盛,去五 先 位卑 夫大人」至「鬼 云爻位 「重剛」者,上下 近 下,向 并 九 重 彌近 上爲 一剛不 也 四 神

重剛_

位也。 中也。

地,以

初九

也。

言「

居上位不至於「亢」也。 所以亢極有悔者 可有違乎? 若在天時之後行事能奉順上天,是「大人」合天也 乃在後不違,是天合「大人」也。「後天而奉天時」者 禍淫也。 夏,刑以秋冬之類也。「與鬼神合其吉凶」者,若 其明」者,謂照臨 不知退,知存而不知亡,知得而不 至「聖人乎」。正義曰:此明上九之義也。 不違遂明大人之德,言尊而遠者尚不違,況小 者,上稱「聖人」爲「知進退存亡」發文,下 者,「得喪」輕於「存亡」,舉重略輕 心,存亡據身,得喪據位。」「其唯聖人乎,知進退存亡」 失其正道。 者,其唯聖人乎」者,聖人非但只知進退存亡,又能 者,言唯聖人乃能「知進退 「天且弗違,而況於人乎,況於鬼神乎」者,夫子以天且 與天地合其德」者,莊氏云「謂覆載 物相感,此 乎」。 「先天而 正 「其唯聖人乎」,此 況於人乎? 義 論 日 大人之德 1,正由 也。 天弗違」者,若在天時之先行事,天 此 「與 明 有此三事。 此設誡 九 況於鬼神乎? 四 无所不合,廣言 Ŧī. 存亡」也。 時合其序」者,若賞以 爻 經 辭。 解。 再 也。 知喪」者,言此上 若能三事備 稱 莊氏云:「 也」。 但 何不云 「其唯聖人乎 上 而 稱「其唯聖人 「亢之爲 節 「與 所合之事 不失其 明 「知進 「得喪 前 日月合 大 進 知, 近者 退 人 春 與 九 而

亡」,又能「不失其正」,故再發「聖人」之文也。乎」者,爲「不失其正」發文。言「聖人」非但「知進退存

周易正義卷第二

計畫萬肆阡玖佰柒拾捌字

 \equiv

周易正義卷第三

國子 ,祭酒 上 護 軍 曲 阜 縣

者,此假象以明人事。6

西南坤位,是陰也。

今以陰詣

「東北

喪

貞正

離 其 之 先唱,猶臣不可先君,卑不可先尊故也。

在物之先即迷惑,若在物之後即得

「主利」,以陰不可

「西南得朋

主利」者,以其至陰,❺當待唱

而 後

和。

凡有所爲,若

開 國 子臣 孔 穎 達奉 勑 撰

物,各得亨通,故云「元亨」,與乾同也。 「利牝馬之貞 合體之物,故乾後次坤。 此一節是文王於坤卦之下陳坤德之辭。 坤坤 上下 乾之所利,❷利於萬事爲貞,此唯云「利 坤。 「元亨」至「安貞吉」。 言地之爲體,❶亦能始生萬 但 乾、 正 坤 義

曰 :

黨而人君之朝,女子離其家而人夫之室。莊 朋,安貞吉」者,西南既爲陰,東北反西南即爲陽也。 行,又向陰柔之所,❸是純陰柔弱,故非吉也。 「「先迷後得,主利」者,唯據臣 吉,以陰而兼有陽故也。若以人事言之,象人臣 以柔順之道往詣於陽,是喪失陰朋,故得安静 陰是「得朋」,☞俱是陰類,不獲吉也。猶人既懷陰柔之 婦 適夫也。」其理褊狹, 非易弘通之道。᠑ 事君也。

地」,阮本同,嘉本作「坤」。

0

據

- 0 利」,嘉本同,阮本作「貞」。
- 假」,嘉本同,阮本作「正」, 屬上
- 假」,嘉本同,阮本作「還」。
- 陰」,嘉本同,阮本作「柔」。
- 此」,阮本同,嘉本作「是」。
- 是」,嘉本同,阮本作「乃」。
- 所」,嘉本同,阮本作「方」。
- 易」,嘉本同 阮本作「復」。

周 易正 義卷第三 雖柔順,不能行地

无

疆

,无以見「坤」廣生之德。

「馬

比

「龍」爲劣,所行

亦能

廣遠,象地之廣育。

「君子有

者,以其柔順利

貞

故君子利有

所往。

先

迷後

貞」自然之德以

垂教也。

不云「牛」而云「馬」者,「牛」

馬」,外物自然之象,此

亦

聖人因

「坤元亨,利牝

順,假借此柔順以明柔道,❹故云「利牝馬之貞」。

以明柔順之德也。❸「牝」對「牡」爲柔,「馬」對「龍」爲 牝馬之貞」。坤是陰道,當以柔順爲貞,假借柔順之象 者,此與乾異。

得朋喪朋,唯

氏 云:

○注

也。 必之於陽,是之於反類乃得吉也。凡言「朋」者, 之於反類,而後獲安貞吉」者,若二女同居,其志不同 物,若向西南,「與坤同道」也。 論凡所交接,不可 乃得貞吉。 物,故云「至順之貞」亦是「至順之亨」。 貞」,避此「貞」文,故云「乃亨」,但「亨」、「貞」相 之下,在「貞」之上,應云「至順 人爲其黨,性行相 而後乃亨」倒取上文者,輔嗣之意,下句既云「牝馬之 於牝馬之貞」者,案:「牝馬」是 至順」乃得「貞」也。下文又云「東北喪朋」,去陰就 與 至「牝 卦》云: ○注 「乾」相對,不可 馬 「西南」至「貞吉」。 「坤也者,地 之貞」。 上下義反者,但易含萬象,一 同亦爲其黨。 純 純剛敵「乾」,故「利 正 陰 義 也,萬物皆致養焉。」。 ,當須剛柔交錯,故「喪朋吉 日 : 正義曰: 至 而 至 「陰之爲物,必 假令人是陰柔而之剛 後 順,「牝馬」在「元 順 乃貞」,今云「至 而 坤 後 此坤德以牝馬 牝馬」。 乃 位在 屈 亨, 一伸。 西 離其 坤 故 南。 下句 非 既 將之 唯 亨 唯 黨 此 陽 順 養 利

句

德與 哉坤 之首也。 元」至「德合无疆 彖》曰, 相連共文也。❷「至哉坤元」者, 但「元」是坤德之首 至 哉」至「无 二,此 五. 句摠明 故連言之,猶乾之「元」 疆 「坤」義 _ 歎美坤德,故 正 義 及 「元」德 日 「 至

正,亦是離其黨。

窮已。 句釋 也。 君子之所行, 是 云「地類」,以柔順爲體終无禍患,故 若比衆物,其實「大」也,故曰「含弘光大」者也。 故品類之物皆得亨通。 廣博无疆,二是長久无疆也。 乾言「大哉」,坤言「至哉」。 也。 生長之德,合會无疆。 乾是剛健,能統領於天,坤是陰柔,以和順承奉於天。❸ 故云「資始」; 地而生初。 云「至哉」。 坤 也。 厚載物,德合无疆」者,以其廣厚,故 「含弘光大,品物咸亨」者,包含弘厚,光著盛大 但天亦至極,包籠於地, 「亨」也。 此二句釋「利 「柔順利貞,君子攸行」者,重釋 禀其氣謂之始,成形謂之生。 「至」謂 兼 「牝馬地類,行地无疆」者,以其柔順,故 坤據成形,故云「資生」。「乃順承天」者 釋 前 至 貞」也。 文「君子有 極 凡言「无疆」者,其有二義:一是 但 也,言地 「坤」比「乾」即不得「大」名 「萬物資生」者,言萬物 故上文云「利 非但至極,又大於 自此已上論「坤元」之德 攸 能 往 生養至 「行地无疆」,不復 「利貞」之義,是 能 「先迷失道 載物; 牝馬之貞 乾本氣初 極 與 地。 天 此 資 故 司

⁰ 連」,嘉本同,阮本作「通」。 在」、嘉本同、阮本作「居」。

² 奉」,嘉本同,阮本作「平」。

馬」也。 常」。 也。 喪朋」,去陰就陽,是「利」之「永貞」。 求安難矣。 柔也,故須「永貞」也。 剛」者,言體既方正而性又剛强,即太剛也,所以須「牝 馬」謂柔順也,「利之不以永貞」,「永貞」謂貞固、剛 注「若夫行」至「難矣」。正義曰:「行之不以牝馬」,「牝 而能正即得其吉,應合地之无疆,是慶善之事 雖離羣,乃終久有慶善也。 「安貞之吉,應地无疆」者, 與類俱行。 陰在物之後,陽唱 者,以陰在物之先,失其爲陰之道。「後 安」謂安静,「貞」謂貞正,地體安静而貞正,人若得静 言坤既至柔順而利之,即不兼剛正也。「方而 「西南 「柔而又圓 「東北喪朋,乃終有慶」者,以陰 云「永貞」者,是下「用六」爻辭也。「東北 得朋,乃與類行」者,以陰而 而 」者,謂性既柔順,體 陰 若其坤无「牝馬」,又无「永貞」, 和乃得「主利」,●是「後順 順 又圓曲,謂 造坤位,是乃 得常」者,以 而詣陽,初 太 又 得 正

用此 也。 侯之等。但厚德載物隨分多少,非如「至聖」載物之極 ,❷是「不順」也。其勢承天,是其「順」也 「地」之厚德容載萬物,言「君子」者,亦包公卿 注:「地 象》曰,「地勢」至「載物」。 形不 順,其勢 順。」正 義 正 日 義曰: 地 體 君子 諸 方

初六,履霜,堅冰至。正義曰:初六陰氣之

《坤》之六三「含章可貞」之例是也。 《坤》之「履霜堅冰」、「龍戰」之屬是也。 至。 非 注云「至於九三,獨以君子爲目者何也」,「乾乾夕惕 象者則取象也,可以取人事者則取人事也。故《文言 凡易者象也,以物象而明人事,若《詩》之比喻 不取物象以明義者,若《乾》之九三「君子終日乾乾」, 如」之屬是也。 以明義者,若《屯》之六三「即鹿无虞」,六四「乘馬班 取天地陰陽之象以明義者,若《乾》之「潛龍」、「見龍 微,似若初寒之始,但履踐其霜 龍德也」。故以人事明之是其義也 義取所謂陰道, 如此之類、《易》中多矣。或直以人事 初雖柔順,漸 微 漸 聖人之意,可以取 而 積著乃至堅剛。 積 或取萬物雜 漸,故堅 也。 冰 象 或 乃

聖正經之辭。❸ 及至輔嗣之意,以爲「象」者本釋經文,所作象辭,元在六爻經辭之後,以自卑退,不敢于亂先《象》曰,「履霜」至「冰也」。正義曰:夫子

[「]乃」,嘉本同,阮本作「人」。

[「]體」,嘉本同,阮本作「勢」。

[「]于」作「干」,是也。 「于」,嘉本作「干」,阮本作「于」,阮校云:錢本、監本

굸: 冰」爲戒。 人事有爲,不可不制其 六。」陰陽之氣无爲,故積馴履霜必 凝也」者, 言之,猶如 宜 馴 相 致其道,至堅冰也」者,「馴」猶狎順 「履霜 言順其陰柔之道,習而不已乃至堅冰也 附 近 其 釋「履霜」之義,言陰氣始 者, 所以防漸慮微,慎終于始也 元凱 (義易 從 注《左傳》分經之年與傳相 初 了,故分文之象辭 六至六三, 堅冰 (尊度,❷故於「履 至於「堅冰」。 ₹,0各; 者, 凝結 也 霜 從六四 若若 附 而 附 而 [鳥獸 其 爲 逆以 堅 (當爻下 霜 至上 陰始 以 褚 馴 也。 明 氏 狎

習无不利」。 也。 之「直」也。 以方」也。 方」者,言六二之體,所 居在此位,亦當如地之所爲。《象》曰「六二之動 極 位,極地之質,故亦同 大,不習无不利」者,《文言》云「直,其正也」。 於地 物无不 既有三德極 六二,「直方」至「光也」。 體,故 義曰: 「不習无 利 地體安静是其「方」也,无物不載是其「大」 物皆自成,无所不利。 ",猶地 盡極 「質」謂 地之美,自然而生不假脩營,故云「不 地之義。 道 不利,地 地 形 光 有興動 也。 質 大 ,地之形質「直方」又「大」 故 此因自然之性以 道光」者,言所以不假脩 俱包三德,生物 也。 任其自然之性,故云「直 \bigcirc 以此爻居中得位 注 正 義 居中」至 日 : 明 不邪,謂 二得 人 直 事。 以 其 方

> 相副者 是也。 方, 能任其質性,「直」而且「方」,故《象》云「六二之動, 言氣至即 此六二「居中得 方也」。 動又「直方」,是質之與行内外相副。 故《略例》云「形躁好静, 生物,由 ○注 「動 正 是體 是 而 盡 |至「質也」。 正 極地之體 直之性。 質也。 質柔愛剛」, 正義曰:是質以「直 其運 動生物之時又 所 物有内外不 以「直 此之類 者

以

美也。 始,但奉終而行,是知慮光大,不自擅 大」者,釋「无成有終」也。 美之道待時而發,是「以時發」也 釋「含章」之義,以身居陰極,不敢爲物之首,但内含章 終,故云「有終」。 爲 事 道 章可貞」者,六三處下卦之極 (事之首主成於物,故云「无成」。 ,无成有終」者,言六三爲臣,或順從於王事,故 待命乃行,可 既居陰極能自降退,不爲事始,唯内含章美之 六三,「含章」至「光大也」。 以 《象》曰「含章可貞,以時發 得 正,故曰「含章可 既隨 而 能 從王事,不敢 不被 唯上唱下 「或從王事,知 其美,唯奉於上 疑 貞」。「或 於陽。 正義 和 者, 主 日 奉 「章」, 不敢 從 成 行其 一含 Ŧ.

文」,嘉 本、阮本皆作「爻」。

尊」,嘉本、阮本皆作「節」。

章可貞」已下之事乃「應斯義」。此爻全以人事明之。也。「應斯義」者,「斯」,此也。若能應此義,唯行「含極將與陽敵,體必被陽所忌;今不被疑於陽,言陽不害者,欲見三雖陰爻,其位尊也。「不疑於陽」者,陰之尊

此,故得大吉也。《象》曰「黄裳元吉,文在中」者,釋所居於臣職,故云「黄裳元吉」。「元」,大也,以其德能如道,五居君位,是臣之極貴者也。能以中和通於物理,裳元吉」者,「黄」是中之色,「裳」是下之飾。坤爲臣、 五,「黄裳」至「文在中」。正義曰:「黄

此陽所生之地,故陽氣之龍與之交戰。 此陽所生之地,故陽氣之龍與之交戰。 以者,「固」爲占固,陰去則陽來,陰乃盛而不去,占固 以者,「固」爲占固,陰去則陽來,陰乃盛而不已,固陽之 以治,以爲氣之龍與之交戰,即《說卦》云「戰乎乾」是也。 以治,以爲氣之龍與之交戰,即《說卦》云「戰乎乾」是也。 以治,「陰之」至「戰于野」。 陰陽相傷,故「其血玄黄」。 以治,「陰之」至「戰于野」。 陰陽相傷,故「其血玄黄」。 以治,「固」爲占固,陰去則陽來,陰乃盛而不去,占固 此陽所生之地,故陽氣之龍與之交戰。 上六,「龍戰」至「道窮也」。 正義曰:「龍

六,六是柔順,不可純柔,故利在「永貞」。「永」,長也,貞」者,此坤之六爻摠辭也。言坤之所用,用此衆爻之「用六」至「大終也」。正義曰:「用六,利永

- 「由」、嘉本同、阮本作「曰」。
- 「文在中」,嘉本同,阮本「在」下有「其」字。

三六

永貞」之義,既能 貞, 若不用「永貞」,則是柔而又圓,即 此「永貞」即 也, 言 長 能 用 常坤 此 貞 》卦之下「安貞吉」是 正 柔順,長守貞正 也。 象》 日 前 以 ,所以 注云「求 大終 也 廣 大而 一者, 難 終 釋

也。

則上云 柔也。 理 承 弘光大」,言含養萬物 卑退、若在事之後、不爲物先、即「得主」也。 静」,生物不邪是 至堅剛而 分釋六爻之義。「坤至柔而動也剛」者,六爻皆陰是至 天而時行」者,言坤 不敢爲如之先,❶恒相 節 故云「有常」。「含萬 ,明坤之德也。 「《文言》」至「時行」。 「履霜 體雖「至柔而運動也 成就。 堅 冰」是 德能 至 自「積善之家」以下是第二節 方 静 道 而 也。 物 正。 而 時 柔順,承奉於天以量時 德 而化光」者,自明《彖》辭「含 德方」者, 而 化光大也。「坤 又地能生物,初 剛」,柔而積漸乃至堅剛 「後得主而 動 正義曰:此一 地 有常」者,陰主 體 道其 不動是「至 雖 此陰之恒 柔 節 八順乎, **水弱**,後 而 是第 行, 也

六爻辭 殃」者,欲明初六其惡有漸,故先明其所 而 積 弑父非 也。「積善之家必 積善」至「言順 故 致後之吉凶。 朝 一夕率然而 有餘 也。 其 起, 所 **慶**,積 其 由 正 禍患所 來 義 者 不 E : 善善 行善惡 漸 之家 從來者積 矣 此 一者,言 事 必 節 由 有 明 久 餘 初

> 惡。 陰爲弑害,故寄此以明義。 至禍亂,故特於坤之初六言之,欲戒其防柔弱之初,又 今獨言弑君、弑父有漸者,以陰主柔順 凡萬事之起皆從小至大,從微至著,故上文善惡並言 之道,積微而不已乃致此 君父欲辯明之事不早分辯故也。 久遠矣。 「蓋言順」者,言此「履霜,堅冰至」,蓋言順 一由 辯之不早辯」者,臣 弑 害。 子 稱「蓋」者是疑 此戒君 所 以 ,積柔不已乃 久 父防 包禍 習陰 臣 《之辭。 心, 子之 惡 由

人,則人亦敬、 内」,改云「敬以直内」者,欲見 也,方其義也」,下 直 「義以方外」者,用此義事以方正外物,言君子法 君子用「敬以直内」,「内」謂心也,用 故曰「義」。「君子敬以直内」者,覆釋「直其正 其 節釋六二爻辭。「直其正」者,經稱「直」是其正也; 敬」也。 而生萬物,皆得所宜,各以方正。 (義」者,經稱「方」是其義也。 「直其正」至「疑其所行」。 「敬、 義立 義以應之,是 云「義以方外」,即 而 德不孤」者, 「德不孤 正 「義」者宜也,於事 則 身 能敬 然即前云「直 此 也。 有敬 此應云「正 恭敬以直 正 故變 義 直 義以 E. 則不邪 也, 内 接於 以 地 此 方 心 宜. 正

如 ,嘉本、 阮本皆作「物」。

不利」,則所行不須疑慮,故曰「即不疑其所行」。●正則謙恭,義則與物无競,方則凝重不躁。 既「不習无

「陰雖有美」至「代有終」。正義曰:此一「陰雖有美」至「代有終」。正義曰:此一有終也。「陰雖有美」至之後雖有美道包含之德,是此道卑柔,无敢先唱成物,必待陽始先唱而後代陽時,三爻辭。言「陰雖有美,含之以從王事」者,釋節明六三爻辭。言「陰雖有美,含之以從王事」者,釋節明六三爻辭。言「陰雖有美,含之以從王事」者,釋節明六三爻辭。言「陰雖有美,含之以從王事」者,釋節明六三爻辭。言「陰雖有美,含之以從王事」者,釋節明六三爻辭。言「陰雖有美」至「代有終」。正義曰:此一有終也。

謹慎也 不蕃。 地否閉 通。 草木蕃滋。「天地閉,賢人隱」者,謂二氣不相交通,天 明六四爻辭。「天地變化」,謂二氣交通,生養萬物 「蓋言謹」者,「謹」謂謹慎,蓋言賢人、君子於此之時須 8 「天地閉,賢人隱」,明天地通則賢人出,互 此乃「括囊、无咎」、故「賢人隱」屬「天地 ,賢人潛隱。 天地 變」至「言謹 天地通則草木蕃,明天地閉草木 也。 正義曰: 閉 此 也 而 故 相 節

明六五爻辭也。「黄中通理」者,以 色,奉承 君子黄」至「之至也」。 臣 職 是 通 曉 物 理 也。 正 位 黄居中兼 居 正義 體 曰 : 居 四 此 方之 中 得 節

> 莫過之,故云「美之至也」。 能宣發於「事業」。 支」。「四支」猶人手足,比于四方物務也。 「美在其中」,有美在於中必通暢於外,故 正,是正位也,處上體之中,是居體也。 所營謂 之「事」,事成謂之「業」,美 「黄 굸 中 外内俱善 「暢 通 理 四 是

色玄,地色黄,故血有天地之色。」今輔嗣注云「猶與 爻兼有天地雜氣,所以上六被傷,「其血玄黄」也。 玄而地黄」者,釋「其血玄黄」之義。莊氏云:「上六之 故爲陽所傷而見滅也。●「夫玄黄者,天地之雜也。 「血」焉」者,言上六雖陰盛似陽,然猶未能離其 純陰非陽,故稱「龍」以明之。 「猶未離其 「爲其嫌於无陽,故稱「龍」焉」者,上六陰盛似陽,爲嫌 動,欲除去此陰, 六爻辭。「陰疑於陽必戰」者,陰盛爲陽所疑,陽 「陰疑於」至「地黄」。 陰既强盛,不肯退避,故「必戰」也 正義曰: 此一 類也,故 節 陰 明上 乃 類 天 發

-) 「即」,阮本無此字。
- 「若」,阮本作「苟」。
- 「互」,阮本同,嘉本作「反」。

三八

意,今所不取也。 戰而相傷」,是言陰陽俱傷也。恐莊氏之言非王之本

₩ 坎上 屯。「元亨」至「建侯」。正義

亨」也。 之。 曰 : 乾之「四德」无所不包。 難也」。 屯難之世,世道初創,其物未寧,故宜 屯之四德,劣於乾之四德,故「屯」乃元亨,亨乃利貞。 应 利建侯」,不如乾之无所不利。此已上説屯之自然之 德」,聖人當法之。「勿用有攸往,利建侯」者,以其 此二句釋人事也 屯,難也。 萬物大亨乃得利益而貞正,故 以陰陽始交而爲 剛柔始交而難生,初相 此即「勿用 難,因 難,物始大通 有攸往」,又别言 逢遇,故云「屯 「利 「利貞」也。 建侯」以 故 故 但 寧

險中。 者,此釋「四 剛柔已交之後,物皆通泰,非復難 二氣始欲相交,未相通感,情意未得,故「難生」也。 有難,故云「剛柔始交而難生」。 屯 剛柔始交而難生」者 彖》曰 動 險中, [德]也。 ,「屯剛」至「不 故「屯,難」。 坎爲 險, , 此 一 震爲動, 句釋屯之名。 動 「動乎險中,大亨貞. 也。 而不已,將出 寧」。 震 唯初始 在坎下是動於 正 交時而 以剛 義 於險 日 若 柔

> 雨」至「所爲」。 則 「難」則坎爲險,則上云「動乎險中」是也。 陰陽而致之,故云「皆剛柔始交之所爲」也。 始交之所爲」者,雷雨之動亦陰陽始交也,萬物盈滿 氏、褚氏云:「釋『亨』也,萬物盈滿則亨通也。」「皆剛柔 不得安居无事。 時,王者當法此屯卦,宜建立諸侯以撫恤萬方之物,而 萬物於草創之始,如在冥昧之時也。 者,釋「利建侯」也。「草」謂草創,「昧」謂冥昧,言天造 已下説屯之自然之象也。「天造草昧,宜建侯而不寧」 以 養萬物,故得「滿盈」,即是「亨」之義也。 「雷雨」二象解「盈」也。 也,二盈也。① 者,周氏云「此一句覆釋「亨」也」。 故得「大亨貞」也。 「利」屬於「貞」,故直言「大亨貞」。 坎爲雨 屯難之世不宜亨通,恐「亨」義難曉,故特釋之。 ,震爲動, 上既以「剛柔始交」釋「屯難」也,此 正義曰:「雷 此二句以人事釋「屯」之義。 「大亨」即「元亨」也。 此 云「雷雨之動」是也。 言「雷雨」二氣初相交動以生 雨 之動 但屯有二義: 「雷 乃得滿盈 于此「草昧」之 雨之動 覆釋「亨」者。 若取 不 -言「利」 隨義 ○注「雷 若取 「亨通 滿 一難 而 又 盈 者 此 以 屯 周

^{▶ 「}二」,嘉本同,阮本作「一」。

也,「草」謂草 體不寧」者,以此屯邅險難,其體不寧,故「宜建侯」也 象,其例不一。● 造物之始,始于冥昧」者,「造物之始」即「天造草昧 2,其形未著,其體未彰,故在幽冥闇昧也 創,初始之義。「始於冥昧」者,言物之初 ○注「屯體」至「建侯」。正 義 曰:「屯

之世,民思其主之時,既能 義也。 者,解「利居貞」也。 謂陰也,言初九之陽在三陰之下是「以貴下賤」。 行守正也。「以貴下賤,大得民」者,「貴」謂陽也,「賤」 安,志欲以 不可進,唯宜利居處貞正,亦宜 桓」,不進之貌。 以經綸天下,約束於物,故云「君子以 安民 云:「「綸」謂緯也,❸以織綜經緯。」此君子之事,非其 雖磐桓,志行正」者,言初九雖「磐桓」不進,非苟求宴 ○注「處屯」至 在正」者,解「貞」也。 初九,「磐桓」至「得民也」。 劉表、鄭玄云「以「綸」爲「淪」字」,非王本意也。 經緯,「綸」謂繩綸,❷言君子法此屯象有爲之時 象》曰,「雲雷」至「經綸」。 静息亂,故居處 處屯之初,動即難生,故「磐桓」也 「得民 「守静以侯」者,解「利建 也。 真也。 「以貴下賤」,所以大得民心 「弘正在謙」者,取象其「以 正義曰:「息亂以 建立諸侯。《象》曰: 非是苟貪逸樂 經綸」也。 正義曰:「磐 正 侯」也 義 唯志 屯難 姚信 曰

> 言身雖住,但欲以静息亂也。 故磐桓且住,非是苟求宴安,棄此所成之務而不爲也 求於强」者,解「大得 貴下賤」也,言弘大此屯正在 義曰:「非爲宴安棄成務」者,言己止,爲前進有難 民」也。 ○注「不可」至「行正也」。 於謙 也。「 陰 求 於陽,弱

正

猶 爲 年乃字」者,十年難息之後,即初不害己也,乃得往谪 也,女子以守貞正,不受初九之愛,「字」訓愛也。「十 者,「寇」謂初也,言二非有初九與己作寇害,則得共五 往適於五,正道未通,故班旋而不進也。 牽不進也」,馬季長云「班,班旋不進也」。 邅如」也。 「乘馬班如」者,《子夏傳》云 「班如者,謂 言六二欲應於九五,即畏初九逼之不敢前進,故 如遭 會也。」「女子貞不字」者,「貞」,正也,「女子」謂 婚媾矣。❹ **|如」者,「屯」是屯難,「邅」是邅迴,「如」是** 六二,「屯如」至「反常也」。 馬季長 云"「重婚日 媾。 鄭玄云: 正 言二欲乘 「匪寇婚 義 語 E : 辭 屯 六二 屯 也 馬 相 如

- 0 例 嘉本同,阮本作「義」。
- 繩」,嘉本同,阮本作「綱」。
- 緯」,嘉本同,阮本作「綱」。
- 共」,嘉本同,阮本作「其」。

於此。 法此。 此爻因 如邅 得「反常」者,謂 此,非唯男女而 近者所陵,經久之後乃得與應相合。 前有難,不得行常,十年難息,得反歸於常以適五 有難也。 於五,受五之字 ·十年」也。《象》曰「六二之難,乘剛也」者,釋所以「屯 如也。 猶如有人逼 六二之象以明女子 「十年乃字,反常」者,謂十年之後屯難 有畏難者,以其乘陵 已。 愛。 反常道,即二適于五是其得常也。 近於强,雖遠有外應未敢苟進,被 諸爻所云陰陽、男女之象,義皆倣 「十」者數之極 婚媾之事 初 ,即其餘人事 數 剛,不肯從之,故 是知萬事皆象於 極 則 變, 止 亦 故 也。 息 當 已 云

子幾不 林中」。 如舍此 豈取 虞」也。 五自應 就於鹿,當有虞官助己, 无虞官,即虚 鹿无虞」者,「即」,就也,「虞」謂虞官,如人之田 恨 六三,「即鹿」至「吝窮也」。 求五之心,勿往 辱 如 二,今乃 即 此是假物爲喻。 哉? 舍 徒 入于 者,「幾」,辭 往 見 向 不 林木之中,必不得 此形勢,即不如休舍也。 五,五所不納,是徒入于林中。 自揆度彼五之情 .也。 商度形勢可否,乃始得 今六三欲往從五,如就鹿 也, 夫君子之動 「往吝」者,若往求 納 鹿,故云「唯 己以 正 自 義 否,是 言六三不 知可 E : 五即有 鹿。 獵 人于 欲 「君 厂无 否 也 若 從 即

> 也。 也。 悔吝 微」之「幾」。 鹿无虞」,是已 揆度五之情意納己以 不害己,身无屯邅是路之平易,即意欲向五,而不預先 商度鹿之所在,猶若三欲適五,先遣人測度五之情意。 往,若往則有悔吝窮苦也。 虞官,❷即有鹿也。 幾微」者,乃從无向有,其事未見乃爲「幾」也。 幾」爲語辭,不爲義也。 也。 「君子舍之,往吝窮」者,君子見此之時 正義曰:「見路之易,不揆其志」者,三雖比四,四 《象》曰 成之事, 即 若无虞官以從逐于禽,亦 鹿 否,是「无虞 无 知此「幾」不爲事之幾微。 事已顯著,❸故不得 虞,以從禽」者,言 ○注「三既近五」至「吝窮 也。 獵 人先遺虞官 當 就 今「即 不 爲「 舍 鹿 可 而 當 凡 得 不 有

也,慮二妨己路,故初時班如旋也。 馬班如,求婚媾,往吉,无不利」者, 求而往明」者,言求初 求之爲婚必得媾合,所以「往吉,无不利」。《象》曰 六四,「乘馬」至「往明 而 往 婚媾 明 也。 ,六四 二既不從於初,故 識 初與二之情狀 應初故「乘 正 義 曰: 馬 乘

^{● 「}變」,嘉本同,阮本作「復」。

[「]就」,嘉本同,阮本作「即」。

[「]著」,嘉本同,阮本作「者」。

知初納己,知二不害己志,是其「明」矣。

凶。 同好,不容他人間厠其間也 容他間」者,「間」者,厠也,五應在二,是堅固其志在于 有司,是小正爲吉。 當恢弘博施,唯繫應在二,而 屯其膏」者、「膏」謂膏澤恩惠之類、言九五既居尊 「小貞吉,大貞凶」者,「貞」,正 ○注「處屯」至「貞之凶」。正義曰: 九五,「屯其」至「施未光也」。 若大人不能恢弘 所施者褊狹,是屯難其 也。 博 出納之吝謂之 「固志同好,不 施,是大正爲 正 義日 位

馬班 處險難之極而下无應援,若欲前進即无所之適 如。 曰「何可長」者,言窮困泣血,何可久長也。 上六,「乘馬」至「何 窮 困 闉 厄,无所委仰」,故「泣 可 長 也。 血 正 漣 2,故「乘 義 如。 日

■ 艮上 蒙。「亨」至「利貞」。正義曰:

也。 蒙之闇,但 願亨通,即明者不求於闇,即 蒙亨」。「匪我求童蒙、童蒙求我」者,物既 蒙」者,微 初 筮告」者,「初」者發始之辭,「筮」者決疑之物 闇者求明,明 昧 闇 弱 之名。 者不諮於闇 物皆蒙昧,唯 厞 我 師 ,故云「童蒙求我 德之高明 願 亨 闇 通 往 弱 求 而 故 童 意 云

周

易

正義卷第三

其淺深。 默不言,人則莫測其淺深,不知其大小,所以聖德 曰 : 中,故知是「二」也。 其唯二乎」者,以《彖》云「初筮告,以剛中」者,剛 褻瀆 此初本之意而猶豫遲疑、歧頭别説,則童蒙之人聞之 義一理而則告之。●「再三則瀆,瀆,蒙也」者,若以棄 也。 不告。 而 筮則告」者,童蒙既來求我,我當以初心所念、所筮 失其道也。 在此事之上也。不云「元」者,謂 已上解「蒙亨」之義,順此上事乃得「亨」也,故「亨」文 言告之,即童蒙聞之轉亦瀆亂,故不如不告也。 **瀆則不告」者,師若遲疑不定,或再或三,是褻瀆,** 童蒙既來求我,我當以 〈彖》云「蒙以養正」,乃「聖功」也。 若養正以「明」,即 難測矣。 「然則養正以明,失其道」者,言人雖懷聖德,若隱 「利貞」者、「貞」,正也,言蒙之爲義,利以養正,故 而 煩亂也 童蒙來問 故《明夷注》云「明夷莅衆,顯明於外,巧 若彰顯其德,苟自發明 ○注「筮者」至「夫疑者也」。 ,故「再三則瀆, 本爲決疑,師若以廣深二義、再三之 ○注「蒙之」至「失其道矣」。 初 始一 理 瀆,蒙也」。「能爲初筮 剖 時當蒙弱未有「元」 即即 決告之。 人知其 正義 「再三 所 日:「 正 彌遠 而 瀆 義 得 之 初

❶ 「則」,四庫本、阮本作「剖」。

是 也。 此 卦 繇 辭皆以人事明之。❶

句釋經之「利貞」。 也」者,能以蒙昧隱 自此已上,《彖》辭摠釋「蒙亨」之義。 「蒙以養正,聖功 **瀆,瀆則不告,瀆,蒙」者,所以再三不告,恐瀆亂蒙者。** 童蒙闇昧之志而求應會明者,故云「志應」也。 故云「時中」也。 之名。「蒙,亨,以亨行時中」者,疊「蒙亨」之義,言居 止是「險而止」也。 蒙」之時人皆願「亨」,若以亨道行之于時則得中也 当下 有險」者,坎在艮下是山下有險,艮爲 彖》曰,「蒙山」至「聖功也」。 「匪我求童蒙,童蒙求我,志應」者,以 恐進退不可,故蒙昧也。 |默自養正道,乃成至聖之功。 止,坎上遇 此釋蒙卦 正 ,「再三 義 此一 日

不相須也。 自相違錯,若童蒙來問 隱默懷藏、不自彰顯以育養其德。 道,❷以果決其行告示蒙者,則「初筮」之義,「育德」謂 故蒙昧之象也。「君子以果行育德」者,君子當法此蒙 下出泉,蒙」者,山下出泉,未有所適之處,是險 象》曰,「山下」至「育德」。 則果行也,尋常處衆則育德,是 「果行」、「育德」者 正義曰:「山 而 止

發蒙」者,以初近於九二,二以 初六,「發蒙」至「以正法也」。 陽處 中, 而 明 正 能 義曰 照闇

> 故也。 「説人」二事、《象》直云「利用刑人」一者,但舉 之桎。」「以往吝」者,若以正道而往,即其事益善矣,若 可不施於國,鞭扑不可不施於家。 以正法」者,且刑人之道乃賊害於物,是道之所惡。 以刑人之道出往,行之即有鄙吝。 在足曰桎,在手曰梏。 蒙既發去,无所凝滯,故利用 故初六以能發去其蒙 人桎梏。 利用刑人」者,以正其法制,不可不刑矣。 以蒙既發去,疑事顯明,刑 也。 《小雅》云: 「利用刑人,用 刑戮于人,又利用説去罪 《象》曰「利用 ●「杻謂之梏, 案:此經「刑 人説梏皆得當。❸ 説 故 桎 刑 梏」者 械 刑 人、 罰 刑 以 重 不 人 謂

故得「吉」也。 中,羣蒙悉來歸己,每九二能含容而不距,皆與之決疑, 蒙吉,納婦吉,子克家」者,「包」謂 九二,「包蒙」至「柔接也」。 九二以剛居中,陰來應之。 包含,九二以 正 義 「婦」謂 曰:「包 剛 配 居

繇」,嘉本同,阮本作「繋」。

法」,嘉本同,阮本作「發」。

説」下,阮本有「桎」字。

小」,阮本同,嘉本作「爾」。

羣」,嘉本同, ,阮本作「童」。

也, 既能包蒙,又能納匹,是「能幹其任 陰,❷陰陽相親,故云「親而 居下卦之中央,上下俱陰,以己之剛 注「以剛」至「之義」。 居於卦内接待羣陰,是剛柔相接,故克幹家事 蒙納婦、 云「子克家」也。 故 納 在内理中、❶幹了其任,即 此 兀 配 而得 《象》曰「子克家,剛柔 「吉」也。 正 義曰:「親 得 中」也。 此 爻在下體之中, 是子孫能克荷家事 而 得 「能幹其任」者 陽迎接上下一 中」者,言九一 接 者 也 以 能 陽 包

而動。 取女」之義。 无攸利」也。 今先求於夫,是爲女不能自保其躬、固 女,自往求見「金夫」。 不須取者,❸此童蒙之世陰求於陽,是女求男之時也。 用取女」者,「女」謂六三,言勿用取此六三之女。 ·見金夫」者,謂上九以其剛陽故稱「金夫」。此六三之 六三,「勿用」至「不順也」。 正義曰: 行既不順,若欲取之,无所利益,故云「不有躬 所以勿用取此女者,以女行不順故也。 《象》曰「勿用取女,行不順」者,釋「勿用 女之爲體,正行以待命而嫁。 守貞信,乃非 所以 勿 禮

實」者,「實」謂 發去其童蒙,故 六四 六四,「困蒙」至「遠實也」。 爻辭 也。 九二之陽 曰困于蒙昧 六四 在 兩陰之中,去九二既遠,无人 也。 而 九二以陽故稱「實」也 有鄙吝。 《象》曰 正義 日 「獨遠 此

> 義 六三近九 二又不近上,故云「獨遠實」也。 日 陽主生息,故稱「實」,陰主消塤,故不得言「實」。 六五 近上 九又應九二,唯 ○注 陽稱實 此 六四 既 不 Œ. 近

貌順。 謂 於二是心順也,不自造爲是貌巽也。母 於二也。 五雖居尊位,而事委任於二,⑥不在 也。」〇注「委物」至「以巽也」。正義曰:「委物以 之吉」,異亦順也,❺猶委物於二。「順」謂心順,「巽」謂 之人,故所以得吉也。《象》曰「順以巽者」,④ 中,五則以事委任於二,不勞己之聰明,猶若童稚 委付事 」者,言六五以陰居於尊位,其應在二,二 六五,「童蒙」至「以巽也」。 故褚氏云: 「不爲」者,謂不自造爲,是委任二也。 物與有能之人,謂委二也。 「順者 心不違也,巽 一先而 「不先不爲」者 者外 正義 首唱 迹 釋 日:「 相 剛 「童蒙 是順 能 卑下 蒙 而 昧 童 得

[「]在」,嘉本同,阮本作「任」。

[「]剛」,嘉本同,阮本作「兩」。

[「]取」,嘉本同,阮本無此字。

[「]者」,阮本作「也」。

[「]亦」,阮本作「以」。

[「]事」,阮本作「專」。

[「]巽」,阮本作「順」。

也。 之願,又能爲之禦寇,故上下彌更順從也。 者,由上下順從故也。 若物從外來,爲之扞禦,則物咸附之,故「利用禦寇 之來即欲取之而爲寇害,物皆叛矣,故「不利爲寇」也 擊去衆陰之蒙,合上下之願,故莫不順從也。 擊蒙,不利爲寇,利禦寇」者,處蒙之終,以 象》曰「利用禦寇,上下順」者,所宜 上九,二 擊 蒙」至「上下順 言此爻既能發去衆蒙以 也」。 利爲物禦寇 剛 正 居上 若因 合上下 義 日 物 能

Ⅲ 乾下需。「有孚」至「大川」。正義

涉大川」。 明,物得亨通,于正則吉,故云「光亨貞吉」也。 爲體,唯有信也。 成,无信即不立 日 大川」者,以 此 需卦繇辭 剛 健 ,所待唯信也,故云「需有孚」。 也。 耐 「光亨貞吉」者 進即不患於險,乾德乃亨,故云「利 「需」者,待也。 1,若能, 物初蒙稚 有信,即 ··, 待 言需之 需道 「利 養 涉 光 而

需 名也,是需待之義 此 釋需 待 由險難在前 《彖》曰 卦繇辭。 故有待乃進也。 ,故云「需,須也 需 需」,須 須 也。 至「 「險在 有 0 功 剛健而 險 前」者,釋 也 0 在 前 不陷,其 正 一釋 需 義 所以 桂 曰 義

> 畢。 功」,剛健即乾 以此待物即所爲皆成,故「須道畢矣」。❶ 通 至「輒亨也」。 於信,後乃光明亨通於物而貞吉,能備此事是須道 至「貞吉」。 涉大川」之義,以乾剛健,故行險有功也。 德者,此卦之例是也。 卦德者,或直取爻而爲卦德者,或以兼象兼爻 以 通而貞吉也。 天子之位,又以陽居陽,正而得中,故能有信,光 但得乾之剛彊 以中正」者,此疊出需卦繇辭然後釋之也,言此需體 亨貞吉」,由乾之德也。 而不被陷滯,是其需待之義,不有 不困窮矣」者,解需道所以得亨由乾之剛 光 也。 正中,是九五之德也。 亨」乃 五即居於天位,以陽居 此雖釋「利 得 正義曰:「需道畢矣」者,凡需 「利 正義曰: 剛健 也,故乾德獲進,往 而不陷,又由中正之力也。 涉大川」, 涉 而不陷,只由二象之德。 大 「利涉大川,往有功」者,釋「利 川, 前 「需有孚,光亨貞吉,位 凡卦之爲體,或直取 云「剛健 尊,中 兼釋 故 於 上「光亨」之義,由 而 而不陷」,此云「往 則 「利 「困窮矣」,故 不 有 涉 偏 功即是往 大川」 健 ○注 正則 以九 ○注 待之義先 位 前 「乾德 而 象 乎天位 一乎天位 「謂 五 雖 无邪 得 乃 輒 明 爲 而 居 遇 一光 五. 須 亨 桂 平 非 爲 險

● 「須」、嘉本同、阮本作「需」。

言「雲上於天」,是天之欲雨,待時而落,所以明「需」天 是天上有雲,无以見欲雨之義,故云「雲上於天」。若 不云「雨」也。不言天上有雲,而言「雲上於天」者,若 既爲險,又爲雨。 也,故不云「險」也。 雨是已下之物,不是須待之義,故 施而盛德又亨,故君子於此之時「以飲食宴樂」。 《象》曰,「雲上」至「宴樂」。 今不言險、雨者,此象不取 正義 險難 日 坎

日: 以「无咎」。猶不能見幾速進,但得无咎而已。《象》曰 「不犯難行」者,去難既遠,故不犯難而 恒」,常也,遠難待時以避其害,故宜利保守其常,所 ,不敢速進,遠難待時,是「未失常」也 是境上之地,亦去水 但難在於坎,初九去難既遠,故待時在于郊。 初九,「需于郊」至「未失常也」。 遠 也。 「利用恒、无咎」者 行。 「未失常」 正 郊 義

其吉也。《象》曰「須于沙,衍在中」者,「衍」謂 寇,而「小有言」以相 是水傍之地,去水漸近,待時于沙,故難稍 難 「履健居中,以待要會」,雖小有責讓之言,而終得 雖 九二,「需于」至「吉終」。 近 ,猶未逼于難,而 責讓。「近不逼難,遠不後時」, 寬衍 在 其中 也,故 正義 近, 日 「雖 雖 寬衍, 「沙」 小有 未致

周易正義卷第三

言 ,以吉終也

泥

慎則不有禍敗。❶ 敬慎不敗」者,「自」,由也,由我欲進而致寇來,己若敬 之義、未陷其剛之義、故可用「需」以免。 之義,言爲「需」雖復在泥,泥猶居水之外,即災在身外 寇至亦未爲禍敗也。《象》曰「災在外」者,釋「需于 難必害己,故「致寇至」。 」者,水傍之地,泥溺之處。 九三,「需于泥」至「不敗也」。 猶且遲疑而 逼 近於難,欲 需待時,雖即有 「自我致寇 正 進 義 其道 i E

故出此所居之穴以避之,但順以聽命而得免咎也。 也,而處坎之始是居穴者也。② 時于血猶待時於難中也。 進,此六四之陰而塞其路,兩相妨害故稱「血」。 自穴也」。 坤》之上六「其血玄黄」是也。 需于血」者,謂陰陽相傷 象》云"「「需於血」,順以 六四,「需于血 正義曰:「凡稱血 至 故 聽命」也。 「出自穴」者,「穴」即陰之路 有血也。 以 」者,陰陽相傷 「穴者,陰之路也」者、 三來逼己,四 聽 ○注「凡稱血 也。 九三之陽而欲 正 者也 不 義 能 日 至 距 故 上

- 0 敗」下,阮本有「也」字。
- 「是」,阮本同,嘉本無此字。

四 五

其處則爲「穴」也。「穴」之與「血」,❶各隨事義也。爻,若以戰鬬言之,其出則爲「血」也,若以居處言之,處坎之始是「居穴」者也。但《易》含萬象,此六四一居穴」者,「坎」是坎險,若處坎之上即是「出穴」者也,凡孔穴穿道皆是幽隱,故云「陰之路也」。「處坎之始

得正,「需」道亨通,上下无事也。食貞吉,以中正」者,釋「酒食貞吉」之義,言九五居中需,但以需待酒食以遞相宴樂而得貞吉。《象》曰「酒儒于酒食貞吉」者,五既爲需之主,已得天位,无所復「需于酒食貞吉」者,五既爲需之主,已得天位,无所復

進。 之終吉」之義。 言己雖不當位,而以一陰爲三陽之主, 陽乃得「終吉」。 之地,以一陰而爲三陽之主,不可怠慢,故須恭敬此三 應,三來之己不爲禍害,乃得爲己援助,故上六无所畏 九、九二、九三,此三陽務欲前進,但畏于險難不 忌,乃「入于穴」而居也。❷「有不速之客三人來」者, 六人于穴」者,上六陰爻故亦稱「穴」也,上六與三相 有不速之客三人來」也。 速」,召也,不須召唤之客有三人自來。「三人」謂 其難既通,三陽務欲上升,不須召唤而自來,故 上六,「入于」至「大失也」。 《象》曰 「雖不當位,未大失」者,釋「敬 「敬之終吉」者,上六居无位 正義曰:「上 能 前 初

> 人事曲 也。 大失。 象以明人事,待通而亨,須待之義。 去難遠近,須出須處,法此六爻即萬事盡矣,不可皆以 若不敬之則有凶害。 且. 言初時雖有小失,❸終久乃獲吉,故云「未大失. 細比之。《易》之諸爻之例並皆倣此。 「需」之一 卦, 須待難通,其於六爻,皆假他物之 今由己能敬之,雖不當 且凡人萬事,或有 位 亦未 有

■ 乾上 訟。「有孚」至「大川」。正義

往涉危難必有禍患,故「不利涉大川」。 起。「終凶」者,訟不可長,若終竟訟事,雖復窒惕亦有 也。「終凶」者,訟不可長,若終竟訟事,雖復窒惕亦有 也。「終凶」者,訟不可長,若終竟訟事,雖復窒惕亦有 也。「終凶」者,訟不可長,若終竟訟事,雖復窒惕亦有 見大人」也。「不利涉大川」者,以訟不可長,若以配 見大人」也。「不利涉大川」者,以訟不可長,若以配 程,不可 是,若終竟訟事,雖復窒惕亦有 是大人」也。「不利涉大川」者,以訟不可長,若以訟而 是大人」也。「不利涉大川」者,以訟不可長,若以訟而 是大人」也。「不利涉大川」者,以訟不可長,若以訟而 是大人」也。「不利涉大川」者,以訟不可長,若以訟而 是大人」也。「不利涉大川」者,以訟不可長,若以訟而 是大人」也。「不利涉大川」者,以訟不可長,若以訟而

《彖》曰,「訟上」至「于淵也」。正義曰:

^{●「}血」、嘉本同、阮本作「位」。

② 「于」,嘉本無此字。

③ 「雖」,嘉本無此字。

之義。 習常施爲已自不可,❷若更以訟涉難,其不可特甚焉 利見此「大人」者,以時方關争,貴尚居中得正之主 所以 故云「涉難特甚焉」。 所往之處皆不可也。 者,言若性好不和又與人鬭訟,即无處施設而 聽斷之。「不利涉大川,入于淵」者,釋「不利涉大川 大人,尚中正」者,釋「利見大人」之義。 所以於訟之時 凶」之義,以争訟之事不可使成,故「終凶」也。「利見 其「有孚,窒惕中吉」也。 「終凶,訟不可成」者,釋「終 體,❶而處下卦之中,爲訟之主而聽斷獄訟,故訟 以訟得其「有孚,窒惕中吉」者,言由九二之剛來 而得中」者,先疊出訟之繇辭,以「剛來而得中」者 易者則不釋之,他皆做此。 剛」即乾也,「下險」即坎也 此 止乃得吉也。 不閉 訟」義可知,故不釋也。 釋繇辭 上「需」,須也,以釋卦之名,此訟卦不釋「訟」名者 ○注「凡不和」至「應斯任」。正義曰:「无施 訟 其源,使訟不至」者, 若以訟事往涉于川,即必隊于深淵而 也。 之義。 此二句因 前注云「可以獲中言」,❸謂獲中止之吉 「訟,上 「中乃吉」者,謂此訟事以中途而 「涉難特甚焉」者,言好訟之人, 卦之象以顯「有訟」之所 剛 諸卦其名難者則釋之,其名 ,猶人意懷險惡,性又剛健 若能 下險,險而 「訟有孚,窒惕中吉,剛 謙虚 退 讓 健,訟」者,「上 與 物不競 可 陷于難 也,言 而 釋所 者得 向 可 由 下

> 即此 不閉 亦凶矣。 謂 塞訟 是閉塞 雖 每 源 訴 一訟之根源,使訟不至也。 ,使訟得至也。 訟,陳其道理,不有枉曲 「雖每不 今不能 枉 而 而 訟 至終 訟 至終竟 如 **、 竟**,此 (此,是

者

道

契」者,言上之有德,司 之起,只由初時契要之過,謂作契要不分明。「有德司 責於人」。 職分明、不相干涉,即終无所訟也。 防此訟源。 違行」也。 「君子以作事謀始」者,物既有訟,言君子當 者,凡訟之所起,必 人彼此兩相乖戾,故致「訟」也。 亦不須責在下之人有争訟也。 老子》經也。 西 轉,水流東注,是天與水相 《象》曰,「天與」至「謀始」。 正義曰:「訟之所以起,契之過」者,凡屬訟 凡欲興作其事,先須謀慮其始。 剛健在先以 主契要而能使分明以 「有德司契」之文,出 爲訟始,故云「天與水 違 不云「水與天違行 而行,相違 ○注「聽訟」至「不 正 若初始 義 斷於下 而 曰: 行 天

初六,「不永」至「辯明也」。 正 義 日 示

由」,嘉 本同,阮本作「中」。

自」,嘉本同, 阮本作「且」。

言」,嘉本、阮本皆作「吉」。

境、言訟事尚微、故云「處訟之始」也。 始」、「不爲訟先」者。 者,釋「小有言」,以訟 所事」,以訟不可長,故不長此關争之事。 不爲訟先,故「終吉」。《象》曰「訟不可長」者,釋「不永 能不訟,是不獲已而訟也,故「小有言」。 九四剛陽,先來非 言己是陰柔,待唱乃和,故云「不爲訟先」也。 能辯訟道理分明,故初時「小有言」也。 不可終」也。 永所事」者,「永」,長也,不可長久爲鬭 「小有言,終吉」者,言初六應于九四,然 理犯己,初六陰柔,見犯乃訟 正義曰:「處訟之始」者,始入訟 必辯析分明。 四雖初時犯己,己 「不爲訟先」者 訟之事,以「訟 ○注「處訟之 以 處訟之始 「其辯明 · 雖不

百 餘六百夫。 十里爲成,九百夫之地,溝渠、城郭、道路三分去其 云「小國下大夫之制」,又鄭注《周禮・小司徒》云:「方 邑狹少,唯三百户乃可也。 則大都偶國,非逋竄之道。「人三百户无眚」者,若其 邑」者、訟既不勝、怖懼還歸、逋竄其邑。 上與五相敵,不勝其訟,言訟不得勝也。 「不克訟」者,「克」,勝也,以剛處訟不能下物,自下 家。」即此「三百户」者,一成之地也。 九二,「不克」至「患至掇也」。 又以田有不易,有一易,有再易,定受田 「三百户」者,鄭注 鄭注云:「不易 若其 「歸 正 (邑强 《禮記 而 義曰 逋 大 其

> 告。 災」者,如此注意,則經稱「其邑」二字連上爲句,「人三 訟上,悖逆之道,故禍患來至,若手自拾掇其物,言 百户」合下爲句。 必來也。故王肅云:「若手拾掇物然。」〇注 勝,故退歸逋竄也。 乃種。」言至薄也。 「災未免也」。 之田歲種之,一易之田 《象》曰 正義曰: 歸 逋竄」者,釋「歸 苟自 「患至掇」者,「掇」猶拾掇 休 「若能以 藏 隱, 歲乃種 不敢與五 懼 而 歸 ,再易之地 逋邑」,以 竄 其邑,乃 相 敵,則 「以剛」至 也,自下 訟 休 可 之不 无災 免 患

觸忤,无敢先成,故云「无成」。《象》曰「從上吉」者,釋 應於上,上則壯而又勝,故六三或從上九之王事,不敢 在上,衆莫能傾,故「終吉」也。 須貞正,自危厲,故曰「貞厲」。 保全己之所有,故食其舊日之德禄位。 「貞」,正也,「厲」,危也。 「食舊德」者,六三以陰柔順從上九,不爲上九侵奪,故 以 食舊德 六三,「食舊」至「從上吉也」。 」以順從上九,故得其吉,「食舊德」也。 居争訟之時,處兩剛之間,故 「或從王事无成」者,三 然六三柔體不争,係應 「貞厲」者 正義曰

九四,「不克」至「不失也」。 正義曰:「不

之」者,「爲仁由己」,《論語》文。 訟之命也,今乃變之也。「安貞不犯」者,謂四安居 當反從此原本不争之理,故云「反從本理」。「變前之 從之」。正義曰:「若能反從本理」者,釋「復即」之義 理變命,故得安貞之吉,不失其道。 九四 正,不復犯初,故云「安貞不犯」。 命 自 四 克訟」者,九 命」上,故云「變前之命」。「前命」者,謂 復」,反也,「即」,從也,「本理」謂原本不與初訟之理。 ,是爲仁義之道自由於己,故云「爲仁由己」。 」者,解「命渝」也。 渝變休息,不與 既能 《象》「安貞不失」者,釋「復即 訟既不勝 示 勝 反從本理 也。 四 若能 既 復即 非 初 ,渝變往 理 訟 反就本理,變前與初争訟之命,能 命 「渝」,變也。 陵 渝」者,「復」,反 故 犯 於 云「復即命渝」。 前 初, 争訟 初不犯己,己 初 「爲仁由己,故吉從 命渝」之義,以其反 之命,即得安居貞 〇注「處上」至「吉 但 能 倒經 也,「 分 辯 往前共 即,就 道 「安貞 「渝」字在 理,故 莫陵 初 吉 也 於 貞 相 九

則 訟得大吉者,以九五處中而 吉」也。《象》曰「以 不 元 有 吉」者,處得 九五,「訟元吉」至「中正也」。 邪 曲 中 正 爲德 尊 中 位 Ė 故 中 也 前 元吉 得正位,中則不有過差,正 一者,釋「元吉」之義。 且 正以 0 斷 注 獄訟,故 「處得」至 正 義 得「元 所以 日

> 必以 中正 之德 也。 也。 故諸卦皆五居尊位。諸爻則偏主一事,猶若六卿 古。 上《彖》辭 之類是也。 主 以然者,五居尊位,猶若天子摠 復之尊位,爲復卦尊位之主,如此之例非一 復卦初九是復卦之主,「復」義 矣。五是其卦尊位之主,餘爻是其卦 是五又爲 二爲主也; 之人凡有二主。 當争訟之時,是主斷獄 (實)針 禮、秋官主刑之類偏主一事,則 若卦由 何, 爲九二者,凡上下二象 即六卿 ,其五與二爻,其 正 云「柔來而文剛」, 義曰: 0 主也。 「剛來而得中」,今九五《象》辭云「訟 知《彖》辭 摠歸 此注又云「爲訟之主,用其中正以 五位,五又居尊,正爲一主也,若比 今此訟卦二既爲主,五又爲主,皆 案: 處 一卦兩主者,凡諸 於天子,諸卦之爻皆以九五 得 義同然也,故 上注云「善聽之主其在 尊 「剛來得中」非 訟者 位 是離下艮上而稱「柔來」。今 爲訟之主」者,居 在於下象者則稱 也。 在于初九也。 統 然此卦之内, 其 萬機,與 俱以爲 杜 據九五 餘 之内 爲義之主,猶 諸爻各 主 · ; 如 萬 也 九 卦 也。 六五 斷 二乎」,是 「來」,故 元吉,以 物 五 有斷 之九 爲尊 主 此 斷 也。 在直 爲 之位 春官 亦 者 獄訟 主 嗣 獄 若 Ŧī. 位 事 所 居 名

❶ 「何」,阮本作「也」。

故云「以斷枉直」。 故云「以斷枉直」。 「往」,非類而稱「來」也。「以斷枉直」者,「枉」,曲也。 下卦向上卦稱「來」也,故《需》上六有「不速之客三人 下卦向上卦稱「來」也,故《需》上六有「不速之客三人 水」,謂下卦三陽來。然需上六陰爻,陽來詣之,亦是 來」,謂下卦三陽來。然需上六陰爻,陽來追之,亦是 水」,可之不。 此云「剛來而得中」,故知九二也。且凡云「來」者,皆

帶也。 假外物之象以喻人事。 也。」此訟 朝之間三被褫脱也。 以其因訟得勝受此錫服,非德而受亦不足可敬,故終 可長久,終一朝之間三被褫脱,故云「終朝三褫之」。 蒙錫,則可長保有,若因訟而得勝,雖或錫與鞶帶,不 之鞶帶」者,上九以剛居上是訟 .坤》之六三「或從王事无成」之類是也。 「鞶帶」謂大 或有」如此、故言「或」。 象》曰「以訟受服亦不足敬」者,釋「終朝三褫」之義。 上九,「或錫」至「敬也」。 故杜元凱桓二年傳「鞶厲旒纓」注云:「鞶,大帶 卦及爻辭並以人事明之,唯「不利涉大川 凡言「或」者,或之言「有」也,言 則上云「或從王事无成」及 而得勝者也,若以謙讓 正義曰: 「或錫

開 國子祭酒上 國 一子臣孔 護軍曲 (達奉 阜縣 勑 撰

坤上 師,貞,丈人吉,无咎。正坎下師,貞,丈人吉,无咎。正 穎 ·義曰:

罪,❷故云「興役動衆无功,罪」也。 則有功勞乃得无咎。若其不以威嚴,師必无功而有其 義曰:「興役動衆无功,罪」者,監臨師衆當以威 不能齊衆,必有咎害。 主領乃得「吉无咎」。若不得丈人監臨之、衆不畏懼、 人」謂嚴莊尊重之人,言爲師之正,唯得嚴莊丈人監臨 師,貞,丈人吉,无咎」者,「師」,衆也,「貞」,正也,「丈 ○注「丈人」至「乃无咎也」。 嚴, 正

爲衆也。 或訓爲長、恐此「師」名取法之與長、故特明之、「師」訓 之名并明用師有功之義。 師,衆也,貞,正也,能以衆正可以王矣」者,此釋師卦 彖》曰,「師衆」至「何咎矣」。 「貞」爲正 也。 「貞」之爲正,其義已見於此 但「師」訓既多,或訓 正 義 爲法, 日

易

IE.

義卷第四

以得其吉,又何无功而咎責乎? 可行師得吉也。 剛中而无應,或有應而不剛中,或行險而不柔順,皆不 也。 人吉,无咎」也,言丈人能備此諸德也 者,「毒」猶役也,若用此諸德使役天下之衆,人必從之 而順」者,「行險」謂下體坎也,而「順」謂上體坤 「剛中而應」者,「剛中」謂九二,而「應」謂六五。 「行險 復云「貞,正」者,欲見齊衆必 與下文爲首引之勢,故云「能以衆正可以王矣」。 「以此毒天下而民從之, 吉又何咎矣. 須以 自「剛中」以下釋「丈 正,故訓「貞」爲正 也。

衆。若爲人除害使衆得寧,此則「容民畜衆」也。 之中,亦是「容民畜衆」之義。所以《象》稱「地中有 師之主,雖尚威嚴,當赦其小過,不可純用威猛於軍 子以容民畜衆」者,言君子法此師卦容納其民,畜養其 若其不然,或當云「地在水上」,或云「上地下水」,或云 水」、欲見地能包水、水又衆大、是「容民畜衆」之象。 「水上有地」,今云「地中有水」,蓋取「容畜」之義也。 《象》曰,「地中」至「畜衆」。正義曰: 初六,「師出」至「失律凶 也。 正義曰: 又爲 「君 師

0 衆」,嘉本同,阮本作「旅」。

2 有」,嘉本同,阮本作「獲」。

經義。 皆爲凶 不 制 師之體,理 不容赦,故云「何異於否」。 之義。「令」則法律也,若失此法令,雖有功勞,軍 否」者,若棄失法律,不奉法而行,雖有功而 首,先唱發始,是齊整師衆者也。 齊師者也」者,以師之初爻,故云「爲師之始」。在師之 言所以必須以律者,以其失律則凶。 律行師,无問 制整齊之,故 於「否」也? 臧凶」者,本意 齊師衆者也。 臧」謂 否」配之,欲盛言臧凶,不可單言, ,制宜,不必皆依君命 可赦耳。 時施行 也。 有功。 ○注云「爲師」至「皆凶」。 師 出 非 《象》曰 以 「失令有功、法所不赦」者,解 云「師 「否」之與「臧」,皆爲凶也。 然「否」爲破 既 律 若苟順 所 齊整師衆,使師 者,「律」, 明,雖臧 量 「失律凶」者,釋「師 出 私情 事 以 何得 律 制 亦凶。 敗即是凶也,何 宜 然關 法也,初六爲師之始,是 故違君命 也。 有功「法所不赦 隨 「否臧 時 外之事將軍 正義曰:「爲師之始 出之時,當須以 「失律而臧,何異於 「臧」文既單, 故云「否」之與「臧 進退 反經之文,以明 犯 <u>الله</u> 出 「否」謂破敗、 律 ,此則將 以律」之義。 「何異於 須 者,若其失 觸 「臧」,何異 法 所 更云「否 裁,臨 法所 故以 軍 凡 其 則 否 所 爲 法 整 事

九二,「在師」至「萬邦也」。正義曰:「在

馬。 字,故「吉」屬「師中」也。「故乃得成命」者,案《曲 吉,承天寵」者,則似「吉」字屬上。 謂承受五之恩寵,故「中吉」也。 兼該,故注文屬下、《象》文屬上,但《象》略其「无咎」之 至「成命」。 命。《象》曰「承天寵」者,釋「在師中,吉」之義 云「三賜不及車馬」,一命受爵,再命受服,三命受車 有 故吉乃无咎。 師 「无咎」者,承上之寵,爲師之主,任大役重,无功則 在師中」爲句,其「吉」字屬下,觀《象》之文,「在師中 功,能招懷萬邦,故被「王三錫命」也。 中,吉」者,以 三賜三命而尊之得成,故「乃得成命」也。 正義曰:「在師 「王三錫命 剛 居 中 而 」者,以 應於五,是「在 而得 「懷萬邦也」者,以 其 中」者,觀注之意,以 此「吉」之一字上下 有功,故王三 師 ○注 中, 吉 「以剛 也 加 也 凶 其 正 錫

「以陰」至「之凶」。 者,釋「與尸」之義。 所守,以此用師 或輿尸,凶」者,以陰處陽,以柔乘剛,進 一之剛,己又以陰居陽,是「退无所守」。 六三,「師 或有輿尸之凶。 或」至「无 正義曰:「退无所守」者 以其「輿尸」,則大无功也 功 《象》曰「大无 也」。 无所應,退 正 倒 義 退 日 功 而下, ○注 无 師

左次,无咎」者,六四得位而无應,无應不可以行,得位六四,「師左」至「失常也」。正義曰:「師

故《漢書·韓信》云:「兵法欲右背山陵,前左水澤。」次之」。正義曰:「行師之法,欲右背高」者,此兵法也。義。以其雖未有功,未失常道。○注「得位」至「故左次,止,則无凶咎也。《象》曰「未失常」者,釋「无咎」之則可以處,故云「師左次,无咎」。故師在高險,之左以則可以處,故云「師左次,无咎」。故師在高險,之左以

義曰:「往必得直」者,見犯乃行,①欲往征之,則於理 子則軍必破敗而輿尸,是爲正之凶。莊氏云:「長子謂 也。 正 辭云「長子帥師,以中行也」,是九二居中也,「弟子輿 九二,德長於人,弟子謂六三,德劣於物。」今案:《象 長子、弟子之等。 爲軍帥,己又是陰,身非剛武,不可以親行,故須役任 不直則有咎。 則可誅之。此假他象以喻人事,故「利執言,无咎」,己 王者守國非叛者所亂; 犯苗,若往獵之則无咎過也。 有禽、利執言」者、柔得尊位、陰不先唱、柔不犯物、犯 而後應,往必得直,故往即有功。 、,使不當也」,謂六三失位也。 ○注:「往必得直。」正 直 「長子帥師,弟子輿尸,貞凶」者,以己是柔,不可 ,故云「往必得直」。 六五,「田有」至「不當也」。 己今得直,故可以執此言往問之而无咎 若任役長子則可 禽之犯苗則可獵取,叛人亂國 人之脩田非禽之所犯 猶如田中有禽而來 以帥師,若任用弟 正義曰:「田

> 也」者,若用小人必亂邦國,故不得用小人也。 以正功也」者,正此上六之功也。「小人勿用,必亂邦侯,若其功小,使之承家爲卿大夫。「小人勿用」者,言侯,若其功小,使之承家爲卿大夫。「小人勿用」者,言好。言天子爵命此上六,若其功大,使之開國爲諸子也。言天子爵命此上六,若其功大,使之開國爲諸子也。言天子爵命此上六,若其功大,使之開國爲諸子也」者,若用小人必亂邦國,故不得用小人也。

■ 坎上 比。「吉」至「後夫凶」。正義

《彖》曰,「比吉」至「道窮也」。正義曰:

❶ 「行」,嘉本同,阮本作「得」。

之主 也。 之義。 相 則 情,得久長 唯元永貞乎」者、「原」謂原窮比者根本、「筮 也,「永」,長 比之情,以求久長 注「處比」至「九五乎」。 正義曰: 來,比道窮困,无人與親,故其凶 之,於此之時,陰往比陽,羣陰未得其所,皆未寧也 釋「不寧方來」之義。 得「原筮、元永貞、无咎」也。 筮,元永貞,无咎,以剛中」者,釋「原筮,元永貞,无咎」 順從九五也。 「下順從」者,在下之人順從於上,是 後夫凶,其道窮」者,釋「後夫凶」。 比 雖 而 求,了比 也」者,釋「比」所以 吉 永貞 无明主照察,不被上知 ,剛而處中,能識「比」者之情意,故使「比」者得保 使永貞而无咎者,其唯九五 所以得如此者,以九五剛而處中,故使比者皆 [也]者 永 」者雖各懷永貞 而猶未足免於咎」者,若不逢遇明 貞 而 也、爲己有大長、貞正乃能原筮相親比 无咎,謂 久而 自此已上,釋「比」名爲「吉」之義。 親 无咎。 比 无咎,其唯 以九五處中,故上下羣陰皆來應 彼此 爲 得 善,言 而猶未足免離於咎。 「其唯 古, 相親 ,相親涉於明 「不寧方來,上下應」者 由 九 相 比 也。 元 「將原筮以 比 親 五. 乎」者,使「比」者 也。 永 乎? 比 者 他悉親比,己獨 相 此謂上六也。 貞乎」,「元」,大 而 人 「若不 輔 來 得 黨,故不免咎 助 以 吉 求无 一謂 主 相 也 九 也。 ·遇其 雖有 , 謂 輔 五 則 筮決 咎,其 助 爲 彼 衆陰 主 也 比 比 永 此 之 求 後 得

> 在 永貞、无 親成則誅 後 而來,衆則 M 咎 」者,彼 也。 嫌 其離 此相 注 貮 比 將 皆速來 所以 合」至 被誅 爲 二以 親,親 而 X X 也 也 道 __ 린 正 成 義 曰 :

相親比 比 身,故云「親」也。 友之。「萬國」據其境域,故曰 萬國親諸侯」,非諸侯已下之所爲,故特 建萬國」謂割土而封建之,「親 也。 猶 象》曰 地上 有 地上 水 地 流通 上」至「諸 有 相潤 水 「建」也。 猶域中有萬國,使之各 諸侯 及物,故 侯」。 謂 「諸侯」 云地 爵賞恩 云「先 正 義 上 」謂其 \exists 王 有水 : 亡也 而 「建 君 親

應不在 也。 在一」,故「心无私吝」也 吝。」正義曰: 之缶,以 得无咎。 莫大焉。必有誠 孚比之,无咎」者,處比之始,爲比之首,若无誠 心 人而已,更有它人並 无私 此假外象 初六,「有孚」至「它吉也」。 |各|也。 一,心无私吝,莫不比之。 此 「有孚盈 待物,物皆歸 喻人事 應不在一」者,初六无應是應不在 若心 信 缶 而相 ,終來有它,吉」者,身處 有偏應 也。 來而得吉,故云「終來有它,吉 親 向,從始 比,終始如一,爲之誠 ○注:「應不在 即 私有愛吝也 有此孚信,盈溢質素 至終尋常 Œ 一, 心 恒 義 ,以「應不 來, 比 E. 之首 信 信 无私 非 乃 有 唯 禍

之自内」之義,不自失其所應之偶,故云「比之自内,不已,不如初六「有它吉」也。《象》曰「不自失」者,釋「比悉來,唯親比之道自在其內,獨與五應,但「貞吉」而「比之自內,貞吉」者,居中得位,係應在五,不能使它「比之自內,「比之」至「不自失也」。正義曰:六二,「比之」至「不自失也」。正義曰:

比皆非其親,是以悲傷也。四自外比,二爲五應,近不相得,遠又无應,是所欲親「比之匪人,不亦傷乎」者,言六三所比皆非己親之人,六三,「比之,匪人」至「傷乎」。正義曰:

上」也。

一八四,「外比之」至「從上也」。正義曰:
一八四,「外比之」,上體爲外,六四比五,故云
所以「貞吉」。凡下體爲內,上體爲外,六四比五,故云
所以「貞吉」。凡下體爲內,上體爲外,六四比五,故云
不四上比於五,故「外比」也。● 居得其位,比不失賢,
六四十八四,「外比之」至「從上也」。正義曰:

於「前禽」也。「顯比」之道,與己相應者則親之,與己凡「三驅」之禮,禽向己者則舍之,背己者則射之,是失用三驅,失前禽」者,此假田獵之道以喻「顯比」之事。應於二,顯明比道,不能普徧相親,是比道狹也。「王應於二,顯明比道,不能普徧相親,是比道狹也。「王九五,「顯比」至「使中也」。正義曰:五

也。 亦不失。「夫三驅之禮」者,先儒皆云「三度驅禽而射 者與來向己者皆悉親附,无所失也。 失」者,若比道弘闊,不偏私於物,唯賢是親,則背己去 王者之身,堪爲王者之使,以居中位,故云「上使中」 使,得其中正之人,伐不加邑,動必討叛,不横加无罪 誠」之義,所以己邑之人不須防誠,止由在上九五之 是「失前禽」也。「邑人不誠,上使中」者,釋「邑人不 己者則舍之而不害,禽順去背己而走者則射而取之, 不相 止由在上「使中」也。「中」謂九五也,此九五雖不得爲 云「顯比之吉」。「舍逆取順,失前禽也」者,禽逆來向 中」者,所以「顯比」得吉者,以所居之位正而且中,故 「邑人不誠」而爲「吉」,非是大人弘闊之道,不可爲大 不妄加討罰,所以己邑之人不須防誡而有吉也。 人之身,❷但可爲大人之使。《象》曰「顯比之吉,位 「邑人不誡,吉」者,雖不能廣普親比 「王用三驅,失前禽」也。 ○注「爲比」至「之道」。 應者則疎之,與三驅 田 言「顯比」之道 正義曰:「去之與來皆无 獵、 愛來惡去相 ,於自己相親之處 言去亦不失,來 似 於此也 似,故云 至于 正

- ●「故」、嘉本同、阮本作「欲」。
- ❷ 「身」,嘉本同,阮本作「道」。

逆。 伐也。云「雖不得乎大人之吉,是顯比之吉」者,以 討有常,伐不加邑,動必討叛」者,此九 五居上之位,若爲行 云「用其中正」也。 如三驅所施愛來憎去,則失在前禽也。 之」也。 去」者、來則舍之是愛於來也、去則射之是惡於去也、 己、趣己,故左右及於後皆有驅之。「愛於來 以爲「三面 比」道弘通也。「可以爲上之使、非爲上之道 象》云「顯比」之吉,其「比 故其所施常失前禽」者,言獨「比」所應則所比 `非是爲王之道,故云「非爲上之道」。 所伐之事,不加親己之邑, 興師動衆,必欲討其叛 二以其「顯比」親者,❶伐所不加也。 三度則已,今亦從之,去則射之。 著人驅 禽」,必知「三面」者,禽唯有背 心既中正,不妄喜怒,故征 如此,身雖爲王,止可爲上使之 」狹也,若「大人之吉」,則 五居中 「用其中正,征 叛者,必欲征 褚氏諸 得 」者,九 伐 而 爲失 正,故 有常 惡 儒 於 皆 向

在

者,釋「比之无首 後、是親比於人无能爲頭 无首,凶」者,謂无能爲頭首。 能與之共終也。 獨在後,衆人所棄,宜其凶 上六,「比之无首」至「所終」。 二,既 不能爲比 以首也。 之初首 也。《象》曰 它人皆「比」,己 它人皆「比 被人所 」,親道已 正 「无所終 義 獨 日 在

> 密雲由在我之西郊,去我既遠,潤澤不能行也,但聚 物 也。 雨也。今唯能畜止九三,其氣被畜但爲密雲,初九、九 巽在於上,乾在於下,巽是陰柔,性又和順,不能止 九二猶剛健得行,是以剛志上得亨通,故云「小畜亨」 「密雲不雨」者,若陽之上升,陰能畜止,兩氣相薄則 猶自上通,所以不能爲 下之乾,唯能 能止此乾之剛健,所畜者大,故稱「大畜」。 若大畜,乾在於下,艮在於上,艮 小畜,亨」者,但小有所畜,唯畜 巽 乾 上 下 畜止 小 畜。 九三,所 雨 亨 也。 畜狹 「自我 至 小,故名「小 九三而已。 是陽卦,又能 西 西郊」者,所 郊 此 初 畜 卦 正 九 在 聚 爲 則 畜 IL. 義

下 應之,故曰「小畜」。 六 以陰居陰故稱 柔得 四唯畜其下九三,初九、九二猶 應之」者,若細别而言,小畜之義唯當畜止在下,三 位而上下應之曰小畜」者,「柔得 《彖》曰,「小畜」至「未行也」。 「得位」,此卦唯 此釋小畜卦 有 名也。 一陰,上下諸陽皆來 不 能 擁畜。 位 言此卦之畜 謂 正 而 義 云上 四 日 也

西

郊而已。

爻,其 若在國 不能 義。 不被九三所陵,得安於上,所以「既 能 陰,是以皆不雨也。 在國 行」,今言在 澤未得流行周徧,故不 陽,初九、九二猶得上進,陰陽氣通所以不雨,釋 不雨」也。 行,❷以此言之,故剛健之志乃得亨通,此釋「亨」 能 陽 復道」,九二可「牽」以獲「復」,皆得剛健上通,則 密雲不雨 卦 摠 自「復」,更 健 畜 固其路而安於上」者,謂上九能閉固九三之道路 固陽。 都 而論之。 所 止 應 而 不 正 義别也。 都, 而 以 外 剛 能 六 義曰:「九三更以不能復爲劣」者,初 密密 不雨,亦是「施 四、故 「自我西郊,施未行」者,釋「自我西 逢 健 畜 尚往 雨 而 也。 盡 「西郊」, 柔 雲 爲劣弱,故言「九三更 「能爲小畜,密雲而已」者,此明卦之與 雖未 九三劣弱,又不能 但 順,剛 但卦摠二象,明上體 不 云「上下應之」。 「健而 」者,所以「密雲不雨」者,不能 雨」,從我西郊 畜九三而已, 落,猶有覆蔭之施,不得云「施 且小畜之義貴於上往,而 去施 發 覆國 巽,剛中而志行乃亨」者,内既 未行」也。 於中,●不 遠 都,但 也。 若大判 自 而 其 ○注 遠 必云在「西郊」者,❸ 不能 被 四 雨 積聚者,猶 不 「復」,則 聚 既 雖 擁 能 而言之,上下 「小畜」至 西郊也。 處」也。 閉 抑 應何妨,摠不 復 固 爲 是 而 下體,所 劣」也 九三不 九既 陽 志 所 畜止 郊」之 故舉 不薄 然雲 是 施 意 一既 也 陰 得 未 浬 諸 得 五

> 也; 三,所以上九而 、爻義相違反,它皆倣此 密雲不 復》卦云「復亨」,上六云「迷復凶」也。 若比卦云「比吉」,上六則 能 爲 雨。 有 雨 也。 爻則 止 所 明一爻之事, 以 桂 與爻其 云「比 義 之无 E 異 九 此皆卦 也 首 能 , 凶 諸 固 之 九 掛

以

義。 子以 違 卦云「君子以作事謀始」,防其所訟之源,不取「天與水 名,因其卦義所有,君子法之須合卦義行事者: 象》云「上天下澤,履,君子以辯上下」,取上下尊卑之 師,君子以容民畜衆」,取卦象包容之義,若《履卦 子」所取之義,或取二卦之象而法之者:若「地中有水 去物既遠,无所施及,故 天下則施附於物,不得云「施未行」也。 君子之人但脩美文德,待時 行 如此之類皆取 懿文德」者,「懿」,美也,以於其時, 「象》曰,「風行」至「文德」。 若《小畜》「君子以 二象,君子法以爲行也。 日 「風 而 行天上」。 發。 懿文德」,不取 風爲號令,若風 凡大《象》「君 今風在天上 施 正 未得 -義曰: 或 若《訟 直 行, 取 行 卦 喻 君

⁰ 中 本 同, 阮本作「外」。

擁」,嘉本同,阮本作「摧」。

西」,嘉本無此字。

上」之象。餘皆倣此。

柔,其義於理吉也。 其咎? 吉」。《象》曰「其義吉」者,以陽升陰,以剛應自用己道,四則順而无違,於己无咎,故云「復自道,何處乾之始以升巽初,四爲己應,以陽升陰,反復於上,處乾之始以升巽初,四爲己應,以陽升陰,反復於上,

復吉」也。

九二、「牽復」至「自失也」。正義曰:「牽復吉」也。

(象)曰「牽復在中、亦不自失」者、既彊牽連而復在下畜之極、不閉固於己、可自牽連反復於上而得「吉」也。

(本)、一、「牽復」至「自失也」。正義曰:「牽

事也 輻。 夫不 能 陽被長女閉固,不能 (象》曰「不能正室」者,釋「夫妻反目」之義。 以九三之 欲復而進,上九固 ·夫妻反目」者,上九體巽,爲長女之陰,今九三之 九之室,故「反 輿説 而止之,不可以行,故 自復,夫妻乖戾,故反目 至「正室」。 目」也。 此假 正 象 車輿 義 以 E. 1相視。 喻人 八説 其 九

血去惕出,无咎」者,六四居九三之上,乘陵於三,三既六四,「有孚」至「合志」。正義曰:「有孚,

唯 於血」,注云「凡稱血者,陰陽相 「夫」者、發語之端、非是摠凡之辭。 「夫言血者,陽犯陰也」者,謂此卦言「血」,陽犯陰也, 釋「惕出」之意。所以「惕出」者,由己與上九同合其 於三、三不能害己、故得其血 惕懼也。 志,共惡於三也。 去懼除乃得「无咎」。 務進而己固之,懼三 「陽犯陰」也。 但上九亦憎惡九三,六四 ○注「夫言」至「无咎也」。正 《象》曰「有孚惕出,上合志」者, 害己,故有「血 去除,其惕出散,信 傷也」,則稱「血」者,非 [與上 故《需》六四云「需 也,畏三 九同 志,共惡 義 陵,故 Î: 能 血

二也。 義。 鄰。 者,五是陽爻,即必富實,心不專固,故能用 有信而相牽攣也。「如」,語辭,非義類。「富以 而來,己又攀攣而迎接,志意合同 攣如」者,五居尊位,不疑於二,來而不距。 「鄰」謂二也。《象》曰「不獨富也」者,釋「攣如」之 所以攀攣於二者,以其不獨自專固於富,欲 九五,「有孚」至「獨富」。 ,不有專固 正義 二既 曰:「有 富 相 以 其鄰 逼,是 牽挽 分 與 其 孚

雨也。「既處」者,三不能侵,不憂危害,故己得其處雨既處」者,九三欲進,己能固之,陰陽不通,故己得其上九,「既雨」至「所疑也」。 正義曰:「既

也。 也。 言所以 畜止剛 之善畜」者,謂雖 雨。」今九三之陽被上九所固,不獲亨通,故「既 陽若亨通則 處小畜盛極,是閉畜者也。 畜」至「征凶」。 被陽有所疑忌,必見戰伐,故「征凶」也。 者,釋「君子征凶」之義。 使人慕尚,故云「既雨既處」也。「君子征凶,有所疑 者,陰疑於陽必見 也。 也。 ○注「夫處」至「征之輻」。 幾望」者,婦人之制夫,猶如月在望時盛 三是婦制其夫,臣 (象)日 幾」,辭也,已從上釋,故於此不復言也。「君子征 陵」者,② 坤之順從」者,謂 言慕尚此道德之積載也。 異雖不能 故可得少進」者,謂初九 尚 得「既雨既 既 健,●慕尚 德載」者,體巽處上, 雨 九三欲陵上九,被上九所 不雨也,所以卦繇辭云「小 既 正義曰:「處小畜之極能畜者也」者,已 如艮之善畜」,故其畜小也。「 處,德 不能如大畜艮 此德之積聚而運 制其君,雖復貞正 處」者,以上九道德 戰伐,雖復君子之行 猶不肯如 積載」者,釋「既雨既處」之義。 言所以「征凶」者,陰氣盛 正義曰:「夫巽雖不能 「陽不獲亨,故既雨也」者 剛 泰卦,坤 九二得前進也。 「婦貞厲」者,上九制九 不敢犯,爲陰之長,能 卦 載也,故云「尚德 在上,善畜 而 固, 積 在 近危厲也。 畜亨,密雲不 是不 聚 極 於上 而亦 ○注「處小 以敵日 可以 可 順 猶 下 兩」也。 「不可 運 [X] 從乾 不肯 之 乾 若艮 也。 「月 滿 載 也 X

> 也。 車 下 説,則是「説征之輻」,因上九「征凶」之文,「征」則行 者, 輿之有輻,可以征行, 九三爻有「征 但有「説輻」,无「征」之文,而王氏言上九「説征之輻 上九畜之「積極」,故能説 二,畜道既弱,故初、二可以 九三也。「是以四、五可以進」者,四雖畜 者,小畜之道既微,積其終極至於上九乃能畜 上九「道乃大行」,无所畜也。「小畜積極而後乃能 已,畜極則通,四、五畜道既極至於上九,无可所畜,故 而不已,謂之「大畜」。四爻、五爻是畜之盛極而 五至于上九,道乃大行」者,此論大 陵 劇也。」 縛木與軸相連,鈎心之木」是也。《子夏傳》云: 也。 文雖不言,於義必 「畜而 不已,畜 有言「輻」者。 極則通,是以其 此九三征 進。「上九説征之輻」者 行之輻。 畜 鄭《注》云「謂輿 一義。 義 畜之盛在于 也。 初,五 今輿 也 大畜,畜 ,謂 輻 雖 不休 四 既 畜 畜

Ⅲ 战上履虎尾,不咥人,亨。正義曰:

作「止」,是也。」 作「止」, 嘉本同, 阮本作「正」。 阮校云: 「閩、監、毛本

② 「可盡」,阮本同,嘉本作「可得盡」。

見咥齧于人。此假物之象以喻人事。應乾剛,雖履其危而不見害,故得亨通,猶若履虎尾不之甚。「不咥人,亨」者,以六三在兑體,兑爲和説,而三以陰柔履踐九二之剛,履危者也,猶如履虎尾,爲危「履虎尾,不咥人,亨」者,履卦之義,以六三爲主。六

也。 也。 所 也。 由 以 説應於剛,故得吉也。 應剛无所見害,是以履踐虎尾,不咥害於人,而得亨通 説,應於上九,上九在乾體。 兑自和説應乎乾剛,以 爻,在九二陽爻之上,故云「柔履剛」 人,亨」者,釋「不咥人,亨」之義。 履,柔履剛」者,言履卦之義是柔之履剛。❶ 釋也。 德之光明故也。 剛處中得其正位,居五之尊,❷是「剛中 此釋履卦之義。 若以和説之行而應於陰柔 「而不疚光明」者,能以剛中而居帝位,不有疚病! 象》曰,「履柔」至「光明也 此二句贊明履 「説而應乎乾,是以履虎尾,不 「剛中正履帝位 ,則是邪佞之道 六三在兑體, 兑爲 卦德義之美,於經无 也。 」者,謂九 「履」謂 正履帝位 正 六三陰 義 五 由 履 日 也 以 説 踐 和 咥

此履卦之象以分辯上下、尊卑,以定正民之志意,使尊子以辯上下,定民志」者,天尊在上,澤卑處下,君子法《象》曰,「上天」至「民志」。正義曰:「君

覆 卦卑承尊之義,故云「上天下澤,履」。 履,禮也,在下以禮承事於上。 履踐於下,六三履九二也,若以二卦上下之象言之,則 卑 取義,不可定爲一體故也。 有序也。 但 此履 卦 名含二義: 此象之所言,取上下二 若以爻言之,則 但易含萬象,反 在 上

六〇

則物无犯也。」 往」,它人尚華,己 素履往无咎」者,處履之始而用質素,故往而无咎。 不以質素則有咎也。 初九、「素履」至「行願」。 獨 質素,則何咎也? 《象》曰「獨行願」 正義 者,釋「素履之 故獨 E : 行所願 初 九 若

踐之道貴尚謙退,然後乃能踐物, 0 危險而自亂也。 《象》曰 「幽人貞吉」者,既无險難,故在幽隱之人守正 於謙退、己能謙退、故「履 「履道坦坦」者,「坦坦」,平易之貌,九二以陽處)注「履 九二,「履道」至「不自亂也」。 「中不自亂」者,釋「幽人貞吉」,以其居 道」至「其吉」。 既 能 謙 正 退幽居,何有危險自亂之事? 義曰: 道坦坦」,平易 履 履又爲禮,故 道 尚謙 无 正 中,不以 險 「尚謙 義 陰,履 一得吉 難 E: 也

^{●「}剛」,原作「則」,據嘉本、阮本改。

② 「五」,嘉本同,阮本作「九五」。

與顯 然以 貞正 也。 吉」者,以其在内卦之中,故云「在幽」也。 居外爲榮,處内爲屈。 也。 居 在心 陽 處陰,尚 内履 在 齊等,故曰 [幽能行此正,故曰「宜其吉」。 中 於謙 ·, 隱 顯 隱 德,「居 同 若居在外,亦能履 顯 者 同」也。 内履中」,以 履 道 在 尚 謙 幽 信爲道 中謙退,隱之 , 不 謙 而 而得 喜 貞,宜其 處 不以 中是 盈

也。 居陽 能視 爲于大君」,所以 行 履」,足既蹇跛,假使能履,行不能遠,故云「不足以 眇,假使能視,无多明也。 甚。《象》曰「不足以有明」者,釋「眇能視」物,目既隆 以 爲明也,以此履踐 者,緣居位不當,謂以陰處陽也。❷ 「志剛」者,釋 自爲於「大君」,以六三之微,欲行九五之志,頑愚之 凶也。「武人爲于大君」者,行此威武加陵於人, 也。 而 「履虎尾,咥人,凶」者,以 而又失其位,以此視物猶如眇目,自爲能視,不足 跛能履」者,居「履」之時 六三,「眇能」至「志剛 處陽,是志意剛 「位不當」者,釋「咥人」之「凶」,所以被咥見 陵武 猶如跛足,自爲能履,不足與之行 加 也 人欲爲大君,以其志 「不足以與 此履虎尾咥齧於人,❶所 當須謙退,今六三以 也。 行」者,解 正義曰: 意剛 「武人 跛能 與 欲 M 陰 眇

九四,「履虎」至「志行也」。正義曰:「履

者,釋「愬愬,終吉」,初雖「愬愬」,終得其吉,以謙志得 以陽居陰,意能 以 虎 尾,愬 陽承陽、處嫌隙之地,故「翹愬」危懼 ,故「終吉」也 愬 者, 謙 逼 近 退,故終得其吉 五之尊 位 是 履 也。 虎 也。 尾」, 《象》曰「志行 「終吉」者 近 其危 也

地故也。 厲」之義。 陽居尊,故危厲也。《象》曰「位正當」者,釋「夬履,貞 之位,不得不決斷其理,不得不有其「貞厲」,以位居此 故夬履也。「貞厲」者,「厲」,危也,履道惡盈,而五以 履」者,「夬」者,決也; 九五,「夬履」 所以「夬履、貞厲」者,以其位正當處 得位處尊,以 至「正當也」。 剛決正,履 正 義 道 曰 在九 行正 一夬 Ŧī.

不危,是其不墜於禮,❸而能旋反行之,禮道大成,故吉」者,「旋」謂旋反也,上九處履之極,下應兑説,高而視其所履之行,善惡得失,考其禍福之徵祥。「其旋元履考祥」者,「祥」謂徵祥,上九處履之極,履道已成,故 上九,「視履」至「有 慶也」。正義曰:「視

[「]此」,阮本同,嘉本無此字。

[「]謂」,嘉本同,阮本作「爲」。

[「]禮」,嘉本同,阮本作「履」,下文「禮道」之「禮」同。

在上「元吉」也 既以「元吉」而在 「元吉」也。 《象》曰 上九,是大有福 「有大慶」者,❶解「元吉在上」之義 慶也。 以 有 福 慶,故

— 坤 乾 上 下 泰,小往大來,吉,亨。 īΕ. 義曰:

通,多失其節,故不得以爲元始而利貞也。 云 以此吉而亨通。此卦亨通之極而四德不具者,物既大 小往大來,吉,亨」者,陰去故「小往」,陽長故「大來」, 「財成」、「輔相」,故四德不具 所以《象

中釋「小往大來,吉,亨」也 君子而外小人,君子道長,小 據其象,内健外順明其性,此説泰卦之德也。 陰,内健而外順」,内健則内陽,外 爻,健順言卦 君也,「下」謂臣也,君臣交好故志意和同。「内陽 者,止由天地氣交而生養萬物,物得大通故云「泰」也 卦「小往大來,吉,亨」名爲「泰」也。 上下交而其志同」者,此以人事象天地之交,「上」謂 泰,小往大來,吉,亨,則是天地交而萬物通」者,釋此 《彖》曰,「泰小」至「道消也」。 ,此就卦爻釋「小往大來,吉,亨」也。 人道消」者,更就人事之 順則外 所以得名爲「泰」 陰,内陽 正義 陰陽言 而外 外陰 日 : 「内

> 言[后]也。 者,以不兼公卿大夫,故不云「君子」也。 安其性、得其宜、據物言之、故稱「宜」也。 若天氣大同則所宜相反,故人君輔助天地所宜之物各 物,及《職方》云楊州其貢宜稻麥,雍州其貢宜 謂天地所生之物各有其宜,若《大司徒》云其動物、植 天地自然之氣,故云「天地之道」也。「天地之宜」者 春殺。君當財節成就使寒暑得其常,生殺依其節,此 不得直言「先王」,欲見天子諸侯俱是南面之君,故 氣相交通則物失其節,物失其節則冬温、夏寒、秋生、 之道」者、謂四時也、冬寒、夏暑、春生、秋殺之道。 相天地之宜」者,「相」,助也,當輔助天地所生之宜 后 以左右民」者,「左右」,助也,❷以助養其人也。「天地 「后」,君也。於此之時,君當翦財成就天地之道。 「輔 以 (財成天地之道」者,由物皆通泰,則上下失節 《象》曰、「天地」至「左右民」。 兼通諸侯,故 此卦言「后 正 義 一黍稷。 日

茅茹 」者,初九欲往於上,九二、九三皆欲上行,己去則 初九,「拔茅」至「在外也」。 正 義 日 「拔

⁰ 有大」,嘉本、四庫本、阮本皆作「大有」。

⁰ 也」,嘉本作「之」。

從,而 從,而 於乾,己去則納,故往行而吉。《象》曰「志在外」者,釋 也,以類相從。 拔茅征吉」之義。 似拔茅往行而得吉。❶ 似拔茅舉 「征吉」者,「征」,行也,上坤而順,下 其根相牽茹 以其三陽志意皆在於外,己 也。 此假外物以明義 「以其彙」者,「彙」, 也。 行 應 則 類

也。 如此。 之道,故此「包荒」。 得尚于中行,以光大也」者,釋「得尚中行」之義。 於中行」者,「中行」謂六五也,處中而行,以九二所爲 无私於朋黨之事,「亡」,无也,故云「朋亡」也。 无所疎遠棄遺於物。 河,是頑愚之人,此九二能包含容受,故曰「用馮河」 物,故云「包荒」也。 荒,用馮河」者,體健居中而用乎「泰」,能包含荒穢之 包荒」得配此六五之「中」者,以无私无偏,存乎光大 「不遐遺」者,「遐」,遠也,「遺」,棄也,用心弘大 九二,「包荒」至「光大也」。 「尚」,配也,得配六五之中也。《象》曰「包荒 皆假外物以明義 「用馮河」者,无舟 「朋亡」者,得中无偏,所在皆納 也 渡 正義曰:「包 (水,馮 「得尚 所以 陵於

欲復歸於下,是初始平者必將有險陂也,初始往者必處。乾體初雖在下,今將復歸於上,坤體初雖在上,今「无平不陂」者,九三處天地相交之際,將各分復其所九三,「无平」至「天地際也」。正義曰:

所 閉 閉 將 下欲上也。 陂 歸向初,復其坤體所處也。「處天地之將閉,平路 乾之上體所處也。 者,以泰卦乾體在下,此九三將棄三而 陂。○注「乾本」至「有福也」。 交際之處,天體將上,地體將下,故往者將復,平者將 憂其孚信也。 福 无咎」者,己居變革之世應有危殆,只爲己居得其正, 无在下者而不在上,❷无在上者而不歸 象》曰「天地際」者,釋「无往不復」之義。 處 ,路有傾危,是「平路之將陂 也。 有其應,艱難貞 有反復也。 |者,天將處上,地將處下,閉而不通,是「天地之將 |者,「恤」,憂也,「孚」,信也,信義先以誠著,故不須 也也 所以往前通泰,路无險難,自今已後,時既否 「信義 則上六將歸於下,是上欲下也,故云「復其 信義自明,故於食禄之道 无有平而 誠著」者,以九三居不失正,動不失 (正乃得「无咎」。 泰卦坤體在上,此六四今將去四而 不 陂,无有 也。 正義曰:「將復其所處 「勿恤其孚,于食有 此因三之向 往 而 向四,是將 下也。 自有福慶也。 不復者,猶 而三處天地 「艱貞 四,是 之將 復其 若

❶ 「往」,嘉本同,阮本作「征」。

[「]无」,嘉本同,阮本作「元」。

[「]无」,嘉本、阮本作「元」。

六四

食有 福」,以信義自明 信信 義 誠著」也。 故飲食有 「故不恤 一
其
孚 福 而 自 明」者, 解於

四翩 不待戒而自孚也。 戒告,而六五、上六皆已孚信者,由中心皆願下復,故 孚,中心願」者,解「不戒以孚」之義,所以不待六四之 而下也。 動,不待財富,並悉從之,故云「皆失實」也。 信以從己也。《象》曰「皆失實」者,解「翩翩不富」之 也,今己下復,衆陰悉皆從之,故不待財富而用 不戒以孚」者,鄰皆從己,共同志願,不待戒告 猶衆陰皆失其本實所居之處,今既見 刷」者,四主坤首而欲下復,見命則退, 四二 「不富以其鄰」者,「以」,用也,「鄰 翩翩」至「心願 也」。 正 命,翩翩樂 義 故「翩 謂 「不戒以 曰: 其 而 Ŧī. 鄰。 自孚 與上 六六 翩

願 祉 以明之也。「以祉元吉」者,履順居中,得行志 帝乙歸嫁于妹而能然也,故作《易》者引此「帝乙歸妹 與,用其中情,行其志願,不失於禮。 乙歸妹」者,女處尊位,履中居 福 福、盡夫陰陽交配之道、故大吉也。 而「元吉」也。 六五,「帝乙」至「行願 釋 以 祉元吉」之義。 ○ 注: 「婦人謂 止由中順 順,降身應二,感以 也。 嫁 曰 爻備 《象》曰 ,❷行其 歸。」正義曰: 正義曰: 斯義者, 願 志願,故 「中以行 以 一帝 獲 唯 相

> 婦 人謂嫁曰歸」,隱二年《公羊傳》文也

爲城。 隍」之義。若教命不亂,臣當輔君,猶土當扶城。 命錯亂,下不奉上,猶土不陪城 下既不從,故「貞吝」。《象》曰「其命亂」者,釋「城復 吝」者,否道已成,物不順從,唯於自己之邑而施告命 用師」者,謂君道已傾,不煩用師 道傾危,故云「城復于隍」。 猶君之爲體,由臣之輔冀。今上下不交,臣不扶君,君 上交,故卑之道崩壞,不承事於上 傳》云:「隍是城下池也」。 城之爲體,由基土陪扶乃 交,卑不上承,尊不下施,猶若「城復于隍」也。 復于隍」者,居泰上極,各反所應,泰道 也。 今下不陪扶,城則損壞,❸以此崩倒,反復於隍 上六,「城復」至「命亂 ○注:「卑道崩也。」正義曰: 此假外象以喻人事。「勿 使復于隍,故云「其 也 也。 也。「自邑告命,貞 卑 將 道向下,不與 正 滅, 義 曰 上 ^②子 由 下 命 干 得 城 其 夏

乾上「否之」至「小坤下 來」。 正 義曰: 「否之

亂

- 0 財 本 無此字。
- 止」,嘉本同,阮本作「正」。

0

陽主生息,故稱「大」,陰主消耗,故稱「小」。利君子爲正也。陽氣往而陰氣來,故云「大往小來」。人」。「不利君子貞」者,由小人道長,君子道消,故不匪人」者,言否閉之世,非是人道交通之時,故云「匪

「健順」。 《彖》曰,「否之」至「道消」。正義曰:「上下不交而天下无邦」者,與泰卦反也。「泰」卦云「上下不交而其志同」,此應云「上下不交則其志不同」也。非交而其志同」,此應云「上下不交則其志不同」也。非下不交而天下无邦」者,與泰卦反也。「泰」卦云「上下不使順」。 不養別,「否之」至「道消」。 正義曰:「上

逸也。 《象》曰、「天地」至「以禄」。正義曰:「君子以儉德辟難」者、言君子於此否塞之時以節儉爲德,辟其危難,不可榮華其身以居禄位。此若據諸侯公卿辟其危難,不可榮華其身以居禄位。此若據諸侯公卿辟其危難,不可榮華其身以居禄位。此若據諸侯公卿以儉爲德,關其之,以禄」。正義曰:「君

邪,不敢前進。三陰皆然,猶若拔茅牽連其根相茹也。茅茹」者,以居否之初,處順之始,未可以動,動則入初六,「拔茅」至「在君也」。正義曰:「拔

苟進,故得「吉亨」也。此假外物以明人事。吉」之義。所以居而守正者,以其志意在君,不敢懷諂君,乃得吉而亨通。《象》曰「志在君」者,釋「拔茅貞以其同類共皆如此。「貞吉亨」者,守正而居,志在於己若不進,餘皆從之,故云「拔茅茹」也。「以其彙」者,

人雖盛,不敢亂羣,故言「不亂羣」也。 以「大人否亨」之意,良由否閉小人,防之以得其道,小吉,其道乃亨。《象》曰「大人否亨,不亂羣」者,此釋所人否亨」者,若大人用此「包承」之德,能否閉小人之人吉」者,否閉之時小人路通,故於小人爲吉也。「大人」者,居否之世而得其位,用其至順包承於上。❷「小承」者,居否之世而得其位,用其至順包承於上。❷「小承」者,居否之世而得其位,用其至順包承於上。❷「小人此盛,不敢亂羣,故言「不亂羣」也。

當,所包承之事唯羞辱也。❸「包羞」者,言羣陰俱用小人之道包承於上,以失位不行包羞」者,言羣陰俱用小人之道包承於上,以失位不不一,「包羞」至「位不當也」。正義曰:

命无咎」者,九四處否之時,其陰爻皆是小人,若有命九四,「有命」至「志行也」。 正義曰:「有

「厄」,嘉本作「危」,阮本作「已」。

0

- 「至」,嘉本作「志」。
- (也」,嘉本同,阮本作「已」。

六五

六六

也。 得行,守正而應於上,故九四之命得 初六得福也。 處于窮下。 於小人,則君子道消 」者、「疇」謂疇匹、謂初六也、「離」、麗也、麗 言九四命初,身既无咎,初既被命,附依祉 所以九四「有命」,得「无咎」者,由初六志意 今九四「有命」, 《象》曰「有命无咎,志行」者,釋 也。 今初六志在於君,守正不進 命之,故「无咎」。 「无咎」。 「有命无 謂附 一疇 福,言 離 著

之義。 尊」至 其亡」,以自戒慎, 常懼其危亡,言丁寧戒慎如 世,居於尊位而遏小人,必近危難,須恒自戒慎其意 其凡人則不能。「其亡其亡,繫于苞桑」者,在道消之 五居尊得位, 正所以 施此否閉之道,遏絶小人,則是「否」之休美者也,故云 否」者,「休」,美也,謂能行休美之事。 一苞」,本也,凡物繫于桑之苞本則牢固也。 象》曰「大人之吉,位 休否」。「大人吉」者,唯大人乃能如此而得吉也,若 固 「得固也」。 九五,「休否」至「正當也」。 身雖安静,心意常 」者,●即 「繋于苞桑」也。 正義曰:「心存將危」解「其亡其亡」 則 當,遏絶小人得其吉。 有「繫于苞桑」之固、无傾 .正當」者,釋「大人吉」之義,言九 存將有 此 也。「繫于苞 危難,恒念「其亡其亡 必云「苞桑」者,取 於否塞之時,能 正義曰:「休 若能「其亡 ○注「居 1桑」者. 危也。

> 義。 喜」也。《象》曰「否終則傾,何可長」者,釋「傾否」之 是「先否」之道,否道已傾之後,其事得通,故云 其否,故云「傾否」也。 「先否後喜」者,否道未傾之時 否,先否後喜」者,處否之極,否道已終,此 韵之義,又桑之爲物其根衆也,衆則牢固之義。 否道已終, 上九,「傾否」 通道將至,故否之終極則傾損 至「可長 也。 正義 上九能 其否, E 後 傾

毁

傾

得長久,故云「何可長也」。

川」也。 處,借其野名喻其廣遠,言和同於人必須寬廣,无所 人于野,亨」。 用心无私,處非近狹,遠至于野,乃得 同人」謂和同於人。「于野,亨」者,「野」是廣遠 與人和同,義涉邪僻,故 乾 離 上 下 「同人于野」至「君子貞」。 與人同 心足以 涉 「利 難,故曰 君子 貞」也 亨通 利 涉 故 正 大 云 不 之 此

同。

同

利

涉大川」,假物象以明人事。

曰:

《彖》曰,「同人」至「之志」。 正義曰: 同

² 0 之」,嘉本無此字。 恒, 嘉本同,阮本作「但」。

能以 别也。 之辭,不關六二之義,故更疊「同人于野,亨」之文,乃 主,故同人卦名繫屬六二,故稱 云「同 發首應云「同人于野,亨」,今此「同人于野,亨」之上别 卦之《彖》辭,發首即 乃能」至「同人曰」。 應,則非君子之正也。 曰 卦曰」也。 此更贊明君子貞正之義,唯君子之人於「同人」之時 道也,故云「君子正 應」,謂六二、九五,皆居中得正而又相應,是君子之正 貞」也。 能也,故特云「同人曰」,乃云「同人于野,亨」,與諸卦 者,由「乾」之所行也。 者,釋「同人于野,亨,利涉大川」之義。 應於乾也。 人,柔得位 「乾」之所行也。 正道通達天下之志,故利君子之貞。 若非 人曰」者,是其義有異。 「文明以健,中正而應,君子正」者,此釋「君子 此以二象明之,故云「文明以 君子,則用威 「同人于野,亨,利 得 「柔得 「同人曰: 中 而 位 應乎乾, 也。 正義曰:「故特曰「同人曰」」者,謂 疊卦名以釋其義,則以例言之,此 得中」者,謂六二也,上 注"「君子以文明爲德。」正 「唯君子爲能通天下之志」者、 言「乾」能行此德,非六二之所 同人于野,亨,利涉大川 武。 若以威武而爲健,邪僻 曰同人」者,此 今卦之下體爲離,故《彖 涉大川」,雖是同 此同 「同人日」,猶言「同 人卦名以 健。 所以 釋 ○注「所以 應 所 「中正而 六二爲 人卦 能 九 以 而相 如此 五. 能 行 下 X 是 口

明爲德也,謂文理通明也。云「文明」,又云「唯君子能通天下之志」,是君子用文

體在 自 人」,以類而聚也。 君子以類族辨物」者,「族」,聚也,言君子法此 相同,不間雜也。 上,火又炎上,取其性同,故云「天與 「天與」至 辨物」謂分辨事物,各同 「辨 物」。 (火,同 正 義 其 日 一同 使 天

言既心无係吝,出門逢人皆同,則誰與爲過咎?咎」也。《象》曰「又誰咎」者,釋「出門同人无咎」之義。含弘光大,和同於人,在於門外,出門皆同,故云「无曰:「同人于門」者,居同人之首,无應於上,心无係吝,曰:「同人于門」者,居同人之首,无應於上,心无係吝,曰、「同人于門」至「誰咎也」。正義

弘闊,是鄙吝之道,故《象》云「吝道」也。人于宗,吝」者,係應在五而和同於人,在於宗族,不能六二,「同人」至「吝道也」。正義曰:「同

歲,亦不能興起 力不能敵,故伏潛兵戎於草莽之中,升其 同,欲下據六二,上與九五相争也。 不興」者,唯升高 戎于莽」者,九三處下卦之極,不能包弘 九三,「伏戎」至「安行也」。 也。 陵以望前敵,量斯 《象》曰 「伏戎于 勢也 但九 莽, 八高陵。 ,縱令更經三 五剛 上下,通 敵剛」 正 義 健, 日: 夫大 「伏 一歲

九五之應也。 知二之從五,直以苟貪與二之比,近而欲取之。 之應」者,言此九三欲乖其同人之道,不以類相從,不 五相親,與三相分別也。 分」者,謂同人之時,物各有黨類而相分别也。 三欲下據六二,奪上之應,是不能「包弘」也。 出門皆同,无所係著,是「包弘上下,通夫大同」。 行焉」。正義曰:「不能包弘上下,通夫大同」者,初九 云「安行也」。 「伏戎于莽」、「三歲不興」。 「安行」者,釋「三歲不興」 伏戎于 何」也。既三歲不興,五道亦已成矣,何可行也? 莽」之義 經三歲猶不能興 此假外物以明人事。 门以 其 當 「欲乖其道,貪於所比,據上 八起也。 敵 九五 「安」,語 之剛,不 ○注「居同」至 辭 敢 「物黨 也, 顯 二則與 亢 據上 今九 相 故 言 故

違義傷理,衆所不與,雖復乘墉,不能攻三也。 既是上體,力能顯 「不克」之義。 此爻亦假物象也。 者,既不能攻三,能 攻,吉」者,三欲求二,其事已非。 者,履非其位 九四,「乘其」至「反 所以乘墉攻三不能克者,以其違義,衆 《象》曰「乘其墉,義弗克也」者,釋 亢,故乘上高墉欲攻三也。 反自思 ,與人鬭争,與三争二,欲攻 您以從法 則 四又效之以求 也」。 則 ,故得「吉」也。 正 義 日 (於三。 其二, 「吉 「乘

師

所不從,故云「義不克」也。 而反歸其法則,故得「吉」也 「其吉」之義。 所以得「其吉」者 「其吉則 九四 困 |則以 而 反 不克,困 則 」者, 苦

釋「相遇」之義,所以必用大師乃能 直云「同人之先以中直」也。 物所未從,故「先號咷 以中直」者,解「先號咷」之意,以其用中正剛直之道 物自歸,己用其剛直,必以大師與三、四戰克,乃得與 位,戰必克勝,故「後笑」也。「大師克相遇」者,不 志未和同於二,故「先號咷」也。「而後笑」者,處 共二欲相和同,九三、九四與之競二也。 人先號咷」者,五與二應,用其剛直,衆所未從,故 一相遇。 .與三、四相伐而得克勝乃與二相遇,故言「相克」也。 九五,「同人先」至「相克」。 此爻假物象以明 也。 人事。 但《象》略 「大師 《象》曰「同 相遇 相 遇,言相克」者 「號咷」之字,故 也。 五未得二,故 正 義 以其用大 人之先 曰 : 能使 得 九 同 五

之志猶未得也。 争訟,故无悔吝也。 疎己,不獲所同,其志未得。 同 于 人于郊」之義。 郊」者,處同人之極 上九,「同人」至「未得也」。 ○注「郊者」至「其志」。 同 《象》曰「同人于郊,志未得 人在 ,最在於外, 郊境遠處,與 然雖陽在于外,遠於内之 雖欲「同 人疎遠,和同 正義曰:「不 正義曰:「同

卒。 楚也。」」昭王名軫,哀六年,吴伐陳,楚救陳,在城父 曰:「惜乎! 其志不大也。不曰人亡之,人得之,何必 之。王曰:「楚人亡弓,楚得之,又何求焉?」孔子聞之 子好生篇》云:「楚昭王出游,亡烏號之弓,左右請求 能亡楚。愛國愈甚,益爲它災」者,案《孔子家語 同人一卦之義。去初、上而言,二有同宗之吝,三有 焉,則必用師矣」者,王氏注意非止上九一爻,乃摠論 也。以遠内争,故无悔吝。 爲郊境之人而與相同,人未親己,是「不獲同志」也。 獲同志」者,若彼此在内相同,則獲其同志意也。 「同人」之世,无大通之志則必用師矣。「楚人亡弓,不 「伏戎」之禍,四有不克之困,五有「大師」之患,是處 ○注「凡處」至「用師也」。正義曰:「凡處同人而不泰 遠于内争」者,以外而同,不於室家之内,是遠于内争 矣。 此愛國而致它災也。 引此者,證同人不弘皆至用 以在外郊,故未得志也。 ・ 弟 若已

周易正義卷第 四

師

一萬二千 四百五十三字

周易正義卷第五

開 國子祭酒 國 子臣 孔 上 護軍曲阜 縣

者,柔處尊位,羣陽並應,大能所有,故稱「大有」。 離 乾上下 大有,元亨。 正義曰:「大有,元亨」 穎達奉粉撰 既

能「大有」,則其物大得亨通,故云「大有,元亨」。

通, 也。 明,應乎天而時行,是以元亨」者,釋「元亨」之義。 是其大也。居上卦之内,是其中也。「其德剛健 曰 氏、莊氏云「六五應九二」,九二在乾體,故云「應乎天」 健」謂乾也,「文明」謂離也。 有,柔得尊位大中而上下應之,曰大有」者,釋此 「大有」之義。「大中」者,謂六五處大以中,柔處尊位, ●故云「是以元亨」。 德應於天則行不失時,以 |剛健不滯」者,剛健則物不擁滯也。 | 文明不犯 《彖》曰,「大有」至「元亨」。 ○注 「應乎天而時行」者,褚 「德應」至「元亨」。 時 而 行 則萬物大得亨 正義曰: 正義 而文 桂 一剛 大 稱

> 天則盛大也。 者,文理明察則不犯於物 有此諸事,故「大通」而「元亨」也 「時行无違」者,以時 也。 應天則大」者,能 而行,物无違也。 應 於

理也。 上,是光明之甚无所不照,亦是包含之義,又爲揚善之 子以遏惡揚善」者,大有,包容之義,故君子象之亦 上」者,天體高明,火又在上,火是照耀之物而 命,❷皆取含容之義也。不云「天在火下」而云「火在天 包含,遏匿其惡,褒揚其善,順奉天德,休美物之性 (象》曰,「火在」至「休命」。 Œ 義 E . 在於天 君

咎也」。 溢 位,是不能履中。 故云「无交害,匪咎,艱則无咎」也。 必有凶。其欲「匪咎」,能自艱難其志,則得「无咎」。 夫剛健爲大有之始,不能履中謙退,雖无交切之害,久 也。 初九,「无交」至「交害也」。 故云「不能履中,滿而不溢」。 正義曰:「不能履中,滿而不溢」者,以不在二 在大有之初,是盈滿 ○注「以夫」至「无 身行剛 正 義 티 : 健,是 以

- 0 「以 違 時 雖 而 行則萬物大得亨通」, 物皆得亨通」。 嘉 本同, 阮本
- 休」,阮本同,嘉本作「體」。

彊壯,故不有傾危也。 也。 也。 往」。「无咎」者,以居失其位,嫌有凶咎,故云「无咎」 能 車以載」者,體是剛健而又居中,身被委任,其任 意。「大車」謂牛車也。 積聚,身有中和,堪受所積之物聚在身上,不至於敗 以喻人事。 堪受其任不有傾危,猶若大車以載物也。此假外象 《象》曰「積中不敗」者,釋「大車以載」之義。 ○注:「任重而不危。」正義曰:釋「大車以載」之 九二,「大車」至「不敗也」。 「有攸往、无咎」者、堪當 載物既多,故云「任重」。 車材 重任,故「有所 正義 曰:「大 重也。 物既

之同 功, 至「可待也」。 五同功」,此云「與五同功」,謂五爲王位,三既能與五 勝其位,必致禍害,故云「小人不克」也。○注「處大」 之同功,則威權之盛莫盛於此,乃得通乎天子之道,故 乘剛健之上,履得其位,與五同功,五爲王位,三既與 云「公用亨于天子」。「小人弗克」者,小人德劣,不能 「公用亨于天子」者,九三處「大有」之時,居下體之極 九三,「公用亨」至「弗克也」。 正義曰: 則 威 正義曰: 權 與五 相似,故云「威權之盛,莫此 「與五同功」者、《繫辭》云「三與

九四,「匪其」至「辯哲也」。正義曰:「匪

而香知,能斟酌事宜,故云「明辯哲」也。 《象》曰「明辯哲也」者,釋「匪其彭,无咎」之義。「明」,分權之臣,可謂危矣。能棄三歸五,故得「无咎」也。 公夢,九四若能專心承五,非取其旁九四,言不用三之旁,九四若能專心承五,非取其旁九四,言不用三其彭,无咎」者,「匪」,非也,「彭」,旁也,謂九三在九四其彭,无咎」者,「匪」,非也,「彭」,旁也,謂九三在九四

義。 行,所爲之處,人皆畏敬,故云「威如」。 自畏之,故云[易而无備]也 威 「威如之吉,易而无備」者,釋「威如之吉」之義。 所以 得「吉」也。《象》曰「信以發志」者,釋「厥孚交如」之 也。「威如、吉」者、「威」、畏也、既誠且信、不言而 物,上下應之,故其誠信,物來交接,故云「厥孚交如 也,「如」,語辭也。 五厥孚交如」者,「厥」,其也,「孚」,信也,「交」謂 如得吉者,以己不私於物,唯行簡易,无所防備,物 由己誠信,發起其志,故上下應之,與之交接也。 六五,「厥孚」至「无備也」。 六五居尊以柔,處大以中,无私於 以用此道,故 正義曰: 交接 六

之,故云「自天祐之」。〇注「大有」至「具焉」。正義「大有」。上九而得吉者以有三德,從天已下悉皆祐上九,「自天」至「不利」。正義曰:釋所以

累於位。 曰 祐之,則无物不祐,故云「盡夫助道」也 志 剛乘柔,思順之義」,是二也,「不以物累於心,高尚其 德」者,「五爲信德而已履焉,履信之謂」,是一也, 「以 富 ,尚賢者」,是三也。 有爲累 「不累於位,志尚乎賢」者,既居豐 也。 能 既居 清 静 高絜,是慕尚賢之行也。 无位之地,不以富有縈心, 「爻有三德、盡夫助道」者、天尚 富之時, 「爻有三 是不繫 應 須 以

■ 申上 謙,亨,君子有終。正義曰:「謙」

正也。 其吉可知,故不言之也。凡《易經》之體,有吉理可 以幹正 義有嫌者,爻兼善惡也。 案謙卦之象,「謙」爲諸行之善,是善之最極,而不 者,屈躬下物,先人後己,以此待物則所在皆通, 而不言「吉」者,即此謙卦之繇及《乾》之九五「利見大 人」,是吉理分明,故不云「吉」也。 「元」與「利貞」及「吉」者,「元」是物首也,「利貞」是幹 亨」也。 事有惡則不得其「吉」。 於人既爲謙退,何可爲之首也? 於物? 小人行謙則不能長久,唯「君子有終」也 故不云「元」與「利貞」也。 若行事有善則「吉」乃隨之, 諸稱「吉」者,嫌其不吉故 諸卦言「吉」者,其 以謙下人,何 謙必 獲 故 吉 知 言 然 日

> 也。六爻各明其義,其義有優劣,其德既小,嫌其不 可知也。既不云「吉」,何故初六、六二及九三並 例,今各隨文解之,義具諸卦之下。 吉,无不利」之類是也。但《易》之爲體,不可以一爲 吉,故須「吉」以明之也。 有其吉灼然而稱「吉」者,若《大有》上九「自天祐之, 大貞凶」,及《否》之六二「包承,小人吉」之類是也。 或有於小人爲吉,大人爲凶,若《屯》之九五「小貞 於小人爲凶,若《否》之九五云「休否,大人吉」是 若不行此事則无「吉」,若行此事則得 稱「吉」也。 「元吉」。其餘皆言「吉」,事亦倣此。 吉」者,謙卦是摠諸六爻,其善既大,故不須云「吉 若坤之六五,及泰之六五,並以 今謙卦之繇,其吉 亦有大人爲吉 其「吉」,故並稱 陰居尊位 亦

者,地體卑柔而氣上行,交通於天以生萬物也。「天道高,地體卑柔而氣上行,交通。坤體在上,故言「地道卑而上行」也。且艮爲陽卦,又爲山,天之高明,今在下體,亦是也。且艮爲陽卦,又爲山,天之高明,今在下體,亦是也。且艮爲陽卦,又爲山,天之高明,今在下體,亦是一、,以,天道下濟」之義也。「下濟」者,謂降下濟生萬物也,而「光明」者,謂三光垂耀而顯明也。「地道卑而上行」者,此釋「亨」不道下濟」之義也。「謙亨」至「之終也」。正義曰:

神害盈 尊者 受益 之所終也。 之,謙退恭巽悉皆好之。 而福謙」也。 漸下,下者益高,是改變「盈」者,流 日中則昃,月盈 能終之義也。 虧 云「君子之終」也 盈 也。 有謙而更光明盛大,卑者謙而 而 益 而福謙 地地 謙」者, 言君子能 「人道惡 道 0 」者, 變盈 則食,是虧減其盈。 「虧」謂 從此已下,廣 驕盈者 而 盈 終其謙之善事,又獲謙之終福 減損 流謙」者,丘 而好 「謙尊而光,卑而 被害,謙退者受福,是「害盈 減 謙」者、盈溢 説 損 謙 盈 不 一陵川 布「謙」者也。「鬼 盈 德之美,以 滿 可 者虧減 而增 踰越,是君子 谷之屬,高者 驕慢皆以惡 不可 益 ",則謙 謙退,若 踰 結 君 者 子

物之先多者而得 可 更進益 故云「稱物平施」也。 也 謙,物更襃聚,彌益多也,故云「襃多」。 多」者, 踰 於地爲不謙,應言「山 ,意取多之與少皆得其益,似 是尊者得謙 越也。 即 象》曰,「地中」至「平施」。 君子若能用 卑 「稱物平 而 不可 而光大也。 其 施 此謙 施」者,稱此物之多少 踰 此謙卦之象以山爲主,是於山爲 也,物之先寡 也。 道, 在地中」,今乃云「地中有 「益寡」者,謂 是卑者得謙 則襃益 「地中有山」,以包取 者 其多。 而 即 亦 而 正 寡者得 「謙尊 得其 更增 均平而 義曰: 言多 而光 施 謙而 者 「襃 也 施 得

> 謙 增之榮秩,位之先卑亦加以爵禄,隨其官之高下,考其 是「施不失平」也。言君子於下若有謙者,官之先高則 與 以爲益」也。「隨物而與」者,多少俱與,隨多隨少而 以 更多而積聚,故云「多者用謙以爲褒」也。 聚 正 物以與於人,故變其文也。 之多少,皆因其多少而施與之也。 也。「施不失平」者,多者亦得施恩,少者亦得施恩 爲益」者,其物先少,今既用謙而更增益,故云「用謙 也」,於先多者,其物雖多,未得積聚,以謙故益其物 義 曰:「多者用謙以爲襃」者,《爾雅· 注 「多者」至「不失平」。 釋詁》云「褒 「少者用 謙

德也。 初六,「謙謙,唯君子」之義,恒以謙卑自養其宜也。「用涉大川」,假象言也。《象》曰「卑以自牧」宜也。「用涉大川」,假象言也。《象》曰「卑以自牧」,一、,「謙謙」至「自牧也」。正義曰:「謙

吉 曰 以 鳴謙」,正 鳴謙」者, 中和爲心, 六二,「鳴謙貞吉」至「心得也」。 而得吉也。 謂 而得其所,故鳴謙得中吉也 聲名也。 《象》曰「中心得」者, 二處正得 中, 行 謙 廣遠,故 正 義

❶ 「君子」,原爲二空格,據嘉本、阮本補。

七四

《象》曰「萬民服」者,釋所以「勞謙」之義。 陰,象萬民皆來歸服,事須引接,故疲勞也 民,上承下接,勞倦於謙也。 謙君子」者,處 下 勞謙」至「 體之極,履得其位,上下无陽以 民 唯君子能終而得吉也。 服 也 _ 正 義 以 上下 曰 分其 羣 勞

故「利用侵伐,无不利」者也。 以謙得衆, 豐富能用其鄰也。「利用侵伐,无不利」者,居謙履順, 能用之。六五居於尊位用謙與順,鄰自歸之,故不待 當以其鄰」者,「以」,用也,凡人必將財物周贍鄰里乃 了工,「不富」至「不服也」。正義曰:「不

謙 虚名。 ,其志未得。 一者,上六最處於外,不與内政,不能於實事而謙, 上六,「鳴謙」至「邑國 聲聞之謙,故云「鳴謙」。 既在外 而 行謙 順 也。 唯利 志 欲 用 立 正 行 功、未能 義 師 曰 征 伐外 遂 鳴 但

> 《象》改「利」爲「可」者,言內志雖未得,猶可在外興行 之後次訟卦也。 訟則起兵,故《序卦》「需」爲飲食,飲食必有訟,故需卦 必 今動之所以起者,見利乃動,故云「興於利」 曰:「動之所起興於利」者,凡人若不見利則心无所動 軍師征國邑也。❶ 師 者,以其居在於外,其内立功之志猶未得也。 釋「鳴謙」之義也。 旁國邑 有訟、訟必有衆起」者、欲明爲利乃有動、動 征邑國」者,釋「行師 而 已,不 能 争訟必興兵,故訟卦之後次 立 ○注「夫吉凶」至「信矣哉」。 所以但 功 在 征 内 邑國」之意。 有聲鳴之謙,不能 也。 《象》曰 經言「利 志 也。 師 實事 可 未 卦也 而 得 致訟 正義 用, 用 立 行 功

IIII 坤下 豫,利建侯行師。正義曰:謂之

事 以逸豫之事,不可以常行,時有所爲也。 以 説豫,故謂之「豫」也。 「豫」者,取「逸豫」之義。 順而動,不加无罪,故可以「行師 ,不可長行以 經 邦 訓 俗, 動 以和 而 故无「元亨」也。 衆説, 順 而 故 動 也。 動 可「利建 无 一四 不違衆, 縱恣寬暇之 逸豫非 [德]者 侯 衆皆 也

▶ 「國邑」,嘉本同,阮本作「邑國」。

正之道 行 侯 師即利貞也。」 則「建侯」非「元亨」也。 不云 「利 案:《屯》卦「元亨利 貞」也。 莊氏 恐莊氏説非 云 貞」之後 「建 侯 也 即 别 元 云「利 亨 也

天地以 清 師」能 神之難者猶尚如之,況於封建諸侯、行師 地 乎」者,此釋「利建侯 豫卦之理也。 故「豫」也。 凡 聖人能 忒變,寒暑以時。「聖人以順動,則刑罰 時不忒」。 者既從,易 順 豫 言不盡意者,不可煩文具説,故歎之以示情,使後 (美爲豫之善,言於逸豫之時,其義大矣。 之德,故天地 初六也,既陰陽相 也。 以 剛 順動 動」,坤在 順 應而志行,順 彖》曰,「豫剛」至「大矣哉」。 以 刑罰當理 理 而 自 者 則衆從之。 此以上下二象明「豫」義也。 動 順 可知。 此已下,廣明天地聖人順 「豫順 而 則日月不 下 亦 動則 ,故人服也。 如 是 以 應,故 行師」也。 以動,豫」者,「剛」謂 若「建 聖 順 天地以 不 動,故天地如之,而況 也,震 人 赦 有 而 「志行」也。 侯 有 過 爲之也。 在上是動 罪 差 順動,故 「豫之時義大矣哉」者 若聖人和順 能順動 不濫 依 其 天地 此就爻明 日 晷 則 无辜,故 動 也,以 清而 度,四 自此已上, 九四 征 月不過 人從之,「行 之功 此歎 尊 而動 伐乎? 建 民 正 大而遠 順 也,「應 侯行 服 時 也 義 刑 豫 卦 而 日 而 不 義 也 動 生 有 Щ

也。 略 適時之用也。 之時,「解緩」之世是也,四者改易之時,「革變」之世 哉」也。 逢治世,或遇 哉」之例是也。 時 如 思 哉 者,不盡於所見,中有意謂者 等三卦,餘從可知矣。 險取濟,不可爲常,斟酌得宜 而用之耳,故 養」之世是也, 二者亂時, 「大過」之世是也, 三者離 義 以 卦 意 其餘 用大矣哉」之例是也,三歎時并義,「豫之時義大矣 不可 揆,故爻來適 「大過之時大矣哉」之例是也,二歎時 。」以此言之,則四 發明大義,恢弘妙理者 明佚樂之世,相 」者,凡一十二卦, ,其義不小,則 故舉此四卦之時爲歎,餘皆可知。 案: 姤卦注云: 「凡言義者,不盡 **滋**,得 然時運雖多,大體不出四種者:一 盡 申,故摠云「義」也。 坎、睽、蹇之時宜用 亂 意 雖知居 時,出處存身,此道豈)時,有凶有吉。人之生世亦復如 夫立卦之體各象其時,時 而 餘 忘言也。 隨 卦 若豫、旅、遯、姤凡 卦,卦各未盡其 相 亦 時之難,此 又言「義 可知 遇之日,隱遯羈旅之時,凡 也。 然歎卦 也。 ,是用時之大略。 也」,是 凡于《彖》之末歎云「大 隨之一 」者,姤卦注云「凡 君子,小人勿 事 今所歎者十二卦,足 有三體: 足其時皆 不 小? 理,其中更有 小, 桂 於所見 四四 并用, 言「用」者 有 亦言「義 而 卦,皆云「時 者治時,「 故曰 有 屯夷,事 未 直 一義 用 知以 舉 (斯,或 二大 歎 險 言義 險 也 時 矣 散 頤 用 五 何 是

即 所用,故解、革及頤事已行了,不須言「用」。 餘義,故不言「義」。 注言之,直云「時」者,尋卦之名則其意具盡,中間 小人之所能用」,此二卦言「大矣哉」者,則是 睽卦注云「睽離之時,非小人之所能用」,蹇卦亦云「非 時之義大矣哉」。 義」者,非但其中别有義意,又取隨逐其時,故變云 與 大過是有用之時,亦直稱「時」者,取「大過」之名,其意 益乃大,與睽、蹇「時用」文同而義異也。 云「非用之常,用有時也」。 用,故云「大矣哉」。 用 用」也。 時」,注云「君子有爲之時」,與解、革、頤 用」,體盡於「解」之名,无有幽隱,故不曰 用」不云「義」也。 盡 四 頤之時、大過之時,此四 也 更无 卦 其 案 : (文稍 餘意, 解卦注「難解」之時、非「治難」時、故不 别 故 睽、蹇、坎此 坎卦「時 几 其卦名之事,事已行了,不須 其中更无餘義,唯大人能用,故 直 卦 稱 皆 「時」不云「義」,又略 謂坎險之事,時之須用 1卦直 用」則 三卦皆云 時 云「時」,不云「義」與 義 與睽、蹇稍 隨 一時 解之時、 卦 「義」。 其理 則 用。 唯大過 别, 大人能 隨 稍 不云 更无 革之 别 以 案: 故 時 别。 利 稱 有 此 言 注 云 之

諸卦之象,或云「雲上于天」,或云「風行天上」。以類《象》曰,「雷出」至「祖考」。正義曰:案

以 郊天配靈威 樂,崇盛德業,樂以發揚 配 用此殷盛之樂薦祭上帝也,象雷 王以作樂崇德」者,雷是鼓動,故先王法此鼓動 被陽氣而生,各皆逸豫 雷是陽氣之聲,奮是震動之狀,雷既出 言之,今此應云「雷 考文王也,故云「以配祖考」也。 祖考」者, 仰,以 謂 以「祖 祖 一考」配 出 后稷配也。 地上」,乃云「雷 盛 故云「雷 上帝。 德故 也。 配 出 出 用祖 地而 「殷薦之上帝」者 祀 地 明堂五方之帝 用 奮, 出 地, 向天也。 地 考,若周夏正 豫 震動 奮 也。 豫 萬物 而 「以 「先 者 作

豫。 豫 時 《象》曰「初六鳴豫,志窮凶」者,釋 「鳴豫」,後則樂志窮盡,故爲「凶 者,處豫之初而獨 但逸樂之極,過則淫荒,獨得於樂,所以「凶 初六,「鳴豫」至「窮 、得應於四、逸豫之甚,是聲 凶 也。 「鳴豫 」之義。 正 義 曰 鳴 而 也。 「鳴 于 初

待終日守正吉者,以此六二居中守正,順不苟從,豫不 中 去惡修善,恒守正得吉也。 逸豫,守志耿介似於石。 諂,下交不瀆, 于石」者,得位履中,安夫貞正,不苟求逸豫,上交不 正 者,釋 六二,「介于」至「中 「貞吉」之義。 知幾事之初始,明禍福之所生,不苟 然見幾之速,不待終竟一日 所以見其惡事即 《象》曰「不終日,貞吉,以 正也」。 能 義 離去,不 E : 介介

違中,故不須待其一日,終守貞吉也。

《象》載經文多從省略,經有「盱豫有悔」、「遲有悔」,兩 也,故直云「盱豫」。 文具載、《象》唯云「盱豫有悔」,不言「遲」者,略其文 以六三居不當位,進退不得其所,故「盱豫有悔」。 《象》曰「盱豫有悔,位不當」者,解其「盱豫有悔」之義 悔」者,六三履非其位,上承動豫之主。 有悔」者,居豫之時,若遲停不求於豫,亦有悔 睢盱」者,喜説之貌。 六三,「盱豫」至「不當也」。 舉其欲進,略云「有悔」,舉其 若睢盱之求豫則悔吝也 「盱」謂 正義曰「盱豫 睢 也。 盱, 仴

所得,是志意大行也。

九四,「由豫」至「大行也」。正義曰:「由豫大有得」者,處豫之時,居動之始,獨體陽爻,爲衆陰、大有得」者,處豫之時,居動之始,獨體陽爻,爲衆陰、大有得」者,處豫之時,居動之始,獨體陽爻,爲衆陰、大有,是正意大行也。《象》曰「由豫」也。「大有之所從,莫不由之以得其豫,故云「由豫」也。「大有豫大有得」者,處豫之時,居動之始,獨體陽爻,爲衆陰所得,是志意大行也。《象》曰「由豫」也。「大有次」者,釋「由豫」至「大行也」。正義曰:「由九四,「由豫」至「大行也」。正義曰:「由

疾,恒不死」者,四以剛動,爲豫之主,專權執制,非合六五,「貞疾」至「未亡也」。正義曰:「貞

未可亡滅之也。「中未亡」者,以其居中處尊,位滅之,是以必常至於貞疾,恒得不死而已。《象》曰亡滅之,是以必常至於貞疾,恒得不死而已。《象》曰己之所乘,❷故不敢與四争權。而又居中處尊,未可得己之所乘,❷故不敢與四争權。而又居中處尊,未可得

「渝」,變也,若能自思改變,不爲冥豫,乃得「无咎」也。俾晝作夜,不能休已,滅亡在近。「有渝无咎」者,動豫之極,極豫盡樂,乃至於冥昧之豫而成就也。如上六,「冥豫」至「可長也」。正義曰:處

■ 魚上 隨,元亨利貞,无咎。正義曰:

有四德,如乾、坤、屯、臨、无妄,此五卦之時即能「四德」乃无咎也。凡卦有「四德」者,或其卦當時之義即正,隨而不正則邪僻之道,必須「利貞」也。「无咎」者,无以相隨,逆於時也。「利貞」者,相隨之體須利在得一元亨」者,於相隨之世必大得亨通,若其不大亨通則

2

^{● 「}得」,嘉本同,阮本作「有」。

[「]非合己之所乘」,嘉本同,阮本作「非己所乘」。

七八

德」備 其義大略亦然也 其德未具,故卦不 德義既美,行之不已,久必致此 致「四德」者,於卦則不言其德也。 之時,其卦雖美,未有「四德」,若行此美,方得在後始 其《革》卦「巳日乃孚」有 乃无咎,无此「四 四德」,與乾、坤、屯、臨、无妄、隨,其義又别。若當卦 具。 其 隨 卦 德 顯「 以 則 惡 四 相 有 「四德」,若不「巳日乃孚」則 德」也。 咎 隨 1也,與 則 「四德」。 不 其諸卦之三德已下. 可 若謙、泰及復之等, 前 也。 Ŧī. 桂 但當初之時 有 其 此 義 四四 稍 别 德 无

通

邪 隨之初始其道未弘,終久義意而美大也。 元、亨、利、貞則天下隨從,即隨之義 道 時」者,以有大亨、貞正,无有咎害,而天下隨之,以 則喜説,所以物皆隨從也。「大亨、貞、无咎,而天下 也,震處兑下是剛 致此「隨」者,由剛來而下柔。「剛」謂震也,「柔」謂 隨 隨 解相 相隨,故隨之者廣。 謂 剛 時」也。 隨其 來而下柔,動而説,隨」者,此釋隨卦之義。 隨,則 彖》曰,「 時節之義,謂 ○注「震剛」至「矣哉」。 天下不從 隨 來下柔,震動 剛」至「大矣哉」。 若不以「大亨、貞、无咎」,而 也。 此 時 「隨時之義大矣哉」,若以 宜 行 而兑説,既 元、亨、利、 正義曰: 爲隨而不 意 廣大矣哉。 特云「隨時」 能下 Œ 貞,故云 義 人,動 所 日 謂 以 隨 兑 以 正

> 隨,則是否塞之道,當須可隨 時,舊來恒往,今須隨 凡所遇之時,體无恒定,或值 大,故云「隨時之義大矣哉」。 不能大通利貞是失時 之道」也。 言隨時施設唯在於得時,若能 於物守其正直,此則小人之道 利,正災之道」者,凡物之相隨 大通 使物閉塞, ,逆於時 「隨之所施,唯在於時」者,釋 也。 是違逆於隨從之時也。 物 既 從。 也。 相隨 「時 時 之時,若王 既殊異於前 則 不動之時,或值 ,多曲相朋 異 大通利貞是得時也,若 長,災禍及之,故云「災 隨 而不隨,否之道」者, 逐時 者 而 附,不 「隨時」之義。 相 而 不 用 不 隨 以 所 相 能 使 而 廣 物 隨之 利 大 利 不 則 相 爲 開

晦 者 注云「澤中有雷,動説之象也」。「君子以嚮晦 卦 `明物皆説豫相隨,不勞明鑒,故君子象之。 云「動萬物者莫疾乎雷」,「説萬物者莫説乎澤」,故 `冥也」,❶猶人君既夕之後,人於宴寢而止 象》曰,「澤中」至「宴息」。 正義 入宴息 E : 鄭玄云 《説

心所主謂之「官渝變」也。 有 .渝」者,「官」謂執掌之職,人心執掌與官同稱,故人 初九,「官有」至「不失也」。 此 初九既 无 其應,无 正 義 日 官

[「]冥」,嘉本同,阮本作「宴」。

宜也。 出門即 變,以見貞正則往隨從,故云「從正吉」。 則往隨之。 不失」者,釋「交有功」之義。 正吉」者,釋「官 係 貞吉」也。 隨不以欲,以欲隨宜」者,若有其應則有私欲,以 ,可隨 所隨之事不以私欲,有正則從,是以欲隨其所 有 則 功也。 隨 以此 「出門交有功」者 ,是所執之志有 有渝」之義。 出門,交獲其功。 ○注「居隨」至「失哉」。 以所隨之處不失正道,故 能渝 「, 所隨 所執官守正,能 變 《象》曰 不以 也。 「出門交有 私 唯 正義 「官有 欲,故見 正 是從,故 隨 E : 渝, 无 時 偏 功 渝 從

弗兼與」者,釋「係小子」之意。 則不得往應於五,故云「失丈夫」也。《象》曰「係 獨立所處,必 五「丈夫」,是不能兩處兼有,故云「弗兼與」也 小子」, 五居尊位,故稱「丈夫」。 六二既是陰柔,不能 小子」謂初九也,「丈夫」謂九五 六二,「係小子」至「 近係屬初九,故云「係小子」。 兼與 既隨此初九,則 也。 八也」。 初九處卑,故稱 既 正 屬 義 失彼九 小子 初九 日

求得 六三陰柔,近於九四,是係於「丈夫」也。 二之所據,六三不可復往從之,是「失小子」也。 」者,三欲 六三,「係丈夫」至「舍下也」。 往隨 於 四 四 亦更无他應。 初 己 九 正 既被六 往 「隨有 義 隨於 日

> 无義也。 此六二、六三因陰陽之象,假丈夫、小子以明人事,餘 无應」者,三既无應,四亦无應,是四與三俱无應也 之初九也。 貞」者,己非其正,以係於人,不可妄動 四,四不能逆己,是三之所隨,有 「係丈夫」之義。 正,故云「利居貞 ○注「陰之」至「小子也」。正義曰: 六三既係九四之「丈夫」,志意則舍下]也。《象》曰「係丈夫,志舍下」者,釋 求 而 皆 ,唯利在 得 也。 居處 「四俱 利 守 居

咎 ? 故曰 有獲 義 是以宜其凶 獲,其義凶」者,釋「隨 在 道以明,何咎」者。 擅 三、六二,獲得九五之民,爲臣而擅君之民,失於臣義 濟物,心存公誠,著信 其民,失於臣道,違其正理,故「貞凶」也。「有孚在 既能著信在于正道,是明立其功,故无咎也 「隨有獲」也。「貞凶」者,居於臣 」者,處説之初,下據二陰,三求係已,不 故云「有孚在 九四、「隨有」至「明功也」。 也。 「有孚在道 體剛居 道 以 有獲,貞凶」之意。 明,何咎」也。 在 於正 説而得民心,雖違常義, 明功」者 道,有 ,釋「以明何 地,履非 功以 《象》曰「隨 九四 正義曰: 、明,更 其位 距 既 則 有 有 「隨 以以 獲 志 六 有 何

嘉,吉」者,「嘉」,善也,履中居正而處隨世,盡隨時九五,「孚于」至「正中也」。 正義曰:「孚

于

八〇

之義,得物之誠信,故獲美善之吉也。

係」也。 從,❶必須維係,此乃王者必須用兵通於險阻之道,非 此上六,王者必須用兵,通于西山險難之處,乃得「拘 上窮」者,釋「拘係」之義。 是意在好刑,故曰「王用亨于西山」。《象》曰「拘係之, 係之乃始從也。「維之,王用亨于西山」者,若欲維 處上極,是不隨從者也。 一,不肯隨從故也。 上六,「拘係」至「上窮也」。 「山」謂險阻,兑處西方,故謂「西山」。 隨道已成而特不從,故須 所以須拘係者,以其在上而 正義 今有不 日 係 拘 最

■ 異上 蠱。「元亨」至「後甲三日」。正

義曰: 新令之日,「甲」前三日取改過自新,故用「辛」也。 令之後三日,❷更丁寧而語之。 民未習,故先此宣令之前三日,殷勤而語之,又於此官 今用創制之令以治於人,人若犯者,未可即 者,「甲」者創制之令,既在有爲之時,不可因仍舊令。 利在拯難,故「利涉大川」也。「先甲三日,後甲三日」 其褚氏、何氏、周氏等並 「蠱」者,事也,有事營爲則大得亨通。 同鄭義,以爲「甲」者 其人不從,乃加刑罰 加 有爲之時 刑 罰,以 造作

日,而諸儒不顧輔嗣注旨,妄作異端,非也。又云「甲、庚皆申命之謂」,則輔嗣不以「甲」爲創制之又云「甲、庚皆申命之謂」,輔嗣注「申命令謂之庚」,輔嗣「甲」後三日,取丁寧之義,故用「丁」也。今案輔嗣注,「甲」後三日,取丁寧之義,故用「丁」也。今案輔嗣注,

三日」之義也。 日,後甲三日,終則有始,天行」者,釋「先甲三日,後甲 故「利涉大川」。此則假外象以喻危難也。「先甲三 「元亨」,是天下治理也。 也」,謂物蠱必有事,非謂 損壞,當須有事也,有爲治理也。故《序卦》云「蠱者事 故可以有爲也。 利涉大川」也。 盛,元亨而天下治」者,釋「元亨」之義。 蠱」之義也。 「剛上而柔下,巽而止,蠱」者,此釋蠱卦之名,并明稱 彖》曰,「蠱剛」至「天行也」。 以上剛能制斷,下柔能施令,異順止静 民之犯令,告之已終,更復從始,告之 **蠱者有爲之時,拔拯危難,往當有事** 褚氏云「蠱者惑也」,物既惑亂,終致 「利涉大川,往有事也」者,釋 訓「蠱 |爲「事」義當 以有爲而得 正 義 然 Î. 也

^{□ 「}今」,嘉本同,四庫本作「令」。 阮校云銭本「今」作

❷ 「於」,嘉本同,阮本作「如」。

謂兼通責讓之罪,非專謂誅殺也。 問辦不已,若天之行,四時既終,更復從春爲始,象天之行,故云「天行」也。○注「蠱者」有那門能也。 「甲者創制之令」者,「甲」爲十日之首,創造之令爲在「甲者創制之令」者,「甲」爲十日之首,創造之令爲在「重者謂之「甲令」,則此義也。「創制不可責之以舊」故須先後三日殷勤語之,使曉知新令而後乃誅。「誅」啟須先後三日殷勤語之,使曉知新令而後乃誅。「誅」殷勤不已,若天之行,四時既終,更復從春爲始,象天殷勤不已,若天之行,四時既終,更復從春爲始,象天殷勤不已,若天之行,四時既終,更復從春爲始,象天

山下有風,「育德」象山在上也。風」,取君子能以恩澤下振於民,育養己德。● 振民象云「山下有風」者,風能搖動,散布潤澤。今「山下有≪象》曰,「山下」至「育德」。正義曰:必

承考」者,釋「幹父之蠱」義。凡堪幹父事,不可小大、也。「厲,終吉」者,「厲」,危也,既爲事初,所以「危」也。「有子考无咎」者,「有子」既能堪任父事,「考」乃也。「萬,終吉」者,「萬」,危也,既爲事初,所以「危」也。能堪其事,所以「終吉」也,既能堪任父事,「考」乃位。能堪其事,所以「終吉」也。《象》曰「幹父之蠱,其是其人人之。以其處事之首,以柔巽之質幹父之事,堪其任父之蠱」者,處事之首,以柔巽之質幹父之事,堪其任父之蠱」者,釋「幹父之蠱」者,稱於「於之」至「承考也」。正義曰:「幹

「垮」也。 傷厥考心」,是父在稱「考」。此避「幹父」之文,故變云没稱「考」,若散而言之,生亦稱「考」。若《康誥》云「大損益一依父命,當量事制宜以意承考而已。對文「父」

失在中之道,故云「得中道」也。
曰「得中道」者,釋「幹母之蠱」義。雖不能全正,猶不正,宜屈己剛,不可固守貞正,故云「不可貞」也。《象》内處中,是幹母事也。「不可貞」者,婦人之性難可全内處中,是幹母事也。「不可貞」者,婦人之性難可全人一,「幹母」至「中道也」。正義曰:居

悔」也。「无大咎」者,履得其位,故終无大咎也。「幹父之蠱,小有悔」者,以剛幹事而无其應,故「小有九三,「幹父之」至「无咎也」。正義曰:

故「往未得」也。 之事也。「往見吝」者,以其无應,所往之處見其鄙吝,父之蠱」者,體柔當位,幹不以剛而以柔和,能容裕父父之蠱」者,體柔當位,幹不以剛而以柔和,能容裕父子之。上義曰:「裕

有聲譽。《象》曰「幹父用譽,承以德」者,釋「幹父用父之蠱,用譽」者,以柔處尊,用中而應,以此承父,用六五,「幹父」至「以德也」。 正義曰:「幹

❶ 「已」,嘉本同,阮本作「以」。

N

「承以德」也。
譽」之義。奉承父事唯以中和之德,不以威力,故云

尚 者,釋「不事王侯」之義。 事,故云「高尚其事」也。 係累於職位,故不承事王侯,但自尊高慕尚其清虚之 王侯,高尚其事」者,最處事上,不復以世事爲心,不 可法則也 上九,「不事」至「可 《象》曰「不事王侯,志可 身既不事王侯,志則清 則也」。 正 義 EI: 虚 則 示 高

■ 牌上 臨。「元亨」至「有凶」。正義

盛不可終保,聖人作《易》以戒之也。 區為建丑之月,從建丑至于八月建申之時,三陰既盛, 真」也。「至于八月有凶」者,以物盛必衰,陰長陽退, 以監臨於下,故曰「臨」也。剛既浸長,説而且順,又以 以監臨於下,故曰「臨」也。剛既浸長,説而且順,又以 以監路於下,故曰「臨」也。剛既浸長,,其德壯大,可 曰:案《序卦》云「臨,大也」,以陽之浸長,其德壯大,可

例,説而順之,下應以「臨」字結之。此无「臨」字者,以「臨,剛浸而長,説而順」者,此釋「臨」義也。據諸卦之《彖》曰,「臨剛」至「不久也」。正義曰:

居中, 凶。 其剛中 卦三 建 注云「小人道長,君子道消」,宜據否卦之時,故以臨 未爲八月」,褚氏云「自建寅至建酉爲八月」。 則陽長之卦,至其終末皆有凶也。 具也。然陽長之卦,每卦皆應「八月有凶」,但此 唯此卦二陽浸長,陽浸壯大,特得 下、地升上,上下通泰,物通 始復,剛性尚微,又不得其中,故未有「元亨利貞」。 以 也。「至于八月有凶,消不久也」者,證「有凶」之義 「元亨利貞」。 臨 「臨」,是盛大之義,故於此卦特戒之耳。 丑. 其陽道既消,不可常久,故「有凶」也。 也。 陽之時,三陽在下而 而至否卦建申爲「八月」也。 正義曰:云「八月」者,何氏云「從建子陽生至 而下與 而 「剛中而應,大亨以 應,亦 地相 今此《臨》卦,其義 是 應, 「臨」義,故 使物大得亨通而利 成乾 則失正,故不具「四德」。 正,天之道」者,天道 不 體,乾下坤上,象天 亦然,故云「天之道 稱「 得 ○注「八月」至「有 於 臨」,所以 剛 若以類言之 中 但復卦一 正,故 之上 今案:此 四四 卦名 乾 以 而 陽 桂 卦 到 加

其下莫不喜説和順,在上但須教化思念,无窮已也,欲有地」也。「君子以教思无窮」者,君子於此臨卦之時,上有地」者,欲見地臨於澤,在上臨下之義,故云「澤上人有地」者,欲見、「澤上」至「无疆」。正義曰:「澤

安其民无有疆境,象地之闊遠,故云「无疆」也。使教恒不絶也。「容保民无疆」者,「容」謂容受也,保

己之志意行而歸正也。
「咸臨貞吉」之義。四既履得正位,己往與之相應,是正,故「貞吉」也。《象》曰「咸臨貞吉,志行正」者,釋臨貞吉」者,「咸」,感也,有應於四,感之而臨,志行得臨貞吉」者,「咸臨」至「行正也」。正義曰:「咸

也。則君臣上下獻可替否之義也。 也。則君臣上下獻可替否之義也。 一九一,「咸臨」至「順命也」。正義曰:「咸 中。「我不利」者,二雖與五相應,二體是剛,五體是 是一世。「我不利」者,二雖與五相應,二體是剛,五體是 是一世。「我不利」者,二雖與五相應,二體是剛,五體是 是一世。則君臣上下獻可替否之義也。則君臣上下獻可替否之義也。則君臣上下獻可替否之義也。

止,不復長久,故「无咎」也。
「既憂之,咎不長」者,能盡憂其事,改過自脩,其咎則也,若能盡憂其危則剛不害正,故「无咎」也。《象》曰也,若能盡憂其危則剛不害正,故「无咎」者,「既」,盡臨」者,謂甘美諂佞也。履非其位,居剛長之世而以邪臨」者,謂甘美諂佞也。履非其位,居剛長之世而以邪此,不復長久,故「无咎」也。

處,故「无咎」也。 處,故「无咎」也。《象》曰「至臨,无咎,位當」者,釋「无 在,能盡其至極之善而爲臨,故云「至臨」。以柔不失 位,能盡其至極之善而爲臨,故云「至臨」。以柔不失 臨,无咎」者,履順應陽,不畏剛長而己應之,履得其 。故[无咎」也。《象》曰「至臨」也」。正義曰:「至

「大君之宜」,故言「行中之謂」也。
「大君之宜,故言「行中之謂」也。《象》曰「大君之宜,行中之謂」者,釋「大君之聽,知力者盡其謀能」,是知爲臨之道,大君之所宜,以聽,大君之宜,吉」者,「處於尊位,履得其中,能納剛以臨,大君之宜,吉」者,「處於尊位,履得其中,能納剛以臨,大君之宜」,故言「行中之謂」也。 正義曰:「知

志意恒在於内之二陽,意在助賢,故得「吉」也。
之吉,志在内」者,釋「敦臨,吉」之義。雖在上卦之極,而志行敦厚,剛所以不害,故「无咎」也。《象》曰「敦臨臨,至在助賢,●以敦爲德,故云「敦臨,吉」。雖在剛長臨,吉,无咎」者,「敦」,厚也,上六處坤之上,敦厚而爲臨,吉,无咎」者,「敦臨」至「在内也」。正義曰:「敦上八,「敦臨」至「在内也」。正義曰:「敦

❶ 「至」,嘉本、阮本皆作「志」。

則下觀 也。 顒若」。○注「王道」至「顒若也 大,不觀其細,此是下之效上,因 下觀此盛 故云「觀盥而 今所觀宗廟之祭,但觀其盥 日 觀盤 故觀至盤則 「薦」者,謂既 觀 而 而化 」者,王 不薦」者,可觀之事莫過宗廟之祭盥 禮,莫不皆化, 巽 坤 」者、「觀盛」謂 主下 不薦」 有孚顒若」者,「顒」是嚴 者 觀,盤而不薦,有孚顒 道 灌 也。 德 之後 之美而 「有孚顒若 悉有孚信 觀 陳 禮,不觀在後籩豆之事, 盤禮 薦 可 籩 盛 觀 豆 正義曰:「盡夫觀 而 「觀 」者,「孚」,信也,但 則 顒 之事,其 也,故謂之「觀 正之貌,「若」爲 休而 然,故云「有 而皆化之矣。 若。 止,是觀其 禮 其 卑 禮 正 也。 盛 平 盛 義

之神 不薦 以觀於天下, 故 觀 本由在下觀效在上而變化,故「有孚顒若」也。 在 在 道而 ,有孚顒若,下觀而 下大觀。 上」者,謂大爲 彖》曰,「大觀」至「服矣」。 四時不忒」者,此 謂之「觀」 今大觀在於上,又順 在 下,所觀 也。 化」者,釋 盛明觀卦之美,言「觀盥」與 此 唯在於上,由 釋 觀 「有孚顒 卦 而 一之名。 和 巽,居中得 正 在上 若」之義。 義 日: 觀 「觀天 一既貴 盥 大 而 īF

語辭,言「下觀而化」皆孚信,容貌儼然也

爲? 然,謂 道 逼 下 下服矣。 道」者,微妙无方,理不可 天之神道 觀天之神道而四 服矣」者,此明聖人用此天之神道,以 ,在下自然觀化服從,故云「天下服矣」。 ,唯身自行善垂化於人,不假言語教 不知 之「神 天既不言而行,不爲而成,聖人法則天之神 相 從 合,觀 道 何 而 一時不太 此 來,唯 而 天之神 四時 見 知,目 也。 之節 四 道 時 「聖人以 而 不可見,不 氣見矣,豈 流 四 行不有 時不 戒,不須 神 「觀」設教 · 有 道設 知所以 差忒, 龙 見天之所 變。 威 教 刑 故 而 然 而 恐 天 而 神 天 云

之所爲,故云「先王」也 行 者,以省視萬方,觀看民之風俗以設於教,非諸 上,故云「風行地上,觀」也。 「先王以省 地上」者,風主號令行於地上,猶如 (象》曰,「風行」至「設教」。 先王 方觀民設教 正義 設 教 曰 : 侯以 在 下 民 風

咎,君子吝」者,爲 小人行之纔得无咎,若君子行之則鄙吝也 自進,无所鑒 童觀 」者,處於觀 初六,「 見,唯 童觀 此 時 如 觀 而 童 至「小 最遠 看 稚 趣 之子而 在 朝 順 廷之美體,是 從 道 觀望 而 也」。 已,无所能 也。 柔 正 「小人无 弱 義 不 曰 能

❶ 「其禮卑」至「籩豆之事」二十四字,嘉本同,阮本缺。

而外觀。此童「觀」、闚「觀」,皆讀爲去聲也。 ○注「處在」至「可醜也」。正義曰:「猶有應焉,事也。○注「處在」至「可醜也」。正義曰:「猶有應焉,不爲全蒙」者,六二雖柔弱在内,猶有九五剛陽與之爲應,則微有開發,不爲全是。● 童蒙如初六也,故能闚觀,利女貞」者,既是陰爻,又處在卦内,性又柔弱,唯觀,利女貞」者,既是陰爻,又處在卦内,性又柔弱,唯觀,利女貞」者,既是陰爻,又處在卦内,性又柔弱,唯觀,利女貞」者,既是陰爻,又處在卦内,性又柔弱,唯

「道」爲「生」也。

「道」爲「生」也。

「觀我上進退」也。「道」得名「生」者,我之動出也。故時可則進,時不可則退,觀風相幾,未爲「童觀」,近則未爲「觀國」,居在進退之處,可以自觀是有可進之時,又居上體之下,復是可退之地,遠則不是其進退」者,「我生」,我身所動出。三居下體之極,我生進退」者,「我生」,我身所動出。三居下體之極,我生進退」者,「觀我」至「失道也」。正義曰:「觀八二」、「觀我」至「失道也」。正義曰:「觀

> 觀民以觀我,故觀我即觀民也。 (觀我生,君子无咎」也。《象》曰「觀我生,觀民」者,謂俗,故觀民以察我道,有君子之風著則无咎也。故曰俗,故觀民以察我道,有君子之風著則天下著小人之後,故觀民以察我道,有君子之風,教化不善則天下著小人之義曰:九五,「觀我生君子」至「觀民也」。正

▶ 「是」,嘉本同,阮本作「蒙」。

■ 離上 噬嗑,亨,利用獄。正義曰:「噬

分謂 例 故不先出卦名。 先出卦名 隱者,先出卦名 隔 之爲體取象既多,若 而 有」、「曰小 假借口 上下,若齧去其物, 嗑,亨」者,「噬」,齧 明」、「動 頤 利 不錯 也。 當 中 用 剛 震 見 剛 先摽卦 獄」者,以 須 有 亂 柔既分 象以 剛 彖》曰 噬 柔分動 物曰 用 明」之與「 」雖各 在下,離 故 虚而 則 畜」之類 刑法 爲 事 此 噬 名, 不大 入義,以 ,「頤 亨」者,釋「亨」義。 刑除間隔之物 而 得 ,後更以卦名結之。 嗑」者,此 此乃夫子因義理文勢隨 頭 去之乃 事,相 乃復言 明,雷 柔 相 彰 是 ,上下乃 中 也、「嗑」, 動 溷 在 著。 取分義則云震下離上,若取 中 也。 喻 有 雜 上。 須 各 電合而 得亨 刑 物 故 釋 日某卦,❶「日 明 至 是 此發首不疊卦 法 而 目 合而 剛 也。 而 動 噬 用 用用 噬 合 通, , 故 柔云「分」、雷 且 事 嗑」名 而 章」者,釋 得 也。 嗑」之類。 故 著 1,故剛 故 顯 「利 凡 獄 「亨」也 雷電云「合」。 由 若具 朔 上下 云「噬 可 用獄 物 也 也。 也。 噬 <u>-</u> 以 在 同 柔 (義顯露 嗑 義 名者,若義 ·之間 於 斷 「利用獄」之 **案** 也 嗑, 云「分」也 雷 其事 人」、「日大 而發,不爲 電 獄。 而 正 此 口 電 云「合」 得「亨」 亨 有 則 諸 卦 義 既 可 ,則不 之名 剛 物 卦 隔 \Box 知 也 柔 出出 > 間 其

> 電並 而 然則此云「上行」,及《晉卦・彖》云「上行」,既 行」,是減三而 在 五. 義曰:凡言「上行皆所之在貴 文以其上云「剛柔分」,「剛柔分」則是「不亂」,故云「雷 柔」至「之義」。 者,既居上卦, 也。 則 Ė 彖》文唯云「雷電 雖 利 謙 又稱 進皆曰「上行」,不是唯向五位 位 云 用 行」,不止 對 不當位」者, .則是「上行」,❷故於此明之。 合,不亂乃章」也。 離 柔得中 獄 震 序《彖》云 上 」之義。 合 行 體 而 Ŧī. 益 共 意 也。 上 Œ 所 則 「地道卑而 陰居 上 成 行, 在 合」,注 似若 義 居 卦 又《損》卦《彖》云 向 日 陰 雖 謂之「上行」,母是 五位 卦 進, 王 位 不 \bigcirc 也 雷 者,雖見 云「不亂乃章」者,「不亂」之 猶 當 注 上行」, 故 是 位 此 電 云上 「謂 一者,輔嗣此注 「利 「柔得 一,利 釋二 並 五 凡言「上行」,但 用 乃 坤 合,不 用 在 行。 稱「上行」 至 獄 中」也,「而 體 象 獄 尊 損 在上,❸故 位 |者,此 亦 也。 用 利 亂乃章」者: 下 不 獄 用 ,恐畏之適 益 據 德 也 獄 在 上曰 也 釋爻有 注 如 上 五 所之 在 之 五 行 也 此 F. īĒ. 位

② 「畏」,嘉本作「思」

[「]畏」,嘉本作「思」,四庫本作「謂」。

③ 「體」,嘉本同,阮本作「道體」。

[「]減三」,嘉本、四庫本作「減下」。

明罰勑法可畏之義,故連云「雷電」也。之體,但「噬嗑」象外物。既有雷電之體,則雷電欲取電噬嗑」者,但「噬嗑」之象,其象在口,雷電非「噬嗑」《象》曰,「雷電」至「勑法」。正義曰:「雷

刑大深 膚滅鼻」者,六二處中得位是用刑者, 乘剛而刑,未盡順道,噬過其分」,故至「滅鼻」。 言用 噬膚」。 六二,「噬膚」至「乘剛 也。 「膚」是柔脆之物,以 「无咎」者,用 刑 得其 喻服罪受刑之人也 所 也。 疾,謂 所刑中當故 刑 正義曰:「噬 中其理,故 曰

周易正

義卷第五

其乘剛,故用刑深也。「无咎」也。《象》曰「乘剛」者,釋「噬膚滅鼻」之義。

以

不當」者,謂處位不當也。

不當」者,謂處位不當也。
三以柔不乘剛,刑不侵順道,雖有遇毒之吝,於德非但難齧,亦更生怨咎,猶噬腊而難人,復遇其毒味然非但難齧,亦更生怨咎,猶噬腊而難人,復遇其毒味然三處下體之上,失正刑人,❶刑人不服。若齧其腊肉,是處下體之上,失正刑人,❶刑人不服。若齧其腊肉,不當」者,謂處位不當也。

光 守貞正 能得其剛直也。「利艱貞吉」者,既得剛直 「得金矢」者,「金」,剛也,「矢」,直也,雖刑不能服物 非其位,❸以斯治物,❹物亦不服,猶如「噬乾肺」然也。 曰:「噬乾肺」者,「乾肺」是臠肉之乾者,履不獲中,居 也也 九四、「噬乾 之吉猶 未 能 光大通理之道, 肺」至「未光也」。 故《象》云「未 ,利益艱 0 正 難 而 義

- ▶ 「正」,嘉本同,阮本作「政」。
- 「肺」,嘉本作「肺」,阮本作「肺」。下「肺」字同
- 「非其」,嘉本同,阮本作「其非」。
-) 「治」,阮本同,嘉本作「噬」。

雖貞正自危而无咎害。 剛是「金」也。 云「得當」也。 治罪於人,人亦不服,如似「噬乾肉」也。 得黄金」也。 黄」,中也。 噬乾肉」者,「乾肉」,堅也 六五,「噬乾肉」至「得當也」。 「金」,剛也,以 「貞厲无咎」者,己雖不正, 既中而行剛,能行其戮,剛勝者也,故曰 位雖不當而用刑得當, ,以陰處陽,以柔乘剛 居於中是「黄」也,以柔乘 「得黄金」者 刑戮得當,故 正義曰 ,以此

滅耳,將欲刑殺,非可懲改,故云「滅耳非懲」也 滅耳非懲」者,若罪未及首猶可誡懼歸善也,罪已及 當刑罪非能懲誡,❶故云「罪非所懲」也。 至「甚焉」。 不明,積惡致此,故 罪及其首,何檐枷械,滅没於耳,以至誅殺。 校滅耳,凶」者,「何」謂檐何,處罰之極,惡積不改,故 命將盡 上九,「何校」至「不明也」。 正義曰:「罪非所懲」者,言其惡積既深,尋 ,非復可誠,故云「及首非 《象》云「聰不明」也。 誠也。 正義曰:「何 「及首非 ○注「處罰 以其聰之 「校」既 誡

■ 限上 費,亨,小利有攸往。正義曰:

「賁」,飾也,以剛柔二象交相文飾也。「賁亨」者,以柔

攸往」也。 以剛上文柔不得中正,故不能大有所往,故云「小利有以剛上文柔不得中正,故不能大有所往,故云「小利有來文剛而得亨通,故曰「賁亨」也。「小利有攸往」者,

以治於物也。 象既有天文、人文,欲廣美天文、人文之義,聖人用之 用此文明之道裁止於人,是人之文德之教。此賁卦之 也。「文明以止,人文」者,「文明」,離也,以止,艮也。 也 是「分剛上而文柔」也。棄此九二之中,往居无位之 字。「分剛上而文柔,故小利有攸往」者,釋「小利有攸 地,棄善從惡,往无大利,故「小利有攸往」也。「天文 往」義。乾體在下,今分乾之九二上向文飾坤之上六 若「大哉乾元」,以「元」連「乾」者也。「柔來而文剛,故 亨,故云「賁亨」。「亨」之下不重以「賁」字結之者,以 亨」,柔來文剛,以文相飾,是「賁」義也。 亨,柔來而文剛,故亨」者,此釋「賁亨」之義。 不直 「亨」之與「賁」相連而釋所以「亨」,下不得重結「賁 ·賁」連云「賁亨」者,由「賁」而致「亨」事,義相連也。 者、天之爲體、二象剛柔、剛柔交錯成文、是「天文」 《彖》曰,「賁亨」至「天下」。 「觀乎天文以察時變」者,言聖人當觀視 正義曰:「賁 相飾即 有爲 言

❶「當」,嘉本同,阮本作「常」。

剛柔得交,若乾上坤下則是天地否閉、剛柔不得交,故 分剛而上、分柔而下也 上、分柔向下者,今謂此本泰卦故也。 在上,陰本在下,應分剛而下、分柔而上,何因分剛 首,❷故以己上六下居乾之二位也。 剛亢,故以己九二上居坤極, ●坤性柔順,不 居於初三,乾之九二何以分居上位不居於五者,乾性 中,薺麥生也。 陽用事,陰在其中,靡草死也。 六」至「之義也」。 化成天下」者,言聖人觀察人文,則《詩》、《書》、《禮》、 天文,剛柔交錯、相 二,剛不分居坤極,則不得「文明以止」故也。 樂》之謂,當法此教而 是觀剛 正義曰: 坤之上六何以來居二位不 飾 成文,以 柔而察時變也。 「化成天下」也。 察四 十月純 時 且若柔不分居乾 變化。 若天地交泰則 陰用事,陽 「觀乎人文以 ○注「坤之上 若四 又陽本 爲 在 月 物 向 純

也。「无敢折獄」者,勿得直用果敢折斷訟獄。火,賁」也。「以明庶政」者,用此文章明達以治理庶政,改之光明,象君子内含文明以理庶政,故云「山下有下有火,賁」者,欲見火上照山有光明文飾也,又取山下,火,賁」者,欲見火上照山有光明文飾也,又取山下,至「折獄」。正義曰:「山

·賁其趾,舍車而徒」者,在賁之始以剛處下,居於无位初九,「賁其趾」至「弗乘也」。 正義曰:

故《象》云「義弗乘」也。而徒」。以其志行高絜,不苟就輿乘,是以義不肯乘,之地,乃棄於不義之車,而從有義之徒步,故云「舍車

起,故《象》云「與上興」也。若似賁飾其須也。循其所履以附於上,與上同爲興「賁其須」者,「須」是上附於面,❸六二當上附於三,❹六二,「賁其須」至「上興也」。正義曰:

如皤 守「質素」,故「皤如」也。 之,三爲己難,故己猶豫。 如」者,「皤」是素白之色,六四有應在 六四,「賁如」至「无尤也」。 「白馬翰如」者,但鮮絜其馬 或以文飾,故「賁如」也, 正 初 義 欲 日 往 賁 或 從

0

^{● 「}上居」,嘉本同,阮本無「上」字。

[「]物」,嘉本同,阮本作「順」。

[「]附」,嘉本同,阮本作「須」。

[「]當」,嘉本同,阮本作「常」。

疑也。 則終有尤也。 四當位疑」者,以 若非九三爲己寇害,乃得與 其色 有寇難乃爲婚媾 匪 寇 翰 婚媾,終无 若不當位 如,徘 徊 尤」者,釋 其 ,則與初非 則終无尤過。 待之,未敢 當位 得與初 應,何須欲 匪 初 輒 寇婚媾」之義。 爲婚媾 進 爲 若犯 也。 應,但 寇難 往而 也 匪 礙於三,故遲 寇 致遲疑 《象》曰 而 婚 爲婚 若待匪 媾 也 者

用

財

袁

若能 之,則 道損 屬,五 其「吝」也,必 則質素之道乃隕落,●故云「丘園乃 于東帛,丘 之帛、「戔戔」衆多也。「吝、終吉」者、初 之主。若能施 于丘園」者,「丘園」是質素之處,六五 園調 象》云「六五之吉,有喜也」。 害 施飾每事,質素與丘園 正義曰:「爲飾之主,飾之盛」者,若宫室輿服之 金銀珠玉之等皆是也。 爲飾主。 六五,「賁于」至「有喜也」。 也。 袁 圃, 園乃落」者,「東帛」,財 「施飾 唯 儉約之「吝」乃得「終吉」而 飾 若施設華飾在 草 在於質素之處,不華侈費 木 丘園 所 生,是質素之處,非華美之所 盛 莫大焉」者,「丘」謂 相似,「盛莫大焉」。「故賁 於輿服、宮館之物,則大 若賁飾於此束帛珍寶 ○注「處得」至「終 物也 落」也。 處得尊位, ,舉「東帛」言 時 正 有 (用,則 儉 義 「賁于丘 喜 約 日 也,故 丘墟 所 故是 爲 「賁 吉 束 飾

> 之文。 之間而云儉約之事? 所以漢聘隱士,或乃用羔鴈玄纁,蒲輪駟馬,豈 先師,唯用「東帛」招聘丘園,以 吉」,此則普論爲國之道不尚華侈, 案輔嗣之注,全无聘賢之意,且爻之與《象》亦无 故「東帛」乃「戔戔」也。 聘士,2則丘園之士乃落也。 物 帛 ,東帛乃戔戔衆多也 乃戔戔」者, 輔嗣云「用莫過儉、泰而 設 飾 今觀注意,故爲此解耳。 在 諸家注 於丘 諸 園 儒以爲,若賁飾 儉約待賢,豈其 能約,故必吝焉 若賁飾丘園之士與之、 《易》多爲 質素之所, 而 貴儉約 此 解。 則 也 東帛 乃 義 止 不 也 若從 得 待 但今 束 縻 終 帛 士 不 費

賁无咎」者,處飾之終,飾終則反素,故任其質素,❸不 (象》云「上得志」也,言居上得志也 文飾 故曰 上九,「白賁」至「得志也」。 「白賁无咎」也。 守志任 真 得其本性,故 正義 E : 白白

艮坤 上下 剥, 不 利 有 攸 往。 正 義 日 剥

0 0

質 素」, 嘉 本同,阮本作「素質」。

不 用聘士」,嘉本同,阮本作「不困聘上」。

任」,嘉本同,阮本作「在」。

者,剥落也,今陰長 人既長,故「不利有攸往」也 變 剛 剛 陽 剥 落,故稱 「剥」也。 小

之時 行也。 消滅,故云「天行」也。 諫,建事立功也。 時,存身避害,危行言遜 盈之時,行盈道也,在虚之時行虚道也。 息盈虚。 象者須量時制變,隨物而動。 唯望君上形象,量其顔色而止也。 天行」者,解所以在剥之時「順而止之」。 无道,君子行之,不敢顯其剛直,但以柔順止約其上. 有攸往」也。「順而止之,觀象」者,明在剥之時,世既 曰: 人道長,❶世既闇亂,何由可進? 有攸往,小人道長」者,此釋「不利有攸往」之義。 剥, 剛 「柔變剛」者,釋所以此卦「名剥」之意也。 「剥、剥也」者釋「剥」。 ·非君子之所尚」者,不逐時消、息、盈 故釋云「剥」者,解「剥」之義,是陰長 《彖》曰 春夏始生之時則天氣盛大,秋冬嚴殺之時 亢激拂,觸忤以隕身,身既 道消之時行消道 剥 「天行」謂 剥 ○注 也。 也」至「天行 也,道 逐時 卦名爲「剥」,不知 「坤順」至「所尚也 若值 君子通達物理,貴尚消 消 息之時 傾 「君子尚消息盈 往則遇災,故「不利 息盈虚乃天道 一盈息之時,極言正 隕 功又不就,「非 行息 若值 觀其顔 也。 、虚、於无道 解 道 消 剥 「不利 何 也, 以小 正義 天氣 之所 虚 色 於陽 以 正 虚 之 在 形 稱 義

君子之所尚」也

防於剥也 義從下而起,故在上之人當須豐厚於下,安物之居,以 故云「山附於地,剥」也。 於地、剥」者、山本高峻、今附於地、即 《象》曰,「山 附」至「安宅」。 「上以厚下安宅」者,剥之爲 是剥落之象 正義曰: 山

附

也。 在牀下。今剥牀之足,是盡滅於下也。 足,以滅下」者,釋「剥牀以足」之義。 滅,❷則以侵削其貞正,所以「凶」也。《象》曰「剥牀 剥道從下而起,剥牀之足,言牀足以剥也,下道始滅 剥牀以足」者,「牀」者,人之所以安處也。 「蔑貞凶」者,「蔑」,削也。「貞」,正也,下道 初六,「剥牀」至「以 滅下也」。 牀在人下,足又 在剥之初 正 義 日 既

除中正之道,故「凶」也。 身,故云「剥牀以辨」也。 牀身分辨之處也。 曰:「剥牀以辨」者,「辨」謂牀身之下,牀足之上,足 六二,「剥牀以辨」至「有與也」。 今剥落侵上乃至於「辨」,是漸近人 初六「蔑貞」,但小削而已,六 「蔑貞凶」者,「蔑」,削也,削 正 與 義

- 以」,嘉本同,阮本無此字。
- 滅」,嘉本同, 阮本作「蔑」。

與」也。 欲 謂「牀」也,今剥道既至於「辨」,在牀體下畔之間,是將 爲「削」。 之辭」也。 柔,削其正道,以此爲德則物之所棄,故《象》云「未 二「蔑貞」,是 正義曰:「蔑猶甚極之辭」者,初既 .蔑」、「蔑」上復「蔑」,此爲「蔑」甚極,●故云「蔑猶甚極 滅牀,故云「轉欲滅物之所處」也。 言无人與助之也。 「稍近於牀,轉 「蔑」謂微蔑,物之見削則微蔑也,故以 削之甚極,故更云「蔑貞 欲滅物之所處」者,物之所處 ○注 「蔑猶」至「所棄 稱「蔑」,二又稱 凶 也。 長 也 此 陰

下之情而往應之,所以「无咎」也。以「无咎」之義。上下羣陰皆悉剥陽也,己獨能違失上處剥而无咎也。《象》曰「剥之无咎,失上下」者,釋所三與上九爲應,雖在剥陽之時,獨能與陽相應,雖失位三與上九爲應,雖在剥陽之時,獨能與陽相應,雖失位三與上九爲。正義曰:六

云「切近災」也。《象》曰「切近災」者,其災已至,故失身,所以「凶」也。《象》曰「切近災」者,其災已至,故牀以膚」者,四道浸長,剥牀已盡乃至人之膚體,物皆,四,「剥牀」至「近災也」。 正義曰:「剥

得寵以消君子。「貫魚」者,謂衆陰也,駢頭相次似若魚以宮人寵」者,處得尊位爲剥之主,剥之爲害,小人六五,「貫魚」至「无尤也」。 正義曰:「貫

「无不利」。故《象》云「終无尤也」。似。宫人被寵,不害正事則終无尤過,无所不利,故云貫穿之魚。此六五若能處待衆陰,但以宫人之寵相

《象》曰「君子得輿,民所載」者,釋「得輿」之義。 若小人居之,下无庇蔭,在下之人,被剥徹廬舍也。 終不可用爲君也。 可用」者,言小人處此 子居處此位養育其民,民所仰載也。「小人剥廬,終不 位,能覆蔭於下,使得全安,是君子居之則得 大之果不爲人食也。 「君子得與」者,若君子 碩果不食」者,處卦之終獨得完全,不被剥落 上九,「碩果」至「不可用也」。 位爲君,剥徹民之廬舍,此小人 正 車 猶 而 義 若君 如 居 曰 也。 此 碩

周易正義卷第五

計一萬五千一百六十九字

「爲」,嘉本無此字。

0

周 易正義卷第六

國 子祭酒上 一護軍 曲 阜

復。「亨」至「攸往」。 開 國子臣 孔 穎達奉勃 正 義 撰 曰

攸往」也 復而得其道,●不可過遠,唯七日則來復乃合於道也 故「无咎」也。「反復其道,七日來復」者,欲使反之與 來,則「无咎」也。若非陽衆來則有咎,以其衆陽之來, 也。「朋來无咎」者,「朋」謂陽也,反復衆陽,朋 人无疾」者,出則剛長,人則陽反,理會其時,故无疾病 利有攸往」者,以陽氣方長,往則小人道消,故「利有 復,亨」者,陽氣反復而得亨通,故云「復,亨」也。「出 聚 而

人无疾,朋 剛反動而以順行」者,既上釋「復亨」之義,又下釋「出 復,亨」者,以陽復則亨,故以「亨」連「復」而釋之也。 《彖》曰,「復亨」至「之心乎」。 來无咎」之理 ,故云「是以出入无疾,朋來无 正 義曰:

周

易正義卷第六

又臨卦亦是陽長而言「八月」,今復卦亦是陽長,何以 褚氏、莊氏並云:「五月一陰生,至十一月一陽生,凡 陽氣從剥盡之後至於反復,凡經七日,其注分明。 始於剥盡之後至陽氣來復時,凡經七日。 宰,何得有心? 象,動息地中,雷在地下,息而不動 不生而物自生,寂然不動,此天地之心也。此復卦之 明復卦之義。天地養萬物以静爲心,不爲而物自爲, 之心相似。觀此復象乃見天地之心也。天地非有 理,故曰「天行」也。 陽氣絶滅之後,不過七日,陽氣復生,此乃天之自然之 唯七日而來復,不可久遠也。此是天之所行也。 咎」也。「反復其道,七日來復,天行」者,以「天行」釋 「月」言「日」。」今輔嗣云「剥盡至來復」,是從「盡」至 來復」經七日也。 陽氣」至「凡七日」。 正義曰:「陽氣始剥盡」,謂陽氣 ·利有攸往」之義也。「復,其見天地之心乎」者,此贊 反復其道,七日來復」之義。 而云七「日」不云「月」者、欲見陽長須速、故變 以人事之心託天地,以示法爾。 若從五月言之,何得云「始盡 「利有攸往,剛長」者,以「剛長」釋 言反之與復得合其 ,静寂之義,與天地 觀注之意 天之 也? ○注 如 主

0 使」,嘉本同,阮本作「速」。

後復而 卦六日 卦之盡 非 則 言 静 曰 静 也,言天地寂 處,是「反本」之謂 於九月之末,十月當 别各得七分,是每卦得六日七分也。 二十分,是四百二十分。 每日分爲八十分,五 主一日,凡主三百六十 坎、震、兑,各主其 復具言。 緯》「六日七分」之義。 獨 復者,反本之謂 静時 變「月」 是對「語」有 聲之動, 非 對 非 多也, 動。 則出人之義,「反」謂人而倒反,「復 向 七分、舉成數言之、故輔 則復卦陽 對 對 上 而 動 動 默 言静之爲本,自然而 也。 稱 動時少 者也。 然不動,是「以本爲心」者也。 《易緯稽覽圖 者也。 七 默, 則 也 ○注「復 來 也。 日 П 也。 ? 者,往前離本處而去,今更反於本 是從剥 方,其 之静,是不語之時 天地之動 純 日分爲四 以 天 語 , 坤用事 同 · 日 。 動 若暫時 六十卦分之,六七四十二卦 鄭康 觀注 息 者 静 地 餘六十卦, 餘有 $\stackrel{>}{\succeq}$ 則 盡 語默 以 至 一之意 成 静 默 百分,四 至陽氣來復 ,坤卦有六日七分。 |嗣言「凡七日」也。 本爲 「具存矣」。 「卦氣起 ~之説, 而 有 Ŧi. 而 爲 動, 非 非 必 日四 无别 其本, 心」者,「本」謂静 非 謂 剥卦陽氣之盡 止 卦 但 對 對 分日之一又爲 恒 不 分日之一者 中孚」, 息則 有六爻,爻别 動 於文省 體 語 然, 常 '^; 隔 動 而 凡動 謂 正 「默 者,「 故 歸 爲 生 亦 義 既 坤 굸 其 静 故離 略 静 用 之 反之 티 : 「反 ",故 末 也 語 易 坤 則 在

> 變 物之自物不能普賴於我,物則被害 此獲寧。 凡以无爲 寂然至无 雷動風行千化萬變,若其雷風 其内也,外是其末,内是其本,言天地 凡 對 有二義: 者,此言天地之動也。 也。 굸 若其以 也。 心,則物我 二天 者,萬物雖 「若其以有爲心,則異類未獲具存」者 地 有爲心,則我之自我不能普及於 雖 大, 齊 致 富 運 親 言「寂 有 動 疎 於外 萬 止 物 息 然至无是 等, ,故「未獲 運 而 雷 无心也; 則不 天 動 化停住之後,亦 地寂然至无於 風 其本 害異 、具存」。 行 二者,雖 -矣」者 運 (類,彼 化 萬

復於 雷 夏至陽之復」者,「復 日」不但不可出 者,恐「方」是 息」之義。 於雷,故關門掩閉,商旅不行。 省方」者,「方」,事 以二至之日閉塞其關 在地中,復」者,「雷」是動 陽動 在地中」。 静 用 也 象》曰 而 ○注 陰復於静 動 四 「先王以至日閉 復則静 「方事」至「无事也」。 行,亦不可 方境域, 也,后不省視其 雷 也。 一謂反 在 也, 行 」至「省方」。 故以 商 本,静 夏至 復則止,事 物,復卦以 省視事也。 旅 關」者,先王 君 不行於道路 方」爲「事」也 爲動 陰生,是陰動用 后掩閉於事 (方事 正 復則 本,冬至 動 「冬至陰之復 義 也。 息爲 E : 无 象 也。 義曰: 事 以 此 主 皆 方, 地 一后 言「至 陽 一, 故 取 復 而 掩 雷 卦 陽 閉 不 H

事也。而反復則歸静,行而反復則歸止,事而反復則歸于无

之,是迷而不遠即能 遠復」者,最處復初是始復者也,既在陽復即能 「不遠之復以脩身」者,釋「不遠之復 祇,大也」,既能 ,以能脩正其身,有過則改故也 初 九,「不遠」至 速復是无大悔,所以大吉。 復也。「无祇悔,元吉」者, 脩 身也」。 也 正 所以不遠速 義 《象》曰 曰 韓氏云 從 而 復

下仁也」。

下仁也」。

、以其下仁、所以「吉」也。故《象》云「休復之吉、以、以其下仁、所以「吉」也。故《象》云「休復之吉、以、附而順之、是降下於仁、是休美之復、故云「休復吉」復、吉」者、得位處中、最比於初。陽爲仁行、己在其上復、吉」者、得位處中、最比於初。陽爲仁行、己在其上、八二、「休復」至「下仁也」。正義曰:「休

也。 道自守,得「无咎」也。 咎,它來難保」者,去復未甚大遠,於義雖復无咎,謂 咎」也。 於上六「迷復」,猶頻蹙而復。「復道宜速」謂 可保此无咎之吉也。 者,「頻」謂頻蹙,六三處下體之上,去復稍遠 去復猶近,雖 六三,「頻復」至「无咎也」。 ○注 「頻頻」至 有危厲,於義无咎。 若自守之外更有它事 「難保」。《正義》曰:「義 所以《象》云「義无咎」,守常之 故《象 正 義 》云「義 蹙而 而來,則 曰 雖 求 雖 无 以 无 復 頻 勝

義得「无咎」也。

從道而歸,故《象》云「以從道」也。居在衆陰之中,故云「中行」。獨自應初,故云「獨復」。行獨復」者,處於上卦之下,上下各有二陰,己獨應初,行四,「中行」至「從道也」。正義曰:「中六四,「中行」至「從道也」。

中 履中,又能自考成其行。 曰「敦復无悔,中以自考」者,釋「无悔」之義。 六二之「休復」,猶得免於悔吝,故云「无悔」也。 復无悔」者,處坤之中是敦厚於復,故云「敦 能自考成其身,①故「无悔」也 六五,「敦復」至「自考也」。 既居敦厚,物无所怨,雖 正 復」。 義 日 :: 以其處 《象 不及 既 「敦 能

「至于十年不克征」者 也。 復, 也 无克勝,唯「終有大敗」也。 凶」也。「有災眚」者 不能征伐。 用 凶」者,最處復後是迷闇於復,以「迷」求復,所 「用行師,終有大敗」者,所爲既凶 此 上六,「迷復」至「君道也」。 迷復 以其 於其國内,則 迷闇不復 ,闇於復道必无福慶,唯 師 敗 「以其國君凶」者,「以」,用 國 反 而 X 違 反 違 君 量斯形勢,雖至十年 道 於君道,故《象》云 ,故用之行 ,所以「凶」也 義 日: 有 師必 災告 迷 以

❶ 「成」,嘉本同,阮本無此字。

迷復之凶,反君道」也。

物既无妄,當以正道行之。● 若其匪依正道則有告災,故曰「元亨利貞」也。「其匪正有告,不利有攸往」者,无敢詐偽虚妄,俱行實理,所以大得亨通,利於貞正,五、元妄」者,以剛爲内主,動而能健,以此臨下,物皆 乾上 无妄。「元亨」至「攸往」。正義

不利

有所往也。

剛中 陽,❷剛而能健,是乾德相 往何之矣」者,此釋 天命,豈可犯乎? 正,私欲不行,何可以妄? 「大亨以正,天之命」者,釋「元亨利貞」之義。 健,故能使物「无妄」也。 「无妄之往何之矣」,上「之」是語辭,下「之」是適也。 无妄」。 无妄」之義。 剛自外來而爲主於内,動而 則能制斷 《彖》曰,「无妄」至「行矣哉」。 九五以 以震之剛從外而來爲主於内,震動 虚 剛 實,有應則物 「其匪正有眚,不利有攸往,无妄之 處中, 匪 正有告,不利 「剛中 似,故云「天之命」也。 六二應之,是「剛 此天之教命也。 健」者,以此卦 所順從,不敢虚 而 應」者,明爻義 有攸往」之義也 以天道 中 象 Œ 威 釋 而 義 遊妄也。 既 剛 能 應 能 而 曰 方 純 致 乾 致

> 道成。 身既非 也」。 者、「竟」謂終竟、言天所不祐、終竟行矣哉 嚴剛正,在下畏威,不敢詐妄,是有妄之道滅,无妄之 僻,則物皆詐妄,是有妄之道興也。 「妄」謂 哉」,言終竟行此不祐之事 正,欲有所往,犯違天命則天命不祐助也。 云「无妄之往何之矣」。「天命不祐行矣哉」者,身既 正義曰: ○注「匪 虚妄、矯詐不循正理。 正,在「无妄」之世欲有所往,何所之適 云「使有妄之道滅,无妄之道成」者, 正」至「竟矣哉」。 也。 若无剛中之主,柔弱邪 ○注「剛自」至「攸 正義曰: 今遇剛中之主,威 必竟「行 「竟矣哉 矣? 往 故 矣

唯王者其德乃耳,❸非諸侯已下所能,故不云「君子」而言先王以此无妄盛事當其无妄之時,育養萬物也。此皆驚肅,无敢虚妄,故云「天下雷行」,物皆「无妄」也。皆驚肅,无敢虚妄,故云「天下雷行」,物皆「无妄」也。下雷行」者,雷是威恐之聲,今天下雷行,震動萬物,物下雷行」者,雷是威恐之聲,今天下雷行,震動萬物,物下電行」者,雷是威恐之聲,今天下電行,震動萬物,物

- ■「當」,嘉本無此字。
- 「以」,嘉本同,阮本無此字。

2

毛本『耳』作『爾』。按監、毛本是也。」「耳」,嘉本作「爾耳」,四庫本作「爾」。 阮校云:「監、

復。舉復一卦,餘可知矣。顯象,以卦結之。至如復卦,唯陽氣復,非是萬物皆與二字也。其餘諸卦,未必萬物皆與卦名同義,故直安」,今云「物與无妄」者,欲見萬物皆无妄,故加「物之,若「雷在地中,復」。今《无妄》應云「天下雷行,无言「先王」也。案:諸卦之《象》,直言兩象即以卦名結

動,故「往,吉」而「得志」也。妄,往,吉」者,體剛居下,以貴下賤,所行教化,不爲妄妄,往,吉」者,體剛居下,以貴下賤,所行教化,不爲妄」至「得志也」。正義曰:「无

之義。 故云「未富也 利有攸往」者,爲臣如此則利有攸往,若不如此則往 唯守其終,猶若田農不敢發首而耕,唯在後穫刈 耕穫不菑畬」者,六二處中得位盡於臣道,不敢創 爲己事,唯爲後穫,不敢先耕。 无利也。《象》曰「不耕穫,未富也」者,釋「不耕 成其末,猶若爲臣之道,不爲事始而代君有終也。 不敢菑發新田,❶唯治其畬熟之地,❷皆是不爲其初而 六二,「不耕」至「未富也」。 不敢前耕但守後穫者、未敢以耕、耕之與穫俱 事既闕 初,不擅其美 正義曰:「不 而穫 而已。 「則 首 TTT

曰:「无妄之災,或繫之牛。行人之得,邑人之災」者,六三,「无妄之災」至「人災也」。正義

云「邑人災也」。

所以可執貞正,言堅固有所執守,故曰「无咎」也。《象》曰「可貞无咎,固有之也」者,釋「可貞无咎」之義。尊,可以任正,固有所守而无咎,故曰「可貞无咎」也。貞无咎」者,以陽居陰,以剛乘柔,履於謙順,上近至貞无咎」者,以陽居陰,以剛乘柔,履於謙順,上近至九四,「可貞」至「有之也」。正義曰:「可

「无妄之疾」者,凡禍疾所起由有妄而來,今九五居得九五,「无妄」至「不可試也」。 正義曰:

- 「菑」,嘉本同,阮校云:「錢本、監、毛本「菑」作「首」,
- ❷「畬」,嘉本同,阮本作「菑」。

理,不須憂勞救護,亦恐反傷其性 之事亦皆然也。 則勞煩於下,害更甚 若身既「无妄」,自 災,「勿藥有喜」之義也。 之,恐更益疾也。 也」者,解「勿藥有喜」之義。 成,以災未息也, 鯀、禹治之者,雖知災未可息,必須順民之心。 必欲除去,不勞煩天下,是「有喜」也。 尊位 若人主而剛正自脩,身无虚妄,下亦无虚妄而 自損,勿須藥療 飲食所致,當 无妄之疾」也。 若堯、湯之厄,災非己招 爲无妄之主,下皆「无妄」,而偶 須治 而 若己之无罪,忽逢禍 「勿藥有喜」者,若疾自 言非妄有災不可治也,若必欲治之, 禹能治救,災欲盡 療; 然致疾,其藥「不可試」也。 「有喜」也。 也。 若其自然之疾,非 此 《象》曰「无妄之藥,不可試 非直施 若有妄致疾,其藥可用; ,但順時脩德,勿 此假病象以 於人主,至於凡人 然 也。 患,此乃自然之 然堯遭洪 有 己所致 是亦自 己 此 招,或 喻 疾害,故 若其試 鯀之不 須 遇 (水,使 事, 疾當 然之 寒暑 治 逢 理 猶 [X] 云

所利 窮之災也」。 處不可妄之極,唯宜静保其身。 也。 上九,「无妄行」至「之災也」。 位處 窮極,動則致災。 故《象》云「无妄之行、 若動行必有災害,无 正 義 E:

> 賢人,❷不使賢人在家自食,如此乃「吉」也。 川」者,豐 故爲「大畜」也。「利貞」者,人能 順,不能 是能止健,故爲「大畜」也。 「利貞」也。「不家食、吉」者、己有大畜之資、當須養 畜 謂之「大畜 止剛健,故曰「大畜」。《彖》云「能 畜止 艮 乾上下 財 養賢應於天道,③不憂險難,故「利 乾之剛,故云「小畜」也。 」者,乾剛上 大 畜 利 進,●艮止在上,止 小畜則巽 貞」至「大川」。 止 健,非正 此則艮能 在乾上,以其巽 止健,大正 「利涉 不可,故 而 止之, 畜之 也, 正 膽 涉 大 義

能

曰:

乾也。 既 剛 日: 剛健篤實之故,故能 艮體静止,故稱 健則 榮 言「大畜剛健篤實」者,此釋「大畜」之義,「剛 而 《彖》曰,「大畜」至「應乎 劣弱 乾體剛,性健,故言「剛健 隕 也,必 何 能 「篤實」也。「輝光日新其德」者 久有輝 既厭 輝耀光榮,日日 而退。 光 日 新其德乎? 若无篤 也。 增 質則 「篤實」謂 天也」。 新 其 虚 剛 德。 薄 艮 健 而 若无 正 」謂 也 其 義

0 0 大川」。

剛 本 同, 阮 本作「健

嘉本同,阮本作「順」。

^{」,}嘉本同 阮 本作「則」。

賢也。 也。 乾來而不距逆,是「尚賢」之義 「上九何天之衢亨」,是處 篤厚充實則恒保榮美,不有隕落也。 進,不被厭退也。 經 正也」,王注云「健莫過 「大川也」。 天,有大通之德也。 之上進而不距逆,是貴尚賢也。 「之謂也」。 至 正應天,可踰越險難,故「利涉大川」也。 在 獲吉也。 養賢」者,釋「不家食,吉」,所以不使賢者在家自 止乾之健者,德能大正,故「能止健」也。 「不家 賢」者,「剛上」謂上 尚賢」之謂 剛 家自食也。 「篤實也」。 「剛健」也。 凡物暫時榮華 而尚賢」,王注云「謂 能止 以在上有「大畜」之實養此賢人,故不使賢者 也。 正義曰: 正義曰: 健,大正也」者,釋 若不剛健 正義曰:「凡物既厭而退者,弱也」者,釋 「利涉大川,應乎天」者,以貴尚賢人,大 艮 「既榮而隕者,薄 能 而即隕落者,由體質虚 九 剛 「尚賢制 「謂上九也 畜 也,乾剛 乾, 剛,制 來而不距」者,以有大通 則見厭被退 上通 上九 而 能 健 向 也。 也。 也」,又云「能 健」之謂 止之,非夫大正未之能 」者,謂 」者,言上九之德,見乾 「處上而大通」者,釋 「利貞」義。 上,上九不距,是 也」者,釋經「篤實」 既處於上,下應於 ○注「有大畜」 ,能剛健則所爲 上九剛來不 ○注「謂 也。 〇注「凡物」 薄也。 所 故上經云 止 《食,吉, 以 一健,大 上至 既見 若 食而 艮 貴 至 能 H 尚 能

道

乾,故稱「 正 也 體也 也。 」,則 了大正 是 「止健」是艮也,「應天」者,上體之艮應下體之 全 應天」也。 論 應天」者謂艮 艮 體。 此取上卦下 明 知 「尚賢」謂 也 一、故前· 卦 而相 Ŀ 文云「能 九 應,非謂 也, 止 制 健,大 健 陰 謂

艮

陽而相

應也

不散也。 ○注「物之」至「於此也」。 賢之行,使多聞多見以畜積己德,故云「以畜其德」也 畜」,物既「大畜」,德亦「大畜」,故多記識前代之言,往 「君子以多識前言往行以畜其德」者,君子則此「大 在山中」者、欲取德積於身中、故云「天 德不有棄散者,唯貯藏「前 象》曰,「天在」至「其德」。 唯此而已,故云「盡於此也」。 正義曰:物之可畜於懷令其 言往行」於懷,可以 在 正 Щ 義 Ξ: 中 令德 也 天

《象》云「不犯災也」。 往則有危萬。 厲利己」者,初九雖有應於四,四 初九,「有厲」 唯利休己,不須前進則不犯禍凶 至「犯災也」。 乃抑畜於己,己今若 正義曰: 也。 「有 故

則 雖與六五相應,五 輿 説 九二,「輿 其輻 車 破 敗 説 處 也。 畜盛,未可 至一 以 其居中, 无 尤 犯 也。 能 也。 遇 若遇 難 正 而 義 斯 止 日 則 而 无 進 九

「无尤」也。此「輿説輻」,●亦假象以明人事也。 尤過,故《象》云「中无尤」也。以其居中能自止息,故

也。 行正乎? 進得其時,在乎通路,不憂險厄,故宜利艱難 距,故九三可以良馬馳逐也。 三良馬逐」者,初二之進值於畜盛,不可以升,至於九 「上合志」也 有人欲閑閡車輿,乃是防衛見護也,故云「曰閑 三升于上九,而上九處天衢之亨,塗徑大通,進 「利有攸往」者,與上合志,利有所往,故《象》曰 若不值此時,雖平易守正而尚不可,況艱難 九三,「良馬」至「合志也」。正義曰:「九 日 閑 輿衛」者,進得其時,涉難无患,雖曰 「利艱貞」者,履當其位 而 輿衛」 貞正 无違 而欲

牛之牿」者,處艮之始,履得其 者、柔以止剛、剛不敢犯、以息彊争、所以大吉而 距此初九不須用角,故用「童牛」牿止其初也。 故《象》云「元吉有喜也 六四,「童牛」至「有 位 喜也」。 能 抑 止 正義曰 剛 健 「元吉」 之初。 有喜 「童

「豶豕之牙」。柔能制剛,禁暴抑盛,所以「吉」也。非猾。九二欲進,此六五處得尊位,能豶損其牙,故云豕之牙」者,「豕牙」謂九二也,二既剛陽,似豕牙之横六五,「豶豕」至「有慶也」。正義曰:「豶

其牙。 ○注 牙」謂止其牙也 其牙也。」然「豶」之爲除、《爾雅》无訓。 注意則「豶」是禁制損去之名。 唯獨吉,乃終久有慶,故《象》云「六五之吉,有慶也」。 「豶,大防」,則「豶」是隄防之義。 「豕牙」至「有慶也」。 古字假借,雖豕傍土邊之異,其義亦通。 正義曰: 褚氏云:「豶,除也,除 此「豶其牙」謂 「能豶其牙」者,觀 案:《爾雅》云 防 其

大亨。」
云「何天之衢,道大行也」。何氏云:「天衢既通,道乃云「何天之衢,道大行也」。何氏云:「天衢既通,道乃之時,更何所畜? 乃天之衢亨,无所不通也。故《象》天之衢,亨」者,「何」謂語辭,猶云「何畜」也。處畜極天之衢,亨」者,「何天」至「大行也」。正義曰:「何上,「何天」至「大行也」。正義曰:「何

Ⅲ 艮上 頤。「貞吉」至「口實」。正義

實」者,觀其自養,求其口中之實也。「觀頤」者,「頤」,養也,觀此聖人所養物也。「自求口曰:「頤,貞吉」者,於頤養之世養此貞正,則得「吉」也。

《彖》曰,「頤貞」至「大矣哉」。正義曰:

^{●「}此」,嘉本無此字。

故云「大矣哉」。 之時大矣哉」者,以《彖》釋「頤」義於理既盡,更无餘意, 人,漢帝張良,齊君管仲,此皆養得賢人以爲輔佐,政治 但養賢人使治衆,衆皆獲安,有如虞舜六人,❶周武十 者,先須養賢,乃得養民,故云「養賢以及萬民」也。 養事大,故云「天地養萬物」也。「聖人養賢以及萬民 不欲所養失也。「天地養萬物」者,自此已下廣言頤卦所 賢及自養乖度,則其德惡也。 上自求口中之實,是「觀其自養」,則是在下觀上乃有二 養,所養何人,故云「觀頤,觀其所養也」。「自求口實,觀 故不云「義」,所以直言「頤之時大矣哉」。 世康,兆庶咸説,此則「聖人養賢以及萬民」之義也。 義: 若所養是賢及自養有節,則是其德盛也, 若所養非 其自養」者,釋「自求口實」之義也。 觀其所養也」者,釋「觀頤」之義也。 以此言之,則「養正」之文兼養賢及自養之義也。 萬民」,二者謂養身得正,故《象》云「慎言語,節飲食」。 「貞」,正也,所養得正則有吉也。 頤貞吉,養正則吉」者,釋「頤貞吉」之義。 者養此賢人是其「養正」,故下云「聖人養賢以及 此卦之意,欲使所養得也 其「養正」之言乃兼一 言在下觀視在上頭 謂在下之人觀此 以所養得廣 「頤」,養 「觀頭 聖人 頭 也 在

《象》曰,「山下」至「飲食」。正義曰:山

口出,患從口人」,故於頤養而慎節也。君子觀此頤象,以謹慎言語,裁節飲食。先儒云「禍從雷,頤」。人之開發言語、咀嚼、飲食,皆動頤之事,故止於上,雷動於下,頤之爲用,下動上止,故曰「山下有

静,是「離其致養之至道」,反以求其寵禄而競進 自守廉静,保其明德,則能致君上所養。 己養。今身處无位之地,又居震動之始,是動而 能令物由己養」者,若道德弘大,則己能養物,是物 如手之捉物謂之「朶」也,今動其頤,故知「嚼」也。 至「甚焉」。正義曰:「朶頤者,嚼也」者,「朶」是動 也。不足可貴,故《象》云「亦不足貴也」。〇注「朶頤 而躁求,是損己廉静之德,行其貪竊之情,所以 己而養,而更自動求養,是舍其靈龜之明兆,觀我朶頤 貪惏以求食也。 兆,以喻己之明德也。「朶頤」謂朶動之頤以嚼物,喻 「舍爾靈龜,觀我朶頤,凶」者,「靈龜」謂神靈 也。「離其致養之至道,闚我寵禄而競進 初九,「舍爾」至「不足貴也」。 初九以陽處下而爲動始,不能 今不能守 明 正 脱使物賴 鑒之龜 也。 義 凶 自 日 示不 義 由

六二,「顛頤」至「失類也」。正義

正義曰:

❶ 「六」,嘉本、阮本作「五」。

0

征 也。 於下,是違此經義於常之處,故云「拂經於丘 征凶」者,「征」,行也,若以此而養,所行皆凶,故曰 「顛 顛 凶 類皆養上也,今此獨養下,是所行失類也 頤」。下當奉上是義之常處也,今不奉於上而 六二處下 也。《象》曰「六二,征 倒 也,一 拂」,違 體之中,无應於上,反倒 也、「經」、義也、「丘」、所履之常 闪,行 失類 也」者, 下 養 也。 初, 頤 養之 反 故 「頤 「頤 養 \exists 處

勿用」。 也。 頤, 道大悖」者,釋「十年勿用」之義。 於上以諂媚者也,違「養正」之義,故曰 正道大悖亂,解「十年勿用」,見棄也 貞 爲行如此,雖至十年猶勿用而見棄也,故曰「十年 (凶」者,「拂」,違也,履夫不正以養上 六三,「拂頤」至「大悖也」。 正義 立行於此,故无所利也。 以其養上以 《象》曰「十年勿用、 拂頤貞 九,是 諂 티 : 而 媚 有凶 自 則 納 拂

敦實也。 不可褻瀆, 下得養之宜,所以「吉」也。 逐」者,既養於下,不可 顛 頤」養下 頤,吉」者 六四,「顛頤」至「上施光也」。 「无咎」者,若能「虎視眈眈,其欲逐逐 恒如虎視眈眈, 則得「吉」而 ,體屬上體,居得其位而應 有求,其情之所欲 「无咎」也。 然威而不猛也。 「虎視眈眈」者,以 《象》曰 逐 於 初, 逐然,尚 正 「顛 其 三,雖復 上 以 義 頭之 養下 欲 上 日 於 逐

> 也。 者,以 也。 吉,上 體又應於初,陰 者,六二身處下體而又下養,所以「凶」也,六四身處上 少 於初是「上 、求,「其欲逐逐」,能爲此二者,是上之所施 注「體屬」至「爲盛矣」。 初是陽爻,則能 「察其所養則 然六二「顛頤 陰處陰,四自 |施光」者,釋 施 也。 而 養陽」者,六四下 應 養陽 顛 則 能 處其身是觀其 心陽又能 爲「凶」,六四 威 頤吉」之義。 也 丽 正義曰:「觀其自養則 不猛, 威嚴 如 寡 自養,則 虎視 養於 欲,所 上謂 「顛頤」得 眈 初 以「吉」 眈, 四 能 是 也 觀 履 爲 又寡 有 (履正 其 正 光 下 明 欲

從於上,故得「居貞,吉」也 從上」者,釋「居貞」之義。 解,故「不可涉大川」,故「居貞,吉」也。 類 「頤養」之義,故言「拂經」也。 拂」,違也,「經」,義也,以 ,居貞吉也。 六五,「拂 「不可涉 經」至「 大川」 以 陰 從 五近上九, 居陽 「居 上 處 貞,吉」者, 不 也」。 有謙 頤 《象》 違謙, 以 陰順 退, 正 日 患 行 乖 義 「順 陽, 難 則 違 日 以 未 親 於

於陽也。 頭」者,以陽處上而履四陰,陰不能獨 厲吉」者,爲衆陰之主,不可 上九,「由頤」至「有慶也」。 衆陰 莫不由之以得 褻 其 瀆 養, 嚴厲乃吉,故云「厲 故 爲 日 其 正 由 (主,必 義 頭 曰 一由 也

涉

皆弱也。 者,謂屋棟也。 非謂相過從之過,故《象》云「澤滅木」,是過越之甚也 以拯患難,乃得亨通,故云「利有攸往,亨」也。 人事言之,猶若聖人過越常理 唯陽爻乃大能過越常理以拯患難也,故曰「大過」。 曰:「過」謂「過 音相過之過。」正義曰:「相過」者,謂相過越之甚也, 兑 巽 上 下 「利有攸往,亨」者,既遭衰難,聖人利有所往 越」之過,非「經過」之過。此衰難之世, 大過。 本之與末俱橈弱,以言衰亂之世始 「棟橈」至「往亨」。 以 拯 患難也。 ○注: 「棟 Œ 橈

乃能 若衰難之時始終弱也。 盛大者乃能過其分理以拯難也,故於二爻陽處陰位: 棟橈」義。以「大過」本末俱弱,故屋「棟橈」弱也,似 大過,大者過也」者,釋「大過」之義也。「大者過 乃亨」者 「拯難也,亦是過甚之義。「棟橈,本末弱也」者,釋 彖》曰,「大過」至「大矣哉」。 ,此釋「利 有 攸 剛過而中,異而説行,利 往 一乃亨」 剛 過 正 而 義 中 有攸 E. 二謂

四陽在中,二陰在外,以陽之過越之甚也。

子有爲拯難,其功甚大,故曰「大矣哉」也。 過極之甚也。 時大矣哉」,此廣説大過之美,言當此大過之時,唯 乃得濟,故「利有攸往」得亨也,故云「乃亨」。「大過之 二也,以陽處陰是剛 「巽而説行」者,既以巽 之過極之甚 則 陽 順 來拯 和 説 此 陰 而 行,難 難,是

之義。 改。 立不懼,遯世无悶」者,明君子於衰難之時卓爾獨立, 則九二「枯楊生稊,老夫得其女妻」是也。「君子以 即此「澤滅木」是也,二者,大人大過越常分以拯患難 其大過之卦有二義也:一者,物之自然大相過越常分, 滅木」者,乃是澤之甚極而至滅木,是極大過越之義。 不有畏懼,隱遯於世而无憂悶,欲有遯難之心,其操不 木」者,澤體處下,木體處上,澤无滅木之理。 凡人遇此則不能。 象曰,「澤滅」至「无悶」。正義 然唯君子獨能如此,是其過越 (日: [] 今云「澤 澤滅 瀰

免害,故《象》云「柔在下也」。 以柔道在下,所以如此,雖遇大過之難而「无咎」也。 「无咎」者,既能謹慎, 言以絜素之道奉事於上也。 「无咎」者,既能謹慎用白茅」者,以柔處下,心能謹慎, 薦藉於物用絜白之用白茅」者,以柔處下,心能謹慎, 薦藉於物用絜白之用白茅」者,以柔處下,心能謹慎, 薦藉於物用絜白之

九二,「枯楊」至「以相與也」。 正義曰:

周易正義卷第六

四

分 謂老夫減 枯槁,少之大過則幼稚 者,若以陽處陽是依其本分,今以陽 過分而與夫也。 拯救弱陰也。❶ 也,「生稊」則 是老夫過 得老夫,是老夫減 妻,是女妻以少 相 以 其 ○注「稊者」至「斯義也」。 衰者更 特吝,處 老夫女妻」,不云「枯楊 少則 對。 斯 、少女爲妻也。 陽 云「楊之秀」也。 」者,釋「老夫女妻」之義。 而行,无 處陰,能 生 稚者 與 今老夫而得女妻,是過分相 大過之時 稊 老 老夫,老夫得之似若枯者 分而與 猶 長 而與女妻,女妻得 「女妻 有 若枯槁之楊更生少 過 也。 而與老夫。 「老過則枯,少過則 不 「无不 其 女妻而得少夫,是依分相對。 妻 老而 利 能 本 以 也。 也, 「以 也。 分 謂 行 與少。 也。 利 陽 此 故 丽 枯 稚分老則 生稀」者,「枯楊」則 其意相似,故《象 《象》曰 道,无 正義曰:「稊」者,楊柳之穗 」者,謂 救 槁 處 云「過以 以 若老夫 老夫得少 其 陰, 之而 女妻既 衰弱。 稊 老分少則稚者長」也 有 能 拯 出之稊,朽 老 一謂 枯 衰 更 稚 過其 而 相 處 弱 而 者榮」 益長 與 者不被 [與」。《 楊 得其 更得生稊 而 夫女妻, 上无 |者,老之太過則 陰是過越本分 興 有 也。老 之秀者。 本而 八衰莫盛 更壯,是女妻 老妻,是依分 影略 ,故云「以老 者 老則益長 其 是「老夫 老之夫得 拯 救 象》直云 而 應,心无 謂 今女妻 夫得 過 濟。 故故 其弱 不言。 於此 女 以 九 女 相

> 遂因云「老夫減 衰減至壯,故輔嗣此注特云「以 則 實不然也。 應斯義 「過以相與」者,因 枯 者榮 」者, 也。 老 此 云「大 大過 而 至壯 與少」,猶 之卦 過 而 至 輔 衰 本 至衰,似 若至衰減 明 至壯 而 至 己 至 壯 輔 女妻而 壯, 輔 至 衰 衰 至 以 衰, 而 也。 至 與壯 助 不 壯 光老夫, 《象》 論 輔 至 至

其

日

衰

初, 乎 於 **橈乎下也」者,釋「棟隆之吉」。** 橈 隆 橈 心 拯弱,唯自守而已。 在下 |既褊狹,不可以輔救衰難,故《象》云「不可以有輔」也 心不弘闊 故得棟隆起而獲「吉」也。 · 吉」者,體居上 `凶」者,居大過之時,處下體之極,以 九四,「棟隆」至「乎下也」。 九三,「棟橈 故得 唯 只 ,故「有它吝」也。 拯 棟隆,吉」。 初 體 初謂 獨應於上,係心在 以陽 至「有 下」也。 處 九 陰 四 「有它吝」者 以其能 輔 《象》曰 能拯救其弱,不 應 初, 也 下 __ 一,所以 得 行 陽居陽不能救危 拯 「棟隆之吉,不 其 又 於難,不被 正義曰: 正 拯 以 謙 義 「凶」也 티 : 有應在 爲 若 下 所 所 拯 棟

弱 本同, 阮本作「陰弱」。

焉」,以屋棟橈折則榱柱亦同崩,此則義也。此《彖》辭,是足見其義。故子産云「棟折榱崩,僑將壓橈弱而偏,則屋下榱柱亦先弱。柱爲本,榱爲末,❸觀但經文云「棟橈」《彖》釋「棟橈者,本末弱也」,以屋棟居屋棟隆起,下必不橈弱,❶何得之不被橈乎在下?❷

亦可醜 生華」 不得尊位,故有「棟橈」。 「可醜也」。 不得長久,誠可醜辱。 夫,亦可醜辱也。 拯纔得生華,何可長久? 譽」也。《象》曰 難處少,纔得无咎而已,何有聲譽之美? 故「无咎无 彊壯士夫,婦已衰老,夫又彊大,亦是其益少也。 楊生華」者,處得尊位而以陽居陽,未能拯危,不 言其衰老,雖被拯救,其 二「枯楊生稊」,但以處在尊位,唯得「枯楊生華」而已。 示 但 而已,但使「老婦得 九五處得尊 九五,「枯楊」至「可 也」者、婦當少稚於夫、今年老之婦而得彊壯士 拯難,不能使 正義曰: 「枯楊生華,何可久」者,枯槁之楊,被 此言九五不能廣拯衰難,但使「枯楊 位 「處得尊位,亦未有橈」者,以 村枯 功雖未廣,亦 言不如九二也。 益 楊 其士夫」而已。 今九五雖與九三同以 尋當衰落也。 少也。又似年老之婦 生華」也。 醜也」。 未有 以 ·
橈弱。 ○注「處得」至 在尊位,微 拯難狹劣,故 「老婦士夫 正 義 若其 曰:「枯 陽居 九三 所拯 得其 如九

益薄少,皆爲拯難功薄,故所益少也。能使老婦得士夫而已,不能「得女妻」,言老婦所得利「老夫得其女妻」,是得少之甚也。今既拯難功赘,但「生稊」也。●「能得夫,不能得妻」者,若拯難功闊,則拯難,但其功狹少,但使「枯楊生華」而已,不能使之

之象,故《象》云「不可咎」,言不可害於義理也。 而功不成,復有何咎責? 誅殺,直言深諫以忤无道之主,遂至滅亡。 善功惡,无可咎責。 「无咎」者,所以涉難滅頂至於凶亡,本欲濟時拯難,意 難乃至於滅頂,言涉難深也。既滅其頂,所以 涉滅頂,凶」者,處大過之極是過越之甚也,以此涉危 上六,「過涉」至「可咎也」。 此猶龍逢、比干,憂時危亂,不懼 此亦「過涉滅頂,凶,无咎 正 其意則善 義 「凶」也 \exists 過

曰:「習坎」者,「坎」是險陷之名,「習」者便習之義。險此 坎上 習坎。「有孚」至「有尚」。正義

0 0

6

[「]弱」,嘉本同,阮本作「若」。

[「]之」,阮校云:監、毛本作「云」。

[「]榱」,嘉本同,阮本作「棟」。

[「]使之」,嘉本同,阮本無此二字。

於内, 事 岡川 正 乃 是 在 得 盈, 失其信」者,此釋「重險」、「習坎」之義。 故 注 謂險陷既 云 「習坎 者 極,坑穽特深,水雖流注,不能盈 " 習 重 險 也。 小水 流 而 不 盈,行 小水 流 險 丽

險也。 也。 也 則地之所載之物失其性也,故地以 險也,故使地之所載之物保守其全。 險之用也。 云「行有尚,往有功」也。 「天險不可升」者,已下廣 「行有尚」也。 剛在於中,故維得心亨也。 「有孚」之義也。 險之甚也。 險」也。「地險山川丘陵也」者,言地以山 行此至險能守其剛中,不失其信 「王公設險以守其國」者,言王公法象天地 「維心亨,乃以剛中也」者,釋「維心亨」義 若其可升,不得保其威尊,故以「不可 言天之爲險,懸邈高遠,不可升上,此天之 此釋「重險」之義也。「行險而不失其信」, 既便習於坎而往之險地,必有其功, 以能便習於險,故守剛中,不失其信 「行有尚、往有功」者,此 也。 Ш 若无 Л 此釋「習坎」 丘 川丘 Щ 陵]1] 而 也。 陵 滋滿,言 固 丘 爲險 而 而 故 釋 以 不 不

之用也,二者,人之行險,先須便習其

事

乃可得通,2

乃成險

習,重也,謂上下俱坎,是重疊有險,險之重疊

者,以坎爲險難,故特加「習」名。

卦之名,皆於卦

上不加其字。

此坎卦之名特加

習

「習」有二義:

者,

外柔,以此行險

事可尊尚,故云「行有尚」也。

案 :

諸

「維心亨」,言心得通也。

「行有尚」者

,内亨外

闇

内剛

内,故有信也。

「維心亨」者,陽不外發而在

用,故云「習坎」也。

「有孚」者,「孚」,信

也

之事

經

便

習

不

可 以

行, 故

須

便

習

於

坎, 由

濟 「習坎, 也 險,難也。 《彖》曰,「習坎」至「大矣哉」。 重險」者,釋「習坎」之義。 今險難既重,是險之甚者,若不便習不可 若險難不重,不爲至險,不須便習 言「習坎」者,習 正 義 濟 行重 曰 也

亨」至「有尚也」。

陽在於内,陽

能開通,故維其在心之亨也。

○注「内

正義曰:「内亨外闇」者,内陽故「内

以亨通之性而往詣陰闇之所,能

也」者,母若外陽内陰則内心柔弱

故

不得亨通。

今以

云「剛正在内有孚者也」,「陽不外發而

在乎

内,心亨者

正在内」者,謂陽在中也。

内心

剛正則能

有誠信

, **③** 故

故云「習」也。

○注「剛正」至「亨者也」。

正義

曰:「剛

亨」,外陰故「外闇」。

於險,故行可貴尚也。

0

外發」,嘉本同,阮 本作「發外」。

² 便」,嘉本 一同,阮本作「使」。

内」,嘉本同,阮本作「因」。

下「者」,嘉本同,阮本無。

謂也」。 習」之語以釋「習」名。 防難,是「用有時」也。 化洽平治,内外輯睦,非用險也。 險」、「地險」不可暫无,此謂人之設險,用有時也。 漏,是水流不可 淺岸平谷,則水流有可盈滿。若其崖岸險峻,澗谷泄 習乎重險也」者,言人便習於坎,止是便習重險。「便 矣哉。○注「言習」至「重險也」。 者,言天地已下莫不須險,險難有時 城池,嚴其法令,以保守其國也。●「險之時用大矣哉 「習」義,是一「習」之名有此兩義。 有時也」。 正義曰:「險陗之極,故水流而不能 正義曰:「非用之常,用有時」者,若「天 盈 滿,是險難之極也。 兩「坎」相 正義曰:言「習坎者、 若家國有虞,須設 重謂之「重險」,又當 ○注「險陗」至「之 而用,故其功盛大 ○注「非用」至 盈 」者,若 若 險

初六,「習坎」至「失道凶也」。正義曰:而習其政教之事。❸ 若能習其教事,則可便習於險也。之洊至,水不以險爲難也。「君子以常德行習教事」之洊至,水不以險爲難也。「君子以常德行習教事」。亦不以險爲難也。以人之便習于坎,❷猶若水亦相,不不以險之縣絕,水亦相,不不以入,,「水洊」至「教事」。正義曰:「水

習坎,入於坎窞,凶」者,既處坎底,上无應援,是習爲初六,「習坎」至「失道凶也」。正義曰:

道不能自濟,●故《象》云「失道凶」也。險難之事。无人應援,故入於坎窞而至凶也。以其失

「求小得」也。初、三柔弱,未足以爲大援,故云可以「求小得」也。初、三柔弱,未足以爲大援,故曰「未出中」也。「求小得」者,以陽處中,初、三來附,故險」。既在坎難而又遇險,未能出險之中,故《象》云下以「求小得」也。 正義曰:「坎九二,「坎有」至「出中也」。正義曰:「坎九二,「坎有」至「出中也」。

《象》云「終无功」也。

《象》云「終无功」也。

《条》云「終无功」也。

《条》云「終无功」也。

《条》云「終无功」也。

《条》云「終无功」也。

《条》云「終无功」也。

《条》云「終无功」也。

《条》云「終无功」也。

《条》云「終无功」也。

《条》云「終无功」也。

六四、「樽酒」至「剛柔際也」。正義曰:

^{● 「}守」,嘉本同,阮本無此字。

[「]于」,嘉本作「乎」。

[「]常」,嘉本同,阮本作「當」。

[「]其」,嘉本無此字。

酒簋貳 義。所以一樽之酒、貳簋之食得進獻者,以六四之柔與 器,故云「用缶」也。 咎」也。《象》曰 物,從牖而薦之,可羞於王公,可薦於宗廟,故云 外飾。處「坎」以此 九五之剛兩相交際而相親,故得以此儉約而爲禮也。 位,剛柔各得其所,皆无餘應,以相承比 酒 簋 也。 貢 「用缶」者,既有「樽酒簋貳」,又用瓦 「樽酒簋貳,剛柔際」者,釋「樽酒簋 重 雖復 「納約自牖,終无咎」者,納此儉約之 險 而履 一樽之酒,二簋之食,故 得 其位,以 ,明信顯著,不假 承於五 五. | | 終无 云「樽 缶之 亦 貢 得

離離上下

離,利貞,亨。

畜牝牛,吉。

正

大不盈滿也。 九五、「坎不」至「未大也」。正義曰:「坎不盈滿也。 (象》曰:「坎不盈,中未大」者,釋者,「祇」,辭也,謂險難既得盈滿而平乃得「无咎」,若 大,猶險難未盡也,故云「坎不盈」也。「祇既平无咎」 坎,猶險難未盡也,故云「坎不盈」也。「祇既平无咎」 大,猶險難未盡也,故云「坎不盈」也。「祇既平无咎」 大,猶險難未盡也,故云「坎不盈」也。「祇既平无咎」 大,猶險難未盡也,故云「坎不盈」也。「祇既平无咎」 大,猶險難未盡也,故云「大不盈」也。「祇既平无咎」

叢 以 整,難可犯觸。 用 徽 而禁之也。 被繫用其徽繼之繩。 纆,真於叢棘」者,險陗之極,不可升上,嚴 上六,「係用」至「三歲 「三歲不得,凶」者,謂險道未終,三歲已 上六居此險陗之處,犯其峻整之威,所 「置於叢棘」,謂囚執之處以棘 也。 正 義 曰 法 峻 係

> 後可以 言失道之凶,唯三歲之後可以免也。 來不得其吉,而 水復 自新,故《象》云「上六失道 有 区 也。 險 終乃反,若 凶,三 能 自 脩,三歲 成 也

行,皆非牝之善也,若柔能處中,行能履正,是爲「牝之 於内,似 正義曰:「柔處於内而履正中,牝之善也」者,若柔不處 下 曰:「離之爲卦以柔爲正」者,二與五俱是陰爻,處於 則反「離」之道也。 德,須内順外强而行此德,則得「吉」也。若内剛 也。 柔順爲主,故畜養牝牛乃得其吉。若畜養剛健則不 牝之善者。外强内順是牛之善者也。「離」之爲體 「利貞,亨」。 在行正乃得亨通。以此故,「亨」在「利貞」之下,故云 卦之體陰柔爲主,柔則近於不正,不正則不亨通,故 物各得其所附著處,故謂之「離」也。「利貞,亨」者,離 義 i E 兩卦之中,是以柔爲正。○注「柔處」至「牝 也。 此云「畜牝牛」,假象以明人事也。 「離,利貞,亨」者,「離」,麗也,麗謂附著也,言萬 云「外强而内順,牛之善」者,明若内外俱 婦人而預 「畜牝牛,吉」者,柔處於内而履正 外事; ○注「離之」至「貞亨也」。 若柔而不履 正 中,則 言「離」之爲 邪 外順 中, 解之 强則 正義 也 可 L 以 利

剛猛之物則反其德,故不可畜剛猛而「畜牝牛」也。爲主,故不可以畜剛猛之物」者,既以柔順爲主,若畜爲善,故云「外强内順,牛之善」也。「離之爲體以柔順失於猛害,若外内俱順則失於劣弱,唯外强内順,於用

吉也。 也。 著中正是附得宜, 義也,又摠釋「畜牝牛吉」也。 「柔麗於中正」,謂六五 其正位而云「重明麗乎正」者,以五處於中正,又居尊 者,謂兩陰在内,既有重明之德,又附於正道 明「利貞」之義也。 麗乎正,乃化成天下」者,此以卦象説離 乎天,百穀草木麗乎土」者,此廣明附著之義。 名,之下乃釋卦下之義,於後乃歎而美之。 正」爲德,故萬事亨。 六二之柔皆麗 位,雖非陰陽之正,乃是事理之正,故摠云「麗於正 成天下」也。 質附著中正之位,得所著之宜,故云「麗」也。 離,麗」者,釋離卦之名。「麗」謂附著也。 「柔麗乎中正,故亨。 以 彖》曰,「離麗」至「牛吉也」。 牝 4 然陰居二位可謂爲「正」,若陰居五位 有「中 於中,中則不偏,故云「中 故廣言所附得 「重明」謂上下俱 正 以 中正 故 也。 是以牝牛吉」者, 」得通,故畜養牝牛而 案: 宜之事 諸卦之《彖》釋 離。 也。 之功德也,并 Ė 「麗乎正 此《彖》 正義 釋經「亨 以 ,所以 一日 「重明以 以 陰 以「中 柔附 月麗 柔 日 也 非 化 卦 之

> 義,更无義例。 名「麗」,因廣説 例者,此 釋卦名,即 乃夫子 廣歎 隨 爲 日 月草木所麗之事,然後却 義 卦之美,乃釋卦下之義。 則言 ,因文之便 也。 此 明卦下之 既 與 諸 桂 不

象》曰,「明兩」至「于四

方。

Œ

義

曰

照於四方。❷ 若明不繼續則不得久爲照臨,所以 之美,故云「大人以繼明 後各照,故云「明兩作,離」,是積聚兩明乃作於離。 云「隨風,巽」也。 云「洊雷」、《坎》云「洊至」也。 是連續之至,水爲流注不已,義皆取連續 健」、「地勢坤」,以天地之大,故摠稱上下二體 體事義隨文而發。 故云「明兩作,離 「明兩作,離」者,「離」爲日,日爲明。 明 「兼山,艮」,麗、澤、兑是兩物各行也。 明暫絕,其離未久,必取 (兩作,離」,取「不絶」之義也 也。 山澤各自爲體,非 乾、坤不論上下之體,直摠云「天行 案 : 照 兩明前後相續,乃得 於四 八純之卦論象不同,各因 風是摇動相隨之物,故 方」,是 今有上下二離,❶ 相 今明之爲體 繼續 人之物,故 相因 其 ,故《震 明 也。 作 乃 離 若 云 得 掛 前 雷 卦

「離」,嘉本同,阮本作「體」。

0

❷ 「得」,嘉本同,阮本無此字。

0

敬,以 錯然 故「錯然」也。言「處離之始,將進而盛,未在既濟」者, 能 恒 宜慎其所履,恒須錯然避咎也 「既濟」,今位在於初,是未在「既濟 [錯然,敬慎不敢自寧,故云「履錯然,敬之无咎」。 |如此恭敬,則得避其禍而「无咎」,故《象》云「履錯之 「然」者,警慎之貌者,「錯」是警懼之狀,❶其心未寧, 」者,身處 避咎也」。〇注「錯然」至「其咎也」。正義曰: 而盛」,謂將欲前 離 履錯 初 |至「辟咎也 進 欲前進,其道未濟,故 而向盛也。 」,謂功業未大,故 _ 若位在於三則得 正 義 其 日 所 履 踐 履

道也。 故《象》云「得中道」,以其得中央黄色之「元吉」也。故《象》云「得中道」,以其得中央黄色之「黄」者中色,「離」者文明,居中得位而處於文明,故六二,「黄離」至「中道也」。 正義曰:

所以「凶」也。故《象》云「日昃之離,何可久也」。其缶而爲歌,則至於大耋、老耄而咨嗟,何可久長?須委事任人,自取逸樂。若不委之於人,則是不鼓擊也。「不鼓缶而歌,則大耋之嗟,凶」者,時既老耄,當昃之離」者,處下離之終,其明將没,故云「日昃之離」人二,「日昃」至「可久也」。正義曰:「日九二,「日昃」至「可久也」。正義曰:「日

九四,「突如」至「所容也」。正義曰:「突

必不全,故云「死如」也。「棄如」者,違於離道,无應无 來如 爲已没,四爲始出,突然而至,忽然而來,故曰「突如 承,衆所不容,故云「棄如」。是以《象》云「无所容」也。 以焚炎其上,故云「焚如」也。 如 其 也。 來 小如」者 「焚如」者,逼近至尊,履非其位,欲進其盛 四 處始變之際,三爲 「死如」者,既焚其上,命 始 四 爲 始 其

而言「公」,取其便文以會韻也。 六五、「出涕」至「王公也」。正義曰:「出 完所助,故得「吉」也。五爲王位而言「公」者,此連王 是戚而咨嗟也。「若」是語辭也。「吉」者,以所居在尊 憂戚而咨嗟也。「若」是語辭也。「吉」者,以所居在尊 一、四爲逆首,己能憂傷悲嗟,衆之所助,所以「吉」也。 《象》曰「六五之吉,離王公」者,此釋「六五吉」義也。 《象》曰「六五之吉,離王公」者,此釋「六五吉」義也。 《象》曰「六五之吉,離王公」者,此釋「六五吉」義也。 一、四爲逆首,己能憂傷悲嗟,衆之所助,所以「吉」也。 《象》曰「六五之吉,離王公」者,此釋「六五吉」義也。 《象》曰「六五之吉,離王公」者,此釋「六五吉」義也。 《象》曰「六五之吉,離王公」者,此釋「六五吉」表也。 《象》曰「六五之吉,離王公」者,此釋「六五吉」表也。

非 用 《出征」者,處離之極,離道既成,物皆親 類以去民害,故 上九,「王用」至「正邦也」。 三王 用 出征」也 有 嘉 折 附,當除 正義 日 匪 三王 其 其

❶ 「錯」,嘉本同,阮本無此字。

❷ 「涕」,原作「沸」,據嘉本、阮本改。

邦國故也。
邦也」者,釋「出征」之義。言所出征者,除去民害以正害,居在終極之地則有咎也。《象》曰「王用出征以正罪人之首,獲得匪其醜類乃得「无咎」也。若不出征除罪人,事必剋獲,故有嘉美之功。折斷

周易正義卷第六

計一萬二千一百七十三字

周 易正義卷第七

開 國 四子祭酒 國 子 臣 孔 上 穎 護 軍 達 奉 曲 勃 阜 撰 縣

兑 艮 上 下

卦、夫婦共卦者,周氏云「尊天地之道,略於人事,猶 分上下,乾、坤象天地,咸、恒明夫婦, 專天道,則下經不專人事,理則然矣。 食必有訟,訟必有衆起,是兼於人事,不專天道。 化,豈有天道、人事偏於上下哉!」案:上經之内,明飲 云:「夫《易》,六畫成卦,三才必備,錯綜天人,以 三十四卦爲下經,《序卦》至此又别起端首。 上經明天道,下經明人事。 《易》之舊題分,自此已上三十卦爲上經,已 《繋辭》云「二篇之策」,則是六 咸,亨,利貞,取女吉。 而 擬之,何爲不可? 然韓康伯注《序 乾坤 但孔子《序卦》 卦》破此 乃 先儒皆 十四 正 天 造 義 既不 效變 地 化 土 日 如 各 之 義 以 下

先儒以

地,則 明天地 通則凶害斯及,故利在 共感應方成夫婦。● 可悉,豈宜 交則不成於相感,自然天地各一,夫婦共卦。 咸」,感也,此 放云「咸,亨利貞,取女吉」也 成以 初闢,至屯乃剛柔始交,故以純陽象天,純 明 妄 人事。 爲異 卦 明人倫之始,夫婦之義,必須男女相 端。 既相感應乃得亨通。若以邪道 人物既生,共 貞正。 「咸,亨,利 既感 相感應。 通以正 貞,取女吉」者 即是 若二氣不 婚 此不言 婦之 陰 相 象

之義。 下於女也。 以「利貞」也。 止 以因二卦之義釋 二氣感應以相授與,所以爲「咸亨」也。「止而説」者 則不相交感,无由得通。 「咸亨」之義也。 「柔上而剛下,二氣感應以 則不隨 《彖》曰,「咸感」至「可見矣」。 艮爲少男而居於下,兑爲少女而處於上,是男 動欲,以止行説則不爲邪諂,❷不失其正,所 婚姻之義,男先求女,親迎之禮,御 「男下女」者,此因二卦之象釋「取女吉 艮剛而兑柔,若剛自在上,柔自在下, 「利貞」也。 今兑柔在上而 相與」者,此因上下二體釋 艮 止 而兑説 艮剛在下,是 也。 正 能 義 自 日 静

- 0 相 共」,嘉本同,阮本作「共相」。
- 止」,嘉本同,阮本作「上」。

三才,天地爲二,人止爲一也」,此必不然。

竊謂

坤

本,夫婦寔人倫之原,因

不以咸繫離。

共相 生。 也。 也。 則該萬物。 萬物之情可見矣」者,結歎咸道之廣,大則包天地,小 周,皆男先下於女,然後女應於男,所以 心,使變惡從善,然後天下和平。「觀其所感,而天地 「是以亨利貞,取女吉」者,次第釋訖,摠舉 感應,故「觀其所感而天地萬物之情可見矣」也。❷ 天地二氣若不感應相與,則萬物无由得變化 「天地感而萬物化生」者,以 「聖人感人心而天下和平」者,聖人設教感動 感物而動,謂之情也。 天地萬物皆以氣類 下廣明「感 取 女得 繇 二之義 吉者 辭 人 而

无所棄遺。以此感人,莫不皆應。咸卦,下山上澤,故能空虚其懷,不自有實,受納於物,以山感澤所以爲「咸」。「君子以虚受人」者,君子法此上有澤,咸」,澤性下流能潤於下,山體上承能受其潤,上有澤,咸」,澤性下流能潤於下,山體上承能受其潤,

也。 道 相應,所感在外,處於感初,有志而已,故云「志在外 俱處卦始,爲感淺末,取譬一身,在於足指 咸其拇」也。 咸其拇」者,「拇」是足大指也,體之最末。 轉 進,所感在 ○注:「如其本實,未至傷静。」正義曰: 六二「咸 初六,「咸其拇」至「在外也」。 《象》曰「志在外」者,「外」謂 腓 腓 體動 躁 則 成往而行。 而 四 初應在四 正義 今初六所 已,故 也 與四 曰 : E

> 生乎動 感淺 初感始有其志。 一末,則譬於拇指,❸指雖小動,未移其足,以喻人心 者 也。 以其 志雖小動,未甚躁求。 本實未 傷 於 静,故 无 凡吉凶悔吝 吉 凶 凶 悔吝

吉。 道也。 性 體動 也。」正義曰: 居而獲吉? 吉,順不害」者,「雖 九五,咸道轉進,離拇升腓,腓體動躁 咸其腓,凶。 ,則不有災害,免凶而獲吉也。 躁」也。 以不乘剛,故 六二,「咸其腓」至「不害也」。 由躁故 良由陰性本静。 王 居吉」者、「腓」、足之腓腸也。 **X** 廙云「動於腓腸,斯則行矣」,故言「腓 静居則吉,故曰 」者,與奪之辭。 可以居而獲吉。 今能不躁而居,順其 ○注: 若既凶 「咸 《象》曰 ,躁以 「腓體,動 其 腓, 矣,何 相感,凶之 六二應 正 「雖 凶。 義 躁者 由 凶 日 本 居 居 在

股之爲體動静隨足,進不能制足之動,退不能静守其「咸其股,執其隨,往吝」者,九三處二之上,轉高至股,九三,「咸其股」至「執下也」。正義曰:

2

❶ 「變」,嘉本同,阮本作「應」。

[「]也」,嘉本同,阮本無此字。

[「]於」,嘉本同,阮本作「如」。

動,退 其志意所執下賤也。 吝」。❶《象》曰「咸其股,亦不處也」者,非但 志在隨人,所執卑下,以斯 之志,故云「咸其股,執其隨 股是可動之物,足 亦不能静處也。 動 「所執下」者,既「志在隨 則 隨,不 而 往,鄙吝之道,故言「往 施之於人,自无操持 能 自 處,常 進不能制 執 人」,是 其 隨 足

亡也。 也。 也。 光大也。 者,心神始感,未至於害,故不可不正, 惟欲思運動以求相應,未能忘懷息照,任夫自然,故有 然後乃吉,吉然後乃得亡其悔 吉,悔亡」者,九四居上卦之初,應下卦之始, 憧 |憧往來」,然後朋從爾之所思也。 在股之上,二體始相交感以通其志,心神始感者 「憧憧 凡物始感而不以之於正,則害之將及矣。 九四,「貞吉」至「光大也」。 「未光大」者,非感之極,不能无思无欲,故未 往 來,朋從爾思」者,始在於感,未盡 也,故曰「貞吉,悔亡」 《象》曰「未感害」 正而故得「悔 正 義 故必貞 日 居 感極 體 「貞 >

脢已過心,故「進不能 居體之中,爲心神所感,五進 其脢,无悔」者,「脢」者,心之上、口之下也。 五、「咸 其 脢 大感」,由在心上,「退亦不能 至「志 在 於四上,故所感 末 也 ΙΕ. 義 在 四 日 脢 无 己

> 於言語 之間,故直云「心之上、口之下」也。 體皆在心上。 背而夾脊」、《説文》云「脢,背肉也」。 馬融云「脢,背也」,鄭玄云「脢,脊肉也」,王 也。 心 志」、志在淺末、故「无 脢 則謂之淺末矣。 者,心之上口之下」者、《子夏易 《象》曰「志末也」者,「末」猶 輔嗣以 ○注「脢者」至「而 四爲心神,上爲輔頰 悔 而已。 淺 故 傳》 也,感以心 明其淺於心神,厚 日 雖諸 已。)百「在 咸其 五. · 肅 云 説 正 (脢,无 脊 在 不同,大 義 曰 「脢在 上、四 脢 日 悔

通 送口舌言語 者,言語之具。 滕 滕」徒登反,滕,競與也。 咸其輔、頰、舌」也。 咸其 未知誰同 口説 輔 上六、「咸其 也。 頰、舌」者 相 其旨也。 感 鄭玄又作「媵」,媵 咸 而已,不復有志於其間。 道 馬 轉末,在於口 《象》曰「滕口 輔 融 云 所 至「口 輔 競 者 , 送 上 三一,无 説 説 舌 頷 也。 也。 也」者,舊説字作 言 也」,「輔 復心 語 咸 王注 而 道 正 實,故 已,故云 極 義 頰、舌 義 得 曰 云 徒

^{◆、}四庫本同,阮本無。 本、四庫本同,阮本無。 本、四庫本同,阮本無。

■震上 恒。「亨」至「攸往」。正義曰:

有 始,往而无違,故『利有攸往』」,此以「恒」、「亨」濟「利 也,下注「利有攸往」云「各得所恒,脩其常道,終則有 又云「恒通无咎乃利正也」,此以「恒」、「亨」濟 意説。 攸往 事者,无咎一也,利二也,貞三也。」周氏云:「三事 氏云:「三事,謂无咎、利貞、利有攸往。」莊氏 也。 通,必須變通 恒之爲道 利正」相將 彖》曰「道得所久,則常通无咎而利正也」,此解皆以 恒之爲道,亨乃无咎。 恒,亨,无咎,利貞」者,「恒」,久也,恒久之道,所貴變 攸 亨也,二无咎也,三利貞也。」注不明數,故先儒各以 通无咎,然後利以 往 世。 濟彼三事,无疑「亨」字在三事之中。而 利有攸往」者,得其常道 也。 竊謂注云「恒而亨以濟三事」者,明用此 ,亨乃无咎」,此以「恒」、「亨」濟「无咎 ○注:「恒 爲一事,分以爲二恐非 觀文驗注,褚氏爲長。 隨時方可長久。 而亨,以濟三事 行正,故曰「恒,亨,无咎,利 恒通无咎乃利正也」,又注 能久能通乃「无咎」也 ,何往不利,故曰 注旨。 也。」正 驗此 義曰:褚 云: 利 此 注:云 也, 恒、 「利有 注 貞 貞 云

「恒,久也」者,訓釋卦名也。●「恒」之爲名,以長久爲《彖》曰,「恒久」至「可見矣」。 正義曰:

義。 以 於變通,故終則復始,往无窮極,同於天地之不已,所 往,終則有始」者,舉 喻,言天地得其恒久之道,故久而 以得其恒久之道,故言「久於其道也」。「天地之道 釋卦之德,言所以得「亨,无咎,利貞」者,更无别義,正 爲「恒」。「恒,亨,无咎,利貞。久於其道」 久也。 舉卦名以結之也。 者,故可長久也。 此就六爻釋「恒」。 動 雷之與風,陰陽交感,二氣相與,更互而相 所以爲「恒 剛而異柔,震則剛尊在上,異則柔卑在 義。 恒 爲「利」也。 而不已也」者,將釋「利 而異順,无有違逆,所以可「恒」也。 上言天地之道恒久而不已也,故日月得天,所以 名,所以釋可久之意。 剛上而柔下」者,既訓 「異而動」者,此就二卦之義,因釋「恒」名。 也。 「日月得天而 「雷風 「恒」者,歷就四義釋「恒」名訖 明上四事「皆可久之道」,故名此 此卦六爻剛柔皆相應和,无 經以結成也。 相與」者,此就二象釋 有攸往」,先舉天地 能 此就二 「恒」爲久,因 久照 者 人用恒久之道,會 不已也。 體以 「剛柔皆應」者・ ,以下廣明「恒 釋恒 下,得其順 」者,此就 明 成,故 「利 此 以 也。 恒 掛 , 故 有 爲 孤 得 得 恒恒 也 序 攸 證 名 排 更 媲 恒 其

●「訓釋」,嘉本同,阮本作「釋訓」。

之義 爲長男,異爲長女,遂以「長陽長陰」而名之,作文之體 也。 成 雷之與風共相助成之義,故褚氏云「雷資風而 注:「長陽長陰,能 也。」正義曰: 可見矣」者,摠結「恒」義也。 下,使萬物從化 假雷而增威」是也。 相變,所以能 亦 長陽」,巽爲長女,故曰「長陰」。《彖》曰「雷風相 能 一者,聖人應變隨 也。 久照。 又此卦明夫婦可久之道,故以二長相成,如 恒 明長久,故剛 ○注:「不孤媲 久生 四 咸明感 而成 時 成 變 相 時, 今言「長陽長陰能 也。 為萬物。 化 成 應,故柔上而剛 上 得其長久之道,所以 而 也。」正義曰: 而柔下,取尊卑得 也。 「觀其所恒 能 「聖人久於其 久成」 正義曰: ○注:「剛尊柔卑 一者,四 而 下, 「媲」,配 震爲長男,故曰 相 天 時 成 取 地 道 更代 一者 序 能 二氣相 萬 而 益 物 也 得 也 光 天 遠,風 因 與」, 其序 之情 雷 宅 下 寒 交 風 震 0 天

君子 道 風 也。 相 與爲「恒」,已如《彖》釋。 立 身 象》曰,「雷風」至 得 其 恒久之道,故不改易其方。 「易方」。 「君子以立不易方」者, 正 義 方 E. 雷

恒是 深 也, 施之於仁義,即不厭深, 最 處卦 浚 恒 底 故 至「求 曰 深 深 也。 施之於正 也。 深 恒 者 即 正 求物之 以 義 深 曰 爲

> 故言 攸 在 情 於始而求深者也 利 過 深,是凶 也。 始 也。 注 : 正 最在 害 「始求深者乎。」正 德, 於下,故言「深」也。 无 施 而 利 故 義 日 曰 : 浚 所以 恒 處 卦 貞 致 凶,謂 一之初, 凶,无

處恒故能「久」,位在於「中」,所以消悔也。位故稱「悔」,居中故「悔亡」也。《象》曰「能久中」者,九二,「悔亡」至「久中也」。 正義曰:失

之深 《象》曰「无所容」者,謂不恒之人,所往之處皆不納之, 既无恒,自相違錯,則爲羞辱承之,所羞非 義曰:雖在三陽之中,非一 故「无所容」也。 承之羞」也。 下不全卑,執心不定,德行无恒,故曰「不恒其德」。 上體之下,雖處三陽之中,又在不中之位,上不全尊 「不恒其德,或承之羞,貞吝」者,九三居下體之上,處 詰」,問也,違錯處多,不足問其 `如《論語》云「於子與何誅 九三,「不恒」至「无所容也」。 處 久 ○注「中不在體 如 斯,正 體之中也。 之所賤,故曰 事 」至「不可 理 ,所以明 「不可致詰」者 一,故曰 「貞吝」也。 致詰」。 正 其 義 羞 曰 「或

田田 以喻有事无功也 者 九 田 四, 獵 也 「田无」至「得 以以 「恒於非位」, 譬有事也。 元 故勞而 禽 禽」者,田 也。 无功也。 正 獵 義 不獲 曰

曰「久 _, ① 田 非 獵 其 位,安 而 无所獲是[安得禽]也 禽」者, 在 恒 而 失 位 是 久 非 其

在巽爲婦,五係於二,故曰「從婦凶」也 凶」者,五與二相應,五居尊位,在震爲夫,二處下體 斷事宜,不可專貞從唱,故曰「夫子凶」也。《象》曰「從 其德,貞」者,六五係應在二,不能傍及他人,是恒 貞,從唱而已,是婦人之吉也。 「夫子凶」者,夫子須制 一而終」者,謂用心貞一,從其貞一而自終也。「從婦 其德,故曰「恒其德,貞」也。「婦人吉」者,用 六五,「恒其」至「婦凶也」。 正 義 日 心 常 專 恒 貞

今上六居「恒」之上,處動之極,以「振」爲「恒」,所以 恒,凶」者,「振」,動也,凡處於上者,當守 凶」也。《象》曰「大无功」者,居上而以振 而得, 上六,「振恒」至「无功也」。 故曰「大无功也」。 正義 静以 動爲恒,无 日 制 「振 動

乾上 遯,亨,小利貞。 正義曰: 「遯亨」

日消。 而 者,「遯」者,隱退逃避之名,陰長之卦,小人方用,君子 後 得 君子當此 通 日 「遯亨」。 之時,若不隱遯 小小 利貞」者,陰 避世即受其害,須遯 道 初 始 浸長

> Œ 道 亦未全滅,故曰「小 利貞」。

日

時度宜,避世而遯,自 即消正道,良由二陰漸長而 爲否亢。 當位而應,與 大,故云「大矣哉」。 釋「小利貞」之義。 云「剛當位而應,與時行也」。「小利貞,浸而長」者, 致「亨」之由。 人之道方長,君子非遯 ·小利貞」也。「遯之時義大矣哉」,歎美「遯」德 「遯而亨」者,此釋「遯」之所以得亨通之義 彖》曰,「 遯不否亢即是相 時行」者,舉九五之爻釋 良由九五以剛而當其位,有應於二,非 「浸」者,漸進之名。 遯亨」至「大矣哉」。 非 不通,故曰「遯 大人照幾不能如此,其義 時 正道亦未即 而 動,所以遯而得亨,故 而 所以能「遯」而 若陰德暴進 亨」也。 全滅,故云 正 義

惡 遯避之時,小人進長,理須遠避,力不能討,故不可爲 有山、遯」。「君子以遠小人、不惡而嚴」者、君子當 逼於天,天性高遠,不受於逼,是遯避之象,故曰「天下 下有山、遯」者、「山」者陰類、進在天下、即是山 復不可與之褻瀆,故曰「不惡 《象》曰,「天下」至「而 一而嚴」。 嚴」。 〇注:「天下 正義曰: |勢欲 一天 此 E

0 在」,嘉本同,阮本作「有」。

八

者,地之高峻,今上逼於天,是陰長之象。有山,陰長之象。」正義曰:積陽爲天,❶積陰爲地。山

災害。 義同也 也。 攸往」者,既爲「遯尾」,出必見執,不如不往,不往即无 何災」者、《象 遜,勿用更有所往,故曰「勿用有攸往」。《象》曰「不 宜速遠而居,先而爲「遯尾」,禍所及也,故曰 出 尾厲」者,爲遯之尾,最在後遯者也。 外以避之,而最在卦内,是遯之爲後也。 「勿用有攸往」者,危厲既至,則當固 初六,「遯尾」至「何災也」。正義曰: 何災」者,猶言「无災」也,與「何傷」、「何咎」之 》釋「當遯」之時,宜須出 小人長於内,應 避。 寫,危 而「勿 逃遯之世, 「遯尾厲 用 行 遯 往 言 有

之道 牛革以譬厚順也。六二居中得位,亦是能 脱而去也。 順之道可以固 之主,❷物皆棄己而遯,何以 既處中居内,即非遯之人也。 之用黄牛之革,莫之勝説」者,逃遯之世,避内出 志」者 `故曰「執之用黄牛之革,莫之勝説 六二,「執之」至「固志也」。 ,堅固遯者之志,使不去己也 黄中之色以譬中和,牛 而安之也。 能 執 用此道 既非遯之人,便 固留之? 性順從,皮體堅厚, 則无能勝己 正義 惟有 也 用 中 日 和 中 爲 外,二 . 厚順 所 和 「執 解 厚 遯

> 遯」之人,以「畜臣妾,吉」,明其不可爲大事也 故曰「畜臣妾,吉」。《象》曰「不可大事」者, 近,係在於下,施之於人,畜養臣妾則可矣,大事則凶 致危厲,故曰「有疾厲」也。 者,「遯」之爲義,宜遠小人。 遯 者,九三无應於上,與二相 處「遯」之世而意有所係,故曰 九三、「係遯」至「大事也」。 「畜臣妾,吉」者,親 既係於陰,即是有疾憊而 比 係 以 陽 遯」。 附 正 陰,係 義 「有疾厲 티 : 此 於所 意 係 在

得 遯,貞吉」者,「嘉」,美也,五居於外,得位居中,是遯 未能棄捨,吉。「好遯」,君子超然不顧,所以得「吉」, 九四處在於外 而得正,反制於内,「不惡 小人有所係戀,即不能遯,故曰「小人否」也。 音「臧否」之「否」。」正義曰: 正,二爲已應,不敢違拒,從五之命,率正其 九五,「嘉遯」至「正志也」。・正義曰:「嘉 九四,「好遯」至「小人否也」。 而有應於内,處外即意欲遠遯,應内則 而嚴 嫌讀爲 」,得正之吉,爲遯之美 「圮」,故音之也。 正義 \Box 而

^{● 「}積」,嘉本同,阮本作「精」。

② 「便」, 嘉本作「使」。

^{) 「}无」,嘉本同,阮本作「不」。

不敢爲邪,是五能正二之志,故成遯之美也。故曰「嘉遯,貞吉」也。《象》曰「以正志」者,小人應命、

故云「无不利」也。 猶有反顧之心,惟上九最在外極,无應於內,心无疑 夏傳》曰 繳」、《字林》及《説文》云: 矰」, 矢 ,是遯之最優,故 上九,「肥遯」至「所 「肥,饒裕也」,四、五雖在於外,皆 名 也。 鄭 注 日 0 《周 肥 注 : 遯 禮 「繳,生絲縷 「矰繳 __ *****: 疑 「結 遯 不 也。 而得 繳 能 於矢謂 也。」 及。」正 肥,无所不利 正 在 義 内有應 行:《子 之矰。 義 日

Ⅲ 乾下 大壯,利貞。正義曰:「大壯」,卦名

道將滅,大者獲正,故曰「利貞」也。
壯,故曰「大壯」。「利貞」者,卦德也。羣陽盛長,❶小也。壯者,强盛之名。以陽稱大,陽長既多是大者盛

者壯 以 卦名,乾剛而震動。 盛壯,故曰「大者壯也」。 (成壯。「大壯利貞,大者正也」者,就爻釋 正 也」者,就爻釋卦名。 ,故得「利 彖》曰,「大壯」至「見矣」。 [貞」。 柔弱而 「正大而 「剛以動,故壯」者,就 陽爻浸長已至於四,是大者 動即有退溺,2剛强 天地之情 正 可 義 見矣」者 桂 以動所 曰 德。 體釋 大 大

> 義也。 貞」也。」正義曰:釋名之下,剩解「利貞」,成「大者」之天地,●故不與咸、恒同也。○注:「大者獲正,故「利「正大」即見天地之情。❸ 不言萬物者,壯大之名義歸因大獲正,遂廣美正大之義。 天地之道弘正極大,故

也。 盛極 之象,故曰「壯于趾」也。 于 在天上,大壯」者,震雷爲威動,乾天主剛 征 趾 「剛以動」,所以爲「大壯」。 凶有孚」。 在下用壯,陵犯於物,以斯而行,凶 ,征凶有孚」者,「趾」,足也,初在體下, 之時好生驕溢,故於「大壯 《象》曰,「雷在」至 初九,「壯于」至「孚窮也」。 《象》曰 「其孚窮」者,釋壯 施之於人,即是在 一弗 「君子以非 |誡以「非禮勿履」也。 履 0 於「趾」者, 其信矣,故 健,雷 正 正 禮弗履」者 義 義 下 有 日:「 日: 而 如 在 天上 用 趾 壯 壯 雷 足

「長」,嘉本同,阮本作「大」。

人信有窮凶

也。

- 「溺」,嘉本同,阮本作「弱」。
- 「即」,嘉本同,阮本作「則」。

0 0 0

- 「地」,嘉本同,阮本作「極」。
- 「有」,嘉本同,阮本作「其」。

居中履謙,行不違禮,故得正而吉也。 九一,「貞吉」至「以中也」。正義曰:以其

懼,即 藩」也,必拘羸其角矣。《象》曰「小人用壯,君子 其正必危,故云「貞厲」也。 難,用之以爲羅罔於己,故曰「君子用罔」。 者,言小人用以爲「壯」者,即是君子所以爲羅罔也 纍纏繞也。 而不謙也,健而不謙必用其壯也。 」,羅罔也,「羝羊」,羖羊也,「藩」,藩籬也,「羸 用以 九三,「小人」至「君子罔 爲壯盛,故曰「小人用壯」,君子當此即 九三處乾之上是健之極也,又以陽居 以此爲正,狀似 也」。 小人當此 以 正 「羝 壯爲正 不 義 羊觸 慮危 陽是 日 恐

也。 壯大,无有能脱之者,故曰 決不羸」也。 陰,行不違謙,居謙即不失其壯,故得正吉而 輿」者,大車也。 幾 ,故云「貞吉,悔亡」。 可以往也。 九四以謙而進,謂之上行。 《象》曰 九四,「貞吉」至「尚往也」。 「尚往 「壯于大輿之輹」者,言四乘車而進 下剛而進,將有憂虞。 」者,「尚」,庶幾也,言己不失其壯 九三以壯健 「藩決不羸, 壯于大輿之輹 陰爻不罔己路 不謙 而 正義曰:「大 九四 即) 被 以 故「藩 羸其

六五,「喪羊」至「不當也」。正義曰:「喪

羊,二理自爲矛楯。」竊謂: 後云『能喪壯於易,不於險難」,故得无咎。 處分用。 故戒其預防。 「必 禮,必 於險難敵寇。 爲己寇難,必喪其壯。 至「无悔」。正義曰:「羊」,剛很之物,故以譬「壯」。 當」者,正由處不當位,故須捨其壯也。 逆捨其壯,委身任二,不爲違拒,亦剛所不害,不害即 「无悔」矣,故曰「喪羊于易,无悔」 陽猶不免咎,而況以陰處陽,以柔乘剛者乎? 羊于易,无悔」者,「羊」,壯也,居「大壯」之時,以 能 喪壯於易,不於險難」者,二雖應己,剛長則侵 喪其羊,失其所居」者,言違謙越禮,理勢必然。 喪其壯。 初云「必喪其羊、失其所居」、是自然應失 既來之日,良由居之必有喪其羊之理,● 而莊氏云: 羣陽方進,勢不可 當在於平易寇難未來之時, 「經止一言「喪羊」,而注爲 莊氏此言,全不識注意。 啃 也。 若於平易之時 ○注「羊壯 《象》曰「位 白 能 違 陽 陰 也 굸 處

不能退避。然懼於剛長,故不能遂往,故云「羝羊觸「退」謂退避。「遂」謂進往。有應於三,欽之不已,❷故上六,「羝羊」至「不長也」。正義曰:

❷ 「欽」,嘉本作「飲」,阮本作「疑」。 ● 「必有喪其羊之理」,嘉本同,阮本作「有必喪之理」。

以得[吉]也 不長也」者,能艱 即得「吉」,故曰 自決,以此處事,未見其利,故曰「无攸利」也。 藩,不能退,不能 「祥」者善也,進退不定非爲善也,故云「不祥」也。 處剛 長,剛不 酒其 「艱則吉」也。 |遂」也。「无攸利」者,持疑 志即憂患消亡,其咎不長。 害正 但艱固其志,不捨於三, 《象》曰「不祥也」者 猶 豫,不 釋所 能

■ 離上 晉。「康侯」至「三接」。正義

惟蒙賜蕃多,又被親寵頻數,一畫之間,三度接見也。庶,故曰「康侯用錫馬蕃庶」也。「晝日三接」者,言非進之臣也。臣既柔進,天子美之,賜以車馬,蕃多而衆臣之昇進,故謂之「晉」。「康」者,美之名也,「侯」謂昇曰:「晉」者,卦名也。「晉」之爲義,進長之名。此卦明曰:「晉」者,卦名也。「晉」之爲義,進長之名。此卦明

而上行」者,此就二體之義及六五之爻,釋「康侯用 出 二體釋得「晉」名。 義,恐後世不曉,故以「進」釋之。「明出地上」者,此 晉 地,漸 《彖》曰,「晉進」至「三接也」。 也」者,以今釋古。 就進長,所以 離上坤下,故言「明出地上」。 爲「晉」。 古之「晉」字,即 「順 而麗乎大明, 以 正義曰: 進 明既 柔 長 就 錫 進 爲

> 正義 訖,舉經以結君寵之意也。 被親寵也。 之美道也。 而 馬」已下也。 麗著於大明,六五以柔而進,上行貴位,順 」,俱不盡一 **E**: 舉此對釋者,蓋《訟》言「終朝」,《晉》言 「是以康侯用錫馬蕃 「柔進 坤, 日者,明黜、陟之速,所以示懲勸也。 順也;離, 而 上 行 」,君上所與也, 麗 ○注「以訟」至「三接也 也,又爲明。 庶,晝日三接」者,釋 故得厚賜 坤 而著明 能 順 從, 臣 而

旨也。 得明 此卦與「明夷」正反;《明夷・象》云「君子以莅衆,用 照爲「明德」。 昭明德」者,「昭」亦明也,謂自顯明其德也。 而明」,王注彼云「莅衆顯明,蔽僞百姓」,「藏明於内乃 昭」字宜爲「昭」之遥反,周氏等爲「照」之少反,●非注 照」,以爲自照己身,《老子》曰「自 也」。 《象》曰,「明出」至「明德」。 准此二注,明王之注意以此爲「自顯 案:王注此云「以順著明,自顯之道」,又 知者明」,用明 正義曰:「自 周氏 が明徳 以 等 晦 爲 自

也」,初六處順之初,應明之始,明順之德於斯將隆,進如,摧如,貞吉」者,何氏云「摧,退也,裕,寬也,如,辭初六,「晉如」至「受命也」。 正義曰:「晉

❶ 「少」,嘉本同,阮本作「召」。

喪其長也,故必宜寬裕其德,使功業弘廣然後「无咎」, 卦 所信服,故曰「罔孚」。 「裕无咎」者,「裕」,寬也,方 則之明,退則 初,❶未得履位,未受錫命,故宜寬裕進德乃得「无咎」。 故曰「裕无咎」也。 言進與退,專行其正也。 「裕无咎,未受命」者,處進之 始,未至履位,不可 ,貞吉」也。 居順 「罔孚」者,處卦之始功業未著,未爲 ,進之與退不失其正 《象》曰「獨行正」者,「獨」猶 自以 爲足也。若以此爲足是 一,故曰 晉 專 如 也 摧 自 踐

受此大福於其所脩, 於中正,不以无應而不脩其德,正而獲吉,故曰「貞正 二爻辭也 注:「鳴鶴在 者,處内而 故曰「進如愁如」,憂其不昭也。「貞吉」者,然履 「晉如,愁如」者,六二進而无應於上,其德不見昭 「受兹介福于其王母」者,「介」者,大也; 六二,「晉如愁」至「中正 成德者也。 陰則其子和之。」正義曰:此王用中孚九 故曰 初雖「愁如」,但守正不改,終能 「受兹介福於其王母」。〇 也」。正義曰: 順居 明

當

明,故得「悔亡」。❸ 之時衆皆欲進,己應於上,志在上行,故能 非其位,有悔也。 六三,「衆允」 《象》曰「衆允之志,上行也」者,居 至「上行 志在上行,與衆同 也」。 正 信, 義 與衆同 順 曰 而 麗 六

> 信 也

此也。 身,能走不能先人。」《本草經》云「螻蛄 學篇》云:「鼫鼠五能,不成一伎術」。 功也。 陸機以爲 能過屋,能緣不能窮木,能游不能渡谷,母能穴不 據,以斯爲進,无業可安,无據可守,事同鼫鼠,无所 非其位,上承於五,下據三陰,上不許其承,下不許 「晉如鼫鼠」者,鼫鼠 之。 ○注:「進如鼫鼠,无所守 鄭引《詩》云「碩鼠碩鼠,无食我黍」,謂大鼠 九四,「晉如 以斯爲進,正之危也,故曰 「雀鼠」。 案"王以爲「无所守」,蓋五 有 鼫 五 能 至「不當也」。 而不成伎之蟲也 也。」正義 晉 注 曰 : 如 一名鼫 E: 鼦 鼠,貞 īΕ 能 蔡邕《勸 鼠 義 九 立
伎
者 能 四 飛 曰 厲 也 掩 其 不

也。

尊 亡,失得勿恤,往吉无不利」者,居不當位 位,陰爲明主,能不自用其明,以 六五,「悔亡」至「有 慶也」。 事 委任於下,故得 悔 正 義 也。 日 悔

⁰ 處」,嘉本 同,阮本 無此

正」,嘉本、阮本皆作「吉」。

得」,嘉本同,阮本作「得其」。

渡」,嘉本同,阮本作「度」。

非惟自得,无憂亦將,人所慶説,故曰「有慶」也。故曰「往吉,无不利」也。《象》曰「有慶」者,委任得人,故曰「失得勿恤」也。能用此道,所往皆吉而无不利,「悔亡」。既以事任下,委物責成,失之與得不須憂恤,

也。 雖得之,其道未光大也。 矣,故曰「貞吝」也。 得吉,吉乃无咎,故曰「厲吉无咎」。 使物自服,必須攻伐其邑然後服之,故云「維用伐邑」 其角」者,西南,隅也,上九處進之極,❶過明之中,其猶 日 維用伐邑」者,在角猶進,過亢不已,不能端拱无爲 過於中,已在於角,而猶進之,故曰「進其角」也。 「厲吉无咎,貞吝」者,兵者凶器,伐而服之是危乃 上九,「晉其」至「未光也」。 《象》曰 「道未光也」者 以此爲正亦以賤 正義曰:「晉 ,用伐乃服

■ 離上 明夷,利艱貞。正義曰:「明夷」,

夷」之義也。 之於人事,闇主在上,明臣在下,不敢顯其明智,亦 卦名,「夷」者,傷 ,守其貞正之德,故明夷之世 時雖至闇 也 此卦日入地中,「明夷」之象。 ,不可隨世 ,利在艱貞 傾邪,故 宜 艱 難 「明 施 堅

《彖》曰,「明人」至「以之」。正義曰:「明

惟箕子能用之,故云「箕子以之」。 德。 子以之」者,既釋「艱貞」之義,又須出 以「利艱貞」者,用 其明恐陷於邪道,故利在艱固其貞,不失其正。 王以之」。「利艱貞,晦其明也」者,此又就二體釋卦 紂,以此蒙犯大難,身得保全,惟文王能用之,故云「文 王以之」者,既釋 入地中,明夷」者,此就二象以釋卦名,故此及晉卦 彖》、《象》同辭也。 内有險難,殷祚將傾,而能 内懷文明之德撫教六州,外執柔順之能三分 明在地中是「晦其明」也。 「明夷」之義,又須出能 「晦其明」也。 「内文明而外柔 自正 既處「明夷」之世,外 「内難而能正 其志不爲邪蹈,2 順 能 ,以蒙大難,文 用「明夷」之 「用艱貞」之 其志,箕 言所 晦 事 皆

明 非藏明用晦 若運其聰明,顯 以臨於衆,冕旒垂目,黈纊塞耳,无爲清静,民化不欺 衆顯明 也 ,蔽僞百姓者也」,所以君子能用 象》曰,「 反得其明也? 其智慧,民即逃其 君子」至「而 故曰 「君子以莅衆,用 明」。 密網,姦詐 此一明 Œ 義 夷」之道 愈生,豈 日: 晦而 「莅

- 「進」,嘉本同,阮本作「晉」。
- ○「韶」,嘉本同,阮本作「干」。

君子逃難惟速,故義不求食也。 往,主人有言」者,殊類過甚,以此適人,人必疑怪而有 于飛 夷遠遯、絶跡匿形、不由軌路」、高飛而去、故曰 處於卦始,去上六最遠,是最遠於難。 夷之主。 夷于飛」者,「明夷」是至闇之卦,上六既居 言,故曰「有攸往,主人有言」。《象》曰「義不食也」者 君子于行,三日不食」者,尚義而行,故云「君子于 也。 志急於行,饑不遑食,故曰「三日不食」。 云「飛」者,借飛鳥爲喻,如鳥飛翔也。 「垂其翼」者,飛不敢顯,故曰「垂其翼」也 明 夷」至「不食 也」。 「遠難過 正 上極 義 「有攸 日 甚,明 「明夷 ,爲明 初九 明

也。 左股」。 疑 吉也,故曰「用拯馬壯 位,不至懷懼而行,然後徐徐用馬以自拯濟,而 居中,用夷其明,不行剛壯之事者也,故曰 明 順闇 故得拯馬之吉也 (夷,夷于左股」者,左股被傷,行不能壯。 「夷于左股」,明避難不壯,不爲闇主所疑,猶 六二,「明夷夷」至「 主之則,不同 莊氏云「言左者,取其傷小」,則比夷右未爲切 初 ,吉也。 九 殊類過甚,故不 以則也 《象》曰 「順以則也」者 「明夷,夷于 爲闇 六二以 正 三獲其壯 義 主所 得 日 柔 處

九三,「明夷于」至「大得也」。正義曰

南 大得也 明以征闇君而得其「大首」,故曰「明夷于南狩,得其大 「南狩之志,乃大得」者,志欲除闇乃得「大首」,是其志 首」也。 至南方而發其明也。 久不可卒正,宜化之以漸,故曰 「明夷于南狩,得其大首」者,初藏明而往,託 方,文明之所,「狩」者,征 「不可疾貞」者,既誅其主,將正其民,民迷 九三應於上六,是「明夷」之臣 伐之類; 「不可疾貞」。《象》曰 大 (首) 謂 狩 而 闇 君。 行 H 發

者,心 意 避難門庭而已,故曰「于出門庭」。《象》曰「獲 之心意也。「于出門庭」者,既得其意,雖近不危,隨 處坤,與上六相近,是能執卑順「入于左腹」,獲 其右,是卑順不逆也。「腹」者,懷情之地。● 六四體 于左腹,獲明夷之心」者,凡右爲用事也,從其左不從 也。 有所存,既不 六四,「入于」至「心意也」。 逆忤,能 順 其旨,❷故 正義 曰「獲 百:「人 「明夷 心意 時 柔

子之明夷」者,六五最比闇君,似箕子之近殷紂,故曰六五,「箕子」至「可息也」。 正義曰:「箕

[「]懷」,嘉本同,阮本作「事」。

^{) 「}旨」,嘉本同,阮本作「正」。

保其貞,卒以全身爲武王師也。可息也」,「息」,滅也,《象》稱「明不可滅」者,明箕子能没,明不可息,正不憂危,故曰「利貞」。《象》曰「明不没,明不可息」也。「利貞」者,箕子執志不回,闇不能

則,故誅滅也。 明,遂入於地,謂見誅滅也。《象》曰「失則」者,由失法晦」。「本其初也」,其意在於光照四國,其後由乎不明晦」者,上六居明夷之極,是至闇之主,故曰「不明而明晦」者,上六居明夷之極,是至闇之主,故曰「不明而上六,「不明」至「失則也」。正義曰:「不

翼上 家人,利女貞。正義曰:「家人」

事。統而論之,非君子、丈夫之正,故但言「利女貞」。人」。「利女貞」者,既脩家内之道,不能知家外他人之者,卦名也。明家内之道,正一家之人,故謂之「家

「家人」以内爲本,故先説女也。「男女正,天地之大義是女正位乎内也,九五剛而得位,是男正位乎外也。人」之義,并明「女貞」之旨。「家人」之道,必須女主於正位乎内,男正謂乎外」者,❶此因二、五得正以釋「家正位乎内,男正謂乎外」者,❶此因二、五得正以釋「家正位乎内,男正謂乎外」者,❶此因二、五得正以釋「家

家不正,即天下之治定矣。 尊卑有序,上下不失,而後爲家道之正。 邦國。既家有嚴君,即父不失父道,乃至婦不失婦道 父、子子、兄兄、弟弟、夫夫、婦婦而家道正,正家 則天尊在上,地卑在下,同於男女正位,故 下定矣」者,此歎美正家之功可以定於天下,申 國有嚴君,故曰「家人有嚴君焉,父母之謂也」。 地,此又言道齊邦國。 非 大義」也。「家人有嚴君焉,父母之謂」者,上明義 也 惟人事而已。 」者,因「正位」之言,廣明「家人」之義乃 「家人」即女正於内,男正於外,二儀 父母,一家之主,家人尊事 各正其家,无 百二天 道 均二 -成道 而 同於 均天 地之 「父 一儀 天 齊

言既稱 子樞機。 常,即身无擇行。 有恒」者,「物」,事也,言必有事,即口无擇言,行必有 之義,故曰「風自火出,家人」也。「君子以言有物而 風方熾,火既炎盛,還復生風,内外相成,有似 自火出,家人」者,巽在離外是風從火出,火出之初,因 物 象》曰,「風自」至「有恒」。 出身加人,發邇化遠,故舉言行以爲之誡 而行稱「恒」者,發言立行,皆須合於可 正家之義,脩於近小。言之與行,君 正義曰: 「家人」 「風 行

❶ 「謂」,據《彖》文,當作「位」。

之事 互而相 足 也

閑其家者,家人志未變黷也。 若黷亂之後方始治之,即有悔矣。 有家,悔亡」者,治家之道,在 象》曰「志未變也」者,釋在初防閑之義。 防 「閑有家」,乃得「悔亡」,故曰 初九,「閑有」至「未 初即 變也」。 「閑有家,悔亡」也。 須 初九處家人之初, 嚴正,立 正義曰: 所以 法防 在 初防 閑 開

位,故 巽」者,舉爻位也。 職主在於家中饋食,供祭而已,得婦人之正吉,故 婦人之義也。 攸遂,在中饋,貞吉」者,六二履中居位,以陰應陽, 「无攸遂,在中饋,貞吉」也。 能「順以巽」而獲「吉」也。 六二,「无攸」至「以巽也」。 婦人之道,異順爲常,无所必 言「吉」者,明其以柔居中而 《象》曰「六二之吉,順 正義曰: 遂。 其所 得 元 Ħ 以 IE. 盡

 \exists 若縱其婦子慢黷 之主,以陽處陽,行剛嚴之政,故「家人嗃嗃」。 意也,「嘻嘻」,喜笑之貌也。 人嗃嗃,悔厲,吉,婦子嘻嘻,終吝」者,「嗃嗃」,嚴酷 嗃 婦子嘻嘻 」傷猛,悔其 九三,「家人」至「家節 ,終吝」也。 「嘻嘻」,喜笑而无節,則終有恨辱,故 酷厲,猶保其吉,故曰 《象》曰「未失也」者,初 九三處下體之上,爲一家 也。 正義曰 「悔厲,吉」。 雖 雖 「家 悔 復 之

 \vdash

厲,似失於猛,終无 ·若縱其嘻嘻,初雖歡樂,終失家節 慢 黷, 故曰「未失也」。 也。 失 家 節

者也,故曰「富家大吉」。《象》曰「順在位」者,所以 五,能富其家者也。 大吉」者,「富」謂禄位昌盛也,六四體 大吉」,由順承於君而在臣位,故不見黜奪也 有家」者、「假」、至也、九五履正而應、處 九五,「王假」至「相愛也」。 六四,「富家」至「位也」。 由其體異承尊、長保禄位、吉之大 正義 柔處巽,得 正義 尊 \exists 體異,是 E : 位 富 主 致 承 家

妻以著於外,信行天下,故曰「有孚」也。 孚威如,終吉」者,上九處家人之終,家道大成 莫不化之矣,不須憂恤 家 曰「威如」。 和睦,交相愛樂也 能以尊貴巽接於物,王至此道以有其家,故曰 假 象》曰「交相愛也 一也。「勿恤,吉」者,居於尊 上九,「有孚」至「之謂也」。 威、信並立,乃得終於家道,即 」者,王既明於家道,天下化之,六親 而得吉 也 位 ,故曰「勿恤 而明於家道 威被海内,故 正 而吉從之,故 義 一一一一一 「王假 刑 , 則 曰 : 于寡 在下 「有 有

「有孚威如,終吉」也。 《象》曰「反身之謂」者,身得

同

離 兑上下 睽,小事吉。 正義曰: 睽」者, 乖 異

同之世方可爲之。 之名,物情乖異,不可大事。 而 可,故曰「小事吉」也。 小事謂飲食衣服,不待衆力,雖 大事謂 興役動 宗,必 須大

乎剛」,非爲全弱。 明」,不爲邪僻,「柔進而上行」,所之在貴,「得 麗乎明,柔進而上行,得中而應乎剛,是以小事吉」者 潤下,无相成之道,所以爲乖。 地 就天地、男女、萬物,廣明「睽」義 可以行小事 此 理 物共成烹飪,理應相濟。 此就二體釋卦名。 「睽,火動而上,澤動而下,二女同居,其志不同行」者 就二 卑 應同志,各自出適,志不同行,所以爲異也。 ·, 其 體及六五有應,釋所以小事得吉。 彖》曰,「睽火」至「大矣哉」。 體懸隔 而 獲吉也。 是一天地 爲「睽」之義同而異者也。 雖在乖違之時 「天地睽而其事同」,此 睽 今火在上而炎上,澤居下而 也。 中、少二女共居一家 體乖而用合也。 而 , 卦爻有此三 生成 品 「説而 物 正 水火二 其 以 中 義 「説 天高 下 麗 日 : 而 故 而 平.

> 用大矣哉」也。 用,使合其通理 大,又歎能「用睽」之人,其德不小。 其事類也」。 日「天地睽而 各自爲象,是「萬物睽」也。 「男女睽」也。 也。 男女睽而其志通」者,男外女内,分 「睽之時用大矣哉」,既明 其事同也,男女睽而其志通 而成家理 ,非大德之人則不可 事 ,其志即通 而均於生長,其 也 睽 也。 離之時能 「睽」理合同 故曰 0 也 事 萬物 萬 位 「睽 即 有 物 類,故 别,是 殊 之時 建 睽 其

火下澤,睽」者,動而相背,所以爲「睽」也。 而異」者,佐主治民,❷其 ,故曰「君子以同而異」也 《象》曰,「上火」至「而異」。 (意則 同; 各有司存,職 IE. 「君子以 義 E : 掌 Ē 則

求 阻 故得「悔亡」。 亡」者,初九處睽離之初,居下體之下,无應獨 悔也。 ,勢必自復,故曰「喪馬勿逐,自復」也。 ,馬之爲物,難可隱藏,時或失之,不相容隱,不須尋 初九,「悔亡」至「闢咎也」。 四 亦 「喪馬勿逐,自復」者,時方睽離,觸 處下,无應獨立,不乖於己,與己合志 正 「見惡人,无 義 立,所 E: 目 悔

嘉本同,阮本作「則」。

0

主」,嘉本同 阮本作「王」。

避咎也

失道」者,既遇其主,雖失其位,亦「未失道」也。失道」者,既遇其主,雖失其位,亦「无咎」也。《象》曰「未宣在於巷。言遇之不遠,故曰「遇主於巷」。「主」謂五五亦失位,與己同黨,同趣相求,不假遠涉而自相遇,主於巷,无咎」者,九二處睽之時而失其位,將无所安。主於巷,无咎」者,九二處睽之時而失其位,將无所安。

乖。 輿曳 助 天且劓」。 刑之,故掠其額,●二從下刑之,又截其鼻,故曰「其人 以柔乘剛,志在上九,不與四合。 其人天且劓,无初有終」者,剠額爲「天」,截 隔 ,故曰「无初有終」。《象》曰「位不當」者,由位不當 欲載,其輿被曳,失己所載也。 所 ,其牛掣」者,處「睽」之時,履非其位,以陰居 既處二、四之間,皆不相得。 六三,「見輿」至「遇剛也」。 在,不 而 應在上九,執志不回 能 得進 也,故曰「見輿曳,其牛掣」也。 二自應五,又與己 初雖 其爲人也 欲進,其牛被牽, 受困 正義曰:「見 四四 ,終獲剛 [從上 爲

陽而言「夫」者,蓋是「丈夫」之夫,非「夫婦」之夫也。「元夫」謂初九也。處於卦始,故云「元」也。初、四俱也,以四、「睽孤遇」至「志行也」。正義曰:故輿被曳。「遇剛」者,由過上九之剛,所以「有終」也。

位,與二合德乃爲物所賴,故曰「往有慶也」。 慶」之言,善功被物,爲物所賴也。 五雖居 无咎矣,故曰「往无咎」。《象》曰「往有慶也」者,「有 三雖隔二,二之所噬,故曰「厥宗噬膚」也。 故以「膚」爲譬,言柔脆也。二既噬三即五,可以 往何咎」者,「宗」,主也,謂二也。「噬膚」謂噬三也。 亡」者,失位,「悔」也, 六五、「悔亡」至「有慶也」。 有應故「悔亡」也。 正義曰:「悔 「厥宗噬 三是陰爻 尊 而 不當 往 膚 而

豕 觀至穢之物,事同豕而負塗泥,穢莫斯甚矣,故曰「見 澤盛,睽之極也。 「見豕負塗」者,火動而上,澤動而下,己居炎極,三 「睽孤 負塗」。 」者,處「睽」之極,「睽」道未通,故曰「睽 上九,「睽孤」至「羣疑亡也」。 「載鬼 離爲文明,澤是卑穢,以文明之極 一車、先張之弧、後説之弧」者 正 孤 義 也 E: 而

❶ 「掠」,嘉本、阮本作「剠」。

爲 物」,故舉恢 而 醜,恢詭譎怪,各然其所然,各可其所可,即形雖萬殊 好,所謂「齊」者,豈必齊形狀、同規矩哉? 道通爲一。」郭象注云:「夫筳横而楹縱,厲醜而西 然,无物不可。故爲舉筳與楹,❸厲與西施,恢詭譎怪 併消釋矣,故曰「羣疑亡」也。 者,往與三合,如雨之和。 則吉從之,故曰「往遇 者,陰陽交和之道也。 媾矣,❷故曰「匪寇婚媾」也。「往遇雨則吉」者,「雨 謂四爲「寇」。 者,爲「豕」上有「見」字也。 治,●先見殊怪,故又見「載鬼一車」。「載鬼」不言「見 盈車,怪異之甚 「後説之弧」,不復攻也。 睽」極則通,有 先張之弧」,將攻害也。 輔 性本得同,故曰『道通爲一』也。」莊子所言以明「齊 一。」正義曰:《莊子・内篇・齊物論》曰:「无物不 嗣 用此 文而 詭譎怪至異之物,道通爲 「睽」志既通,匪能爲寇,乃得與三爲婚 似引詩斷章,不必與本義同 也。 改「通」爲「將」字 至 雨則吉」。《象》曰「羣疑亡也 衆異併消,无復疑阻,往得和合 「睽」將合,至殊將 匪 物極則反,「睽」極則通,故 向之見豕、見鬼、張弧之疑 寇婚媾」者,四剠其應,故 見怪若斯,懼來害己,故 ○注:「恢詭譎怪,道將 者,明 一,得性則同。 物 通,未 舉縱横、好 極 則 至 反 施 於

曰「貞吉」也。

難之時,若不守正而行其邪道,雖見大人亦不得吉,故 衆難,惟有大德之人,故曰「利見大人」。「貞吉」者,居 日 : : 故曰「蹇,利西南,不利東北」也。「利見大人」者,能 可解,若人於險阻則彌加 北險位,阻礙之所。 蹇,利西南,不利東北」者,西南地位,●平易之方。 蹇」,難也。 Ħ 坎 艮 上 下 蹇。 有險 世道多難,率物以適平易則蹇難 「利西南」至「貞吉」。 在前,畏而不進,故稱爲「蹇 擁塞,去就之宜,理須如此 正 濟

哉 而 前,所以爲難,若冒險而行,或罹其害。艮居其内, 險有止以釋「蹇」名。 名也。「蹇」者,有難而不進,能止而不犯,故就二體 不往,相時而動,非知不能,故曰「見險而能 也。 難也,險在前也。 《彖》曰,「蹇難」至「大矣哉」。 「蹇,利西南,往得中也」者,之於平易,救難之 坎在其外是「險在前」也,有險在 見險而能止,知矣哉」者,釋 正義 止,知矣 E 卦 有

治」,嘉本同,阮本作「治」。

[「]三」,嘉本同,阮本作「二」。

舉」,上嘉本有「是」字,阮本無。

地」,嘉本同,阮本作「險」。

非 用大矣哉」者,能於蹇難之時建立其功、用以 者,居難守正 位,所以得正而吉,故曰「當位貞吉」也。 也。「當位貞 人,往 阻,更益其難 理 小人之所能,故曰「蹇之時用大矣哉 , 故 有功也」者,往見大人必能 云「往 得 7,其道 八吉,以 ,正邦之道 中 也。 彌 正邦也」者,二、三、四、五 窮,故 示 , 故 利 日以 曰「其道窮」也。 東 北,其 除難 正邦」也。 道 也 故 曰 窮 「以 者, 往 濟世者 「蹇之時 「利見 正邦也-爻皆當 之於險 有 功

績 曰: 上有 暢之時並濟天下,處窮之時則獨善其身也 以行,只可反自省察、脩己德用 下,今在山上,終應反下,故曰「反身」。」處難之世不 道成德立方能 德」者,蹇難之時未可以進,惟宜反求諸身,自脩其德. 上,彌益危難,故曰 Ш 水,蹇」者,「山」者是巖險,「水」是阻 「水在山上,失流通之性,故曰「蹇」。」通水流 上,不得下流,蹇之象。 象》曰「山上」至「脩德」。 濟險,❶故曰「君子以反身脩德」也。 三山上 有水,蹇」。 陸績又曰:「水本 乃除 難。 「君子以 正義曰: 君子 難。 通 反 水 身脩 應 達 積 一山 下, 道 可 Ш 陸 山

居 良始是能見險而止,見險不往 來譽」者, 初六,「往蹇」至「宜 初六處 蹇之初, 往 一待也」。 則 遇難 則是來而 **來** 正義曰: 則 得 得 譽, 故 日 初 往

> 「往 待 時 蹇來譽 也 象》曰 宜待」者, 既 往 則 遇 蹇, 宜 止 以

也。 之故」。《象》曰 中,志匡王室,能涉蹇難而往 居於王位而在難中,六二是五之臣,往應於五,履正 蹇蹇,匪躬之故」者,「王」謂 盡忠於君,匪以私身之故而不往濟君,故曰「匪 六二,「王 「終无尤」者,處難以 臣」至「无尤 五 濟蹇,故曰「王臣蹇蹇」 也,「臣 也 斯,豈有過 一謂 正 義 尤 日 : 也。 也? 躬 九 王

居

臣

五

之」也。 爻,惟九三一陽居二陰之上,是内之所恃,故云「内喜 來則得位,故曰「來反」。 蹇來反」者,九三與坎爲鄰,進則入險,故曰「往 九三,「往蹇」至「喜之也」。 《象》曰「内喜之」者 正義 内 曰 : 卦三 蹇 「往

難 「當位實」者, 曰: 來則乘剛 馬云「連亦難」 六四,「 數 之 明六四得位履正, 往 所 往 來皆難 招 蹇 |也,鄭云「遲久之意」。 來 非 故曰 邪 連」至「位 妄之所 ❷當其本實。 「往蹇來連 致 也, 實 也 也。 六四 故 曰 而 往 往 象 則 正 ¥ 位 遇 義 无

⁰ 方 阮 本 同, 嘉 本作「有

⁰ 得」,嘉本同,阮本作「當」。

志」亦是朋黨也。

九五、「大蹇」至「中節也」。正義曰:九五處難之時,獨在險中,雖之大者也,故曰「大蹇」。然至「朋來」,故云「以中節」也。○注:「同志者集而至致「朋來」,故云「以中節」也。○注:「同志者集而至矣。」正義曰:此以「同志」釋「朋來」之義。鄭注《論語》五處難之時,獨在險中,難之大者也,故曰「大蹇」。然五處難之時,獨在險中,難之大者也,故曰「大蹇」。然五處難之時,獨在險中,難之大者也,故曰「大蹇」。然五處難之時,獨在險中,難之大者也,故曰「大蹇」。然五處難之時,獨在險中,難之大者也,故曰「大蹇」。

之,來則得之,所以往則「有蹇」,來則「碩吉」也。「以 從貴」者,「貴」謂陽也,以陰從陽,❷故云「以從貴」也。 也」者,有應在三,是「志在内」也。 大人以弘道化,故曰「利見大人」也。《象》曰「志 難,故曰「往蹇」也。來則難終,難終則衆難皆濟,志大 得矣,故曰「來碩,吉」也。 一碩」,大也。上六,難終之地,不宜更有所往 上六,「往蹇來」至「從貴也」。 險夷難解,大道可興,宜見 應既在内,往則失 正義 往 在内 則 日 長

Ⅲ 炭下解。「利西」至「夙吉」。正義

曰:「解」者,卦名也。然「解」有兩音:一音「古買反」,

易正義卷第七

静 ; 設此誡者,褚氏云"「世有无事求功,故誡 速赴爲善,故云「无所往,其來復吉,有攸往,夙吉」。 可否。若无難可往則以「來復」爲吉,若有難可往則以 者,上言「解難濟險,利施於衆」,此下明救難之時誠其 《彖》稱 於衆,則所濟者弘,故曰「解,利西南」也。「无所往 者,緩也。」然則「解」者,險難解,釋物情舒 「解」。《序卦》云:「物不可以終難,故受之以解。 解」也。 音「胡賣反」,「解」謂解難之初,「解」謂 亦有待敗乃救,故誡以有難須速也。」 「動而免乎險」,明非救難之時,❸故先儒皆讀 「解,利西南」者,西南坤位 ,坤是衆也。 既解之後。 以 緩,故爲 无 難 施 官 解

所以爲「利」也。「其來復吉,乃得中也」者,无難可解,衆」者,「解」之爲義,兼濟爲美,往之西南得施解於衆,外,即見免説於險,所以爲「解」也。「解,利西南,往得遇險不動无由解難,動在險中亦未能免咎,今動於險「解,險以動,動而免乎險,解」者,此就二體以釋卦名。「解,險以動,動而免乎險」至「大矣哉」。正義曰:《彖》曰,「解險」至「大矣哉」。正義曰:

[「]中」,嘉本同,阮本作「正」。

[「]陰」,嘉本同,阮本無此字。

[「]非救」,嘉本同,阮本作「解衆」。

也。 退守 於草木无不有「解」,豈非大哉! 也。 雷雨乃作,雷雨既作,百果草木皆孚甲開坼,莫不解散 者,此因震、坎有雷雨之象,以廣明「解 往有功也」者,解難能速則 静默, 「天地解而雷雨 解之時大矣哉」者,結數「解」之大也。 得理之中,故云「乃得 作,雷雨作而百果草木皆甲 不失其幾,故「往 中 也。 義。 有 天地 自天地至 攸 有功 往,夙 解緩

赦 過輕則赦,罪重則宥,皆解緩之義也。 謂放免、「過」謂誤失、「宥」謂寬宥、」 象》曰,「雷雨」至「宥 罪」。 「罪」謂 正義 故犯 日

四

咎, 者不能无咎,否結既釋之後,剛强者不復陵暴。 之地,逢此之時,不 處蹇難始解之初,在剛柔始散之際,雖以柔弱處无位 險難未夷,則賤弱者受害。 象》曰「義无咎」者,「義」猶理也,剛柔既散,理必无 或有過咎,非理之常也 「或有過咎,非其理也。」正義曰:或本无此八字。 初六,「无咎」至「无咎也」。正義曰: 慮有 2、咎,故曰「初六,无咎」也。 然則蹇難未解之時,柔弱 o 故 曰「義无咎」也。 初六 夫

獲備盡。② 九二,「田獲」至「中道也」。 |者,狐是隱伏之物,三爲成數,舉「三」言之,搜 九二以剛居中而應於五,爲五所任,處於險 正義曰:「田

> 得貞吉者,由處於中,得乎理中之道故也 吉」也。《象》曰「得中道也」者,明九二位既不當所以 之道,不失枉直之實,能全其正者也,故曰「得黄矢,貞 者,「黄」,中之稱。「矢」,直也,田而獲三狐,得乎理 獵 中,知險之情,以 而獲窟中之狐 ,故曰「田 斯 解 險 无險不濟 獲 三狐 能 「得黄矢 獲隱伏, ,貞吉 如 似 田

也,「負」者,小人之事也。 咎也」者,言此寇難由己之招,❸非是他人致此過咎,故 多矣,此是其一,故曰「亦可醜」也。「自我致戎,又誰 鄙,故曰「貞吝」也。《象》曰 負於物也,故寇盜知其非己所有,於是競欲奪之,故曰 且乘,致寇至」者,六三失正无應,下乘於二,上 「負且乘,致寇至」也。「貞吝」者,負乘之人,正 ,即是用夫邪佞以自説媚者也。 「又誰咎也」。 六三,「負且」至「誰咎也」。正義 施之於人,即在車騎之上而 「亦可醜也」者,天下之醜 「乘」者,君子之器 E: 其所 附 「負 於

九四、「解而 至 「當位· 也。 正義 曰 : 解

日

常」,嘉 本同,阮本作「當」。

備」,嘉本同,阮本作「懽」。

難」,嘉本同,阮本作「雖」。

周易正義卷第七

不得附四則无所解。今須解拇,由不當位也。不得附四則无所解。今須解拇,由不當位也,既三至而信,故曰「解而拇,朋至斯孚」。《象》曰「未當位」應在初,若三爲之拇則失初之應,故必解其拇然後朋於不正,與三相比,三從下來附之,如指之附足。四有而拇,朋至斯孚」者,「而」,汝也,「拇」,足大指也。履

人」謂作難者,信君子之德,故退而畏服之。 「君子維有解,吉」者,六五居尊履中而應於剛,是有君「君子維有解,吉」者,六五居尊履中而應於剛,是有君子之德。君子當此之時,可以解於險難。「維」,辭也。子之德。君子當此之時,可以解於險難。「維」,辭也。不五,「君子」至「小人退也」。正義曰:六五,「君子」至「小人退也」。正義曰:

之極,將解之荒悖而 宜在山林,隼於人家高墉,❶必爲人所繳射,以譬六三 飛鳥爲喻,而居下體之上,其猶隼處高墉。 處於高位,必當被人所誅討。 負乘,不應於上,即是罪釁之人,故以譬於「隼」。 隼」者,貪殘之鳥,鸇鷂之屬。「墉」,墙也。六三失位 而後舉,故必 上六,「公用」至「解悖也」。 「獲之」 除 穢亂,故用「射」之也。 丽 「无不利」,故曰「公用射 上六居動之上,爲「解 隼之爲鳥. 正義 而後 티 :

上六居動之上,能除解六三之荒悖,故云「以解悖」也。「悖」,逆也,六三失位負乘,不應於上,是悖逆之人也。六以陰居上,故謂之「公」也。《象》曰「解悖也」者,隼于高墉之上,獲之,无不利」也。「公」者臣之極,上

周易正義卷第七

計一萬三千八百七十六字

❶ 「隼」,阮校云當作「集」。

=

Д

周 易正義卷第八

開 國子祭酒上 國 子臣 孔 穎 護軍曲阜 達奉 勑 縣 撰

既吉而无咎,則可以爲正。 利有攸往 正,而「利有攸往」矣,故曰「損有孚,元吉,无咎可貞」 則涉諂諛而有過咎,故必「有孚」,然後大吉,无咎 足者也,損剛益柔非長君子之道者也。若不以誠信, 曰:「損」者,減損之名,此卦明損下益上,故謂之「損」。 損」之爲義,損下益上,損剛益柔。 不爲邪,益上而不爲諂 也。 艮 兑 上 下 先儒皆以「无咎」、「可貞」各自爲義、言 有孚」至「用 ,則何咎而可 准下王注《彖》辭云:「損下 損下益上非 正。」然則 享」。 王意 :補不 IE. 義

> 艮,陽卦,爲止,兑,陰卦,爲説。 曰 既行損以信,何用豐爲? 「曷之用,二簋可用享」也 《彖》曰,「損損」至「偕行」。 簋 至約, 可 用享祭矣,故 Œ 義

티 :

於剛 剛柔之中,剛爲德 柔有時」者,明「損下益上」之道亦不可爲常。 二簋至約,惟在損時應時行之,非時不可也。 得如此。「二簋應有時」者,申明二簋之禮不可爲常 孚,元吉,无咎可貞,利有攸往」者,卦有「元吉」已下等 而任性,鶴 以能「損下益上」者,以下不敢剛亢,貴於奉上,則 之用,二簋可用享」者,舉經明之,皆爲「損而有孚」,故 事,由於「有孚」,故加一「而」字,則其義可見矣。 「曷 「益柔」者,謂益艮之陰爻也。 之,是下自減損以奉於上,「上行」之謂也。「 「損,損下益上,其道上行」者,此就二體釋卦名之義 「有時」。「損益盈虚,與時偕行」者,「盈虚」者, 鳧足短 亢而益柔順也。 脛 長而 自 長。 然。 「損剛」者,謂損兑之陽爻也 既爲德 此又云「與時偕行」者,上既 人之爲德須備剛柔,就 長,不可 陽止於上,陰説 恒減,故損之 「損剛 損之所 損 是損 而 而 有 順

以「无咎」、「可貞」共成一義,故莊氏云:「若行損有咎,

須補過以正其失;

今行損用信,則是无過可正,❶故

云「无咎可貞」。」竊謂莊氏之言得王旨矣。❷「曷之用.

簋可用享」者,明行損之禮,貴夫誠信,不在於豐

過」,嘉本同,阮本作「咎」。

王」,嘉本同,阮本作「正」。

行 損我以 理,自然之質,各定其分。 言「損剛 故曰 益人,虚此以盈彼? 「損益盈虚 益柔」,不可常用,此又汎明損 與 (時偕行」也 鳧足非 但 有 短, 時 宜 鶴 益 用,故應 脛 一之事 非 長, 體 時 何 非 須 而 恒

忿欲皆有往來,「懲」、「窒」互文而相足也 逆,故情有忿欲。 懲止忿怒,窒塞情欲。夫人之情也,感物 高,似澤之自損 下有澤,損。 象》日 君子以懲忿窒欲」者,澤在 · 山 以以崇 「懲」者息其既往,「窒」者閉其將來。 Щ 下」至「窒欲」。 之象也。 君子以 法此損 Щ 而 正 動 下,澤卑 義 ,境有順 日 道,以 一: 山 Ш

事而 事遄 乃得「合志」,故曰 剛勝則柔危,以剛奉柔,初未見親也,故須 往乃得无咎,故曰「已事遄往,无咎也」。「酌損 損下益上,如人臣欲自損己奉上。然各有職掌,❶若廢 尚, 往,咎莫大焉。 往,无咎」者,「已」,竟也,「遄」,速也。 庶幾也,所以 初九,「已事」至「合志 竟事 「酌損之」。《象》曰 若事已不往,則爲傲 速往,庶幾與上合志 也」。 尚 正義 慢。 酌 心也。 損之爲道 合 而 百二日 志」者 減損之 竞事速 (之)者

下不可 凶,弗損益」者,柔不可以全益 九二,「利貞」至「爲志也」。 以 无 正。 初 九 已損 剛 以 益 柔 , 剛 爲 正義曰: 不可以 順 六 四 全削 爲 「利 初

> 適也 之」也。 也。 貞,不損益之,良由 二利以居 六,九二復損己以 既 征 《象》曰「中以 而 凶」,故九二不損己而務益,故曰 守正,進之於柔則 益六五爲六二,則成 居 爲志 中, 以中爲 者,言九二所以 Ŋ, 志, 故 日 故損益得 「剥」卦矣,故 「利貞、征 能居 一不 其 而 損 九 節 守

之義。 人益 減損,其實損之也,故曰「三人行則損 行則得其友」也。 九懷疑,疑則失其適匹之義也。 於上九,上有二陰,六四、六五 夫陰陽相應,萬物化淳,男女匹配 六三已上三陰。 時,居於下體。「損」之爲義,其道上行。「三人」謂 人行則損一人,一人行則得 人獨行,則上九納己无疑,則 加 六三,「三人」至「則 若與二陰并己俱行,雖欲益上九一人,更使 疑 《惑也。 上一人謂 (象》曰「三則疑」者,言一人則可,三 上九也,下一人謂 其友」者,六三處 也。 疑 得 名之曰「益」,即不是 也」。 ,故能生育。 其友矣,故曰「一人 損道上行,有 一人」。若六三 正 義 六三也 「損」之 六三 相 H 從

「職」,嘉本同,阮本作「所」。

0

「益」,嘉本同,阮本作「疑」。

乎 ? 感而久不相會,則有勤望之憂,❷故「速乃有喜」。 喜」者、《詩》曰「亦既見止」、「我心則降」,不亦 无咎」也。 自損以益四 有喜乃无咎,故曰「使遄有喜,无咎」。 復企予之疾,❶故曰「損其疾」。 自損己遄往,己以正道速納,陰陽相會,同志斯 其疾,使遄有喜,无咎」者,「疾」者,相 ○注: 四、「損其」至「可喜 四四四 「速乃有喜,有喜乃无咎也。」正義曰: 不速納則有失益之咎也,故曰「有喜乃 疾何可 也」。 思之疾 久,速乃 《象》曰 正義曰 也 亦 來,无 有喜, 初九 有 初九 「損 相 喜 可

之,則人用其力,事竭其功,智者慮能,明者 乎損,而能自抑損者也。 祐之,吉无不利」義同也。 龜,弗克違」也。 能違也。 疑之物也。陰不先唱,柔不自任,尊以自居,損 不自益之,有人來益之也。「朋」者,黨也。 不歸而益之,故曰「或益之」也。「或」者,言有 益之十朋之龜,弗克違,元吉」者,六五居尊以 「元吉」。 六五,「或益」至「上祐也」。 《象》曰「自上祐」者,「上」謂天也,故與「自天 朋 至不違,則羣才之用盡矣,故曰「十朋之 羣才畢用,自尊委人,天人並助 居尊而能自 ○注:「朋,黨也。」正 抑 損, 正義曰: 「龜 慮策, 則 也,言其 義曰: 天下莫 **」者,決** 柔 7,故曰 以 而 而 守 在 或

山龜,八曰澤龜,九曰水龜,十曰火龜。」靈龜,三曰攝龜,四曰寶龜,五曰文龜,六曰筮龜,七曰馬、鄭皆案《爾雅》云:「「十朋之龜」者,一曰神龜,二曰

也。 也。 者,剛德不損,爲物所歸,故「大得志」也。 「无家」者,光宅天下,无適一家也。 所歸,故曰「得臣」。 得臣則以天下爲一,故曰「无家」。 而已,所往亦无不利,故曰「利有攸往」,義兩存也 不使三陰俱進,不疑其志,剛德遂長,故曰「利有攸往 吉,故曰「无咎,貞吉」也。「利有攸往」者,下制於柔,❸ 九處損之極,上无所奉,損終反益,故曰 損,益之,无咎,貞吉」者,「損」之爲義,損下益 「得臣无家」者,居上乘柔,處損之極尊。 又能自守剛陽,不爲柔之所制,豈惟「无咎,貞吉 既「剛德不損,乃反益之」,則不憂於咎,用正 上九,「弗損」至「得志也」。 《象》曰「大得 「弗損,益之」 Œ 夫剛德爲物 義 曰: 上。 志 弗

■ 異上 益。「利有」至「大川」。正義

[「]予」,嘉本同,阮本作「子」。

❷ 「勤」,嘉本作「鞅」。

^{● 「}下制」,嘉本同,阮本作「不利」。

利 曰 : 下益上,益 涉大川」。 之益。」既上行惠下之道利 向秀云: 有矣,而上更益之,明聖人利物之无已也。 ,故曰「利有攸往」。 「益」者,增足之名,損上益下,故謂之「益」。 「明王之道志在惠下,故取下謂之損,與下謂 土針則 損上益 以益涉 下。 益萬物,動 得名皆就下而 難, 理 絶險阻,故曰 而 无違,何往 不據上者。 損 卦 則 下 「利 不 損 已

也。 見 者,此取譬以釋「利涉大川」也。 往」者,正謂 爲常而 正有慶之德,故所 九五之爻釋「利有攸往 益卦所以名「益」者,正以「損上益下,民説无疆」者也 柔巽在上,❶剛動 自上下下」,則其道光大,爲天下之所慶賴也。❷ 益 自上下下,其道大光,利有攸往,中正有慶」者,此就 巽 益」之爲利 既居上者能自損以益下,則下民歡說,无復疆限。 《彖》曰 不溺也。 上益下,民説无 進无 中正 疆」者,自此已下,廣明益義。 故 ,「益損」至「偕行」。 以益 有 在下,上巽不違於下,損上益下之義 往 云利 慶故也。 无不利焉。「益」之所以「利有攸 涉難如木道之涉川,涉川 ,中正有慶」也。 疆」者,此就二體釋卦名之義 涉大川 「利涉大川、木道乃行 木道乃行 木體輕浮,以涉大川 五處中正,能 也。 正 前 无害方 則 義 以中 就 日

> 之,故曰「凡益之道,與時偕行」也。 雖施益无方不可恒用,當應時行之,故舉「凡益」摠結 生,亦是「損上益下」義也。 天地廣明「益」之大義 動而巽,日進无疆」。 曰「天施地生,其益无方」。 而驕盈則被損无已,若動而卑巽則進益无疆,故曰「益 體明「損上益下」以釋卦名,以下有動求,上 損上 益下」之義。 今就二體更明得益之方也。❸ 「天施地生,其益无方」者,此 也。 「凡益之道,與時偕行」者 其施化之益,无有方所,故 天施氣於地,地受氣 能巽接,是 而 若動 化 就

物。 雷, 遷 如二月啓蟄之後,風以長物, 同其意。 云:「雷以動之,風以散之,萬物皆益。」●孟僖亦與此 徙慕尚,「改」謂改更懲止。 益。 風之爲益,其在雷後,故曰 象》曰,「 君子以見善則遷,有過則改」者,《子夏傳 言必須雷 風雷」至「則改」。 動於前,風散於後,然後萬物皆益 遷善改過,益莫大焉,故 八月收聲之後,風以 「風 雷 , 益 世。 正義曰: 「遷」謂 「風 殘

[「]巽」,嘉本同,阮本作「損」。

[「]賴」,嘉本同,阮本作「順」。

[「]就」,嘉本同,阮本作「執」。

[「]益」,嘉本、阮本皆作「盈」。

見 善 則 遷, 有 過 則 改 也。 六子之中

君子 有益物 以 取 「雷風 」者,❶何晏云「取其最長可久之

功,人不與也。 也。 幹,❷應巽不違,有堪建大功之德,故曰「利用爲大作 九處「益」之初,居動之始,有興作大事之端,又體剛能 得「无咎」,故曰「元吉,无咎」。《象》曰「下不厚事」者, 用爲大作,元吉,无咎」者,「大作」謂興作大事 事」猶大事也。 然有其才而无其位,得其時 初九,「利用」至「 時人不與則咎過生焉,故必「元吉」乃 厚 事 而非 也。 其處,❸雖有殊 正義 日: 也。 利 初

居益 於帝、吉」也。 位 卦六五之位,故曰「或益之十朋之龜,弗克違」也。 六二體柔居中,當位應巽,是居益 益之十朋之龜、弗克違、永貞吉。 「不當尊,故「永貞」乃「吉」,故曰「永貞吉」。 「帝」,天 ,不召而至也 王用此時以享祭於帝,每明靈降福,故曰「王用享 用謙則物自外來,朋龜獻策,弗能: 六二,「或益」至「外來也」。 《象》曰「自外來」者,明益之者從外 王用享於帝,吉」者: 而 能用謙沖者 違也。 正義 日 同 於損 也 「或

六三,「益之」至「有之也」。 正義 曰:「益

> 之極」至「用圭也」。 正義曰:告王者宜以文德爕理 不可求益,❺施之凶事乃得固有其功也。 是有信實而得中行,故曰「有孚中行」也。 求益不爲私己,志在救難,爲壯不至亢極,能適 之,用 天下人寧,不當恒以救凶,用志褊狹也。 故曰「告公用圭」。《象》曰「固有之」者,明非爲救凶則 中行」之德,執圭以告於公,公必任之以救衰危之事, 卦之上, 壯之甚也。 若以救凶原之則情 來、己自爲之、物所不與。若以謙道責之則理合誅戮 「用凶事」而得免咎,故曰「益之,用凶事,无咎」。 凶 事、无 能謙退,是求益者也,故曰「益之」。 咎。 有孚中 在可恕。 用此以救衰危則物之所恃,所以 行,告公用 然此 六三以 圭」者,六三以 陰居陽,處下 ○注「公者臣 用此「有孚 益 於時

行,告公從,利用爲依遷國」者,六四居「益」之時,處巽 六四,「中行」至「益志也」。 正 義 日 中

體」,嘉本同,阮本作「應」。

⁰ 獨」,嘉本同,阮本作「猶」。

非」,嘉本同,阮本作「无」。

於」,嘉本無此字。

非」,嘉本同,阮本作「其」。

者,既爲公所從,其志得益也。 《象》曰「以益志」如「周之東遷,晉鄭焉依」之義也。《象》曰「以益志」來人而遷國者人无不納,故曰「利用爲依遷國」也。不中,用中行者也,故曰「中行」也。以此中行之德,有不中,開中行者也,故曰「中行」也。以此中行之德,有之始,體柔當位,在上應下,卑不窮下,高不處亢,位雖之始,體柔當位,在上應下,卑不窮下,高不處亢,位雖

於物, 費,惠心者也。有惠有信,盡物之願,必獲「元吉」,不 信,爲惠之大,莫大於心。 益之主,兼弘德義,❶以益物者也。爲益之大,莫大於 孚惠心,勿問元吉,有孚,惠我德」者,九五得位 於天下,故曰「大得志」也。 待疑問,❷故曰「有孚惠心,勿問元吉」。 象》曰「大得志」者,天下皆以信惠歸我,則可以得志 物亦以信惠歸於我,故曰「有孚,惠我德」也。 九五,「有孚」至「得志也」。正義曰:「有 因民所利而利之焉,惠而不 我既以 信惠被 處 尊 爲

心勿恒,凶」。《象》曰「偏辭」者,此有求而彼不應,是「立心无恒」者也。无恒之人必凶咎之所集,故曰「立故曰「莫益之,或擊之」也。「勿」猶无也,求益无已,是九處「益」之極,益之過甚者也。求益无厭,怨者非一,上九,「莫益」至「外來也」。正義曰:上上九,「莫益」至「外來也」。正義曰:上

·自外來也」。 ·偏辭」也。 「自外來」者,怨者非一,不待召也,故

日

競片 央。「揚于」至「攸往」。正義

往,夬道乃成,故曰「利有攸往」也。 「不利即戎」,然剛德不長則柔邪不消,故陽爻宜 疾,以此用師必有不利,故曰「告自邑,不利即戎」。 斷,行令於邑可也。 若用剛即戎,尚力取勝,爲物 號令,如此即柔邪者危,故曰「孚號有厲」也。 法,❸先須號令。夬以剛決柔,則是用明信之法而宣其 發揚決斷之事於王者之庭,示公正而无私隱也,故曰 [王庭]是百官所在之處,以君子決小人,故可以顯然 之法。「夬」以剛決柔,施之於人則是君子決小人也。 共決一陰,故名爲「夬」也。 「揚于王庭」者,明行 曰:「夬」,決也。此陰消陽息之卦也。 「揚于王庭」也。「孚號有厲」者,「號」,號令也,行決之 陽長至五,五 以 有所 決斷 制 所

《彖》曰,「夬決」至「乃終也」。正義曰:

[「]弘」,嘉本同,阮本作「張」。

[「]待」,阮本同,嘉本作「得」。

[「]之」,阮本同,嘉本無此字。

即是決而不和,其道窮矣。 號令,即柔邪者危厲,危厲之理 故曰 法。 即 道 乃光」也。「告自邑,不利即戎,所尚乃窮」者,剛克之 柔乘五剛也。 説,健則 (不可常行,若專用威猛,以 戎」者,只謂所 終成也。 以剛德 「揚于王庭」。 而 決 能 和 五 也 」者,此 剛 決,説則能 齊 剛長柔消,夬道乃成也 者 「孚號有厲,其危乃光」者,以明信 長, 剛 尚乃窮故 1,此因 就 決 言所以得顯 柔 柔爲逆,衆所同 二體之義明 和 者, 故曰「決 陰 也。 行決所以惟「告自邑,不利 此 此 而 就 「利 即戎則便爲尚 然 居 分明可見,故曰一 決 爻 揚 五陽之上釋 而 有 而 釋 誅 攸 和 于王庭」者 能 桂 往,剛長乃終 和。 誅 也。 名 而 也。 乾 力取勝, 无忌也、 行 揚 健 ,只謂 「其危 決之 于王 而 而 健 宣 兑 而

於健 兼施 則忌」也 潤下、《彖》則明 居德則忌」者,「忌」,禁也。 潤,此事必然,故是「夬」之象也。 上於天、夬」者、澤性潤 而 **蝇** 能 象》曰 復 説 施禄及 決 「澤上」至「則忌」。 法 而 下, 決 能 斷。 和 其在身居德,復須明其禁令, 下,雖復「澤上於天」,決 故 所以君子 日 「夬」有二義:《象》則澤來 「君子 「君子以施禄及下, 法此 以 施 禄及下,居 「夬」義,威惠 正 義 日

> 《象》云「不勝 也。 謀,❶所以爲咎,故曰 以 所忌,謬於用壯,必无勝理。 徒欲果決壯健、前進其趾,以此而往必不克勝,非夬之 九 致於咎過。 居夬之初 《象》曰「不勝而往,咎」者,經稱「往不勝,爲咎」, 初 九 當當 而 故注云「不勝之理 壯 往、咎」、翻其文者、蓋暴虎馮 須 審其 于 「初九、壯于前趾 籌 至「 策 然後乃往。 往 孰知不勝,果決 咎 ,在往前 也 ,往不勝,爲咎 也 而 正 體 義 而 河,孔子 健 往,所 日 處 下 初

《象》曰 憂 寇 疑惑者也。 號,莫夜有戎,勿恤」者,九二體健居中,能決其 來害己」。❷ 故云「得中道也 九二,「惕號」至「中道也」。 「得中道」者 雖復有人惕懼號呼,語之云「暮夜 能 審己 決 事 度,不 而得中道 惑不憂,故 故不以 正 勿 義 「有戏」爲 曰 恤 必 事 有 而 也。 戎 惕 无

之時,獨應上六,助於小人,是以「凶 于頄,有凶」者,「頄」,面權也,謂上六也。 三、處陰長之時而應上,是 九三,「壯于」至「无 助陽 咎 爲善。 也。 也。 今九三處 正 若「剥」之六 言九三處 義 日 剛 壯 夬

[「]夬」,嘉本、阮本皆作「決」。

❷ 「寇」,嘉本同,阮本作「卒」。

咎」,自釋「君子夬夬」,非經之「无咎」也。 答」,自釋「君子夬夬」,非經之「无咎」者,君子之人居 等,於此時,●能棄其情累,不受於應,在於決斷而无滯,是 於此時,●能棄其情累,不受於應,在於決斷而无滯,是 「夬夬」,決之不疑則「終无咎」矣。然則《象》云「无 以此時,●能棄其情累,不受於應,在於決斷而无滯,是 之時獨助陰,爲「凶」也。「君子夬夬」者,君子之人居

既 信 羊」之言,不肯信服事於五,故曰「聞言不信」也。《象》 爲夬之主,下不敢侵。 信」者,「羊」者,牴很難移之物,❷謂五也。 進,故曰「臀无膚,其行次且」也。「牽羊悔亡,聞言不 且 進必見侵傷,侵傷則居不得安,若「臀无膚」矣。 无膚,其行次且」者,九四據下三陽,位又不正,下剛 曰「聰不明」者,「聰」,聽也,良由聽之不明,故「聞言不 「牽羊悔亡」。 [无「凶」文、《象》稱「聰不明」者,與噬嗑上九辭同 「聞言不信」,不肯牽係於五,則必被侵克致 也。 l行不前進也。「臀」之「无膚」,居既失安,行亦不 九四,「臀无」至「不明也」。 ○注:「同於《噬嗑》「滅耳」之凶。」正義曰:四 然四 亦是剛陽,各亢所 若牽於五則可得「悔亡」,故曰 處,雖復聞「牽 正義曰:「臀 居尊當位 凶。 次 而

以「不明」釋「凶」,知此亦爲「凶」也。

子夏等也。 《象》曰「中未光」者,雖復居中而行,以其親決上六,以 也。 者。」正義曰: ❸《子夏傳》云:「莧陸,木根,草莖,剛下 **莧陸爲二。案:** 以莧陸爲一。 柔上也。」馬融、鄭玄、王肅皆云「莧陸,一名商陸」,皆 尊敵卑,未足以爲光大也。 陸夬夬」也。但以至尊而敵於至賤,雖其克勝,不足貴 夬之主,親決上六,決之至易也,如決莧草然,故 之爲義,以剛決柔,以君子除小人者也。 陸夬夬,中行无咎」者,「莧陸」,草之柔脆者 特以「中行」之故纔 九五,「莧陸」 董遇云:「莧,人莧也,陸,商陸也。」以 注直云「草之柔脆」,似亦以爲一,同於]至「未光也」。 得无咎,故曰「中行无 ○注:「莧陸,草之柔 正義 五處尊位爲 也。 日 日「莧 「夬 「莧

子道長,小人必凶,非號咷所免,故禁其號咷,曰「无上六居夬之極,以小人而居羣陽之上,衆共棄也。君上六,「无號」至「不可長也」。正義曰:

[「]居」,嘉本同,阮本作「若」。

[「]牴」,嘉本同,阮本作「抵」。

[「]曰」下,阮本有「莧陸草之柔脆者」七字。

יבע

危若此,非號咷所能延,故曰「終不可長也」。號,終有凶」也。《象》曰「終不可長」者,「長」,延也,凶

■ 覧上 妨,女壯,勿用取女。正義曰:

甚,勿用取此女」也。於人則是一女而遇五男,淫壯至甚,故戒之曰「此女壯於人則是一女而遇五男,淫壯至甚,故戒之曰「此女壯「姤」,遇也。此卦一柔而遇五剛,故名爲「姤」。施之

義 用取女」。 地 正,天下大行」者,莊氏云「一女而遇五男既不可 遇乃得化生,故曰「天地相遇,品物咸章」也。 **亢所處,不相交遇,則萬品庶物无由彰顯,必須** 孔子更就天地歎美「遇」之爲義不可廢也。 美,就卦而取,遂言「遇」不可用,是「勿用取女」也。 之義也。「勿用取女,不可與長」者,「女」之爲體 貞順方可期之偕老,淫壯若此,不可與之長久,故「勿 上遇五剛 ·姤,遇也,柔遇剛」者,此就爻釋卦名。 匹配則能 卦得「遇」名,本由一 「参》曰、「姤遇」至「矣哉」。 「天地相遇,品物咸章」者,已下廣明 ,所以名「遇」而用,釋卦辭「女壯,勿用取女」 成品物」,由 是言之,若剛遇中正之柔,男 柔與五剛 相遇,故 以初六 天地 正 「剛遇 遇 二氣相 義 取,天 婉娩 若各 一遇 柔而 曰 : 中 故 非

> 也。 但是 乃 「品物咸章」,然後「姤之時義大矣哉」。 義大矣哉」者,上既博美,此又結歎 得 「意謂者也」。 幽 至道該天地,故云「不盡於所見,中有意謂者也」。 就卦以驗名義,只是女遇於男,博尋「遇」之深旨 貞之女,則天下 一女而遇五男不足稱 正義曰: 倫之化 注摠爲稱義發例,故曰「凡言 美,博論「天地相 乃 得 大行 () 欲就 ○注「凡言」至 也。 桂 遇」乃 而 姤之時 取義 致

四方也。者,風行草偃,天之威令,故人君法此,以施教命誥於行天下則无物不遇,故爲「遇」象。「后以施命誥四方」《象》曰,「天下」至「四方」。正義曰:風

若不牽於一 謂 羸 吉矣,故曰「繫於金柅,貞吉」也。 於金柅,貞吉」者,「金」者堅剛之物,「柅」者制動之主, 而 往,見凶」。 謂 牝豕也。 豕之務躁而蹢躅然也,故曰「羸豕孚蹢躅」。 承五剛,是不繫金柅 九四也。 初六,「繫于」至「道牽也」。 而 「羸豕孚蹢躅」者,初六處遇之初,以一柔 羣豕之中, 豭强 初六陰質,若繋於正應以從於四,則 而有所行往,則惟 淫 躁 牝 **豕特甚** ,有所往者 而牝弱 馬, 区 故取 也。 是見矣,故曰「有攸 「有攸往,見凶 也 以 」, 故謂 不繫而 爲 正義 喻 往 **豕爲「羸** 曰 : 「羸豕 則 貞 「繋 如

主」,蓋與馬同。下,所以止輪,令不動者也。」王法云「柅者,●制動之徒皆爲織績之器,婦人所用。惟馬云:「柅者,在車之徒,制動之主。」正義曰:柅之爲物,衆説不同。王肅之「柔道牽」者,陰柔之道必須有所牽繫也。○注:「柅

「義不及賓」者,言有他人之物,於義不可及賓也。《象》曰己之厨,非爲犯奪,故得「无咎」也。「不利賓」也。《象》曰己之厨,非爲犯奪,故得「无咎」也。「不利賓」者,夫擅正之陰處「遇」之始,不能逆於所近,故捨九四之正應,正之陰處「遇」之始,不能逆於所近,故稱「魚」也。以不有魚,无咎」者,初六以陰而處下,故稱「魚」也。以不有魚,无咎」者,初六以陰而處下,故稱「魚」也。以不有魚,无聲」者,言有他人之物,於義不可及賓也。

九三,「臀无」至「未牽也」。正義曰: 陽, 災非己招, 故无大咎, 故曰「厲, 无大咎」。《象》曰虚, 同於夬卦九四之失據, 故曰「臀无膚, 其行次且」處, 同於夬卦九四之失據, 故曰「臀无膚, 其行次且」處, 同於夬卦九四之失據, 故曰「臀无膚, 其行次且」。然履得其位, 非爲妄處, 特以不遇其時故致此危處, 同於夬卦九四之失據, 故曰「臀无膚, 其行次且」。 工義曰: 陽

无魚」者,二擅其應,故曰「庖无魚」也,庖之无魚則是九四,「包无」至「遠民也」。 正義曰:「庖

二所據,故曰「遠民」也。而作,是以「凶」也。《象》曰「遠民」者,陰爲陽之民,爲无民之義也。「起凶」者,「起」,動也,无民而動,失應

曰 : 傳 可 命」者,雖命未流行,而居尊當位,志不舍命,故曰「不 中正則无美可含,故舉爻位而言「中正」也。 者,「中正」故有美,无應故「含章」而不發。 曰「有隕自天」,蓋言惟天能隕之耳。 復當位,命未流行,而能不改其操,❸无能傾隕之者,故 未流行,无物發起其美,故曰「含章」。然體剛居中,雖 曰「以杞匏瓜」也。「含章,有隕自天」者,不遇其應,命 不食。九五處得尊位而不遇其應,是 「以杞匏瓜」者,杞之爲物,生於肥地,匏瓜 傾隕 先儒説「杞」亦有不同。 九五,「以杞」至「舍命 也。 「杞梓皮革自楚往。」則爲「杞梓」之「杞」。《子 ○注:「杞之爲物,生於肥地者也。」正義 馬云:「杞,大木也。」《左 也」。 得 《象》曰「中正 地 而 爲物,繫 若非九五 IE. 「志不舍 不食,故 義 i E 而

^{● 「}者」,嘉本同,阮本無此字。

改。
● 「九五」至「命也」,原作「九五至以杞舍命也」,據文例

[「]能不」,嘉本作「己不」,阮本作「不能」。

王氏云「生於肥地」,蓋以「杞」爲今之「枸杞」也。性柔刃,宜屈撓,❶似匏瓜。」又爲「杞柳」之「杞」。 案:夏傳》曰:「作杞匏瓜。」《薛虞記》云:「杞,杞柳也。 杞

上窮,所以遇角而吝也。《象》曰「上窮吝」者,處於與无遇等,故獨恨而鄙吝也。然不與物争,其道不害,遇角而已,故曰「姤其角」也。「吝无咎」者,角非所安,其角」者,「角」者最處體上,上九進之於極,无所復遇,其角」者,「姤其」至「窮吝也」。正義曰:「姤上,「姤其」至「窮吝也」。正義曰:「姤

得常通而利正,故曰「利見大人,亨,利貞」也。 者,聚而无主,不散則亂。 之「有廟」矣,故曰「王假有廟」。「利見大人,亨,利貞」 復享祀,與无廟同。 隔不通,无由得聚,聚之爲事其道必通,故云「萃,亨」。 物,使物歸而聚已,故名爲「萃」也。「亨」者,通 |王假有廟」者,「假」,至也,天下崩離則民怨神怒,雖 ,吉」者,大人爲主,❸聚道乃全,以此而用大牲 「萃」,卦名也,又萃聚也,聚集之義也。 王至大聚之時孝德乃治,❷始可謂 惟有大德之人能弘正道,乃 能招 也。 「用大 神明 民 擁 聚

祐,何往不利,故曰「利有攸往」也。降福,故曰「用大牲,吉」也。「利有攸往」者,人聚神

命可以享於神明,无往不利,所以得「用大牲,吉」。 中,今「順以説」而以剛爲主,是「順天命」也。 「用大牲,吉,利有攸往,順天命」者,天之爲德 能以正道通而化之,然後聚道得全,故曰「聚以 孝享」也。「利見大人,亨,聚以正也」者,釋「聚」所以 説,剛中而應,故聚」也。 也,應不失中則非偏亢也,如此方能聚物,故曰 著,何由得聚? 説則邪佞之道興,全用剛陽而違於中應,則强 者,此就二體及九五之爻釋所以能「聚」也。 「利見大人」乃得通而利正者,良由大人有中正之德 「亨」,獻也,聚道既全,可以至於「有廟」,設祭祀而「致 「利有攸往」者,只爲「順天命」也。 「萃,聚」者,訓「萃」名也。「順以説,剛中而 《彖》曰,「萃聚」至「可見矣」。 今「順以 「王假有廟,致孝享也」者 説, 而剛 「觀其所聚 爲主, 則 應,故 若全用 正 剛 ,而天地 動 正也」。 非 亢之德 義 二順以 順天 邪 不違 日 聚 佞 順

^{● 「}撓」,嘉本同,阮本作「橈」。

[「]治」,嘉本同,阮本作「昭」。

^{· 「}主」、嘉本、阮本皆作「王」。

以 吉无咎」者,萃之爲體,貴相從 陰 居陰, 復在坤體 志於静 退 ,就, 則 聚 是守中未變,不欲 道乃成。 今六二 引

周

易正義卷第八

神也,⑥故曰「孚乃利用禴」。《象》曰「中 其所以須「引」乃「吉」,良由居中未變。 志須牽引,然居中得正,忠信而行,故可以 而 相 禴」,殷春祭之名也,四時之祭最 无 就 者 咎」也,故 也。 乖 衆 日 違 「引吉 時 則 无咎」。 致 危 害 L,故須 薄者也。 「孚乃 未變也」者,釋 牽 利 省薄薦於鬼 引乃得「吉 雖乖於衆 用

澤

凡

故

應,故有「小吝」也。《象》曰 萃於不正,不若之於同志,故可 上六是陰,己又是陰,以二陰相合,猶不若一陰 獨立,處極而憂危,思援而求朋,巽以待物者也 嗟如,无攸利」也。 聚不正,患所生也。干人之應害所起也,故曰 萃之時,履非其位以比於四,四亦失位。 柔巽以求其朋,故三可以往而无咎也。 六三,「萃如」至「上巽也」。 「往无咎,小吝」者,上六亦 「往无咎,上巽也」者 「往」而「无咎」。 不 正 正 義 相 无應 一萃如 曰: 陽之 但以 與其 而 居 相

155

四

0

若

體

正」,嘉本同,阮本作「中」。

志」,嘉本同 阮本作「意」。

謂」,嘉本同,阮本作「爲」。 於」,嘉本同,阮本作「爲」。

就」,嘉本同,阮本作「從」。

薦」,嘉本同 阮本作「祭」。

其所據,失其所處。 吉,无咎」者,以陽處陰,明履非其位,又下據三 吉,无咎」。《象》曰「位不當」者,謂以陽居陰也 若以萃之時立夫大功,獲其大吉,乃得无咎,故曰「大 九 四 ,「大吉」至「不當 處聚之時,不 也 Ē ٠ ٦ 而 據 正 是 義曰: 其 凶 一大 也。

得盛位,故曰「萃有位」也。 守而已,故曰「无咎,匪孚」。 有位,无咎,匪孚,元永貞,悔亡」者,九五處聚之時,最 未光大也。 光也」者,雖有盛位 IE. 匪 ,則其悔可消,故曰「元永貞,悔亡」。《象》曰 「孚」者,良由四專而據,已德化不行,信不孚物, 九五,「萃有」至「未光也」。 ,信德未行,❶久乃悔亡。 既得盛位 若能脩夫大德,久行 ,所以「无咎」。 正義曰: 今時志意 「志未 一萃 其 自

者,未敢安居其上所乘也。 上八、「齎咨」至「安上也」。正義曰:「齎字」者,居萃之時,最處上極,五非所乘,內又无應,處 些數也。若能知有危亡,懼害之深,憂危之甚,至於 是數也。若能知有危亡,懼害之深,憂危之甚,至於 是數也。若能知有危亡,懼害之深,憂危之甚,至於 是。自目出曰「涕」,自鼻出曰「洟」。《象》曰「未安上」 之。自目出曰「涕」,自鼻出曰「洟」。《象》曰「未安上」 是。自目出曰「涕」,自鼻出曰「洟」。《象》曰「未安上」 是。自目出曰「涕」,自鼻出曰「洟」。《象》曰「未安上」 是。自目出曰「涕」,自鼻出曰「洟」。《象》曰「未安上」 是。自目出曰「涕」,自鼻出曰「洟」。《象》曰「未安上」 是。自言出曰「涕」,自鼻出曰「洟」。《象》曰「未安上」 是。自言出曰「涕」,自鼻出曰「洟」。《象》曰「未安上」 是。自言出曰「涕」,自鼻出曰「浃」。《象》曰「未安上」 是。自言出曰「涕」,自鼻出曰「浃」。《象》曰「未安上」

> 者,「升」者,登 升而得大通,❷故曰「升元亨」也。「用見大人, 義 見大人,勿恤」。「南征吉」者,非 免於憂,故用見大德之人,然後乃得无憂恤 陽之方,故云「南征吉」也 宜適明陽之地。若以陰之陰,彌足其闇也。 曰:「升元亨」者,「升」,卦名也,「升」者,登上之義 坤 巽 上 下 也。陽爻不當尊位,无剛嚴之正 「元亨'」 至「南 直 須見大德之人,復 征 吉」。 「南」是 ,故曰「用 勿恤 明 未 正

而應,是以大亨」者,此就二體及九二之爻釋「元亨」之 得時則不能升耳,故曰「柔以 以釋名「升」之意。六五以陰柔之質超升貴位 德 不憂否塞,必致慶善, 且 柔以時升」者,「升」之爲義,自下升高,故就 用見大人,勿恤 也。 順,爻又剛中而應於五,有此衆德,故得 純柔則不能自升,剛亢則物所不從,卦 象》曰,「柔以」至「志行也」。 有 慶」者, 故曰 「有慶」也。 以 時升」也。 大通之德,「用見大人」、 「南征吉、志行 「巽而 正 「元亨」。 順 ,❸若不 體 五. 義 剛中 既異 居尊 日

[「]通」,阮本同,嘉本作「道」。「信」,嘉本、阮本作「然」。

❸ 「超」,嘉本同,阮本作「起」。

暑了也。 者,之於闇昧則非其本志,今以柔順而升於大明,其志

善以成大名,故《繫辭》云「善不積不足以成名」,是也。始於毫末,終至合抱,君子象之,以順行其德,積其小「升」象也。「君子以順德,積小以高大」者,地中生木中生木,升」者,地中生木,始於細微,以至高大,故爲

合志俱升,乃得大吉也。 合志俱升,乃得大吉也。 合志俱升,乃得大吉」者,「允」,當也,異为二、三有應於五、六,升之不疑,惟初无應於上,恐不得二、三有應於五、六,升之不疑,惟初无應於上,恐不得二、三有應於五、六,升之不疑,惟初无應於上,恐不得二、三有應於五、六,升之不疑,惟初无應於上,恐不得二、一人方,大吉」者,「允升」至「上合志也」。正義曰:

「升虚邑」者,九三履得其位,升於上六,上六體是陰九三,「升虚」至「无所疑也」。 正義曰:

往必得邑,何所疑乎?柔,不距於己,若升空虚之邑也。《象》曰「无所疑」者:

之情而立功、立事,故曰「順事」也。
言,无咎」者,若能納而不距,順物之情,則得山也」。「吉,无咎」者,若能納而不距,順物之情,則得可納而不可距,事同文王岐山之會,故曰「王用亨於岐用亨於岐山」者,六四處升之際,下體三爻皆來上升,用可於岐山、正義曰:「王八四,八四,「王用」至「順事也」。正義曰:「王

尊而保其「升階」,志大得矣,故曰「大得志也」。升階」也。《象》曰「大得志」者,居中而得其「貞吉」,處故得「貞吉,升階」。保其尊貴而踐阼矣,❷故曰「貞吉,吉,升階」者,六五以柔居尊位,納於九二,不自專權,吉,升階」者,六五以柔居尊位,納於九二,不自專權,一六五,「貞吉」至「得志也」。正義曰:「貞

陵物爲主,則喪亡斯及。若絜己脩身,施於爲政,則以升也,故曰「冥升」。「利于不息之貞」者,若冥升在上,升」者,「冥」猶昧也,❸處升之上進而不已,則是雖冥猶上六,「冥升」至「不富也」。正義曰:「冥上六

[「]得」,嘉本作「得吉」,阮本無「吉」字。

^{) 「}其」,嘉本同,阮本作「是」。

[「]昧」,嘉本同,阮本作「暗」。

曰「消不富」也。者,雖爲政不息,交免危咎,然勞不可久,終致消衰,故不息爲美,故曰「利于不息之貞」。《象》曰「消不富」

之以「有言不信」也。 子遇之則不改其操。君子處困而不失其自通之道,故 正身脩德,若巧言飾辭,❶人所不信 必是履正體大之人,能濟於困,然後得吉而无咎,故 日 「貞,大人吉,无咎」也。 困。 困 「困,亨」也。「貞,大人吉,无咎」者,處困 者,窮厄委頓之名,道窮力竭,不能 「亨」者,卦德也。 「有言不信」者,處困求濟 小人遭 困 則 ,則其道彌窮,故誡 「窮 自 斯 而 濟 濫 能 矣」,君 故 自 在於 名 通 日 爲

以釋 曰: 矣。 被柔 陽卦 「困剛揜」者,此就二體以釋卦名。 君子遇困安其 揜,施之於人,其猶君子爲小人所蔽,以 爲剛,坎在兑下,是剛見揜於柔也。 「亨」德 險以說,困而不失其所亨」者,此又就二體名訓 彖》曰,「困 也。 坎 險 所 而兑説 剛 遇 揜」至「乃 雖 居險困 , 所以 之世,不失暢説之 困 窮 兑陰卦爲柔,坎 而 剛應升進,今 也」。 能 「亨」者 爲 困窮 正 義

> 之義。 更致困窮,故曰「尚口乃窮」也 若正而不大,未能 乎」者,結歎 心,故曰 窮」者,處困求通在於脩德,非用言以免困。 也,故曰「貞大人,吉,以剛中」也。 「貞大人,吉,以 剛則正直所以爲「貞」,中而不偏所以能 險 以 處 説,困 剛中」者, 困 濟困。 能 通 而 非 不 處困 此就二、五之爻釋「貞 小 失其 人之事,惟 能濟,濟乃得吉而无咎 所 亨 「有言不信,尚口乃 也。 君 「其 子 徒尚口 能 惟 だ大」。 大人」 然也 君 説 子

高志,不屈橈而移改也,故曰「致命遂志」也。人守道而死,雖遭困厄之世期於致命喪身,必當遂其故曰「澤无水,困」也。「君子以致命遂志」者,君子之「澤无水,困」者,謂水在澤下則澤上枯槁,萬物皆困,《象》曰,「澤 无 水」至「遂 志」。正義曰:

也。 覿 不獲拯,勢必隱遯者也,故曰「人于幽谷」也 卑困,居不獲安,若臀之困于株木,故曰「臀困于株木. 困于株木」者,初六處困之時,以陰爻最居窮下,沉 者,困之爲道不過 「人于幽谷」者,有應在四 初六,「臀困」至「不明也」。 數歲,困解乃出, 而二隔之,居則困 故曰「三歲不 正 義 「三歲不 曰 : 株,進 臀

❶ 「飾」,嘉本同,阮本作「能」。

也。 覿 幽」者,正是不明之辭。 也。 釋「株」者,机木謂之「株」也 日 幽 不 明」者,《象 所以人不明 辭 惟 釋 自 藏 幺 丽 」字,言 避 木

濟險也。 慶也」。 曰「中有慶」者,言二以中德被物,物之所賴,故曰「有 酒 方者也,故曰「朱紱方來」也。 也,坎,北方之卦,朱紱,南方之物,處困 應則心无私黨。 于酒食」者,九二體剛居陰,處中 征 「征凶无咎」者,盈而又進,傾敗之道,以 困于酒食」也。 食豐盈,異方歸 九二,「困 自 居陰則謙,物所歸 進致凶 「朱紱方來 處困以斯,物莫不至,不勝豐 .于」至「有慶也」。 向, ,无所怨咎,故曰「无咎 祭則受福, 也。 ,利用亨祀」者,「紱」**,** 舉異方者,明物无不至: 處中則 ・无應。 故 日 用謙 「利 不 征必凶,故曰 體 正 ·失其 剛 也。 用享 義 能 一行 則 日 宜,无 健 《象》 祀。 祭服 招 異 能 困 日

武,己又无應,欲上附於四。 蒺蔾之草,有刺而 也,故曰 困于石、據于蒺蔾」者、石之爲物、堅剛 日 六三,「困于石」至「不祥也。」正 困 據 于石 于蒺葜」 也。 不可 也。 踐 下 也。 「人于其宫,不見其 欲比二,二又剛 四 六三以 自納 於初,不受己 陰居陽,志 而 陽,非 不可 妻, 義 人 己 E: 懷 凶 也 剛

> 善也,吉也。不吉,必有凶 《象》曰 者,无應 X 其宜 「乘剛」者,明二爲蒺蔾也。 而 人,難 也,故 得 日 配 「人于其宫,不見其妻,凶」也 偶,譬於入宫不見其 也 「不祥也」者,「祥」, 妻, 處 困 以

配偶。 不當,執謙之故,物所與也。 道,爲物之所與,故曰「有終」。 不敢往,可 應於初而礙於九二,故曰「困于金車」。 德勝,故曰『金車』也」。「徐徐」者,疑懼之辭。 四,來徐徐,困于金車,吝,有終」者,何氏云「九 疑懼 九四,「來徐」至「有 耻可恨,故曰「吝」也。 而行,不敢疾速,故「來徐徐」也。 與 《象》曰「有與」者, 也。 以陽居陰,不 欲棄之, 惜 正 義 有應 九 曰:「九 二以 失 四 位 謙 而 其 有 剛

刑,行其「劓刖」之事。 用 方之物也。 於赤紱」也。 愈叛。兑爲西方之卦,赤紱,南方之物,故曰 Ŧi. 其中 以陽居陽,用其剛壯,物不歸己。 九五,「劓刖」至「受福 正之德招 此言九五剛猛 此卦九二爲以陽居陰,用其謙退 致 於物,不在 既行其威刑,則異方愈乖,遐 ,不能感異 速暴 也。 而「徐徐」 見物不 方之物也。 正義 歸 「劓 能 則 而 日 別 招 用 木 邇 威 九

❶ 「杌木」,嘉本同,阮本作「初不」。

Ŧi.

正 之而 直 應,乃寬緩脩其道德,則得喜説,故云「乃徐有説,以中 徐有説, 也」者,由物不附己,己志未得,故曰「志未得」 反,不執其迷,用 也。 則異方所歸,祭則受福,故曰「利用祭祀,受福也 有 「利用祭祀,受福」者,君能不遂迷志,●用其 説矣,故曰 以中直也」 其 万乃 八祭 祀 者,居中得直,不貪不暴,終 徐 則受福也。 有 説 也。 居 《象》曰「志 得 尊 位, 也。 困 得 未 而 万乃 中 其 得 能

處困求 爲之謀曰: 致此困也。 之辭也。 則謀通,處至困之地,是用謀策之時也。 繞,居不得安,故曰「困於葛藟,於臲卼」也。 「困於臲 六處困之極,極困者也,而乘於剛,下又无應,行則 象》曰「未當也 葛藟」,引蔓纏繞之草。 上六,「困于葛」至「吉行也」。 通, 卼」,「困」因於上,省文也。 謀之所行,有隙則獲,言將何以 可 「吉行」者,知悔而征,行必獲吉也 必須發動其可悔之事,令其有悔可知,然後 以行 」者,處於困 而 獲吉, 「臲卼」,動摇不安之貌。❷ 極而又乘剛,所 故曰「動 凡物窮則 悔,有悔,征 「曰」者,思謀 通至 處 正義曰: 未當, 思變,困 應亦言 困 吉」。 乎? 上 纏

₩ 以上 井。「改邑」至「瓶凶」。正義

井」也。 無改。 喻 瓶之水,何足言凶? 則 與未汲不異,喻今人行常德須善始令終。 鉤羸其瓶而覆之也。 「繘」,綆也。 明「井」誡,言「井」功難成也。 「往來井井」也。「汔至亦未繘井,羸其瓶,凶」者,此下 「來」者皆使絜静,不以 來井井」者,此明性常。「井井」,絜静之貌也,「往」者 嘗言損,終日泉注未嘗言益,故曰「无喪无得」也。 日: 「亦」者,不必之辭,言不必有。 謂之爲「井」。 井」焉。 井」體有常,邑雖遷移而「井體」无改,故云「改邑不改 必 人之德行不恒,不能慎終如 致凶咎,故曰「汔至亦未繘井,羸其瓶,凶 井」者,物象之名也。 養物不窮,莫過乎井,故以脩德之卦取 「无喪无得」者,此明井用有常德,終日引 「改邑不改井」者,以下明「井」有常德,此明 雖汲水以至井上,然綆出猶未離井口,而 此卦明君子 棄其方成之功,雖有出井之勞 以 人有往 喻人之脩德不成。 脩德養民,有常 古者穿地取 始,故就人言「凶」也 如此不克終者,計覆 來改其洗濯之性,故 「汔」,幾也,幾,近也 水, 若有初 不 以 又云但 譬,名之 變 瓶 引 終始 无 汲 一往 汲 終 E 取 言 而 未

^{● 「}君」,嘉本、阮本作「若」。

^{) 「}貌」,嘉本同,阮本作「辭」。

也。 成而止,所以致凶也。 未及用則井功未成,其猶人德未被物,❶亦是功德未就 故不具舉經文也。「汔至亦未繘井,未有功也」者,水 者,「无喪无得,往來井井」,皆由以剛居中,更无他 居中,故能定居其所而不改變也。 剛中也」者,此釋井體有常,由於二、五也。 汲愈生,給養於人,无有窮已也。「改邑不改井,乃以 而又上水,井之象也。「井養而不窮」者,歎美井德,愈 此卦坎爲水在上,巽爲木在下,又巽爲人,以木入於水 日 : 讀爲去聲,故音之也。 「羸其瓶,是以凶也」者,汲水未出而覆,喻脩德未 ·巽乎水而上水,井」者,此就二體釋「井」之名、義 彖》曰 「巽乎」至「是以 ○ 注: 「音舉上之上。」正義曰: 不釋「往來」二德 凶也」。 二、五以 正 義, 剛 義

功成,●則此養而不窮也。

一成,一則此養而不窮,因,對恤民隱,受勸助百姓,使有勸相」者,「勞」謂勞賚,「相」猶助也。井之爲義,汲養上有水」則是上水之象,受所以爲「井」。「君子以勞民上有水」則是上水之象,受所以爲「井」。「君子以勞民人有水」則是上水之象,受所以爲「井」。正義曰:「木

滓穢,即是井之下泥污,不堪食也,故曰「井泥不食」泥不食,舊井无禽」者,初六最處井底,上又无應,沈滯初六,「井泥」至「時舍也」。正義曰:「井

即是有恒。既居德地,即是用德也。 恒 地」,故曰「居德之地」也。 其最在井下,故爲井泥也。「時舍也」者,人既非 況人乎? 物,居德之地。」正義曰: 禽又不向,即是一時共棄舍也。 也 「井者,不變之物」。「居德」者,《繫辭》又云「井,德之 德至賤,故物无取也。 井泥 而不可食,即是久井不見渫治, 故曰「舊井无禽」也。 禽之與人,皆共棄舍也, 繇辭稱「改邑不改井」,故曰 注言此者,明井既有不變, 《象》曰 ○注:「井者,不變之 今居窮下,即是 「下也」者,以 禽所不嚮,而 食,6

井之道,有似甕敝漏水,水漏下流,故曰「甕敝漏」也。「井中蝦螂,呼爲鮒魚也。」「甕敝漏」者,井而下注,失谷,故曰「井谷射鮒」也。「鮒」謂初也。《子夏傳》云:下比初,施之於事,正似谷中之水,下注轍鮒,❻井而似谷射鮒」者,井之爲德,以下汲上。九二上无其應,反公別,有似甕敝漏水,水漏下流,故曰。《子夏傳》云:「井中蝦螂,呼為別別,有似甕敝漏水,水漏下流,故曰「甕敝漏」也。

[「]未」,嘉本同,阮本作「事」。

[「]之」,阮本同,嘉本作「也」。

[「]隱」,阮本同,嘉本作「德」。

功成」,嘉本同,阮本作「成功」。

[「]人」,嘉本同,阮本作「以」。

[「]轍」,原作「徹」,據嘉本改。

則不與上交,物莫之與,故曰 《象》曰 與 也 」者,井 既 處下,宜應汲上,今反養 「无與也 下

行能。 我心 可食。 下注而不可汲也,有應於上是可汲也。 渫不食」也。 有應於上,非「射鮒」之象。 渫不食」者,「渫」,治去穢污之名也,井被渫治 並受其福 人可用。 食,猶人脩己全絜而不見用,使我心中惻愴,故曰「爲 體,未有成功。 惻 九三處下卦之上,異初六「井泥」之時,得 賢主既嘉其行,又欽其用,故曰「可用汲,王明 九三,「井渫」至「受福也」。 也。「可用汲,王明,並受其福」者,不同 若不遇明王則滯其 也。 「爲我心惻」者,「爲」猶使也,井渫而 功既未成,并雖渫治,未食也,故曰「井 但井以上出爲用,猶 才用,若遭遇賢主則申其 井之可 正 義 曰 : 則 汲,猶 不見 九二 清 位 在 「井 而

而

无咎」也。 以脩井崩壞。 謂之爲甃。」六四得位而无應,自守而已,不能給上,可 案:《子夏傳》云:「「甃」亦治也,以塼壘井,脩井之壞 人也。 六四,「井甃」至「脩 《象》曰「脩井」者,但可脩井之壞,未可上給 施之於人,可以脩德補過,故曰「井甃 井也」。 正 義 티 :

九 五 「井洌」至 「 中 正 也。 正義曰: 一井

> 非居 也。 而體 乃用,故曰「井洌寒泉,食」也。《象》曰「以中正 後乃食。 爲卦之主,擇人而 洌 温 寒泉,食」者,餘 ,故言「寒泉」以表絜也。 中得正,則 剛直、既體 必言「寒泉」者,清而冷者,水之本性,遇物然後 以言剛正之主不納非賢,必 剛 任用非賢,不能要待寒泉,然後乃 用 爻不當貴位 直則不食污穢,必 之。 「洌」,絜也。 一,但 脩 須 德 須行絜才 并 九 以 絜 五居 待 用。 而 高 中 寒 而 泉 得 九 食 後 五

收也。 元吉」也。 爲物所歸信,能致其大功而獲元吉,故曰「勿幕有孚, 成,若能不擅其美,不專其利,不自掩覆,與衆共之則 「井收」也。「勿幕有孚,元吉」者,「幕」,覆也,井功已 收」式胄反,凡物可收成者則謂之「收」,●如五穀之有 元吉」者,只爲居井之上,井功大成者也 上六處井之極,水已出井,井功大成者也,故 上六,「井收」至「大成也」。 《象》曰「元吉在上,大成」者,上六所以能 正 義 \equiv

兑 離 上 下 革。 已 日」至「悔 正 義

凡 物可」,嘉本作「物」。

也。 革之爲義,變動 之,然後乃得大通而 孚,「巳日乃孚」也。 樂成,難 日 通利貞,則革道當矣。 元亨利貞,悔亡」。 「巳日乃孚」者,夫民情可與 革」者,改變之名也。 與慮始。 者 故革命之初人未信服,所以即 也。 「元亨利貞,悔亡」者,爲革 利 正也。 爲 革 革 若不 此卦 而 悔吝之所生,生乎變動 當乃得亡其悔吝,故 當則悔吝交及,如能 八習常, 明改制革 難 與 命,故名「革 適 變, 前 民信 日 可 曰 大 不 與

革 革 初未孚, 巳日乃信也。 以 則本性改矣。 處。 者,此就二體釋卦名也。 雖復同居,其 二女同居」者,此 息」,生也。 卦,此 前 爲「革」。 命 若其共處,必相侵剋,既相侵剋,其變乃生,變生 「革、水火相息,二女同居,其志不 而 爲 彖》曰,「革水火」至「大矣 雖形同 民所 釋四 「巳日乃孚,革而 志終不相 火本乾燥,澤本潤濕,燥濕殊性,不可共 水熱而 信 德 而 也。 也。 志革 就 人事明「革」也。中、少二女而 「大亨以 成湯,火滅 能用文明之德以説於人,❶ 「文明以説」者,此舉二體,上釋 得。 也。 水火相息,先就二象明「革」。 志不相得則變必生矣,所 信」者,釋 Œ 男一女乃相感應,二女 者 而氣冷,是謂 民 「革」之爲義,革 相 既説文明之德 哉」。 得,曰「革」」 革 所以 · 也。 正 成 義

> 智, 訖 以明「人革」也。 禹 王 命,順乎天而應乎人」者,次明「人革」 命,改其惡俗,故曰「湯武革命,順乎天而應乎人」。 凶 理,其悔乃亡消 爲 而從之,所以 革」義,此先明「天地革」者,天地之道,陰陽升降, 摠結歎其大,故曰「大矣哉」也 禪讓猶或因循,湯、武干戈極其損 (涼寒迭相變革,然後四時之序皆有成 者相承、改正易服皆有變革,而 狂无度,天既震怒,人亦叛亡。● 「革」,若合於 上順天命,下應人心,放桀鳴條,誅紂牧野,革其 大通 也。 「革之時大矣哉」者,備論革道之廣 大 而 通 「天地 利 而 正 利 也。 正 革 9 而 革而 四 可 獨舉 時 謂 殷湯、 益,故取相變甚者 也。 當,其悔乃 成」者,以下 「當」矣。 湯、武者、蓋舜 也。 周武聰明 夏 「湯 桀、 革 (亡)者 般 廣 武 而 計 温 Ŧ. 睿 紂 革 明 當

中 革 有 象也。 火,革」者,火 象》曰,「澤中」至「明 「君子以治歷明 在澤中,二性 一時 一者,天 相 時」。 違 必 時 相 正 變改故須 改變, 義 E : 故 歷 澤 爲

[「]用」,嘉本同,阮本作「思」。

[「]正」,嘉本同,阮本作「王」。

[「]次」,嘉本同,阮本作「以」。

[「]亡」,嘉本同,阮本作「主」。

了 L,「鹭 月」以「1 ろ J 1。 E 戛 n數,所以君子觀兹革象,脩治歷數以明天時也。

爲也」。 不義曰: 初九,「鞏用」至「有爲也」。正義曰: 初九,「鞏用,中也,牛革,牛皮也。「革」之爲義,「鞏」,固也,「黄」,中也,牛革,牛皮也。「革」之爲義,「鞏」,固也,「黄」,中也,牛革,牛皮也。「革」之爲義,「鞏」,固也,「黄」,中也,牛革,牛皮也。「革」之爲義,「鞏」,固也,「黄」,中也,牛革,牛皮也。「革」之爲義,

納,故行有嘉慶也。 納,故行有嘉慶也。 納,故行有嘉慶也。 (象》曰「行有嘉」者,往應見日乃革之」者,陰道柔弱,每事順從,不能自革。革,已日乃革之」者,陰道柔弱,每事順從,不能自革。革,已日乃革之」者,陰道柔弱,每事順從,不能自革。革,已日乃革之」者,陰道柔弱,每事順從,不能自革。革,已十二、二,「巳日」至「有嘉也」。正義曰:「巳

之危也,故曰「征凶,貞厲」。所以征凶致危者,正以水極,火性炎上,處「革」之時欲征之使革,征之非道則正凶,貞厲。革言三就,有孚」者,九三陽爻剛壯,又居火也,九三,「征凶」至「何之矣」。正義曰:「征

伐矣。 伐矣。 (伐矣。

有似「虎變」,其文彪炳。則是湯、武革命,順天應人,❷革之主,損益前王,創制立法,有文章之美,焕然可觀,人虎變,未占有孚」者,九五居中處尊,以大人之德爲九五,「大人」至「文炳也」。正義曰:「大

❶「革」,嘉本同,阮本作「不」。

^{) 「}順天」,嘉本同,阮本作「廣大」。

《象》曰「其文炳」者,義取文章炳著也。不勞占決,信德自著,故曰「大人虎變,未占有孚」也。

順而從君也。 上六、「君子」至「從君也」。正義曰:「君子豹變,小人革面」者,上六居革之終,變道已成。君 對守正,更有所征則凶,居而守正則吉,故曰「征凶,居 對守正,更有所征則凶,居而守正則吉,故曰「征凶,居 對守正,更有所征則凶,居而守正則吉,故曰「征凶,居 對守正,更有所征則凶,居而守正則吉,故曰「征凶,居 一相映蔚也。「順以從君」者,明其不能潤色立制,然亦 是言」也。《象》曰「其文蔚」者,明其不能潤色立制,然亦 其言」也。《象》曰「其文蔚」者,明其不能潤色立制,然亦 其言」也。《象》曰「其文蔚」者,明其不能潤色立制,但 而相映蔚也。「順以從君」者,明其不能潤色立制,但 而相映蔚也。「順以從君」者,明其不能潤色立制,但

周易正義卷第八

「細」,嘉本同,阮本作「炳」。

五五五

周 易正義卷第九

國 子祭酒 上 護軍曲阜 縣

開 國 子臣 孔 穎 達奉 勑

正

義

三 三 :

鼎

象,故名爲「鼎」焉。 法象,惟新其制,有「鼎」之義,「以 取新」,明其亨飪有成新之用。 且有二義: 謂之爲「鼎」。 之名也。 而 鼎,象也」,明其有法象也。 後乃「亨」,故曰「鼎,元吉,亨」。 離 巽上下 自火化之後,鑄金而爲此器,以供亨飪之用 有亨飪之用,二有物象之法,故《彖》曰 亨飪成新,能 鼎,元吉,亨。 變故成新必須當理,故先「元吉」 《雜卦》曰「革去故」而「鼎 成新 此卦明聖人革命,示物 法。 木巽火」,有「鼎」之 然則鼎之爲器

象也 名也 亨飪也」者,此明上下二象有亨飪之用,此就「用 者,明「鼎」有亨飪成新之法象也。 彖》曰,「鼎象」至「元亨」。 聖人亨以享上帝,而大亨以養聖賢」者 正義曰:「鼎 以以 木 7,此明 巽火 」釋卦

> 剛 矣。「柔進而上行,得中而應乎剛,是以元亨」者,此 其事而助於己,明目達聰,不勞己之聰明,則不爲 鼎用之益。 享帝尚質,特牲而已,故直言「亨」。 六五釋「元吉,亨」。 飫,故「亨」上加「大」字也。 大則輕小可知。❶ 鼎用之美。 ,所通者大,故能制法成新而獲「大亨」也。 若祭祀則天神爲大,賓客則聖賢爲重,故 言聖人既能謙巽大養聖賢,聖賢獲 亨 飪 所須,不出二種, 享帝直言「亨」,養人則言「大亨」者 以柔進上行,體已獲 「巽而耳目聰明」者, 聖賢既多,養須 供 祭祀、二當 (通,得 則 此 其 而 應 就 成 憂 明 飽 重 賓

難犯,布嚴凝之命,故君子象此「以正位凝命」也。 即須制法。制法之美,莫若上下有序,正尊卑之位 「君子以正位凝命」者,「凝」者,嚴整之貌也。 有火」即是「以木巽火」,有亨飪之象,所以爲「鼎」也 《象》曰,「木上」至「凝命」。正義曰:「木上 鼎既 成新 而

實 顛趾」,「趾」,足也,凡陽爲實而陰爲虚,鼎之爲物,下 而 而上虚。 鼎 足倒矣,故曰 初六,「鼎顛」至「從貴也」。 初六居鼎之始,以陰處下 「鼎顛趾」也。 「利出 則 否」者,「否」者 是下虚,下虚 正義 E. 「鼎

⁰ 舉其 重」,嘉本同,阮本作「質其牲」。

寫出 妾猶不得爲室主,妾爲室主,亦猶鼎之顛趾 主,亦從子貴也 出否、未爲悖逆也。「以從貴」者、舊、穢也、新、貴也 妾若有賢子,則母以子貴,以之繼室則得「无咎」,故曰 咎」者、「妾」者側媵、非正室也。 不善之物,鼎之倒趾 得妾以其子,无咎」也。 (穢納新,所以 否穢之物也 「從貴」也。然則去妾之賤名而爲室 故 故 日 , 失其所 利 《象》曰 出 否」也。 利 鼎 施之於人,正室雖亡 「未悖也」者,倒趾以 覆而不失其利 「得妾以其子,无 而 有咎過 在 於

則溢 者也 也,自此已往,所宜慎之也。 疾,不我能即,吉」也。 剛之疾不能就我,則我不溢而全其吉也,故曰「我仇 是匹也,「即」,就也。 有實,我仇有疾,不我能即,吉」者,「實」謂 之疾,不能加我,則我「終无尤」也。 ,故曰「鼎 而傷其實矣。 九二,「鼎 有實」也。 六五,我之仇匹,欲來應我,困 有」至「无尤也」。 九二以陽之質居鼎之中,「有實 《象》曰「慎所之」者,「之」,往 有實之物 「終无尤也」者,五既有乘 不 可 復加 Œ 陽 義 也, 也,「仇 日 於乘 加之 有

也。鼎耳之用,亦宜空以待鉉。今九三處下體之上,耳革,其行塞」者,鼎之爲義,下實上虚,是空以待物者九三,「鼎耳」至「其義也」。正義曰:「鼎

納。 當此 中 亢,務在和通,方欲爲此和 和,不偏亢者也,雖體陽爻,而統屬陰卦。 曰「雉膏不食」。 膏不食」者,非直體實不受,●又上九不應於己,亦无所 受鉉之處,今則塞矣,故曰「鼎耳革,其行 也 方雨虧悔,終吉」也。 納受之義也。 雖有其器而 既實而不虚 鼎之耳,宜居空之地,而 「方雨虧 无所用,雖有雉膏而不能見食也,故 則 變革 《象》曰「失其義也」者,失其 悔,終 鼎 通,則 耳之常,義 以 陽 吉」者,「雨 悔 居陽,是以 虧 而終獲吉,故 也。 若不全 塞」也。 一者陰 常 實處 所 任 陽 納 實 曰 剛 交 者

下 餗」, 既折,則「覆公餗」也。 重 初處下體之下,九四處上體之下,上有 初以「出否」,至四所盛,故當馨絜 折足,覆公餗」者,「餗」,糁也,八珍之膳 象》曰「信如何也」者,言不能治之於未亂,既敗之後 有所施,既承且 如 (此必受其至辱,災及其身也,故曰 九四,「鼎折」 則 渥 霑 也。 施,非己所堪,故曰 施之於人,知小 至「如 「渥」,霑濡之貌 何 也。 矣,故 而 「鼎折足」。 謀 所承而又應初 「其形渥,凶」。 也。 以 大,力薄而任 正 ,鼎之實 義 餗」言之。 既 曰 : 「覆公 鼎 「鼎 也 足

❶ 「直」,嘉本同,阮本作「有」。

Ŧī.

何也? 言信有此不可如何之事也。乃責之云「不量其力,果致凶災」。災既及矣,信如之

曰「中爲實也」者,言六五以中爲實,所受不妄也。柔納剛,故曰「金鉉」,所納剛正,故曰「利貞」也。《象》貫鼎而舉之也。五爲中位,故曰「黄耳」,應在九二,以黄耳金鉉,利貞」者,「黄」,中也,「金」,剛也,「鉉」所以

雖復在上,不爲《乾》之「亢龍」,故曰「剛柔節也」。 得「大吉」而「无不利」。《象》曰「剛柔節」者,以剛履柔, 鼎道之成,體剛處柔,則是用玉鉉以自舉者也,故曰「鼎 小故曰「鼎 上九,「鼎玉」至「剛柔節也。 上九居鼎之終, 上九,「鼎玉」至「剛柔節也」。 正義曰:

■ 震上 震。「亨」至「匕鬯」。正義曰:

來虩 笑語之聲也。 齊,由懼而獲通,所以震有亨德,故曰 震」爲名。 震亨」者,「震」,動也,此象雷之卦,天之威 虩,笑言啞啞」者,「虩 震既 震之爲用,天之威怒,所以肅整 威 動,莫不驚懼,驚 虩」,恐懼之貌 懼 「震亨」也。 以 威則 也,「啞啞」, 動, 怠慢,故 物 皆 故 「震 整 以

> 象焉。 幂, 祀之禮,先烹牢於鑊,既納諸鼎而 云「有梂棘匕」是也。 但不兩歧耳。 績云"「匕者棘匕,橈鼎之器。」先儒皆云" 匕形似畢 以「百里」言之也。 發聲,聞乎百里」,故古帝王制國,公侯地方百里,故以 ○注 彝器粢盛,守而不失也,故曰「震驚百里,不喪匕鬯」。 「匕」,所以載鼎實,「鬯」,香酒也,奉宗廟之盛者也 百里爲極。文王作繇在殷時,明長子威震於一國,故 震卦施之於人又爲長子,長子則正體於上,將所傳重 出則撫軍,守則監國,威震驚於百里,可以奉承宗廟 盛,故曰「笑言啞啞」也。 虩」也。 教行於天下也。 迅 鬯 雷 而以 」者, 「威震」至「廟之盛也」。 風 竊謂:天之震雷不應止聞百里,蓋以古之啓土 烈,君子爲之變容。 物既恐懼,不敢爲非,保安其福,遂至笑語之 鄭玄之義則爲秬黍之酒 匕出之,升于俎 以棘木爲之,長三尺,刊柄與末。《詩 故震之來也,莫不恐懼,故曰 「匕,所以載鼎實,鬯,香酒」者,陸 用「棘」者,取其 上,故 「震驚百里,不喪匕鬯」者 施之於人事 正 日一上 義曰: 加幂焉。 其 所以 (氣調 (赤心之義。❶ 先儒皆云「雷之 則 載 暢, 鼎 將薦乃 是 一震 故謂之 實」也 威 來 嚴 虩 之

● 「其」,嘉本無此字。

鬯而已,其餘不足觀也。」今特言「匕鬯」者,鄭玄云:「人君於祭祀之禮,尚牲薦鬯,諸侯薰,大夫蘭。」以例而言之,則「鬯」是草,明矣。「鬯」、《詩傳》則爲「鬯」是香草。案《王度記》云:「天子

君出 啞 之禮事也。 社稷,以爲祭主」者,釋 驚於百里之遠,則惰者恐懼於近也。 懼,不敢失則,必時然後言,樂然後笑,故 恐懼自脩,未敢寬逸,致福之後方有「笑言」,以 懼自脩,所以致福也。 明由懼得通,故曰「震亨」,更无他義。 震 震,亨」者,卦之名德,但舉經而不釋名德 ,後有則」也。 來虩虩,恐致福 「巡狩等事也。 彖》曰,「震亨」至「祭主也」。 ○注:「己出。」正義曰:「己出」謂君 震驚百里,驚遠 君出則長子留守宗廟社 也」者,威震之來,初雖 「笑言啞啞,後有則也」者 「不喪匕鬯」之義也。 而懼邇」者,言威震 出 或本无此二字。 可 日「笑言啞 恐 所 稷,攝祭 以守宗廟 正 出 懼 由 曾 義 也 能 者,正 , 因前 經 日 主 謂 戒 因

子恒 彌 震之卦 洊 自 」者重也,因仍 脩 自 ,故曰 :身,省察己過,故曰「君子以恐懼脩省」也 戰戰兢兢,不敢懈惰,今見天之怒,畏雷之威 象》 Ĕ, 「狩雷、震 也。 洊 雷 雷相 也。 至「 因 「君子以恐懼脩省」者,君 仍 脩 乃爲威震 省」。 也, 正 此 義 是 티: 重

> 致福 汎舉屯時宜其有所封建,❷爻則以貴下賤,則是堪建之 本末俱等,其猶屯卦初 爻則據人威震,所説 辭釋之又與《彖》不異者,蓋卦舉威震之功,●令物恐懼 識,故處震驚之始能以恐懼 九剛陽之德,爲一卦之先,剛 虩虩,後笑言啞啞,吉」。 此震之初九,亦其類也 ,爻論遇震 初九,「震來」至「有 而 懼、 雖殊,其 脩 九,與卦俱稱 省致福 此爻辭 自脩而獲其吉,故曰 則 事 不闇 則 之人,卦則自震言人, 兩句,既 也。 也。 於幾,先則 「利建侯」,然卦 所以爻卦二辭 與卦同、象 正 義 能 曰 「震來 有 則 前 初

屬。 貝 能敬於剛陽,尊其有德,❸而反乘之,是慠尊 而懼 所 震來厲,億喪貝」者,「億」,辭也,「貝」,資貨 誅。 也。 震之爲用,本威 ,恐而致福,即是有德之人。 六二,「震來厲」至「乘剛也」。 震 「躋于九陵,勿逐,七日得」者,「躋」, 來則 有危亡,喪其資貨,故 惰慢者也。 初九以剛 六二以 日 「震 陰賤 來厲,億 處下, 陵貴,爲天 正 升也,犯 之體 糧 義 聞 用 日 喪 震 之 不

「舉」,嘉本同,阮本作「主」。

0

- 「汎」,嘉本同,阮本作「凡」。
- 「德」,嘉本同,阮本作「得」。

得」。 過七 既喪資貨,无糧 逆受戮,无 也 日 《象》曰「乘剛也」者,只爲乘於剛陽,所以犯逆受 應 有 而 司 行,行 而 所 走,雖復超越 獲 矣,故 无所 舍。 日 「躋 陵 威 於 險,必 嚴 九 大行, 陵 困 ",勿逐 物莫 於 窮匱,不 之納 ,七日

告」也。 爲懼 行而 不能自安也。 之逆,故可以懼行而无災眚也,故曰「震蘇 不當位,故震 蘇 无告。」正義曰:驗注,以訓 由震故懼也。 震行无告」者、「蘇蘇」、畏懼不安之貌。 六三,「震蘇」至「不當 《象》曰「位不當」者,其猶竊位者,遇 懼 〇注:「位非所 而 「蘇 自下爻辭,皆以震言懼也。 蘇」然也。 處,故 「震」爲懼,●蓋懼 雖不當位,而 也 蘇蘇。」又 __ 正 蘇蘇,震 義 威嚴 云:「 日 六三 无 之世 行无 不自 乘 懼 岡川 居 震

懼 除恐,使物安己,是道德 時,宜勇其身以安於衆,若其自懷震懼則 遂泥」者,九四 矣,故曰「震遂泥」也。 ,遂沈泥者也。 九 四 處四陰之中,爲衆陰之主。 震遂」至「未光 《象》曰 未能 「未光 然四失位 光 大也 也 者 也 違 中,則 身既 正 遂 不正 義 當 是 滯 曰 : 恐 溺 有 不 罪 懼 而 能 自 之 震 困

往 來 厲」者,六五往則 五、「震往 无應,來 至「无喪也」。 則乘剛 恐 正 而 義 往 E : 來 不 免

> 於咎 則无喪有事,若恐懼往來則致危无功也。 懷懼往來是致危之行。 事,故戒之曰「億无喪,有事」也。 之時 五. 居尊當其有事,❷在 而得尊位 故曰 一震 往來 ,斯乃有事之機 厲 於中位得建 也。 「其事在中,大无喪也」者,六 億无 而懼 《象》曰「危 喪, 大功。 有事」者, 以 往 若守中建大 來, 行 將 夫 也 喪其 處 震

六〇

親。 懼之地,雖復婚媾相結,亦不能 己造,彼動故懼,懼鄰而戒,合於備豫則得无咎,故 中理以自安而未能 專之容。 索索,視矍矍」者,「索索」,心不安之貌,「矍矍」,視 畏鄰戒也 震不于其躬,于其鄰,无咎」也。 有 「征凶」也。 言」也。 「征凶」者,夫處動懼之極而復 上六,「震索」至 上六處震之極,極震者也。 」者,畏鄰之動 《象》曰 「震不于其躬 得,故懼而索索,視而矍 「中未得 ,懼而自戒乃得无咎 ,于其鄰,无咎」者,若恐 也」者,猶言未 戒 无相疑之言,故曰 「婚媾有言」者,居極 也。 征焉 既居震位,欲求 N N 正 其宜也,故 矍,无所安 義 曰 非 \exists 不 震

⁰ 訓 」,嘉 本 同 , 阮校引盧 文昭云 當作

⁰ 其有」,嘉本同 ,阮本作「有其」。

彖》曰,「艮止」至一

「无咎也」。

正

義

 \exists

艮。 其 背 至「无 咎」。 正 義

有時。

凡物之動息,自若有時

運。❻

用止之法不可爲

静不失其時,其道光明」者,將

「艮,止

也」者,訓其名

也。「時

止 釋

時 施

止, 6時

行

則

行,

動

止

有所

光

明,施

常,必須應時行止,然後其道乃得光明也。「艮其止

止其所也」者,此釋施止之所也。

艮其背」也。「易背曰止

,以明背」者,无見之物即是

「艮其止

」者,疊經文

凶咎。 欲是目見之所患。 但止其背,可得「无咎」也。 是治之於未萌,若對面 身,行其庭,不見其人,无咎」也。 其身」,則相背矣。 見,所止无見,何及其身?4 對面而來,則情欲有私於己。 情,❷故施止於无見之所則不隔物欲,得其所 曰:「目」者,能見之物,施止於面 庭,不見其人」。如此乃得无咎,故曰「艮其背,不獲其 施止於面則對面而不相 然静止。 欲,使心不亂」也。「背」者,无見之物也,夫无 名。 成,施止不得其 曰: 艮其背」者, 艮」,止也,静止之義。 「艮其背,不獲其身,行其庭,不見其人,无咎」者 施之於人則是止物之情,防其動欲,故謂之止 止而无見則所止在 夫欲防止之法宜防其未兆,既而 此 所則其功難成,故《老子》曰 明施 今施止 相背者, 止 不 通,强止其情則姦邪 之所也。 此是象 於背則「目无患 相 後,不與面 交通 雖近而不相見,故「行其 ○注:「目无患也。」正 故「不獲其身」。 既止在後則是施止 山之卦,故以「艮」爲 又若能止於未兆,則 則抑割所見 施止 ,則是「否」之道 相 得 對。 所 也。 止 則 並 1E 既 一不 强隔 言有物 其道 興 則 見 也 「不獲 見 而 傷 則 也。 无 有 物 自 可

與」也。

此

卦既

止而不交,爻又峙而不應,與

「止」義相協,故

得其所。♂

故曰「艮其止,止其所」也。「上下敵應,不相與

也」者

也

須

可止之所也,既時止即宜止,時行則宜行,所以施止

艮既訓止,今言「艮其止」,是止其所止

故, 嘉本同,阮本作「其」。

0

面」,嘉本同,阮本作「而」。

既」,嘉本、阮本皆作「既兆」。

下「時」字,嘉本、阮本作「則」。 及」,嘉本同,阮本作「見」。

若」,嘉本、阮本作「各」。

得其所」,嘉本同,阮本作「須是所」。

相當,而爻皆峙敵,不相交與,故曰「上下敵應,不 之義。凡應者,一陰一陽二體不敵,今上下之位雖 此就六爻皆不相應釋艮卦之名,又釋「不獲其身」以

然八純之卦皆六爻不應,何獨於此言之者,謂

取以 咎」也。❷ 咎也」者, 明之也。❶ 此舉 經文以結之,明相與而止之則「有 是以「不獲其身,行其庭,不見其人,无

之時,思慮所及不出其己位也。 以思不出其位」者,止之爲義,各止其所,故君子於此 止,今兩山重疊,止 Щ 艮 《象》曰,「兼山」至「其位」。 一者,兩山 兼重謂之「兼山」也。 義彌大,故曰「兼山,艮」也。 直置一 正義曰: Ш 「君子 已 能 鎮 兼

動,故利在「永貞」也。《象》曰「未失正也」者,行 居止之初,行无所適,止其足而不行乃得无咎,故 艮其趾,无咎」也。 良其趾,无咎」者,「趾」,足也,初處體下故謂之「足」。 ,止則不失其正,釋所以在「永貞」。 初六,「艮其」至「未失正也」。 「利永貞」者,静止之初不可 正義 以躁 則 曰 有 日

動之物而强止之,貪進 故曰「艮其腓,不拯其隨」也。 或屈或伸,躁動之物,腓動則足隨之,故謂足爲 其 拯」,舉也。 良其腓,不拯其隨」者,「腓」,腸也,在足之上。 (心不快」。 六二,「艮其腓」至「退聽也」。 今既施止於腓,腓不得動則足无 此爻明施止不得其所也。 而不得動,則情與質乖也 「其 心 不快」者,腓 《象》曰「未退 正 由舉, 義 , 故 隨 腓 是躁 日 日 體

> 見止之命,所以「其心不快」矣。 聽也」者,「聽」,從也,既不能拯動 又不能 静 退 聽 從 其

所也。 夤。 也。 故曰 義曰:「大器」謂國與身也。 帶之處,母言三當兩象之中,故謂之「限」。 曰: 臣不接則上下離心,列夤則身亡,離 然則君臣共治,大體若身。大體不通則君臣 列其夤,厲薰心」。 「艮其限,列其夤,厲薰心」者,「限」,身之中,人繫 夤既分列,身將喪亡,故憂危之切薰灼其心矣。 既止加其身之中,則上下不通之義也,是分列其 「艮其限」也。「夤」,當中脊之肉也。 九三,「艮其 ○注:「體分兩主,大器喪矣。」正 限」至「危薰 此爻亦明施止不得 心則 心 也。 國 「薰」,燒灼 施止於限 喪,故 不接,君 正 其 日 義

「艮其 體 履得其位, (身,无咎」者,中上稱身。 六四,「艮其身」至「諸躬 止求諸身,不陷於咎,故曰 六四居止之時已入上 也」。 艮其身,无 正 義 日

- 0 0 取」,嘉本同,阮本作「此」。
- 有」,嘉本、阮本作「无」。
- 由」,嘉本同,阮本作「拯」。

8

繋」,嘉本同,阮本作「是」。

全。 謂之「身」。 者何也? 蓋至中則體分而身喪,入上體則不分而身 止其身,不分全體。 所以體分夤列。六四已入上體則非上下不接,故能摠 之際,在於身中,未入上體則是止於下體,不與上交, 身,❶兩體不分乃謂之全,全乃謂之身。 止其躬,不分全體。」正義曰:艮卦摠其兩體以 躬」猶身也,明能静止其身,不爲躁動也。 也。 九三施止於分體故謂之「限」,六四施止於全體故 非中上獨是其身,而中下非身也 諸,之也。《象》 然則身是摠名,而言「中上稱身」 日 止 以九三居兩體 諸 ○注:「自 躬 也 爲一

位雖不正,以居得其中,故不失其正,故「言有序」也。故曰「艮其輔,言有序,悔亡」也。《象》曰「以中正」者,也。以處其中,故口无擇言也。言有倫序,能亡其悔,「艮其輔,言有序,悔亡」者,「輔」,頰車也,能止於輔頰

以獲吉也。

(象》曰「以厚終」者,言上九能以敦厚自終,所吉」也。《象》曰「以厚終」者,言上九能以敦厚自終,所上能用敦厚以自止,不陷非妄,宜其吉也,故曰「敦艮,艮,吉」者,「敦」,厚也,上九居艮之極,極止者也。在艮,吉」者,「敦艮」至「厚終也」。正義曰:「敦上九,「敦艮」至「厚終也」。正義曰:「敦

Ⅲ 異上 漸,女歸吉,利貞。正義曰:「漸

漸,得禮之正,故曰「利貞」也。「利貞」者,女歸有施,吉在女嫁,故曰「女歸吉」也。「利貞」者,女歸有家,故謂嫁曰「歸」也。婦人之嫁,備禮乃動,故漸之所「女歸吉」者,「歸」,嫁也,女人生有外成之義,以夫爲者,不速之名也。凡物有變移,徐而不速謂之「漸」也。

也。 止不爲暴,巽能 「止而巽,動不 等,故特言「剛得中」,以明「得位」之言惟是九五也。❷ 中」者,此卦爻皆得位,上言進得位,嫌是兼二、三、四 五是進而以正,身既得正「可以正邦」也。「其位剛得 進以正,可以正邦也」者,此就九五得位剛中釋「利貞 進之,施於人事是女歸之吉也。「進得位,往有功也 但卦所名「漸」是「之於進」也。「女歸吉也」者,漸 漸之進也」者,釋卦名也。漸是徐動之名,不當進退 進,不有困 言進而得於貴位,是「往而有功」也。 《彖》曰,「漸之」至「不窮也」。正義曰: 窮也 窮也 用 謙 」者,此就二體廣明漸進之美也。 以 斯適 進,物 无違拒,故能 以六二適九 漸而 而

- ❶ 「一」,嘉本同,阮本作「二」。
- 2 「之」,嘉本同,阮本作「言」。

須文德謙下,漸以進之。 者,漸之美也。 故是「漸」義也。 上有木,漸」者, Ĭ 君子求賢德使居位,化風俗使清善,皆 木生山上,因 「君子以居賢德善俗」者,夫止 Щ 上至 若以卒暴威刑,物不從矣。 Щ 善 而 俗 高,非 0 是從下 IE. 義曰: 而 山 高 巽

日: 子之義, 被毁於謗言,故曰「小子厲,有言」。 干,不得安寧也 進,未得禄位,上无應援,體又窮下,若鴻之進於河之 之道自下升高,故取譬「鴻」飛,自下而上也。 无咎」者,始進未得顯位,易致陵辱,則是危於小子,而 「鴻漸于干」者,「鴻」,水鳥也,「干」,水涯 故曰「无咎」也。),故曰 鴻漸 「鴻漸于干」也。「小子厲,有言・ 于干」至「无咎也」。 《象》曰「義无咎」者,備如 小人之言,未傷君 也。 初之始 正 進 義

衎」然。 地, 日得之,故「願莫先焉」。 鴻 衎衎」,樂也。 故曰 也。 漸 于磐,飲食衎衎,吉」者,「磐」,山石之安者也 《象》曰 樂而獲吉,福也,故曰「鴻漸于磐,飲食衎衎 「鴻漸于磐」。 鴻 六二進而 「不素飽 漸 至「不 既得 」者,「素」,故也,故 〇注:「磐,山石之安也。」正 得位,居中 可 素飽 安之地,所以「飲 也。 而 應,得可安之 无禄養,今 正義 食衎 i E

者

雖

之義,不復係水鳥也 蓋 鳥 義 日 ,非是集於山 漸」之爲義,漸 馬季長云: 石陵陸之禽,而爻辭以此言「鴻 漸之於高 0 山 中 右 I磐紆, ,故取山 故 石陵陸以 稱 磐 也。」 鴻 應 漸 是 高 水

者。 育, 티 : 也」者,非 寇」也。《象》曰 忘義,貪進忘舊,凶之道也,故曰「夫征不復,婦 配,妻亦不能保其貞。 羣類而與四合好,即是夫征而不反復也。 應,近而相得。 漸于陸」也。 之頂也、九三居下體之上、是進而得高之象、故曰「鴻 有陰陽之殊,同體艮卦,故謂之「羣醜」也。 凶也。 然和比相順,共相保安,❷物莫能間 「鴻漸于陸,夫征不復,婦孕不育,凶」者,「陸 四以 九三,「鴻漸于陸」至「相 夫而孕,孕 陰乘陽 「利禦寇」者,異體合好,恐有 進而之陸,无應於上,與四相比,四 三本是艮體,與初、二相 離羣醜」者,「醜」,類也,言三 ,嫌其非順 而不 非夫而孕,故「不育」也。 育 失道 然好 合相 故 也。 保 心故曰 得 同一家。 「順 寇難 也。 夫既樂於邪 和 相 「失其道 比 「利用禦 離 保也 相 初、二 間 孕 見利 亦无 棄其 正 之 高 義

⁰ 長, 嘉 本同 阮 本作「良」。

⁰ 共」,嘉本同,阮本作「其」。

故曰 爾雅》云「高平曰陸」,故曰「高之頂」也 相 保」也。 注:「陸,高之頂也。」 正 義 曰

以 无乘剛之咎,故曰「无咎」。《象》曰「順以 與三相得,❶順而相保,故曰「或得其桷」。 榱也。之木而遇堪爲桷之枝,取其易直可安也。 位,故曰「鴻漸于木」也。「或得其桷,无咎」者,「桷」, 六四得其安栖,由「順以巽也」。 雖乘三,體異□ 「鴻漸于木」者,鳥而之木,得其宜也。 六四,「鴻漸于木」至「以巽也」。 而下附,❷三雖被乘,上順而相保,所 巽也」者,言 六四 既與 進 八相得, 六四 而得 正 義

也

成。」正義曰: 勝之,故終得其所願也。 路,終得遂其所懷,故曰「終莫之勝,吉」也。《象》曰 感説而隔礙不交,故曰「婦三歲不孕」也。 「終莫之勝, 在二而隔乎三、四,不得與其應合,是二、五情意,徒相 處於尊高,故曰「鴻漸于陵」。「婦三歲不孕」者,有應 吉」者,然二與五合,各履正而居中,三、四不能久塞其 曰:「鴻漸于陵」者,「陵」,次陸者也,九五進得中 ·得所願也」者,所願在於與二合好,既各履中正,无能 有成」,❹ 九五,「鴻漸于陵」至「所 則三、四不敢塞其路,故 九 五居尊得位,故曰「進以正邦也」。 「三 〇注:「進以正邦,三年有 曰「不過三歲」也。 願 也」。 ·位, ❸ 正 義

> 以「鴻」明「漸」,故用「羽」表「儀」也。《象》曰「不可 處高而能不以位自累,則其羽可用爲物之儀表,可貴 可法也,故曰「其羽可用爲儀,吉」也。 可用爲儀,吉」者,然居无位之地,是不累於位者也。 九最居上極,是進處高絜,故曰「鴻漸于陸」也。 「鴻漸于陸」者,上九與三皆處卦上,故並 者,進處高絜,不累於位,无物可以亂其志也。 上九,二 鴻漸」至「不可亂 也 必言「羽」者,既 稱 正 陸」。上 「其羽 義 日

震 兑 上 下 歸妹,征凶,无攸 利。 正 義 曰

也。 也。 從姊而嫁謂之「歸妹」,⑤故初九爻辭云「歸妹以娣」是 歸妹」,彼據兄嫁妹謂之「歸妹」。 歸妹」者 然《易》論「歸妹」得名不同。《泰》卦六五云「帝乙 上咸卦明二少相感,恒卦明二長相承,今此卦 ,卦名也,婦人謂嫁曰「歸」,「歸妹」猶言嫁 此卦名「歸妹」,以妹

阮本作

[「]三」,嘉本同,阮本作「二」。 □」,嘉本無空格。 「下附」,嘉本同,

得」,嘉本同,阮本作「于」。

歲」,嘉本同,阮本作「年」。

姊」,嘉本作「姉」,阮本作「娣」。

古 退 以此卦當之矣。 征 ·征」謂進有所往也,妹從姊嫁,本非正匹,惟須自守 1者諸侯 承 以 尊 凶、无攸利 事 長,非 以 元 包 妃。 之也。 中取 是匹 九女,嫡夫人及左右媵皆以 若妄進求寵則 敵 不言 一征 明 凶,无攸利」者, 是妹從姊 「歸姪」者,女娣是兄弟之行, 有 嫁,故謂之「歸 並 后 凶咎之敗,故 歸妹 姪 之戒也。 娣從,故 妹 焉。 卑 E

其義也。 相 始 也」者,上既引天地交合爲證,此又舉人事「歸妹」結合 之氣共相交接,所以 媵者,所以廣其 於匹對之理。 及釋卦名先引證者,以「歸妹」之義非人情所欲,且 舉天地交合然後萬物蕃興,證美「歸妹」之義。 歸 交而得 也。 妹, 也 少女而 《彖》曰,「歸妹」 歸 天地之大義 一説 ·繼嗣不絶,歸妹豈非「天地之大義,人倫之終 係姊所以説者,既係姊爲媵,不 天地以陰陽 必 與 以 妹 動 蓋以聖人制禮,令姪娣從其姑姊而 長男 也 繼嗣 所 也。 交,少 歸妹 雖 相 蕃 以象天地以少陰少陽 與 合而 興萬物也。 天地不交而 也」者,此就二體釋「歸妹」之 長 至「乘剛 女所不樂 男 得生物不已,人倫以 交, 嫁 「歸妹,人之終始 也。 也。 萬物不興 而 係 得别適 而 於 、長陰 二今 「説 正義 姊, 所以未 者, 曰 : 長 長 充 陽 妾

> 失位釋 剛 剛,其猶妾媵求寵 陰應在下,今二、三、四、五並皆失位,其勢自然柔皆乘 之陰? 《略例》云:「去初、上而論位分,則三、五各在 无施 動」也。 陽貴而陰賤 乘剛也」者,此因六三、六五乘剛釋「无攸利」之義。 更求進,妖邪之道也。 不以 上,何得不謂之陽? 當位,釋「征凶」之義。 緣於失正 備 而利也。 數,更有勤 然則二、四陰位也,三、五陽位也。」陽應在上, 征 凶」、乘剛釋「无攸利」,而注 ,以妾媵之賤進 X 而 ○注「以征」至「之逆」。 ,位不當也」者,此因二、三、四、 進 也。 ,其勢自然以賤陵貴。 望之憂, 二、四各在 所戒其「征凶」也。 位既不當, **●**故 求殊寵 係姊 明 卦之下,何得不謂 ,即是以賤陵貴,故 非正 而 正義曰:《彖》以 行 連 嫡, 以明柔之乘 「无攸利、 合 引言之者 因 禮 一卦之 説 Ŧī. 説 動 皆 夫 柔 而 不 以

知應有不終之敝故也。 做」者,歸妹,相終始之道也,故君子象此以永長其終,上有雷」,「説以動」也,故曰「歸妹」。「君子以永終知上有雷」,「説以動」也,故曰「歸妹」。正義曰:「澤

初九,「歸妹」至「相承也」。正義曰:「歸

^{■ 「}勤」,嘉本同,阮本作「動」。

常道。 娣」也。 以兑適震,非夫婦匹敵,是從姊之義也,故曰 妹以娣」者,少女謂之「妹」,從姊而行謂之「歸」。 立之不爲妄也。 以類妃之妹應爲娣也。 正義曰: 承之吉也。○注:「夫承嗣以君之子,雖幼而不妄行。」 而爲娣,恒久之道也。「吉相承也」者,行得其宜是相 娣而行則吉,故曰「征吉」也。 能履」也。 而 爲娣則可行也。 臂猶跛人之足然,雖不正,不廢能履,故曰「跛 「跛能履」者,妹而繼姊爲娣,雖非正 此爲少女作比例也。● 言君之子宜爲嗣承, 「征吉」者,少長非偶,爲妻而行則凶 以言行嫁宜匹敵。 立嗣宜取長,然君之子雖幼而 《象》曰「以恒也」者,妹 然妃之妹雖至少, 配,不 「歸妹 一焉,爲 初九 失

履 正也,故曰「利幽人之貞也」。《象》曰 者,居内處中,能守其常,施之於人是處幽而不失其貞 不正,不廢能視耳,故曰 妹」,雖非正配,不失交合之道。 不言也。 二不云「歸妹」者,既在 中不偏 正者人之常也,九二失位,❷嫌其變常不貞 九二,「眇能」至「變常也」。 然九二雖失其位,不廢居内處中。 ,故云「未變常」 「歸妹」之卦,「歸妹」可 「眇能視」也。 也 猶如眇目之人,視雖 「未變常也 「利幽人之貞 正義曰: 以言「歸 知,故 也,能以 者 九

嫁妹也,故曰「帝乙歸妹」。「其君之袂,不如其娣之袂乙歸妹」者,六五居歸妹之中,獨處貴位,是帝王之所六五,「帝乙」至「貴行也」。正義曰:「帝

[「]比」,嘉本、阮本作「此」。

[「]二」,嘉本同,阮本作「三」。

[「]猶」,嘉本同,阮本作「獨」。

[「]不」,嘉本同,阮本作「下」。

也。 獲「吉」也。 得「吉」者,其位在五之中,以貴盛而行,所往必得合而 者,釋「月幾望,吉」也。 言不如少女而從於長男也。❸「其位在中,以貴行也」 娣之袂良」者,釋其六五雖所居貴位,然長不如少也。 也,故曰「月幾望,吉」也。《象》曰「帝乙歸妹,不如其 配,雖不如以少從長,然以貴而行,往必合志,故 袂,猶不若以少從長之爲美,故曰「不如其娣之袂良. 震長,以長從少者也。❶ 嫁妹,爲之崇飾,故曰「其君之袂 象,其君即五也。 是婦人之道,故爲帝乙之妹。 良」者,六五雖 「月幾望,吉」者,陰而貴盛,如月之近望。 處 貴位 袂,衣袖也,所舉斂以爲禮 · 卦 既以長適少,非歸妹之美,而 以長從少,❷雖有其君崇飾之 是長陽之卦,若以爻爲 既 也。 居長卦,乃是長 配在九二,兑少 容,帝 以斯 得吉 女之 人 滴 即

與,故无所利。《象》曰「承虚筐」者,筐本盛幣,以幣爲與,故无所利。《象》曰「承虚筐」者,惟具之爲功,以下有應命爲貴。上六處卦有承順爲美。士之爲功,以下有應命爲貴。上六處卦不實,而則无所承受,故爲「女承筐」,則虚而无實。又之窮,仰則无所承受,故爲「女承筐」,則虚而无實。又之窮,仰則无所承受,故爲「女承筐」,則虚而无實。又之窮,仰則无所承受,故爲「女承じ」,正義曰:「女上、,「女承」至「虚筐也」。正義曰:「女上、,「女承」至「虚筐也」。正義曰:「女

實。今之「无實」,正是承捧虚筐,空无所有也。

₹1、1915年,1915年,1915年,1915年,1915年,1915年,1915年,1915年,1915年,1916年,1915年,1

中之時徧照天下,故曰「宜日中」也。 一之,故曰「王假之」也。「勿憂,宜日中」者,「勿」,如日在,王能至於豐亨之道,王之所尚,非有王者之德不能不所擁礙謂之爲「亨」,故曰「豐亨」。「王假之」者,「假」,至也,豐亨之道,王之所尚,非有王者之德不能下,擁礙謂之爲「亨」,故曰「豐亨」。「王假之」者,「豐」也,然則「豐」者多大之名,盈足之義,財多德大,「豐亨」者,「豐」者多大之名,盈足之義,財多德大,「豐亨」者,「豐」,對名也,《彖》及《序卦》皆以「大」訓「豐亨」者,「豐」,對名也,《彖》及《序卦》皆以「大」訓

豊,大也」者,釋卦得名爲「豐」之意。 動而不明,未豐,大也」者,釋卦名正是弘大之義也。 「明以動,故《彖》曰,「豐大」至「鬼神乎」。 正義曰:

濟」,嘉本同,阮本作「齊」。血」,嘉本同,阮本作「和」。

[「]也」,嘉本同,阮本無此字。

[「]如」,嘉本同,阮本作「必」。「以長從少」,嘉本同,阮本作「可以從少」。

乎 ? 闡大之大也。」正義曰:闡者,弘廣之言。凡物之大,其 之爲義,既 有二種: 一者自然之大,二者由人之闡弘使大。「豐. 日 日 地、後言人、鬼、神者、欲以輕譬重、亦先尊後卑也。 天地日月尚不能久,況於人與鬼神而 往 之德照臨 日中至盛,過中則昃,月滿則盈,過 於鬼神乎」者,此孔子因豐設戒。 昃,月盈則食,天地 中之盛,❶故曰「勿憂,宜日中,宜照天下也」。「日中 能光大; 者,日中之時徧照天下,王无憂慮,德乃光被,同 大」,非自然之「大」,故音之也。 「王假之,尚大也 來, 月以對之,然後并陳天地,作文之體也。 月先天地者,承上「宜日中」之下,遂言其昃食,因 勉令及時脩德,仍戒居存慮亡 地之陵谷遷貿,盈則 能尚 資明以 天下,同於日 闡弘微細,則「豐」之稱「大」乃「闡大」之 大故 動,乃能 」者,豐大之道,王所崇尚 盈虚 也。 「勿憂, 中。 ,與時消 致豐,故 與 然盛必有衰,自然常 時 宜日中, 而 息,而況於人乎? 曰「明以 以上言王者以豐大 息, 盈則食。天之寒暑 也。 虚則 能 宜 動,故 此辭先陳 長保其盈 ○注: 與 照 , 所 時 天 以 豐 下 而 於日 王 一音 理。 也 也。 消。 則 舉 而 天 盛 能

電 皆 至, 象》曰,「雷電」至「致刑」。 豐」者,雷者天之威動,電者天之光耀 Œ 義 E : 雷 「雷 電

> 致刑。 中。 也。 者,君子法象天威而 俱 至則 若動 斷 決 威 獄訟 而 明 不明則淫濫斯及,故君子象於此卦 備,足以 須 得 虚 用 爲「 實之情, 刑罰,亦當文明以 豐 也。 致用刑 君子以折 罰 動 必 折獄 得 獄 而 致 斷決 重 刑 之 獄

爲「交」,勢若不均,則初、四之相交,於斯乖叛矣。 注:「過均則争,交斯叛也。」正義曰: 争競乃興而相違背,災咎生焉,❷故曰「過旬災」也。 咎,而往有嘉尚也,故曰「雖均无咎,往有尚」也 是陰陽相應,嫌其有咎,以其能相光大,故雖均可以无 无咎,往有尚」者,「旬」,均 以明之動,能相光大者也,故曰「遇其配主」也。 動,尚乎光大者也。 其」至「旬災也」。正義曰:「遇其配主」者,豐者文明以 「過旬災也」者,言勢若不均則相傾 初九,「遇其」至「旬災也」。 初配在四,俱是陽爻,以陽適陽 也,俱是陽爻謂之爲均,非 初,四 奪, 正 既 義曰: 相 應配謂 傾奪則 「雖 之 旬 遇

日

其蔀」者,二以陰居陰,又處於内,幽 六二,「豐其」至 發志 也 闇 无所覩見,所豐 正義日 一一豐

本同, 阮本作「盈」。

⁰ 生」,嘉本同,阮本作「至」。

易 IE 義

七〇

之闇 極盛者 若,吉」也。《象》曰「信以發志」者,雖 有信以自發其志,不困於闇,故獲吉也,故曰 而斗星見,故曰「日中見斗」也。 使斗星見明者也。 在 往得疑疾」也。 也。 於覆 ,是有信以發其豐大之志,故得吉也 不 「日中見斗」者,二居離卦之中,如日正 也。 能 蔽 自發,以自 處日中盛明之時而斗星顯見,是二之至闇 曰 然居中履正,處闇不邪,是有信者也。 豐 處光大之世 其 求於五,往則得見疑之疾,故 蔀 也。 而爲極闇之行,譬日 蔀 二、五俱陰,二已見斗 者, 覆 處 曖 幽 習 障 「有爭發 中,則 而不爲 光 明 至

見斗,然施於大事終不可用。 有左在,終不可用也 大事也。 大事」者,當光大之時可爲大事,而明不足,❶故不可爲 已,乃得无咎,故曰「折其右肱,无咎」。 日中見沫」也。 於六二以陰處陰,亦未見免於闇也,是所以 沬」,微昧之明也。以九三應在上六,志在 豐其沛,日中見沫」者,「沛」, 九三,「豐其沛」至「可用也」。 「終不可用」者,凡用事在右肱,右肱既折,雖 處光大之時而豐沛見沫,雖 假如折其右肱,自守 幡幔,所以 《象》曰 禦 乎陰 愈於豐 一豐在 正 盛 義 示 光 雖 曰 : 沛 也 蔀 可 丽

九 四、「豐其」至「 吉行也」。 正義日 一豐

> 行」也 也。 闇已甚, 陰,是應明 當」者,止謂以 故初謂四爲「旬」,而四謂初爲「夷」也。 以初爲主,故曰「遇其夷主」也。 據初適四則以四爲主,故曰「遇其配主」。 吉」也。 初,而同是陽爻,能相 其 幽不明也」者,日中盛明而反見斗,❷以譬當光大而 蔀 「日中見斗,遇其夷主,吉」者,「夷」,平也,四應在 二者, 言四之與初交相 更應於陰,无由獲吉,猶與陽相遇,故得「吉 九 而 四 幽闇不明 陽居陰而位不當,所以豐 以 陽 居 顯發而得其吉,故曰「遇其夷 陰 也。 闇 爲主者,若賓主之義也。若 「吉行也」者,處於陰位 同 於六二, 二陽體敵,兩主均平, 故 《象》曰「位不 一蔀而 曰 自四之初則 豐 闇 者 其 蔀 爲 居

《象》曰「有慶也」者,言六五以柔處尊 章顯 Ŧī. 慶譽」也 處豐大之世,以陰柔之質來適尊陽之位,能 其德,而獲慶善也,故曰「來章 六五,「來章」至「有慶也」。 ,履得其中,故致 有慶譽, 吉」也。 正 義 自 티 : 光大, 六

上六,「豐其 屋 至「自 藏 也。 正 義 曰

⁰ 而 本同, 阮本無此

明而反」,嘉本同,阮本作「盛 則反而」。

[屋」者,藏蔭隱蔽之物也。上六以陰處陰,極以處外,「屋」者,藏蔭隱蔽之物也。上六以陰處陰,極以處外,不履於位,是深自幽隱,絶跡深藏也,事同豐厚於屋者也。雖闚視其户而闃寂无人,棄其所處而自深藏也。 雖閱視其户而闃寂无人,棄其所處而自深藏也。 是於豐大之世,隱不爲賢。治道未濟,隱猶可也。 三處於豐大之世,隱不爲賢。治道未濟,隱猶可也。 三處於豐大之世,隱不爲賢。治道未濟,隱猶可也。 三處於豐大之世,隱不爲賢。治道未濟,隱猶可也。 三處於豐大之世,隱不爲賢。治道未濟,隱猶可也。 三處於豐大之世,隱不爲賢。治道未濟,隱猶可也。 三處於豐大之世,隱不爲賢。治道未濟,隱猶可也。 三處於豐大之世,隱不爲賢。治道未濟,隱猶可也。 三個於位,是深自幽隱,絕跡深藏也,事同豐厚於屋者

周易正義卷第九

計九千七百一十字

周易正義卷第十

國子祭酒上護軍曲阜縣

雕上旅,小亨,旅貞吉。正義曰:「旅」艮下旅,小亨,旅貞吉。正義曰:「旅」財下旅,小亨,旅貞吉。正義曰:「旅」財政子臣孔穎達奉勅撰

亨是旅之正吉,故曰「旅,貞吉」也。「旅」之爲義,小亨而已,故曰「旅,小亨」。羈旅而獲小「旅」。既爲羈旅,苟求僅存,雖得自通,非甚光大,故者,客寄之名,羈旅之稱,失其本居而寄他方謂之爲

得其所託 寄 若所託不得其主,得主而不能 體釋「旅」得「亨貞」之義。 而麗乎明,是以「小亨」。「旅貞吉」者,此就六五及二 旅,小亨」者,舉《經》文也。柔得中乎外而順乎剛,止 旅之時得通而正,不失所安也。 得自通 彖》曰,「旅小」至「大矣哉」。 而 而貞吉乎? 順從於主,又止而麗明,動不履妄,故 今柔雖 柔處於外,弱而爲客之象。 順從,則 處外而得中順陽,則 「旅之時義大矣哉」 和逆而 正 離 義 散,何 能 티 :

> 義大矣哉」。 传旅者獲安,非小才可濟,惟大智能然,故曰「旅之時者,此歎美: 寄旅之時物皆失其所居,若能與物爲附,

獄訟。離明,故君子象此,以静止明察,審慎用刑而不稽留避,故君子象此,以静止明察,審慎用刑而不稽留逐草而行,勢不久留,故爲「旅」象。又上下二體,艮止上有火,旅。君子以明慎用刑而不留獄」者,火在山上上有火,旅。君子以明慎用刑而不留獄」。正義曰:「山《象》曰,「山上」至「留獄」。正義曰:「山

志意窮困,自取此災也。 災,故曰「旅瑣瑣,斯其所取災」也。《象》曰「志窮災」, 卑賤之役,然則爲斯卑賤勞役由其處於窮下,故致此 也。初六當旅之時最處下極,是寄旅不得所安而爲斯 也。初六當旅之時最處下極,是寄旅不得所安而爲斯 也。初六「旅瑣瑣」者,細小卑賤之貌

童僕貞」。《象》曰「終无尤」者,旅不可以處盛,盛則爲得童僕之正,不同初六賤役,故曰「旅即次,懷其資,得此而爲寄旅,必爲主君所安,故得次舍,❶懷來資貨,又即次,懷其資,得童僕貞」者,得位居中,體柔承上,以即、一一,「旅即」至「无尤也」。正義曰:「旅六二,「旅即」至「无尤也」。正義曰:「旅

❶ 「故」,嘉本同,阮本作「旅」。

物所害。今惟正於童僕則終保无尤也。❶

也。 主君之權勢,若齊之田氏,故爲主所疑也 ○注"「與萌侵權。」正義曰"言與得政事之萌漸,侵奪 亦可悲傷也。 僕之正而身危也。 羈旅之身而爲惠下之道,是與萌侵權,爲主君之所疑 焚其次,喪其童僕,貞厲」者,九三居下體之上,下 一,上无其應,與二相得,是欲自尊而惠施於下也 爲君主所疑則被黜而見害,故焚其次舍,喪 九三,「旅焚」至「義喪也」。 「其義喪」者,言以旅與下,理是喪亡也。 《象》曰「亦以傷矣」者,言失其所安 正 義 E: 其童 以 於 旅

地,所以其心不快也。 成,故曰「旅于處,得其資斧」也。求安處而得資斧之 獲平坦之所,而得用斧之地。言用斧除荆棘然後乃 同九三之自尊,然不得其位猶寄旅之人,求其次舍不 于處,得其資斧,我心不快」者, 九四處上體之下,不 于處,得其資斧,我心不快」者, 九四處上體之下,不

矢亡」也。然處文明之内,能照禍福之幾,不乘下以侵一矢射之而復亡失其矢,其雉終不可得,故曰「射雉一羈旅之身進居貴位,其位終不可保。譬之射雉,惟有雉一矢亡,終以譽命」者,羈旅不可以處盛位,六五以淮一矢亡,終以譽命」者,羈旅不可以處盛位,六五以淮一天亡,終以譽命」者,羈旅不可以處盛位,六五以

上,故得「終以譽命」也。以譽命」也。《象》曰「上逮」者,逮,及也,以能承及於權,而承上以自保,故得終以美譽而見爵命,故曰「終權,而承上以自保,故得終以美譽而見爵命,故曰「終

咷。 易,終无以一言告之,使聞而悟也。 曰「終莫之聞也」者,衆所同疾,危而不扶,至于喪牛于 于易」。 焚其巢」也。 客得上位所以「先笑」,凶害必至故「後號 鳥之巢,以旅處上必見傾奪,如鳥巢之被焚,故 其巢,旅人先笑後號咷,喪牛于易,凶」者,最居 衆所同疾,❷喪其稼穡之資理在不難,故曰 上九,「鳥焚」至「之聞」。 物莫之與則傷之者至矣,故曰「凶」也。 正 義曰:「鳥 於 公曰「鳥 1「喪牛 上 如 焚

異上 巽。「小亨」至「大人」。正義

者亦无所不容。然「巽」之爲義,以卑順爲體,以容入无所不入,故以「人」爲訓。若施之於人事,能自卑巽名、《説卦》云「巽,人也」,蓋以「巽」是象風之卦,風行曰:「巽,小亨,利有攸往,利見大人」者,「巽」者卑順之

-) 「尤」,嘉本同,阮本作「咎」。
- ❷ 「疾」,嘉本同,阮本作「嫉」。

巽,❶命令可行,然全用卑巽則所通非大,故曰「小亨」。 爲用 皆无往不利,然大人用「巽」其道愈隆,故曰「利見大 巽悌以行物无違距,故曰「利有攸往」。 教令乃行,故於重巽之卦以 明上下皆須用「巽」也 ,故受「巽」名矣。 上下 ·皆巽 明 申 不 命之理。 爲 違逆,君 但能用「巽」者 雖 上 唱 下 臣 皆 和

順

通之道,所以文王繫「小亨」之辭,孔子致「皆 亨」者,褚氏云:「夫獻可替否其道乃弘,柔皆順剛非大 成「小亨」以下之義也。 初、四各處卦下,❷柔皆順剛无有違逆,所以教命得申 巽爲中正,柔若不順乎 所以志意得行、申其命令也。 「柔皆順乎剛」者,剛 物所不與也,故又因二、五之爻剛而能巽,不失其中, 奉於上,上下皆巽,命乃得行,故曰「重巽以申命」也。 體上下皆異以明可以申命也。 巽以申命」者,此卦以卑巽爲名,以申命爲義,故就 意不專釋「小亨」二字,❹而注獨言「明无違逆,故得 ○注:「明无違逆,故得小亨。」正義曰:案《彖》併舉 ·小亨,利有攸往,利見大人」以結之,則「柔皆順 「剛巽乎中正而志行」者,雖上下皆巽,若命不可 《彖》曰,「重巽」至「大人」。 是以「小亨」以下舉經結 剛,何所申 上巽能接於下,下巽能 其 八命乎? 正義曰:「重 故又就 順 剛 也。 從則 之 小 雖

> 釋。 「巽」義,故知 案: 王注上下卦 「皆順」之言通釋諸 之體皆以 「巽」言之, 辭也。 柔不 違 剛 正

風 志在使人從治,故曰「利武人」。 也。「志,治也」者,武非行令所宜,而 未明其令、欲不從則懼罪及己、志意懷疑、所以 善威武,既未能從令,則宜用武人之正以整齊之,故 巽不能自決,心懷進退,未能從令者也。 退,利武人之貞」者,初六處令之初,法未宣,著體 「進退,利武人之貞」也。 至,非是令初,故君子則之以申命行事也。6 故曰「隨風,巽」。 巽」者,兩風相隨 《象》曰,「隨風」至「行事」。 初六,「進退」至「志治也」。 故曰 「君子以申命行事」者,風 《象》曰「志疑」者,欲從之則 「隨風」,風既 其猶蒙卦初六《象》曰 言 「利 相 正義 成命 正義曰: 隨,物 武 티 : 齊邪莫 之隨 進退 於 无 進 日 不 隨

「利用刑人,以正法也」。

四」,嘉本同,阮本作「九」。

2

⁰ 雖」,嘉本同,阮校云閩、監、毛本作「須」。

舉」,嘉本同,阮本作「釋」。

則」,嘉本作「明

則」,嘉本作「象」,阮本作「訓」。

吉也。 恭,神道无形,多生怠慢。 故曰「巽在牀下」。 道,用之於神祇,不行之於威勢,則能致之於盛多之吉 盛多之貌。 祝史,「巫」謂巫覡,並是接事鬼神之人也。 得中」者,用卑巽於神祇是行得其中,故能致紛若之 床 无咎過,故 下」者,九二處巽下體而 九二,「巽在」至 卑甚失正則入於過咎。 曰 「用史巫紛若,吉,无咎」也。 「用史巫紛若,吉,无咎」者,「史」謂 若能用居中之德行至卑之 得 復 中也」。 以陽居陰,卑巽之甚 人有威勢易爲 正義曰 「紛若」者 《象》曰 「巽 行

受其屈辱 也 爲四所乘,是志意窮屈 《象》曰:「志窮」者,志意窮屈 」者,「頻」者,頻蹙憂戚之容也。 也。 頻蹙而巽,鄙 頻巽」至「志窮也」。 、不得申遂也。 吝之道, ,所以爲吝也 故 既處巽時,只得 九三 曰「頻巽, 正義曰: 體 剛 居 「頻 īE

所奉,雖以 亡,田 取 客,三日 悔亡,田獲 譬田 獲三品」者,六四 獵,能 六四,「悔亡」至「有功也」。 充君之包厨 柔乘剛 三品」也。 獲 而 有益 而 也。 依 莫善三品,所以 「三品」者, 有 尊 《象》曰「有功」者 乘剛之悔,然得 履 正,以斯 一曰乾豆,二曰賓 行命必能 得 正義 曰: 悔亡,故 位 田 承 獵 尊 有功。 有 悔 曰 其

> 以 喻 行命有 功也。

五.

在

言之。 令, 怨而獲吉矣,故曰「先庚三日,後庚三日,吉」也。 三日,令著之後復申之三日,然後誅之,民服其 直,化不以漸,物皆不説,故曰「无初」也。 物之不齊无由致吉,致吉是由 者,申命令謂之「庚」,民迷固久,申不可卒,故先申之 物服其化,故曰「有終」也。 曰「貞吉,悔亡,无不利 「位正中」者,若不以九居五位,則不能以中正齊物 以 '物莫之違',是由貞正獲吉,故得悔亡 陽居陽違 九五,「貞吉」至「正 於 謙巽 也。 是 悔 「先庚三日,後庚三日,吉」 「无初有終」者,若卒 也。 中 九居五位,故舉 然 也。 執手 而无不利,故 中 終於中 正 正 義 以 日 八罪,无 ·爻位 甪 宣 正 剛 九 其

乎凶」 也。 資斧」也。 則不能行威命,命之不行是喪其所用之斧,故曰 牀下」。「喪其資斧」者,斧能斬決,以 巽在牀下」者,上九處巽之極,巽之過甚,故曰 者 象》曰「上窮」者,處上窮巽,故 上九,「巽在」至「正 正 正 「貞凶 理須當威斷,而喪之,是「正乎凶 |者,失其威 斷是正之凶, 乎 凶 過在牀下也。 喻威斷 也 故 日「貞 也。 正 義 「喪其 「異 巽過 日 正 凶 在

日

∭ 兑上 兑,亨,利貞。正義曰:「兑」,説也,

「兑,亨,利貞」。 以爲「亨」。以説説物,恐陷諂邪,其利在於貞正,故曰事,猶人君以恩惠養民,民兑不説也。● 惠施民説,所以爲分」爲名。澤以潤生萬物,所以萬物皆説。施於人以「兑」爲名。澤以潤生萬物,所以萬物皆説。施於人以「兑」爲名。澤以潤生萬物,以及是象澤之卦,故

故曰 死」者,先以説豫勞民,然後使之犯難,則民皆授命,忘 説豫撫民,然後使之從事,則民皆竭力忘其從事之勞, 忘其勞」以下,歎美説之所致,亦申明應人之法。 於惠澤,能以惠澤説人是下應乎人也。「説以先民,民 而不失其説也。 中 内雖剛正而外迹柔説則不憂侵暴。 亨,利貞」之義也。 者,此就二、五以剛居中,上六、六三以柔處外,釋「兑 人,所致如此,豈非説義之大,能使民勸勉矣哉,故曰 其犯難之死,故曰「説以 人」者,廣明説義合於天人。 天爲剛德而有柔克,是剛 「兑,説也」者,訓此名也。 外相濟,故得説亨而利貞也。「是以順乎天 「説以先民、民忘其勞」也。 (彖》曰,「兑説」至「矣哉」。 今説以利貞,是上順乎天也。人心説 外雖柔説而内德剛正則不畏邪諂 犯難、民忘其死 「剛 中而 「説以 只爲剛中而柔外. 柔外,説以利貞 犯難、民 也 正 義曰: 施 而 に忘其 先以 説 於

説之大,民勸矣哉」。

象之「以朋友講習」也。 友,朋友聚居講習道義,相説之盛莫過於此也,故君子澤,兑」也。「君子以朋友講習」者,同門曰朋,同志曰澤,兑」者,麗,猶連也,兩澤相連,潤説之盛,故曰「麗澤」至「講習」。正義曰:「麗

以得吉也。
初九、「和兑」至「未疑也」。正義曰:「和允,方」者,初九居兑之初,應不在一,无所私説,説之兑,吉」者,初九居兑之初,應不在一,无所私説,説之分,吉」者,初九,「和兑」至「未疑也」。正義曰:「和

者,失位而得吉,是其志信也。《象》曰「信志也」乃得亡悔,故曰「孚兑,吉,悔亡」也。《象》曰「信志也」則吉從之,故曰「孚兑,吉」也。然履失其位,有信而吉兑,吉,悔亡」者,九二説不失中,有信者也。説而有信兑,吉,悔亡」者,九二是「信志也」。正義曰:「孚九二,「孚兑」至「信志也」。正義曰:「孚

兑,凶」者,三爲陽位,陰來居之是進來求説,故言「來六三,「來兑」至「不當也」。正義曰:「來

❶ 「兑」,嘉本、阮本作「无」。

《象》曰「位不當」者,由位不當,所以致凶也。 兑」。而以不正求説,●佞邪之道,故曰「來兑,凶」也。

之位宜任君子,❷而信小人,故以當位責之也。 危之道也,故曰「有厲」。《象》曰「位正當」者,以正當與之相得,是説信於小人,故曰「孚于剥」。信而成剥,小人爲剥也。九五處尊正之位,下无其應,比於上六,小人爲剥也。九五處尊正之位,下无其應,比於上六,小人爲剥也。八五,「孚于」至「正當也」。正義曰:「孚

以經无「吉」文,以其道「未光」故也。《象》曰「未光也」者,雖免躁求之凶,亦有後時之失,所三自進求説,必須他人見引然後乃説,故曰「引兑」也。兑」者,上六以陰柔之質最在兑後,是自静退,不同六兑」者,上六,「引兑」至「未光也」。正義曰:「引上六,「引兑」至「未光也」。正義曰:「引

異上 涣。「亨」至「利貞」。正義日

難,離散奔迸而逃避也,大德之人,能於此時建功 者,大難既散,宜以正道而柔集之,故曰「利貞」。 者,德治神人,可濟大難,故曰「利涉大川」。 以至於建立宗廟,故曰「王假有廟」也。 德,散難 受之以涣。」然則「涣」者,散釋之名。 也」,此又「涣」是離散之號也。 亨」,故曰「涣亨」。「王假有廟」者,王能涣難而亨,可 涣亨」者,「涣」,卦名也。《序卦》曰: 釋 險,故謂之爲「涣」。能 蓋「涣」之爲義,小人 釋險 《雜卦》曰 一説而 「利涉大川 難,所以爲 後散之,故 「利貞 立 遭

之乖,所以得散釋險 得位於外而上與五同,内剛 大川而克濟,利以正道 貞」等也。二以 位乎外而上同」者,此就九二剛德居險,六四 上,釋所以能散釋險難而致亨通,乃至「利涉大川,利 涣,亨」者,疊經文,略舉名德也。 彖》曰,「涣亨」至「有功也」。 剛 德 難 來居險中而不窮於險,四 而 而 鳩民也。 通 亨,建立宗廟而祭享,利 无險困之難,外柔无違 「王假有廟,王乃在 「剛來而不窮,柔 正義曰 以 得 柔 位從 順 涉 逆 得

- ▶ 「求」,嘉本同,阮本作「來」。
- ❷ 「任」,嘉本同,阮本作「在」。

乎外」釋 通在下; 意 : 皆亨,利 同剛 此還 暢 必不沉溺,以 利涉大川,乘木有功」,恐 得位乎外而 乘木有功」者,重明 經略,今在涣然之中, 以爲乘木水上, 者,專所以涉川 回之累」者,此還言九二居險不窮是剛得 亨」以下至于「利)注「凡剛」至「利貞也」。 ,无復畏忌回邪之累 直取況喻之義,故言此以序之也 一則《彖》雖疊「涣亨」二字,即以「剛來 言六四 ,何由得亨 此 涉大川,利 利 重 則先儒 得 上同」釋之,下别言「王假 明 貞」,故言 涣 〜〜海 位履正,同 也。 涉 通而濟 濟難必 川之象, 貞 有以 一時 用 正 貞」也。 也。 可 故至於 -義曰: 「涣」可 . 「皆」 難 也。 「剛來不窮」釋 有成功,故曰「乘木 以 志乎五 「剛來」之言惟釋「亨」德,不 正義曰:「凡剛得暢 有 ○注: 利貞 故言「乘木 「柔履 以 注 先儒皆以 廟之義。 以 「有廟 通之。 於此 八而不 濟難之事。 「乘木即 也 Œ 言「皆」者凡有二 也 ·邪乎? 而 有廟,王乃在中, 剛 有 明 「亨」德,「柔得位 此 險 同 功。 德 卦坎下巽上 「剛柔 暢遂,剛 難 志乎 涉難也。」木 而不窮,柔 不暢,柔不 利涉大川 未 有 乘 故言「則 夷、 王不 而 木 剛 功也」。 皆釋 涉川 方勞 既得 无忌 用

行水上,涣」者,風行水上激動波濤,散釋之象,故曰《象》曰,「風行」至「立廟」。正義曰:「風

故曰 然无難之時,享于上帝以告太平 風 行水上,涣」。 「先王以享于帝,立廟」也 先 王以 享于 帝, 建 立 立宗廟以祭祖 廟 者 先 王以 涣

行,不與險争,故曰「順 散之初,乖散未甚,可用馬以自拯拔 用拯馬壯吉」。 九二,「涣 初六,「用拯」至「順 《象》曰「初 奔」至「得願 也。 六之吉, 也 ٥ آ 也。 而 順 正 得 也 義 壯 正 曰: 者 吉 義 门,觀 也, 曰 初 難 故 六 而 日

散,願 故曰 之,得其所安,故「悔亡」也。 俱无應,與初相 奔其机」者,「机」,承物者也。 「渙奔其 得所安。奔初獲安是得其願 机也。 得,而 初得 「悔亡」者,初 遠難之道。 《象》曰 初承於二, 也 得 得 今二 散 願」者,違 謂 道 散 初爲 而 奔 二往 机,二 歸 難 「涣 奔 歸

能 外 曰 其躬,无悔」者,「涣」之爲義,内險外安。 也。 而外應上九,是不固所守,能散其躬,故得无 涣其躬者, 涣其躬,无悔」。 六三,「涣其」 正爲身在於内, 《象》曰 」至「在外 一志 而 在 應 也。 外」者,釋六三所 在 上九,是志 正 六三内 義 曰 悔, 意 不 在 以 故 比 涣

涣其 羣」者,六四出 六 四 渙其 在坎上,已踰於 羣」至「光 大 險, 也」。 得 位 正 體 義 巽 日 與

害,故 吉,是其道光大也 匪夷所思」也。《象》曰「光大也」者,能散羣險而獲元 散難之中,有丘墟未平之慮爲其所思,故曰 可自專,而 能散羣險則有大功,故曰「元吉」。 五合志,内掌機密,外宣化命 日 「涣其羣」也。「元吉,涣 得位承尊,憂責復重,雖 者也。 有丘,匪夷所思」者, 然處上體之下,不 獲「元吉」,猶宜於 能 爲羣物 「涣有丘 散 其 險

咎」之義,以九五是王之正位,若非王居之則有咎矣。 故曰「涣,王居无咎」。《象》曰「正位」者,釋「王居无 咎」者,爲涣之主,名位不可假人,惟王居之乃得无咎, 以散險阨者 汗喻險阨也。 汗其大號」者,人遇險阨,驚怖 九五,「涣汗」至「正 也,故曰「涣汗其大號」也。「涣,王 九五處尊履正,在號令之中,能行號令 位 而勞則汗從體 也。 正 義 出, 日 居无 故以 「涣

害」者,釋「涣其血」也,是居遠害之地故也。「涣其血,去逖出」者,「血」,傷也,「逖」,遠也。上九處「涣其血,去逖出」者,「血」,傷也,「逖」,遠也。上九處「涣其血,去逖出」者,「血」,傷也,「逖」,遠也。上九處上九,「涣其血」至「遠害也」。正義曰:上九,「涣其血」至「遠害也」。正義曰:

⇒ 坎上 節,亨,苦節,不可貞。正義曰:

薄,物所不堪,不可復正,故曰「苦節,不可貞」也。道乃亨,故曰「節,亨」。節須得中,爲節過苦,傷於刻也。」然則「節」者,制度之者,❷節止之義。制事有節其節,卦名也。《彖》曰:「節以制度。」《雜卦》云:「節,止

義也。 貞,其道窮」者,止由爲節不中則物所不説,母不可復 節爲正則其道困窮,故曰「苦節,不可貞,其道窮也 節,不可貞,其道窮」者,爲節過苦,不可爲正。若以苦 中,所以得亨,故曰「節,亨,剛柔分而剛得中」也。 「説以行險,當位以 上,兑柔處下,是剛柔分也。 二、五剛中,❸釋所以爲「節」得「亨」之義也。 曰:「節,亨,剛柔分而剛得中」者,此就上、下二體 道 二、五以剛居中,爲制之主,所以得節, 彖》曰,「節,亨」至「不害民」。 困 窮,故更就 節,中正以通」者,上言「苦節,不可 二體及四、五當位 剛柔分,男女别,節 重 一釋行 坎 節 之大 「節 不違 剛 正 居 及 義

0

[「]遠」,嘉本同,阮本作「逖」。

[「]者」,嘉本、阮本作「名」。

[「]及」,嘉本同,阮本作「居」。

[「]止」,嘉本同,阮本作「正」。

王者以 以 節 不 得 節得中,「當位以節 ·害民 而四 氣序爲節,使寒暑往來各以其序! 通,故曰「中 「亨」之義,以 制 也 時成」者,此下就天地與人廣明「節」義。 度 爲節,使用之有道,役之有時, 正以 明 「苦節」之「窮」也。 通。 」則可以爲正,良 此 其所 以 則四 爲 以由中而 行行 「亨」也。 時功成之也。 險 則 以 能 不 説 正 「天地 傷財 天地 所 則 以 爲

節 其禮數等差,皆使有度,議人之德行任用 命之多少,「德行」謂人才堪任之優劣,君子象節,以 上有水,節」者,水在澤中乃得其節,故曰 也。 象》曰, 「君子以 制數度,議德行」者,「數度」謂尊卑禮 「澤上」至「德行」。 ,皆使得 正義曰 澤上有 宜。 水, 澤 制

注: 居 不可以終離,故受之以節。」以 故慎密不失,然後事 密,不出户庭。 出户庭,无咎」者,初九處節之初 節之初,故曰「將整離散而立法度也 「爲節之初,將整離散。」正義曰:《序卦》云:「物 《象》曰 初九,「不出」至「通塞也」。 知 若不慎而 通 塞 濟 」者,識時 而 泄則民情姦險,應之以 无咎, 此卦承「涣」之後,初 通 塞,所以不出也。 故曰「不出户庭,无 ,將立制度,宜 正 義曰:「不 其慎 偽。 0 九

九二,「不出」至「時極也」。正義曰:「不

不出,失時之中,所以爲凶。「不出門庭,凶」。《象》曰「失時極」者,極,中也。應出之極,可施之事則遂廢矣。不出門庭,所以致凶,故曰出門庭,凶」,若初已制法,至二宜宣,若猶匿之則失時出門庭,凶」,若初已制法,至二宜宣,若猶匿之則失時

由己不節,自致禍災,又欲怨咎誰乎? 自己致,无所怨咎,故曰「无咎」。《象》曰「又誰咎」者,道,禍將及己以至哀嗟,故曰「不節若,則嗟若」也。禍不可失。六三以陰處陽,以柔乘剛,失位驕逆,違節之師之,以三,「不節」至「誰咎也」。正義曰:「不二、「一八二、「不節」至「誰咎也」。正義曰:「不

故不失其道也。 六三以失位乘剛則 安行此節而不改變,則何往 節,亨」者,六四得位而上順於五,是得節之道。 「安節」而致 六四,「安節」至「上道也」。 「亨」。 《象》曰「承上道」者,以能承於上 失節 而招咎,六四以得位承陽故 不通,故曰「安節,亨」。 正 義 曰 但 安 明 能

節, 不苦而甘,所以得吉,故曰「甘節,吉」。 以 位,得正履中,能以中正爲「節」之主,則當《彖 制 吉,往有尚」者,「甘」者,不苦之名也。 度,不傷財,不害民」之謂也。 九五,三 甘 至「位 中 也。 爲 節 而无傷 以 正 九 此 義 五 而 》曰「節 E 害 居 於 是 Ħ 尊 所

曰「悔亡」也。 是正道之凶,若以苦節脩身則儉約无妄,可得亡悔,故不可復正,正之凶也,故曰「貞凶」。若以苦節施人則甘,以至於苦,故曰「苦節」也。爲節過苦,物所不堪,節,貞凶,悔亡」者,上六處節之極,過節之中,節不能節,貞凶,悔亡」者,上六處節之極,過節之中,節不能

Ⅲ 巽上 中孚。「豚魚」至「利貞」。正義

柔併在兩體之內,二、五剛德各處一卦之中,及上、下「中孚,柔在內而剛得中,説而巽,孚」者,此就三、四陰《彖》曰,「中孚」至「乎天也」。正義曰:

應於天,是「中孚」之盛,故須濟以利貞也。 孚以利貞,乃應乎天」者,釋「中孚」所以「利貞」者,天 德剛正而氣序不差,是正而信也。今信不失正,乃 所以得利。 信及豚魚故也。 化邦也」。「豚魚吉,信及豚魚也」者,釋所以得吉,由 之「中孚」,故曰「柔在内而剛得中,説而巽,孚」也 中,各當其所,説而以巽,乖争不作,所以信 「乃化邦也」者,誠信發於内,則邦國化於外,故曰「乃 體説而以巽,釋此卦名爲「中孚」之義 以中信而濟難,若乘虚舟以涉川也。「中 「利涉大川,乘木舟虚」者,釋此 也。 發 於內 柔 涉 内 得 Ш 謂 剛

子以議其過失之獄,緩捨當死之刑也。
死」者,中信之世必非故犯,過失爲辜,情在可恕,故君无所不至,故曰「澤上有風,中孚」。「君子以議獄緩上有風,中孚」者,風行澤上无所不周,其猶信之被物上有風,中孚」有,「澤上」至「緩死」。正義曰:「澤

始,應在于四,得其專一之吉,故曰「虞吉」。既係心於吉,有它不燕」者,「虞」猶專也,「燕」,安也。初爲信初九,「虞吉」至「未變也」。正義曰:「虞

❶ 「著」,嘉本同,阮本作「者」。

八

改變,不更親於他也。 也。 故更有 《象》曰「志未變」者,所以得專一之吉,以志未 他 來, 不不 能與之共相燕安也 ,故曰「有它不

應焉。 也。 鶴在 爾靡之」。《象》曰「中心願」者,誠信之人願與同 爵,吾願與爾賢者分散 散也,又无偏應,是不私權 陰,其子和之」也。 四重陰之下。 處於幽昧 陰,其子和之」者,九二體 誠信而應之是「中心願也 九二,「鳴鶴」 如鶴之鳴於幽遠,則爲其子所和,故曰「鳴 而 而履不失中,是不徇於外,自任其真 行不失信、 「我有好爵,吾與爾靡之」者,「靡」, 至「心 而共之,故曰 利,惟德是與。若我 則聲聞 願 剛 也。 處於卦内,又在 于外,爲同類之所 「我有好爵、吾與 正義日 有 鶴 類 Ξ 「鳴 好 在 者 相

如

爲類。 歡樂也 憂悲也。 害己,故「或鼓」而攻之。 而不相比,「敵」之謂也,故曰「得敵」。欲進礙四,恐其 敵,或鼓或罷,或泣或歌」者,六三與四俱是陰爻,相 或罷」而退敗 故故 然三居少陰之上,四 六三,「得敵」至「不當也」。 四 日 履 「或鼓或罷,或泣或歌」也。《象》曰 也。 于順,不與 不勝 而退,懼見侵陵,故 物校 而四履正承尊,非己所勝,故 居長陰之下,各自 退 不見 害,故 正義曰: 「或泣」而 有 一得 對 與

> 當 妄進故也 一者,所以 鼓或罷」 進退无恒者、 止 爲不當 其 位

「馬匹亡、无咎」也。 敵,進來攻己,己若與三校戰則失其所盛,故棄三之類 之於五,❷内毗元首,外宣德化,充乎陰德之盛. 近望,故曰「月幾望」也。「馬匹亡,无咎」者,三與 幾望」者,六四居「中孚」之時,處巽應説,得位履 馬之亡匹。 三争,❸而上承於五也。 六四,「月幾」至「類上也」。 上承其五,不與三争,乃得无咎,故 《象》曰 · 絶類上」者, 絶三之類, 不 正 義 如 如 日 : [順,上 行月之 「月 己 日

正當尊位,故戒以繫信乃得无咎。 故 信何可暫舍,故曰「有孚攣如」。 在信時、處於尊位、爲羣物之主,恒須以中誠交物、孚 孚攣如,无咎」者,「攣如」者,相 曰 有孚攣如,无咎」也。 九五,「有孚」至「正當也」。 《象》 牽繫不絶之名也。 繫信不絕乃得无咎 曰「位正 若直以陽得正 正 當 義 曰: 「有 其 五.

⁰ 本同,阮本作「求」。

[「]之」,嘉本、阮本作「承」。

[「]三」,嘉本同,阮本作「二」。

无有係信,❶則招有咎之嫌 也。

故曰「貞凶」。《象》曰「何可長也」者,虚聲无實,何可 進聞也,❸故曰「翰音登于天」。 起,❷而忠篤内喪,華美外揚,若鳥之翰音登于天,虚聲 音登于天,貞凶」者,「翰」,高飛也,飛音者, 不從之謂也。 上九,「翰音」至「可長也」。 上九處信之終,信終則衰也。 虚聲无實,正之凶 正 義 信衰則 音飛 日 而 也 詐 宵 翰

震 艮上下 小 過。 「亨」至「大吉」。 正 義

即以 裘之比也。」此因小人有過差,故君子爲過厚之行,非 之行小有過差,君子爲過厚之行以矯之也,如晏子狐 曰:「小過,亨」者,「小過」,卦名也,王於大過卦下 行過乎恭,喪過乎哀」之例是也。6 小過」之義,亦與彼同也。 音相過之過」。恐人作「罪過」之義,故以音之。 過得 :過」得名,止在君子爲過行也。❻ 「過差」釋卦名。《彖》曰「小過,小者過而亨」,言 亨,明非 罪 :過」釋卦名,失之遠矣。 「罪過」,故王於「大過」音之,明 過於小事謂之「小過」,●即 過爲小事,道 褚氏云:「謂小人 而周氏等不悟此 強義兼 然則 乃 注云

> 也。 執卑守下,逆則犯君陵上,故以臣之逆順類鳥之上下 則凶,故曰「飛鳥遺之音,不宜上,宜下,大吉」。 過差之時,爲過矯之行,❸順而止之則吉,⑨逆而 求處,過上則愈无所適,過下則不失其安,以譬君子處 借喻以明過厚之行,有吉有凶。 不可大事」也。「飛鳥遺之音,不宜上,宜下,大吉」者 曰「鳥之將死,其鳴也哀」,故知「遺音」即哀聲也 過差,₢惟可矯以小事,不可正以大事,故曰 正,故曰 通,故曰「小過,亨」也。 遺」,失也。 ○注:「飛鳥遺其 「利貞」也。 鳥之失聲必是窮迫、未得 「可小事,不可大事」者,時世小有 音,聲 「利貞」者,矯 哀以求處。」正 飛鳥遺其音,聲哀以 世 安 勵 處。 俗 「可小事 義 利 論 順則 曰 在 鱗 歸

直」,嘉本同,阮本作「真」。

0

- 詐」,原作「誰」,據嘉本、阮本改。
- 進」、嘉本同、嘉本、阮本作「遠」。
- 於」,嘉本同,阮本作「之」。
- 止」,嘉本同,阮本作「上」。 例」,嘉本同,阮本作「謂」。
- 世」,嘉本同,阮本作「也」。
- 矯」,嘉本同,阮本作「厚」。
- 止」,嘉本同,阮本作「立」。

「不可大事」也。「有飛鳥之象焉」者,釋不取 順,故曰「不宜上,宜下,大吉」。以上逆而下順也 上,宜下,大吉」之義也。 就六五乘九四之剛,六二承九三之陽,釋所以「不宜 「飛鳥遺之音,不宜上,宜下,大吉,上逆而下順 況,惟取「飛鳥」者,以不宜上,宜下,有飛鳥之象故也。 剛健之人乃能行大事,失位不中是行大不中時,故曰 惟 三得位不中,釋「可小事,不可大事」之義。柔順之人 事也」者,此就六二、六五以柔居中,九四失位不中,九 然矯枉過正,應時所宜,不可常也,故曰「與時行」也。 時行也」者,此釋「利貞」之德,由爲過行而得「利貞」。 俗,雖過而通,故曰「小者過 「柔得中,是以小事吉也,剛失位而不中,是以不可大 「小過」有「亨」德之義。過行小事謂之「小過」,順 小過,小者過而亨也」者,此釋「小過」之名也,并 能行小事,柔而得中是行小中時,故曰「小事吉」也。 (彖) 日 ,「小過」至「下順也」。 上則乘剛而逆,下則承 而亨也」。「過以 正 利貞 二者,此 餘 義 時 曰 與與 而 爲 明

一 山 乎儉」者,雷之所出,本出於地,❶今出山上,過其本所, 故曰「小過」。小人過差,失在慢易奢侈,故君子矯之 有雷,小過。 象》曰「山上」至「過乎儉」。 君子以行過乎恭,喪過乎哀,用 正義 曰 過

> 以 「行過乎恭,喪過乎哀,用過乎儉 也

之逆同於飛鳥,无所錯足,故曰「飛鳥以 鳥以凶」者,小過之義上逆下順 曰「不可如何也」者,進而之逆,孰知不可自取凶咎,欲 何乎? 初六,「飛鳥」至「如何也」。 而 初應在 凶」也。《象》 正 上 義曰: 飛 而

如

過 已,故曰「不及其君,遇其臣 中位,❷故曰「遇其妣」也。 正,故謂之「妣」。 始也、謂初也。「妣」者、母之稱。 謂之「遇」,六二在小過而當位是過而得之也。 祖,遇其妣,不及其君。 者,臣不可自過其位也。 六二,「過其」至「可 已過於初,故曰「過其祖」也 遇其臣无咎」者,過 過不至於僭,盡於臣 **,**无咎」。《象》曰「臣 過 也。 六二居内,履 正 義 曰 : 而 祖 履得 不 中 位 得 而 而 之 過

九三居下體之上,以陽當位,不能先過爲防,至令小者 過防之」者,小過之世,大者不能立德,故令小者得過。 九三,「弗過」至「如 何也」。 義 曰:「弗

⁰ 本」,嘉本同,阮本作「不」。

[「]位」,嘉本同,阮本作「正」。

也,則 咸 此行者,有幸而免也。 之,凶」者,《春秋傳》曰「在内曰弒,在外曰戕」,然則 戕」者皆殺害之謂也。 過。 致凶禍,將如何乎? 有殘害之凶至矣,故 0 上六小人,最居高顯,而復應而從焉。 《象》曰 言不可 言「或」者,不必之辭也。 日 「凶如何」者,從於小人 如何也 「弗過防之」。 「從 其從之 或 戕

咎」。 也。」正 任,不 能无爲自守則无咎,有往則 雖體陽爻而不居其位,不防之責,責不在己,故得「无 世,小人有過差之行,須大德之人防使无過。 豈可任之長以爲正也。 其位不當故也。 所告救,故曰「必戒」。 於物,物亦不與,无援之助,故危則必 行,故得遇於无咎之宜,故曰「无咎,弗過遇之」也。 此 「无咎,弗過遇之,往厲必成,勿用永貞」者,居小過之 象》曰「位不當」者,釋所以弗過而遇,得免於咎者, 辭,言「宴安不救 所以无其咎者,以其失位在下,不能爲過 可用之以長 九四,「无咎」至「不可長也」。 義 E : 此《春 「終不可長」者,自身有危,无所告救 行 秋》「狄伐邢,管仲勸齊侯救邢. 邢 其 以斯而處於羣小之中,未足委 ○注:「夫宴安酖毒,不可 正 比 也,故 酖 危厲,故曰「往厲」。 不交 鳥 之毒,2 曰「勿用 自戒慎而已,无 不 可 永 正 貞」也 今九 懷 義 厚 而 日 以 之 74 安

之也。

《象》曰「已上」者,釋 弋取彼在穴」者,公者臣之極,五極陰盛,故稱「公」也 三陽止於下是陰陽不交,雖復至盛,密雲至于西 雲不雨,自我西郊」者,小過者,小者過於大也。 爻,已止於一卦之上而成止,●故不上交而爲雨 之才治小過之失,❸能獲小過在隱伏者,有如公之弋 小過之時爲過猶小,而難未大作,猶 不能爲雨也。施之於人是柔得過而處尊,未能行 五位是小過於大,陰之盛也。 注「除過」至「能雨也」。 獵,取得在穴隱伏之獸也,故曰「公弋取彼在穴」也 施、廣其風化也,故曰「密雲不雨,自我西郊」也。 也。 六五,「密雲」至「已上也」。 除 過差之道 ,每在於文德懷之,使其自服 所 正義曰: 以 「密雲不雨」也。 陰盛於上而艮止之, 「雨」者,以喻德之惠 在 一隱伏。 正 一義日 以 以 艮之陽 也 郊 六得 小過 其

化

8 0

⁰ 咸」,嘉本同,阮本作「或」。

比」,嘉本同,阮本作「即」。

[「]才」,阮本同,嘉本作「弋」。

止 於」,嘉本 同,阮本作「上於」。

除」,嘉本同,阮本作「際」。

取之是尚威武,尚威武即「密雲不雨」之義也。

者,釋所以「弗遇過之」,以其已在亢極之地故也。 費,復何言哉! 故曰「是謂災眚」也。《象》曰「已亢」 過至於亢,无所復遇,故曰「弗遇過之」也。以小人之 過至於亢,无所復遇,故曰「弗遇過之」也。以小人之 過一中遇,必遭羅網,其猶飛鳥,飛而无託必離矰 身過而弗遇,必遭羅網,其猶飛鳥,飛而无託必離矰 身過而,是調災眚」者,上六處小過之 上六,「弗遇」至「已亢也」。正義曰:「弗

₩ 紫上 既濟。「亨」至「終亂」。正義

小」也。 故曰 之初雖皆獲吉,若不進德脩業至於終極,則危亂及之, 但人皆不能 既萬事皆濟,若小者不通則 位,皆得其所。 名,「既」者,皆盡之稱,萬事皆濟,故以「既濟」爲名。 「既 「初吉終亂」也。 小者尚享,何況于大? 濟,亨小,利貞,初吉終亂」者,「濟」者,濟渡之 居安思危,慎終如始,故戒以今日。 當此之時非正不利,故曰「利貞」也 有所未濟,故曰 則大小剛柔各當其 「既濟,亨

《彖》曰,「既濟」至「道窮也」。正義曰:

見,故從省也。「利貞,剛柔正而位當」者,此就二、三、 矣,故曰「終止則亂,其道窮也」。 濟无終,既濟終亂由止故亂,①終止而亂則既濟之道 理皆獲其濟。 行,故惟「正」乃「利貞」也。 四、五並皆得正以釋「利貞」也。 也。具足爲文,當更有一「小」字,但既疊經文,略足以 二以柔居中釋「初吉」也。 小者皆亨也。 ·終止則亂,其道窮」者,此正釋戒: 若能進脩不 既,濟,亨,小者亨也」者,此釋卦名德。 但舉小者,則大者可知,所以爲「既 物无不濟所以爲吉,故曰 以柔小尚得其中,則剛大之 「初吉,柔得中」者,此就六 剛柔皆正則邪不可 既濟之亨,必 「初吉」也。 ·止則 既

其後患而豫防之。 在火上,既濟」也。但既濟之道,初吉終亂,故君子思上,炊爨之象,飲食以之而成,性命以之而濟,故曰「水上,炊爨之象,飲食以之而成,性命以之而濟,故曰「水不火上,既濟,君子以思患而豫防之」。 正義曰:《象》曰,「水在」至「豫防之」。正義曰:

「曳其輪,濡其尾,无咎」者,初九處「既濟」之初,體剛初九,「曳其輪」至「无咎也」。 正義曰:

尾,其義不有咎,故云「无咎」。 故云「曳其輪、濡其尾」也。 居下是始欲濟渡也。❶ 始濟未涉於燥,故輪曳而尾 但 志在棄難 ,雖復曳輪 濡,

也。 日 正而見侵者,物之所助也。處既濟之時,不容邪道 間,近而不相得,能无見侵乎? 執守中道故也。 量 居初、三之間而近不相得。 二居中履正,處文明之盛而應乎五,陰之光盛者也,然 喪其茀,勿逐,七日得」者,「茀」者,婦人之首飾 「婦」者,以明自有夫而他人侵之也。 |斯勢也,不過七日,不須已逐而自得,故曰「勿逐,七 時既明峻、衆又助之、竊之者逃竄而莫之歸 六二,「婦喪」至「中道也」。 《象》曰 「以中道」者,釋不須追逐而自得者,以 夫以光盛之陰處於二陽之 故曰「婦喪其茀」。 夫以中道執乎貞 正義曰:「婦 也。

> 日 有 有

臂焉。高宗德實文明而勢甚衰憊,不能即勝,三年乃 伐鬼方,三年克之」者,「高宗」者,殷 勢既衰弱 克,故曰「高宗伐鬼方,三年克之」也。「小人勿用」者 能濟者也。 高宗伐鬼方以中興殷道,事同此爻,故 九三處既濟之時,居文明之終,履得其位 九三,「高宗」至「憊也」。 ,君子處之能建功立德,故興而復之, 小人居 王 正義曰:「高宗 武丁之號 ,是居衰末 也 而

> 之日就危亂,必喪邦也,故曰「小人勿用 也 」者,以衰憊之故,故三年乃克之。❷ _ 象》曰「憊

五相得,如在舟而漏矣。 舟漏」者也。 有衣袽,終日戒」者,王注云「繻,宜曰濡,衣袽,所以 戒」,以不與三、五相得,懼其侵克,有所疑故也。 衣袽、終日戒」也。《象》曰「有所疑」者、釋所以「終 衣袽也。 六四,「繻有」至「所疑也」。 鄰於不親而得全者,「終日戒」也,故曰「繻 六四處既濟之時,履得其位 而舟漏則濡濕,所以得濟者, 正 而 義 近不與三、 日 繻

鄰殺牛,不如西鄰之禴祭,實受其福 如我 如 有東鄰不能脩德,雖復殺牛至盛,不爲鬼神歆饗。 居中,動不爲妄,脩德者也。苟能脩德,雖 所務者,祭祀而已。 「牛」,祭之盛者也。「禴」,殷春祭之名,祭之薄者 九五居既濟之時而處尊位,物既濟矣,將何爲焉? 西鄰之時」者,神明饗德能脩德致敬,合於祭祀之時 西鄰禴祭雖薄,能脩其德,故神明降 九五,「東鄰」至「大來也」。 祭祀之盛,莫盛脩德。 也。 福,故曰 《象》曰「不 薄可饗。 正義 九五履 日 : 也。 正 其

⁰ 下」,嘉本同,阮本作「中」。

之」,阮本同,嘉本作「也」。

八八

後世。 儀肅敬,甚得其時。 曰:《詩》云「威儀孔時」,言周王廟中羣臣 義曰:並略《左傳》之文也。 薄 降 ○注: 福 故曰 「沼沚之毛,蘋蘩之菜,可羞於鬼神。」正 一時 也。 此合時之義,亦當如彼也。 「吉大來」者,非 ○注"「在於合時。」正義 助祭,並 惟 當 身 皆 福 威 流

日

厲」也。 也。 其首 可久長者也 濟則首先犯焉。 既被濡首,將没不久,危莫先焉,故曰「濡其首、 ·厲」者,上六處既濟之極則反於未濟,若反於未 上六,「濡其」至「可久也」。 《象》曰 「何可 若進而不已,必遇於難,故「濡其首 久」者,首既被 濡 身將陷没,何 正義曰:

離坎上下 未濟。 「亨」至「无攸利」。 正義

用中、委任賢哲,則未濟有可濟之理,所以得通,故曰 之時,小才居位,不能建功立德、拔難 不免濡, 无餘力,❷必須水汔方可涉川。 者,將盡之名。小才不能 未濟,亨」。「小狐汔濟,❶濡其尾,无 「未濟,亨」者,「未濟」者,未能 豈 有 所利? 故 日 濟難,事同 小 狐汔 未及登岸 濟 濟 小 流濟險。 渡之名也。 狐 攸利」者,「汔 濡 而 雖能 其尾 濡 若能執柔 其尾,濟 渡水而 , 无 未 攸 濟

> 利 也

可濟之理,故稱「未濟」,不言「不濟」也。 不當其位,故即時未濟。 義。凡言「未」者,今日雖未濟,後有可濟之理。 二相應,納剛自輔,故於「未濟」之世終得亨通也。「小 不續終」者,濡尾力竭,不能相續 濟,以其力薄,未能出險之中故也。「濡其尾,无攸利 狐汔濟,未出中也」者,釋小狐涉川,所以必須水汔乃 「无攸利」也。 二,釋「未濟」所以 :「未濟,亨,柔得中」者,此就六五以柔居中,下應九 彖》曰 「雖不當位,剛柔應」者,重釋「未濟」之 「未濟」至 得「亨」。柔而得中,不違剛 剛柔皆應,足 剛柔應也」。 而終至於登岸,所以 得相拯,❸是 以其 正 有 與 義

在水上、未濟」者、火在水上不成烹飪、未能 未濟之時剛柔失正,故用慎爲德,辨别衆物,各居其 「火在水上,未濟」。「君子以慎辨物居方」者,母君子見 《象》曰,「火在」至「居方」。 正義曰: 濟物,故 火 日

⁰ 汔」,原作「沆」,據嘉本、阮本改。

能, 本同, 阮本作「難」。

足」,嘉本同,阮本作「是」。

阮本同 嘉本作「弁」,下同。

方 ,使皆得求其所,❶所以 濟 也

「不知極」也。 没其身也。 濟之初始於既濟之上六,濡首而不知,遂濡其尾,故曰 則能反,故不曰「凶」。 始入於難,未没其身。 其應,進 其尾、吝」者、初六處「未濟」之初、最 曰「聚斂積實,不知紀極,謂之饕餮」,言无休已也 反,頑亦甚矣,故曰「吝」也。 始,始於既濟之上六也。 初六,「濡其」至「知極 則溺身,如 然以陰處下,非爲進亢,遂其志者 ○注「不知紀極」者。 小狐之渡川,濡其 此言「濡其尾」者,進不知極,已 不能豫昭 既濟上六但云「濡其首 《象》曰「亦不知極」者,未 事 也。 正義曰:《春秋傳 之幾萌,❷困 居 尾 險 正 也。 下 義 而 E : 未濟之 也。 欲 而 上 後 木 之 濡

也。 吉」者,位雖不正,以其居中,故能行正也 者,言其勞也。 剛中之質以應於五。 曳其輪,貞吉」者,九二居未濟之時,處險難之内, 一声也。 經綸屯蹇,任重憂深,故曰「曳其輪」。「曳其輪」 九二,「曳其輪」至「行正也」。 正義曰: 《象》曰「中以行正」者,釋九二失位而 循難在正,❸然後得吉,故曰 五體陰柔委任於二,令其濟難者 「曳其輪 稱

濟 征 凶」者,六三以陰柔之質,失位居險,不能 六三,「未濟」至「不當也」。 正義曰: 白濟者 「未

> 《象》曰「位不當」者,以不當其位,故有征 也。 之,若能棄己委二則 「未濟,征凶」也。 身既 不能 自 濟, 利 而 没 涉 欲 大川」者,二能 溺 自 可 進求 免故 濟,必 \exists 「利 則凶 拯 喪 難, 其 涉 身, 而 故 川 己 H

里大國之賞,故曰「有賞於大國」也。 者,釋九四失位 順文明而居尊位,不奪物功。 於險,其德未盛,不能即勝,故曰 威、故震發威怒、用伐鬼方也。 居文明之初,以剛健之質接近至尊,志行其 未濟之時,履失其位,所以爲「悔」。 、吉而悔亡,故曰「貞吉,悔亡」。 正 而終吉故也。 九四,「貞吉」至「志行也」。 而 得 「貞吉,悔亡」者 九四既克而還,必得 然處文明之初,始出 「三年」也。 但出 志既行,靡 也,以其 《象》曰「 正義 險 正,正 難 Ŧi. 正志得 E. 志 之外 以柔 禁其 行 則 居

貞

之主,故必正然後乃吉,吉乃得无悔,故曰「貞吉,无 「貞吉,无悔」者,六五以柔居尊,處文明之盛,爲未濟 六五,「貞吉」至「暉 吉也」。 正 義 티 :

行

0 0

6

求」,嘉本同,阮本作「安」。

昭」,阮本同,嘉本作「照」。

循」,嘉本同,阮本作「靖」。

得吉也。 得吉也。 「君子之光」者,言君子之德,光暉著見,然後乃矣,故曰「君子之光」也。「有孚,吉」者,付物以能而矣,故曰「君子之光」也。「有孚,吉」者,付物以能而矣。故曰「君子之光」也。「有孚,吉」者,付物以能而矣。 以表順文明之質居於尊位,

故 者,釋「飲酒」所以致「濡首」之難,以其不知 既濟,既濟之道,則所任者當也。 失於是矣,故曰「有孚,失是」也。《象》曰「亦不知節」 所以「濡首」之難及之者,良由信任得人不憂事廢故, 難還復及之,故曰「濡其首」也。「有孚,失是」者,言 「濡其首」者,既得自逸飲酒而不知其節,則「濡首」之 疑,故得自逸飲酒 曰:「有孚于飲酒,无咎」者,上九居未濟之極 也。 上九,「有孚」至「不 而已,故曰「有孚于飲酒,无咎」。 知節 所任者當則信之无 也。 則 止 反 正 節 義

周易正義卷第十

計一萬一千七百四十日

周易正義卷第十

開 國 「子祭酒 國 [子臣 孔 上 穎 護 達奉 軍 曲 勑 阜 撰 縣

周易繫辭上第七

之義。 有綱係,所以音謂之「係」也。 係之義。 退藏於密」,是其「无」也。下篇明「幾」,從无人有,故 上、下二篇經文、《繫辭 文取「繋屬」之義,故字體從「毄」。 言」,是繫屬其辭於爻卦之下,則上、下二篇經辭是 「易有太極」,太極即「无」也,、又云:、「聖人以 繋辭 》。分爲上、下二篇者, 知 焉以 幾其神乎」。 聖人繫屬此辭於爻卦之下,故此篇第六 義 卦之與爻各有其辭以釋其義,則卦之與爻各 E: 断其 謂之「繫辭」者,凡有二義,論字取 吉凶」,第十二章云「繋辭 今謂: 》條貫義 分爲上、下更无異 何氏 夫子本作「十翼」,申 궁: (理,别自爲卷,摠曰《繫 上篇明「无」,故曰 又音爲係 (義,直以 焉以 者, 此洗心 章 取 盡 其

> 之道」共爲一章。 所取也。 日 衍之數」爲第八章,「子曰知變化之道」爲第九章,「天 天下之賾」爲第六章,「初六,藉 爲第四章,「顯諸仁,藏 象」爲第二章,「彖者言乎象者」爲第三章,「精氣爲物 理必不通。諸儒所釋上篇,所以分段次下,凡有 大小分之,義必不可。 者也,日月之道貞明者也。」豈復易之小事乎? 之行,豈爲易之大理? 之」。又云:「藉用白茅,无咎。」皆人言語小事及 出其言善則千里之外應之,出其言不善則千里之外 之小理者,事必不通。 「白茅」以下歷序諸卦,獨分「負且乘」以爲别章,義无 「白茅」章後,取「負且乘」更爲别章,成十三章。 書不盡言」爲第十二章。 地二」爲第十章,「是故易 重大, ●是以分之。 周氏云:「天尊地卑」爲第一章,「聖人設 虞翻分爲十一章,合「大衍之數 案:「大衍」一章, 摠明揲蓍策數及十 或以上篇論易之大理、下篇論 故知聖人既无其意,若欲 諸 何則? 又下《繫》云:「天地之道 用」爲第五章,「聖人有 馬季長、 有太極」爲第十一章,「子 用白茅」爲第七章,「大 案: 荀爽、姚信等又分 上《繫》云: 」并「知變化 强釋 以 明 君 一 十 貞 小 觀 以 觀 慎

❶ 「直」,嘉本同,阮本作「有」。

有八變之事,首 知神」及 一 章 ? 「唯幾」之事,全與「大衍」章 今從先儒,以十二章爲定。 尾 相 連。 其「知變化之道」 養不 類 已 何 下, 得 别 合 明

此 静,各有常 此「卑高以 其位矣。 以 位矣」者,「卑」謂 體 則乾坤之體安定矣。 地卑,乾坤定矣」者,天以 明乾坤簡易之德。 萬物之形。 上,高不處高,謂天在下,上下既 「卑」者,便文爾。案: 成,静 略也。 常則成柔,所以剛柔可斷定矣。 陳列,則物之貴賤得其位 (得「乾坤定矣」。若天不剛陽, 不得定也。 章明天尊地卑及貴賤之位,剛柔動静、寒暑往 天尊地卑」至「其中矣」。 而 「動静 此經明天地之體。 无常 度 陳」,不更 此「貴賤」摠兼萬物,不唯天地而已。 則剛 此經 則 :有常,剛柔斷矣」者,天陽爲動,地 地體卑下,「高」謂 柔道不 柔 明 聖人法之,能見天下之理。 斷 别 前經云「天尊地卑」,天地别 夭 乾健與天陽同,坤 陳, 定 地 <u>寸</u>, 剛陽而尊,●地以 矣。 摠 之德 矣。 此雖明天地之體,亦 是剛柔 云「卑 動 也。 亂,則 而 若卑不 地不柔陰,是 若動 天體高上。 有常 高」者,上 雜亂、 卓 萬物貴賤 而 正 則 處卑,謂 高 順 動 无 義 成 以 與 柔 静 常 剛,静 文詳, 陳,貴 地 曰 陰 卑 无 則 乾 「天尊 陰 而 來,廣 陰爲 先云 高 坤 剛 涉 不 地 此 卑, 同 賤 之 平 則 道 而 在 既 第

> 形見,即 摩,八 柔共相 雲行雨 運 故 陰生而推去一陽。 卦,遞相 也,柔則陰爻也。 静, 在 此經雖因天地之性,亦 所同則吉也,若乖其 者,「方」謂法術,性行以類共聚,同方者則同 陰氣多而 剛 形」謂山川草木也。 物」謂物色、羣黨共在 行, 地成形 云「八卦相 柔不 亦 、卦相 摠兼 施 可 切摩,更遞變化 寒一 推 陽極變爲陰,陰極變爲陽 斷 ,故變化見也。 ,變化見矣」者,「象」謂懸象,日 爲静也。 盪 盪。 萬物也。 定 盪 暑」者,重 」之事。 也。 若十 也。 剛柔兩體是陰陽 雖 此 「方以 萬物稟於陽氣多而爲 所 懸象運轉而成昬明 「鼓之以雷霆,潤之以 諸 經 明 月 也。 廣包萬物之情也。 趣 桂 卦 論 上經 「是故剛 處 類聚, 則 遞相推 既相推盪,各有功之所 天 「八卦 陽 而 凶 地 與他物相分别。 生 「變化見矣」及 也, 物以羣 之性 而 柔相 移,本從 相 故 推 陽剛而 二爻,相 盪 也。 去 曰「吉凶生矣」。 摩」者,以 」者,剛 分,吉凶 月星辰 「在天成 Ш 此 陰,五 陰柔, 八卦 風 動 雜 一澤通 雖 一剛 雨 也,稟於 聚也。❷ 而 則 若順 天 日 日 生矣 而 成 陽 故 柔 月 也 地 而 動

^{● 「}天」,阮本同,嘉本作「謂天」。

^{2 「}同」,嘉本同,阮本作「固」。

不可 物艱 説上 也。 此 易 凝静,不須繁勞,以此爲能 也。 簡 知,故曰「乾以易知 作,故但云「知」也。 始在於氣,故云「知其太始」也。 亦 地,陰之形,坤能 云「成」也。「乾知太始」者,以乾是天陽之氣,萬 而 鼓動運行之物,故不言之。 離、坎,不云乾、坤、艮、兑者,乾、坤上下備言,艮、兑非 日 成」者有故,以乾因陰 論 能 司 簡 |坎月 出山澤也。 生,故乾得 「乾以易知」者,「易」謂易略,无所造爲,以 一乾以 知也。「簡則易從」者,覆説 難則不可以知,故以 乾 省,若求 能也,必簡省而後可能 」,論 又鼓動 意 .坤既有此性,人則易可 易 乾 易知」也。 知,心 動 坤之體性 之以震 而行 而 自 「乾道成男,坤道成女」者,「道」謂 行, 然 无 造作以成物 之則易可從也。 也。 而 險 雷 已 乾德既 節爲 也。 爲男,坤 離 難 而得成男,坤因陽而得成 成之物,事 電,滋 坤 易 則 「易則 寒, ,故曰 而得 其實亦兼 也。 能説「易」,若求 相 以簡能」者,「簡」謂 倣效也。 也。 潤 得自然 和 上一坤 知也。 節爲 「坤作 易 「坤以簡能」也 「易則易知」者,此 之以 親 上「乾以易知 可營爲,故云 初 知, 始 暑。 焉: 故 巽 以 簡則易從」者 而 「易知則 若於事繁勞則 成物 云「易 无形,未有營 簡 風 成 ●雷電 直云震、 能 坎 女。 而 一者,坤 雨 知 也。 行 有親 坤 女,故 物皆 則 若於 此爲 之則 簡 自 風 或 巽 省 云 是 雨 離

> 易」至「之體」。 簡則 就, 理並得其宜矣。「天下之理得 者,此則贊明聖人能 久」、「可大」,以賢人目之也。 久」、「可大」則是離无人有,賢人亦事在有境,❷故「可 今云「賢人」者,聖人則隱 賢人事業。 賢人之德」也。 德」者,使物長久是賢人之德,能養萬物,故云「可 害,故可久也。 乾坤之義得定矣。 」者,易含萬 成立卦象於天地之中,言並 |況「立象」,言聖人極易簡之善 也。 故曰「易從則 此二句論 有 所益也。 「易從則 行天地之道, 摠天地之功, 唯聖 象,天地最大。 正義曰:云「先明天尊地卑以定乾坤 人 「可大則賢 「有 法乾坤,久而益大。 有功」。 有功」者,於事易從不有繁勞 「有親則可 功則可大」者,事業有 若天之不尊降 行天地易簡之化,則天下萬事 迹藏用,事在无境。 此二句,論聖人法此 人之業」者,功 久」者,物既 「易簡而天下之理 若天尊 天 而 地 成位乎其中」者,「成 則 也。 在 能 可 地卑各得其所 滯溺,地之不卑 通天下之理, ○注「乾坤 和親 / 勞既 久則 功 萴 人能 今云「可 了, 其 賢 无 大則 積 得 人之 久則 相 坤 功 之 是 易 易 可

親

則

體

能

位

⁰ 嘉本同,阮本作「一」。

本 同 阮本作「則」。

是非 亦有非 卑」至 爲自 凶」。○注「天地之道」至「易簡」。 是人例,亦是以 術 者,則貴賤非 經貴賤位矣。 爲體,坤 用,非 進 \exists 也 各自别言,❸而 成」者,釋經「坤以 道,不爲 「方,道也」,是方謂 卑高以陳 无 在 坤 坤 |至「生矣」。 云「聖人不爲,羣方各遂其業」者, 然,養物之始也 爲之化。 類聚也。 剛 亦 爲簡 天地 明矣」。 性、 類 盛 有易 而善始」者,釋經之「乾以 以 而聚者。 也。 則 也。 趣 順 之體,今云乾坤之體 乾坤 ,故注合而言之也。 舍, 唯天地,是兼萬物之貴 爲 上經既 若以人比禽獸即是 經之所云者是也。 注合云「天地」者,若以坤 類聚 正義 正 云 體 故《春 注 簡能 之體 義 故 故 性 若陰 「則 日 : 一天 , 是 曰 : 也 行法術也。 云「天尊地卑」,此 云 何 也。 涉 , 故 地 秋》云「教子以 自然成物之終也。 之所求者陽,陽之所求 「天尊 云「方 由 乎 「乾坤之體」。 易簡 굸 定矣? 萬物,貴賤之位明矣」, **案**: 順 者是所用之體 有 地卑之義 至 所同 非 用 言「方」雖 經 若據乾坤 易 正義曰:云「天地之 類」者,❶「方」謂 案 : 類 使聖人俱 「其 知。 賤。 「乾易」、「坤 聖人顯仁 則 ,雖男女不 經 乾坤 德 義 對乾, 吉, 既 「不勞 又云「貴 ○注 業」。 方」。 注 以 是 相 乖 列 是 「天尊 行易 類 乾 :合皆无 乾爲易 所 天 者 方 而 正 注 簡 趣 可 亦 而 以 地 用 聚 賤 陰 有 則 云 有 俱 法 解 經 地 健 之

> 至察則 是天下之理未得 見其成功始末,皆有德之與業,是所有形器,故以 物,在於有境,是入於形器 之時,不見其所爲,是在於虚 之力,不知何以 唯 滋章,則物失其性 行説易簡 目 不爲也。 不生而物自 天下之理,莫不由於易簡 之賢 其德業。 見 生 也。 无徒。」又《莊子》云: 養之功,不 云「德 静、任 然則本其虚无玄象謂 ○注 生,不化 業既 照 物自 也 「天下之理」至 也。 見 臨,是聖人用无爲以及天下, 成 其 生,則 而物自 《老子》云: 則 何 人於形器」者,初行德業 以 也。 物 而 「馬翦剔羈絆 生 无。若德業既成,覆被 化。 得 各得順其分位」者 養, 賢 其 分 人之分則見其所爲 之聖,據 猶 、性矣。 「水至清 若不行易簡 位 若 日 所 故《列 其 月 則 傷 見 成 義 无 多矣。 是聖 功 其 曰 子》云 法 若 事 賢 未 照 業 於 云 成 X 臨

章 也 聖人設 前 章言 天地 卦 成 象、 至 成 不 形 利。 簡 易 之德, 正 義 日 明 乾 此 坤 第 之

❷ 「坤」上,嘉本有「之」字。

[「]言」上,嘉本有「而」字。

^{)「}簡易」,阮校云錢本作「易簡」。

吉

也

若其。

剥

利

有

攸往

」、《離》之九

四

「突

九

之凶

者是失之象,故曰「吉凶

者是失得之象也

初

時

及爻不言「吉凶」者,義

有數

等。

吉凶據文可

有失有得

積漸

成著乃爲吉

凶 或

也。

然《易》之諸

明言吉凶

者,若《乾

》「元亨利貞」及

九

五、飛

在

,利見大人」之屬,尋

文考義是吉可

知,故不

須 龍 JL

句

經

摠明諸

象不

同

之事。

辭之吉者是得之象,辭

變化,

事非一體,是「而

生變化

也。

「繋解

而

一爻,委

曲

爻、陽爻交變,分爲六十四卦,有三百八十四

卦之與爻,其象既定,變化猶

少。

若剛柔二氣

相

推,陰

則 直 而

包之可知也。

岡 者,

柔 悔

相推而

生變化

」者,八純之卦

若不繫辭,其理未顯

,故繫屬吉凶之文辭於卦爻之下.

顯 云

而

明

一吉凶

吝憂

虞是

凶中之小

,别舉吉凶

明此卦爻吉凶

也。

案:

吉凶之外猶有悔吝憂虞

者,進退之象;

剛柔者,晝夜之象。」是施

設

其

(卦,有

一吉凶

者,失得之象也;

悔吝者,

憂虞之象;

象也。

「繋辭焉

而

明吉凶」者

,卦象、爻象有

吉

有

M

象,法其物象

然

後設之,卦

象則 畫其

有

吉

有

凶

一; 故

下 觀 大旨。

此

章明

聖

人設

卦

觀

象,爻 設

辭

吉

M

悔

吝之

細

别

「聖人設

卦

觀象

一者,謂

聖

人

卦之時莫不瞻

明繫辭之意。「

剛

柔

相

推

而生變化」,明其

推引 明吉

而 M

卦》之意

也。

「是故

吉凶者,失得之象

也

]者,此

下

異。 凶以 之九三二 念虞度之形象也。 得 此 事 嫌其不吉,故言「吉」以明之。 吉凶也。 則 吉,大貞 者,若不有善應則有咎,若有 乃字」,是吉凶 二「屯如邅如,乘馬班 故 其 棟 悔 如此。 虞之象也 失相 皆 无嫌,吉凶灼然可 刺 吉,行惡則凶。 不 來 達其理,不可以 隆吉」,是一卦相形 若《訟》卦「有孚窒惕 言 凶 如 正之。 牀以足, 蔑貞凶」、六二「剥 其 一狀灼 形,須言吉凶。若《大過》九三「棟橈凶」、九 凶一是一 焚 君子終日乾乾 諸稱「吉凶」者、皆嫌其 区 原夫《易》之爲 事 如,死 然而言凶 |者,經 若《坤》之六五「黄裳元 也。 ·已過, 未 **宋定,亦** 如,棄如」之屬,據 亦 爻相 是吉凶 以 一爻爲例,義有變通 稱「悔吝」者,是得 意 有爻處吉 知 也。 也。 如 憂虞不已未是大凶,終致悔吝 有 形 而更明言 書, ,夕惕若厲,无咎」,若《屯》之<u>六</u> 不 匪 追 ; 中 也。 未定 或有 言 悔 《屯》卦九五「屯其膏, 曲 寇婚媾,女子貞不字,十年 善應則 古凶: 吉,終凶」之類是也。 推 之也。 明萬象 凶之際,吉 亦 ,亦不言吉凶。 此餘可. 有 吉 牀以辨,蔑貞 卦之内,或一爻之中 八吉凶 也。又諸 其 凶 方,以 无咎,此亦不定言 「吝」者,當 荷 失微 文 事 「者,若《剥》之初 不 知也 也。 辭 相 N N 在 明,故言「吉 其 瓜小,初 形,始 釋 陰居尊位 未定,行 「悔吝者 稱「无咎 若《乾 以凶」者 亦有 凶 可 事之 小 見 貞 四 於

九六

化,故 序也 浸被 耽 悔吝,見 者,言君子愛樂而習玩 之, 2是易位之次序 此之故,君子觀象知 能見吉凶而成變化也。「是故 之道也」者,此覆明變化進退之義,言六爻遞相 則陽日照 此 時 者,由觀易之位,次序 用」,若居在乾之九三而安在「乾乾」。 生變化,是天、地 始而上進,或居終而倒退 化者,進退之象也」者,萬物之象皆有陰陽之爻,或從 而 以祉」、「有慶」、「有福 玩 而 不言者,下經備陳之也,故於此不言。 亦 則 可 、萬物 也。 説。 」者,以其在 有 云「進退之象 是吉象之境,有四 輕 善則思齊其事,見惡 鄙 臨 且《易》者戒人爲惡,故於惡事 卦之與爻皆有其 而皆柔弱,是夜之象也。 恥 ,萬物生 故, 故 則 上,吉凶 、人三才至極之道,以 「无咎」之屬, 云「吝 也 也。 其 也。 所 者,是六爻之辭也。 」之屬,❶各於爻卦别言,故 也。 若居 [德别 顯其得失,變化明其進退,以 工剛,是 「剛柔者,晝夜之象也」者,晝 處,故可居治之位而安静居 ,以其往復相 辭 「所樂 則懼 吝既 善 但爻有變化, 言, 在 君子所居 畫之象也。 補 乾之初九而 而 而玩 是小 故 過是 自改,所以愛樂而 「六爻之動 於此 其 是以 推,或漸變而 M 者,爻之辭 也。 其餘 備言 事 而安者,易 不 則 兼 取象既多 所居 夜則陰 辭有吉凶 言 此 《易》之 安 《三才,故 也。 元 推 也 亦小 在 而 動 不在 亨利 變 「勿 也 之 安 極 其 潤 頓 吉 爲 而

> 爻辭。 義」。 利 化 以從天以下悉皆 則 言 辭 爲下而言,故云「此摠言」也。 以 而習玩其占之吉凶。 而 身之善惡; 惡 以 是故君子居則觀其象而玩其辭」者,以易象則明其 (虞之象」,「剛柔者,晝夜之象」,是别明悔吝晝夜也 也。 焉 決疑」,是 觀其變也。 知 玩其占」者,言君子 ,解則示其吉凶 」者,君子既能奉遵易象以居處其身,无有 悔吝則吉凶之類」者,案:上文「繫辭 而明吉凶 得 正義曰: ○注:「此摠言也。」正 失, 云「而下 故 而習 動 君 《春 玩 云「始摠言吉凶 别明悔吝畫 `剛柔相推而生變化」,是始摠言吉凶 子 元其 i祐之。 其占 一,故 秋傳》云「先王卜征 尤 、辭以曉事之吉凶。 所 若《乾》之九四「或躍在淵」,是動 出 君子自居處其身觀 也。 愛樂, 「吉,无不 行興 「是以 夜」者,謂 外動之時 義 所 ○注 變化 日 以 自天祐之, 吉, 无 利」,此《大有 特 書 者 此「設 則觀其爻之變化 次文云「悔吝者 굸 五年」,又云「ト 一則陽 而明吉凶」, ,謂上文云「繫 「爻之 「動則觀其 看其象 卦 剛」至 觀象」 凶 辭 ž 害,是 以以 「其 也 摠 九. 知

0

[「]以」,阮校云閩、監、毛本作「有」。

^{) 「}可居」,阮校云監、毛本作「居可」。

굸

失得重也。「悔吝者、憂虞之象」、是失得輕也。 别序其義」者,案: 又上文「剛柔相推而生變化」,不云「晝夜」,是摠變化 上文「繋辭焉 明」者,案:上文云「繫辭焉而明吉凶」,次文别序云「吉 言之也。云「下則明失得之輕重,辨變化之大小,❹故 化」、「剛柔」合爲一,次文則别序「變化」、「剛柔」分爲 化者,進退之象」,「剛柔者,晝夜之象」,上文則「變 而著」者,上文「剛柔相推而生變化」,次文别序云「變 類,則同因繫辭 凶」、「悔吝」,兩事同因上繫辭而明之也,故云「吉凶之 化」、「晝夜」是一,分之則「變化」、「晝夜」是殊,故 柔相推而生變化」,次文别序云「變化者進退之象」,❸ 吉凶之類」。云「晝夜亦變化之道」者,案:上文云「剛 吉凶,若細别之,❷吉凶之外别有悔吝也,故云「悔吝則 是吉凶之外别生悔吝,是悔吝亦吉凶之類。大略摠言 文别序云「吉凶者,失得之象」,❶「悔吝者,憂虞之象」, 變化之道,俱由剛柔而著」也。 剛柔者畫夜之象」,變化之外别云晝夜,摠言之則「變 夜亦變化之道」也。云「吉凶之類,則同因繫辭 合之則同,分之則異,是變化從剛柔而生,故云 「變化者,進退之象」,是變化大也。 而明吉凶」,不云「悔吝」,是摠言之也 而明」也。 次文别序云「吉凶者,失得之象」,是 云「變化之道,則俱 云「故始摠言之」也 「剛柔者,晝 公由剛柔 又次 而 云

> 化别明小大,是别序其義。 夜之象」,是變化小也。 兩事 並言,失得别明 輕 重 變

者,言論其卦爻失之與得之義也。 病必預有憂虞,故前章云「悔吝者,憂虞之象」。 也」者、辭著悔吝者、言説此卦爻有小疵病也。 云「吉凶者,言乎其失得也」。 象,故云「吉凶者,失得之象」。 凶者,言乎其失得也」者,謂爻卦下辭也。著其「吉凶 乎變者也」,謂爻下之辭,言説此爻之象改變也。 也」、「彖」謂卦下之辭、言説乎一卦之象也。「爻者言 綸天地之道,仰觀俯察,知死生之説。「彖者言乎象者 故此章更委曲説卦爻吉凶之事。 三章也。上章明「吉凶悔吝」繋辭之義 據其象,此章論其辭也。 彖者言乎」至「生之説」。 「无咎者,善補過也 「悔吝者,言乎其 此章據其卦爻之辭,故 是以義理深奥,能 前章言據其卦爻之 而 正 細 義 意未盡,6 日 有小 但 小 此 前 疵 第

0

章

[「]文」,阮本作「又」。

[「]序」,嘉本同,阮本無此字。 「若」、嘉本同、阮本作「是」。

大小」,嘉本同,阮本作「小大」。

悔」,原作「侮」,據嘉本、阮本改。

九八

則乾 天地 小小疵 其所之」者,謂爻卦之辭,各斥其爻卦之之適也。 則 稱「无: 適於善則其 明謂之「大」,其道 能 之言辭是也。 凶者存乎辭」者,謂辯明卦之與爻之吉凶 往大來,吉亨」,《否》則「大往小來」之類是也。 小大,故齊辯物之小大者存乎卦也。 此之故 論 過 又誰咎也 也。 震无咎者存乎悔」者,「震」,動 凡説易; 自悔過 - 賤也。 道 也。 也 者其禍自己 之美。 健以法天,坤 準」者,自此已上論卦爻辭理之義 案《略 咎」者 病。 一是故 陳列 若之適 前 也。 例》 齊小大者 章舉其大略 言聖 辭 能 、物之貴賤者在存乎六爻之位 但 列貴 即 「是故卦有小大,辭有 「憂悔吝者存乎介」者,「介」謂 招,无 善 預 如此 否 此 「无咎」有 人作《易 ,若之適於惡 憂虞悔吝者, 順以 賤 銷散謂之「小」。 桂 塞 **光**者少。 存 者 所 爻能 一, 其 法地之類是也。 ,故不細言「无咎」之事 存乎位] 乎卦 怨咎,故節之六三「不 》與 辭則艱險 補 = 此據多者言之,故 天地 」者,以 其 則 存於細小之疵 也。 過,若不 」者,以爻者言乎 其 相 者善能 也。 若之適通泰,其 準。 辭 動 彖者言乎 險易」者,其 惡 猶若《泰 而 解 ,自此已下廣明 能 也。 謂 无 補 故 ,存乎卦爻下 補 也 咎 皆 準 過 能彌綸天 過 「《易》與 者,存 象,象 者, 丁, 纖 節 擬 故 云「善 病也。❶ 》則「小 上貴 則 「辯吉 天 之嗟 介,謂 无 若之 道 章 有 地 補 愐 咎

> 卦 者,❷則 即 卦 者存乎解」與「齊小大者存乎卦」,二文相 是爻辭者,但 義 其吉凶則死生可 數 事 故 故知 察,知无形之幽,有形之明,義理 牽引 於天文,俯以 「文」也。 地 易 日 也 , 故 之道 物之終末 知死生之説 「齊小大者存乎卦」是也。 能 幽 此 云一辭 `覆説「言象所以明小大」也。 止謂 明之故」者,「故」謂 彌綸天地之道。 補合牽引天地 辯吉凶者存乎 辭 地 用易道 有山 ,始終吉凶皆悉包羅 爻辭 以 察於 爲「爻辭」 卦辭變化 」者,言用 《易》 識也。 111 地 也」者,其實卦之與爻皆有其 原隰、各 參其逆順 與 理 也。 之道 少,爻辭 天 辭」是也。 ○注 易理,原 者,天有懸象而 彌 地 用用 二謂 云「言象 事 有條理 相 云「言變化所以 川則 「辭,爻辭」 也 準。 彌 此 變 以 事 禍 窮 縫補 云「故小大之義存乎 故 化 易 一故稱 故 福 此之故 事 云「吉凶之狀見乎 爲 派所以 多,此 以 道」也 也。 可知 物 合,「綸 此 用 至「之差」。 之初 之故 成文章, 易 理 明 對。 「原始反 經 知 知 ,用蓍策 道 小大」者 明吉凶 始,反 也。 「辯 死 仰 上 仰 謂 聖 既 生之 吉 觀 故 人 以 經 IXI 正 求 復 用

- 本 作「乎」。
- 化」,嘉本無此字。

所釋。 也。 吝者存乎介」是其四也,「震无咎者存乎悔. 乎卦」是其二也,「辯吉凶者存乎辭」是其三也,「憂悔 者,謂吉一,凶二,悔三,吝四,无咎 於經數之爲便,但於注理則乖。 五者,皆數 者之差」者,謂於吉凶下,歷 者,大則爲吉凶 辭 爻」者,覆説「言變所以 也」者,謂悔吝无咎 言乎變者,❸謂皆從爻變而來。 云「悔吝、小疵、无咎,皆生乎 「列貴賤者存乎位」是其一 ,小則爲悔吝无咎也。 明吉 ,體例與吉 X 次言 也。 五者 今並 變」者,謂 五。 凶 云 也,「齊小大者存 一也 「悔吝无咎,❶ 云「故下歷 然諸 之差别。 云「事有 存焉,任 皆是 」是其五 儒以 皆 坐 小大」 後賢 言 於爻 爲: 也。 \overline{H} 其

化,故於此章明之。 神情狀。 章 能 知 生 極 也。 鬼神之情狀」者,能 變爲死,成變爲敗,或 則分散,將散之時,浮遊精魂 知鬼神之内外情狀 氤氲積 上章明卦爻之義,其事 精 此章説物之改變而爲鬼神、易能 聚而 氣 爲 爲萬物 物」至「鮮 云「精氣爲物」者 窮易 也 也。 未 理 死之間變爲異 物 杰 遊 既以 矣」。 類稍 去離物 魂爲變」者 生 聚 死 盡,但卦爻 變化 而 正 謂 形 生, 義 類 而爲改 陰陽 通 以 日 以 物既 也。 鬼神 散 此 精 未 此 變,則 之故 積 而 是故 之變 靈 明 第 死 聚 之 鬼 四

> 是 皆 違 周 者,「範」謂模範,「圍」謂 仁」之化,故能愛養萬物也。 皆欲安静於土,敦厚於仁。 理,故不憂也。「安土敦乎仁,故能愛」者,言萬物之性 自 知 移淫過。若不應變化,非理而動,則爲流淫也。 不流」者,言聖人之德應變旁行,无不被及,而 者,所爲皆得其宜,不有愆過,使物失分也。 地合也。 神,是與天地 天 言 圍天地之化養。 地能 天地者也。 知 命,故不憂」者,順天施化 知周於萬物,天下皆養是 聖人以易之理 是 性命。 鬼神 知鬼 「知周乎萬物而道濟天下」者 所 順天道之常數,知性 池神,任 爲。 相 一曲 似。 而 但 其 成 言法則天 能 所爲所作,故不違於天地 極 萬物 變化。 然也。 聚 周 散 而 圍,言聖人所爲所 之理 聖 是歡樂於天,識 「與 地 聖人能行 不 道 「範圍天地之化而 人 遺 濟天 以 天 命之始終,任 亦 則 施其化,而不有 地 者,言聖人隨 窮 知 下 相 神 鬼 此「安土」、「 也。 ,聖人无物不 似 神 盡 故 性,能 之情 「故 物 不違 「旁行 作,模範 能 自 始 不 「樂 不 不 狀 過 然之 有 終 與 知 過 過 也。 是 而 失 天 知 天 流 而 鬼

0 0

[「]云」,嘉本作「至於」。

[「]坐」,嘉本、阮本作「生」。

③ 「言」,嘉本作「生」。

知。 无之謂 往,无一 微妙 太虚 用 此道爲是知 道 爲陰之功,在陽之時而不見爲陽之力,自 則彼此相 无陰无陽乃謂之道。 則 言之謂之一,以體 自此已上皆神 繼之者善也」者,道 故神无 通 之功 然 求 朔 者人之本性,若性 而 不 乎 屈 不 不不 知道之功力 不 測,●是 无所營爲,此則 也,夜則 是仁之與 也。 晝 曲 知」者,言萬方百 者,唯善行 測謂之神 可分别 體可定也。 方而 夜 委 形,有二有三不得爲 之道 (也,故云「仁者見之謂之仁,知者見之謂 細 聖人以人事名之,隨其 无 易 幽 成 知,皆 唯一 之所 无 也,言通 而 也 就 以 方 體 知 言之謂之无 也 萬 是 應機變化謂 道之謂 可明 仁 爲, 」者,神 一者 而已,故以 言 資 物 生物 者成 「成之者性也」者,若 道 姓,恒日日賴用此 陰 言言 道 得爲无者,无是虚 曉於幽 聖人 也。 冥 而 而 開 則 就 聖 也。 陽之謂 味 不 得 通 以以 能 易 此 寂 人 有 不 成仁、 明之道 一善是 之易, 然,虚 一爲无也。 極 通 道 故以言之爲道 則 物得開 遺 以 神 一爲仁 故在陰之時而 曉 隨 棄 功 道」者,一謂无也, 義 之幽 於畫 爲 知 順 摠 物 細 无 而 理 也。 性,知 功 理養 改變,應變而 陰陽 然 道以 而 通 小 一,立其 无事不知 近无,虚 夜之道。 隱之德 而有 謂之道,以 言之,皆虚 而 能 若其有境 故 百百 物 深遠 得 不 百 者 成 陰陽 稱 故 成 生, 无是 姓 就 成 姓 不見 號 也 也 也 H 之 就 此 數

> 之稱。 用此神 敦仁 情狀 謂從 神之功用也。 所施爲。 則此經「情 子,不 云「方體者 上」至「體明」。 之道,❸幽冥悉通 案:下云「神无方」,韓氏云「自此以上皆言神之所 也 用 皆係於形器」也。 度,不可 而 」,❹「範圍天地」,「曲成萬物」,「通乎晝夜」,此皆 ,與天地相似。 「神无方」以上至「精氣爲物」下經之所云皆言 不 亦少 凡 知 道 能 「神」者,微 處 以 則 知 測 狀」是 一乎? ,皆係於形器」者,方是處所之名. 所形形 被 也。 各 則 作《易》者因自然之神以 天下,雖 正 滯 何 質, 虚 故能 於所 義曰:「自此已上皆言神之所 有 云「神 故 注「盡 「知周 **炒玄通** 无之神。 處所 非 君 見,百 是 知鬼神之情狀。 子 是神之所 則 是「神 聚散」 虚 之 萬物」,「樂天知 陰陽不 不不 无,皆係著於器 姓 道 聖人極 則日 可測量,故 鮮 至「不 .: 矣 爲,亦是聖人 方 測 用 虚 者 也。 垂教,欲使聖 通 不 无之神 既 知 君 能 云「易 命 注 正 幽 明 子 知 體 物 」,「安十 「自此以 :知變化 爲」者, 微 是 鬼 義 體 謂 2,故云 八所爲 神之 爲」, 則 形 不 日 道 聖 可 質 君 X

❷ 「以」,嘉本同,阮本作「而」。 ● 「測」,嘉本同,阮本作「難」。

[「]知」,嘉本同,阮本作「如」。一以」嘉本同,阮本作「而」

❶ 「土」,原作「上」,據嘉本、阮本改。

是「寂: 之發作 之也。 功顯」 常在 化 風 殺,萬物運動 可爲象。 可爲象」者,謂 由 云「況之曰道」者,比況道 難,不可常通。 不知變之所由,是无形體也,二則隨變而往,无定在 者神則不見其處所云爲,是无方也,二則周遊運 變所 无方」、「无體 風 雨 雖 是 ,亦是无體 也。 云 雨 既 有 適」者, 者,猶 然无體,不 「易无體 道是虚无之稱,以虚无能開通於物,故稱之曰 「道者何,❷无之稱 云「无不通,无不由 功 動 无 極之後,萬 處,亦是无 「无不由」者,言 至如 用 用 心 ,本其用之所以亦在 以 而 若風雨 既 ",皆由 也。 天覆地 生 成,是「有之用極,而 寂 也。 是 也 道既虚无爲體則 萬物 然幽 可 /變易, 物賴 ○注 方也。「无體」者, 爲象」也。 是有之所用,當用之時以无爲心, 道 0 凡「无方」、「无體」,各有二義: ,其功成 載,日照月臨,冬寒夏暑,春 静 而然,豈 此 「道者. 云「不可 唯 萬物皆因 而无體,不 路以 風 者, 」者,若處於有,有則爲物礙 變之適,不 雨 云「必 就 爲稱 此韓氏 何」至「一陽也 一見其所營,知其所爲? 而 以一方一體明」者, 乃 於「无」也,故至乎「神 得生 不爲 之而 也。 在於无形。 ·可以 无之功顯」。 有之用日 自 一是自然而 有 育,是生育之功 礙難,故「无不 「寂然无體,不 通, 問問 形象求 定 其道 由之而 極,而 往, 何 ,是不 動,不 是神 一而釋 正義 无之 生秋 變 可 有。 而 解 有

> 唯在 无方而 道 必 之成」者, 終由道而生,故言「陰以之生」也。 陽之時 日 亦 在於陰而无於陰,言道所 无,无此陰也。云「在陰爲无陰,陰以之生」者,謂 陰之與陽,雖有兩 測,千變萬化 之時道未見 云「因神以明 云「窮變化以 不 由道而成,故言「陽以之成」也。◆ 「君子體道以爲用」者,謂 離 虚无,因此虚无之神以明道之所在,道亦虚无,故 道 於陰 易无 亦以爲虚无,无 陽」也。 而 謂 施 道雖在 陽 體 也。 政 道 盡 聖 -0 神」。 陰陽雖 則《老子》云「爲而不宰,功 也。 人則 云「故 氣,恒用虚 自 陽,陽中必无道 注「君」 [然无 云「因 窮 陰陽雖殊、无一以待之」者、言 由 窮 此 此千變萬化 在皆无陰也。③ 爲 變以 道 子 陽 神以 之道 成,即 也。 无之一,以擬待之。 體 聖人爲君 盡 道」至「極 明道 可 神 「在陽爲无陽,陽 在陰之時亦以 陰陽 也。 顯 道雖无 以 者,神則 見 者,謂盡 盡神之妙理 亦非道 子 雖 矣,當 雖无於陰,陰 體 也 无於陽,陽 於 成不居 履 **於陰陽,然** 神之理 杳 其 於 正 故 道 爲 然 有 一, 故 至 義 日 LI 雖 虚 在 不 用

0 0

[「]是」,原作「骨」,據嘉本、阮本改。

[「]云」,阮本同,嘉本無此字。

[「]在」,嘉本同,阮本作「生」。

[「]之成」,嘉本同,阮本作「成之」。

爲, 觀其道、 不可 亦鮮 知則 見: 以語至而言極也」者,若能 之文以結成此義。 不能 道者,不 通 也 生 如 語 矣」。 由 滯 徧 此 曉,是 至而言極也 之妙趣,謂 道 所見也。 二者觀 可 亦鮮矣」者,是聖人、君子 而 云「故常无欲以觀其妙」者, 以 來, 知 語説 滯 道 則 故云「百姓 於所見 至於百 謂 滯 不爲所爲,得道之妙 其 一无欲 道爲「仁」,「 於 至理而言其極趣也。 所 也。 姓 見 」謂无心 无欲觀此道之妙 日 但 是 者, 用 知 道 H 而 言 用 既 」者觀 ,若能寂 獨能 不 以 通 知 爲用、若以 理 生之道,又不 道 知 悟道 引老子《道 也。 也。 謂 雖 然无心无欲 若不如 理、无事无 道 ,故云「不 睯 云 云 爲 猶 「始可 體 知 有 此 經 斯 知 以 偏

无事无爲,不與聖人同用、有經營之憂也 道之功用能鼓 知 異 也。 也。 ,是「藏諸 至矣哉」者 能全无以 「顯諸仁」也。 章論神之所爲,此章廣明 顯 顯諸 諸仁」至「之門」。 用 仁」者,言道之爲體 動萬物,使之化育,故云「鼓萬物聖人化 ,聖人爲功用之母, 爲 也。 體 「鼓萬 「藏諸用」者 ,猶有經營之憂。 物 而 不與 謂 易道 體同於道 Œ 顯見仁 潛藏功用,不 聖 義 道 之大,與 一人同 日 則 功,衣 虚无爲用 ,萬物由之 此 憂」者,言 「盛 神 第 德 被 使 功 Ŧi. 大 物 萬 不 章

有禦止 皆 天是大矣,故下云「廣大配 也 故 其變化乃得通也。 者,謂 也。 化 之法,擬坤之順,故謂 健,故謂卦爲 改易,生必有死,易主勸戒,獎人爲善,故云「生」 生次於前生是萬物恒生,謂之「易」也。 以謂之「大業」。 及其占之與事,并明神之體以廣大悉備,萬事富有,所 者,自此 而 死」也。「成象之謂 明易理之大。 由 云「通變之謂事」。 矣哉。 |者,「禦」,止也,言乎易之變化窮極 通 也。 故云「陰陽不測之謂神 合變其德,日 [陰陽,或生或 「生生之謂 窮極蓍策之數豫知來事,占問 衆 也。 「通變之謂事」者,物之窮極 已下覆説「大業」、「盛 事 於行謂之德、於事 以 謂无所止息也。 「乾」 之 易」者,生生,不絶之辭。 易之變 「日新之謂 而 日 成,本其所由之理,不可測量之謂 也。 凡天下之事,窮則 理 增 「陰陽不測之謂 乾」者,謂畫 之「坤」也。 新,是德之盛極 「效法之謂 是 化,極 聖 天地」 人 盛德」者,聖 謂之業。 「夫易,廣矣大矣 以 極 於四 德」。 也。 言乎 盛之 卦 「極數 坤」者,謂畫卦 遠 成乾之象,擬 通則静 須變, 一, 欲 吉凶,故云「謂 因 德 神」者,天下萬物 「富有之謂大業 是廣 幽深之遠, ,故謂之「盛 以言乎遠則 前後之生變化 一人以 廣 使 知 陰陽變轉 明易與 廣 矣, 開通 萬 來之謂占 大之業,至 而 能變通 事 窮 正 乃 則不 效 乾 不 乾 生 德 此 神 知 > 坤 之 굸 坤

坤之德也。 二,①唯專 時」者,四時 「廣生」。 開生萬物,故「其動 正,❷故云「其動 此經明乾,復兼明坤也。 也直,是以大生焉」者,上經既論易道資陰陽 道,徧滿天地之内,是則備 夫坤,其静也翕, 邇」,近 也。 道廣大配合天地,大以配天,廣以配 也專」。 云「生」也。 刻 乾坤易簡」,「可久可大」,配至 天體高遠,故 互文也。 謂變化之道,於其近 陰陽之義配日月,易簡之善配至德 對 章,易爲 遠尚不禦,近則不 也,言易 對則乾爲物始,坤爲物生,散則始亦爲生 則 若其 坤是陰柔,閉藏翕斂 變通,易理 而已。 德、 「以 「廣大配 賢 業別 運 也 之變化, **乾** 人之德,簡 其 言乎天地之間則備 轉則四時不忒,寒暑无差,剛 直 也闢」。 若氣不發動 動 _ 》云「大生」; 亦能 天地 散 也 以其動 乾是純陽,德 則 樂,可 處,物各静 闢,是以廣生焉」者,此 矣。 在 變通 以 業 一者,此經申 於 爲 由 其如此,故能 「夫乾,其静 賢 邇 静 則 知 故 , 故 德 地 極 人之業,今摠 近 近 静 如此,故能大生焉。 而 體廣博,故 「其静也翕」; 而 之處 既 微妙之德也。 云「變通 而專一,故云「其 地。 能 來,俱 E矣」者 得 明易之德。 静 」者,案: 普備,无 正,不 則 正 「變通 也 廣 則 寧 爲 配 事,其 變 而 生 命坤 遠 静 煩 德 云至 四 成, 於物 經 所 通 配 動 而 亦 亂 而 也 時 故 故 $\stackrel{>}{\succeq}$ 章 以 則 明 得 偏 故 動 之 四 静 邪 得 成也。 貴也。 0 0 宜 謂 也。 故言 道 子 户 得

谎

焉。

也。

易

行也。 設於位 物之性,使物生不失其性,存其萬物之存,使物 存,道義之門」者,此明易道既在天地之中,能 天地之間萬物變化,是易行乎天地之中也。 矣」者,變易之道,行乎知、禮之中,言知、禮 故法地也。 「天地設位, 知、禮之用。 廣業也」。「知崇禮卑」者,易兼「知」之與「禮 從此 至極,聖人用之增崇其德,廣大其 曰易其至矣乎」者,更美「易」之至極, 也。 「崇效天,卑法地」者,知既崇高故效天,禮 其宜 了子曰」。 若以實象言之,天在 性謂禀其始也,存謂保其終也,道謂 「禮」者卑敬於物,象地柔而在下,故以 易一而 ,謂知之與禮而效法天地也。 也。 ○注 「知」者通利 「夫易,聖人所以 來,故 「萬物 既能「成性存存」,則物之開通、 云道 由之」至「之跡」。 而易行乎其中矣」者, 萬物,象天陽无不覆,以 義之門」。 上,地在下,是天地 崇德 「而易 (業,故 謂 而 正義日 廣業 易 公二二崇 開 語 與 與 行 「成性 一,故 之别 、物之得 通 易 天 卑 得 成 乎 道 以 設 也,義 義爲 其 其 其 而 卑 地 位 存 萬 存 並 中 陳 退 用 爲 明 而

- 本、
- 本同,阮本作「則」。

不可知 玄空相 心无 者,欲言論變化之理,不知涯際,唯「稱極乎神」, 不知所以然,將何爲 始」者、言欲明兩儀天地之體、必以太極虚无爲初始 言物之造作,非由我之宰主所爲。 我,理自玄應」者,此言神力也。 无體,不可以物之形容所求 謂不可尋求也。 也,萬物之體有變象可尋,神則微妙於萬物而爲言 化之極以爲名也。云「妙萬物而爲言」者,「妙」謂微 義曰: 云「神也者,變化之極」者,言神之施爲,自將 經營之跡,則有憂也。 跡」者,言聖人順通天下之理,内則雖是无心,外則 是不能「全无以爲體」。 是其「全无以爲體」,聖人則无心有跡,是跡 以有爲用。 「不與聖人同憂」也。 化 雖 者,言若能知天之所造爲者,會能窮其物 跡、聖人則亦 體 ,静坐而忘其 也。 應 道以 而 云「夫唯知天之所爲者,窮理體化,坐 云「未能全无以爲體」者,道 自 爲 然造作也。 用 云「不可以形詰」者,杳寂不測, 事 者 无心有跡。 及遺 始也 · 言 ○注「神也者」至「於神矣」。 道則心跡俱无,无憂无患,故云 云「故順通天下則 棄所照之物 ? 聖 云「是以 而 云「言變化 人 聖人能 不 窮詰也。❷ 我」,謂宰主之名也。 能 其造化之理,自 明 无 ,任其 體 兩 憂之事, 而 則 附於道,其 儀以太極爲 稱 云「造之非 自 心跡 有 有 理, 極 然 而心 經 道 乎 之理 俱 一志遺 无形 營之 神 則 也, 神 无 无 則 然 妙 戀 有 跡 正 无

> 故云口 也。 測 也。 无,但行之不已,遂至全无不測,故云「資道而同於道 教資取乎道,行无爲之化,積久而遂同於道,内外皆 以神爲名」也。 者,謂不可思量而玄遠覽見者,乃目之爲神,故云「則 道之目也。 由 不 大宗師》篇也。 言天之道亦如 神而冥於神」也 以 无體无方以垂於教,久能積漸而冥合於神,不可 此皆謂聖 云「由神而冥於神也」者,言聖人設教法此 他 則以道爲稱」。 事 係 言至極空虚 心 人初時雖法道 此 端 云「蓋資道而 云「至虚 也。 然玄寂, 「坐忘遺照」之言,事出《莊 云「不思而玄覽,則以 而善應,則以道爲稱」者,此 而善應於物,則乃目之爲道 如此 、法神以爲无、體未能 同乎道」者,此謂 者乃能 知 天之所 神爲 此神之不 聖 爲 一人設 子 名 也 无

周易正義卷第十一

計一萬三百二十一字

「云」,嘉本無此字。

0

② 「詰」,嘉本同,阮本作「語」。

周易正義卷第十二

開 國 國 子祭酒上 子 臣 孔 護 穎 軍 達 曲 奉 阜 勑 縣 撰

也。 貪非位 章也 擬 難 以 易 宜 陽 此 慎 以 言語 物 剛 諸 見,聖人有其神妙以能見天下深賾之至理 證 象以贊成變化。 配於天地,道義從「易」而生。 成之。 宜於剛 理則擬諸乾之形容,見此柔理則 其形容」者,以此深蹟之理擬 六十四 象其物宜」者,聖人又法 ,凡有七事。 上章既明易 ,同心行,動舉措,守謙退,勿驕盈 聖人有以」至「如 「聖人有以見天下之蹟」者,「蹟 卦 也,若象陰物宜於柔也,是各象其物 皆擬諸 又明人擬議之事,先慎其身,在 道 是行之尤急者, ●故引七卦之義 形 變 容, 化 象其物宜 神 蘭 公象其物 理 0 此章又明聖人擬 不 度 諸 測,聖人法之,所 正 擬諸 之所 物 義 也 形容 曰 曰 ,保静密, 坤之形 若 宜 二謂 也。 泰卦 此 也。 若 之所 第 幽 一而 見 於 議 象 深 勿 六

> 賾, 則爲凶 之,不可 下之至賾 事 斷定其吉凶。 逆於順 云「爻者言乎變者也」。 自此已上,結爻義 之通變,而有三百八十四爻。 焉以斷其吉凶」者,既觀其會 變通,當此會通之時,以 行其典禮」者,既知萬物以此變動, 有 成 四 知 「否」之形容,象其「否」之物宜 擬「泰」之形容,象其「泰」之物宜。 而爲爻也。❷ 夫爻者效也,效諸物之通變,故 其微妙,以見天下 卦象之義也。 卦是也,故前章云「卦者言乎象者也」。 也。「是故謂之象」者,以是之故謂之象 卦象義也。 道 也。「是故謂之爻」者,以是之故,謂此 鄙 也。 而 賤 不 輕 「言天下之至動 若會通典禮 可惡也」者,此覆説 惡 「聖人有以見天下之動」者, 謂聖人於天下至賾之理,必重慎 也。 萬物之動也。 若鄙 施行 得則爲吉,若會通典禮失 賤 其典 通 於此爻下 也 輕 而 而 惡,不存意明之,則 不 行其典禮,以 法禮儀也。 舉 「而觀其會通,以 可 觀看其物之會合 前文「見天下之 若 此 亂 而 繋屬文辭, 否 者,覆説上 也。 也 言 此 掛 一,謂 以 則 會 謂 諸 「繋解 「言 上章 定 通 聖 上 六 比 卦 明 爻 之 結 + 可

- 「尤」,嘉本同,阮本作「於」。
-) 「謂」,嘉本同,阮本作「議」。

〇六

之。 **0** 則先議 也。 在幽陰 則惡 也。 感我之恩, 共 與爾靡之」者,言我 上 之而後動也。 近 子 覆説上「天下之至動 言「子曰」。「況其邇者乎」者,出 人欲言之時,必 擬之而後言」者,覆説 聖 ,言身有 靡散之。 既 議之事。 日 人見天下 明 亦 若以文勢上下言之, 可 ,論説之時 君子 我有好爵」者,言我有美好之爵而在我身。 知, 此引中孚九二爻辭 擬議 也 而鳴,其子則在遠而和 隨 ,則能成 之,故引 居其 樞 善惡,無問遠近皆應之也。 故 亦來歸從於我。 謂我既 我擬議於善以 而 之至 一謂 日 「擬 動 擬 冗況 室」者,既 若擬 户 明 盡其變化之道 度 議 動 樞 有 雖 不可 「鳴 其 之而 以 不可亂也」,謂欲動之時,必 好爵 有好 邇者 議 成其變化」者,言則先擬 上「天下之至賾 鶴 爻之義 機 錯 於善則 後言也。「議之而 及物, 能 明《易》辭 爵,不自 宜云「至 也。 在 乎」。 亂 謂 是 陰 也 之,以 善 靡 弩牙,言户 鳴 也), 若 其言 也。 物 往 散 善 此證 鶴 取 獨 亦 則 來應之,若擬 以 動 其同 錯 謂 在 同 善遠 「鳴鶴在陰」者 善 2 以 施 有 明 不 而 亂 天 幽 類 言行,君 前 善 | 者 於物,物 ,吾與 擬 |類相感 樞之轉 · 可 惡 不 則 下 來,皆 陰之處, 尚 語 而 相 議 可 乖 後 至 應 已 應 應 汝 而 動 也 亂 違 賾 之, 絶, 我 也 以 子 動 證 則 外 於惡 議 一吾 召 變 正 也。 也 明 明 有 聖 物 故 證 動 理 動

> 之,盛 心,其 應 類,故 其時雖異 者,言同 言,其臭如 出 其文勢已絶,故言「子 則 豈 者,言行雖初在 或 於語。 氣, 或或 同 於 可不慎乎? 闇 類 物,或是 香馥 言 纖 後笑也。 弩牙 彼物而 相 利 類相應本在於 利 「二人同心,其利 (), 應,以同人初 如蘭也。 蘭」者,言二人同齊 之甚 之發 能 感應之事,其意則同,或 處,或此物而默,或彼物 或 斷 子曰 同 於身,其 也。 截 非 或 中 於 也 人先號 此謂二人言同 此謂 金。 或 君子 日。 心,不 否 言 善惡積而不已,所感 未 三人心 咷 金是堅 和 猶 之道」者,各引《易》之後 斷 行,君子之所以 「或出 必 而後笑」者,證 同, 言 金」者,二人 其 共 行 心, 同 故先號咷; 剛 行 也 之 或處,或默 之物, 同 動 吐 處 而 事。 也 發 應 語 從 於 言 , 出 若 能 或 擬 身 同同 動 語 出 動 同 斷 後得 此 處 議 而 或 天 天 或 齊 默 氤 心 而 物 而 發 語 地 地 之 其 默 丽 動

此 外 第七章也。 物 來 初六 藉用」至「盜之招也」。 此章欲求外物來應,必須擬 故 引 藉 用 白 茅,无咎 一之事 議 IE 謹 證 義 慎 謹 日 則

⁰ 之, 嘉 本 無此

² 阮 本作

既

所

慎

庭

龍

則

之理 之物 其恭敬,以存 功,而不自以 不自伐其善也。 之後,故 本,禮以 功卑下於人者也。 人」者,言《易》之所言者,語説其謙 卦九三爻辭以 乾》之上九「亢龍 生,則 公、欲 錯 周密,故引節 · 您咎之有,是謹慎之至 絜白之茅,可置 盡 由 无咎 有悔」者,上既以謙德保位 忠 言 且 諸 言恭 求外物來 不 語 置 此 地 言 恭爲 |者, 言「子曰 以 於 一藉 而 語 避 地 爲 可 又明擬 其位 爲恩德、是篤 主。 用 危 以 謙 亂 證 矣」者,「苟」, ,其理可 應,非唯謹 之初九周密之事 白 難,爲 爲 「有 之階梯也。 _ 之也。「子曰勞而 階 茅」、《大過 有 者 也者,致恭以 於 德 「德言盛 「勞而 悔」,●證 也 地。 議之道, 者 貴 功而不德,厚之至」者,雖 君 矣。 言 盛 謀 「階」謂 也。 「藉之用茅,何 慎 新 厚 由 言今乃 不 事 ,禮言恭」者,謂 且 7,又須 ,此明无 · 禮 非 之 恭 伐」者,雖 「勞謙 驕 也 君不密 初 存其位」者 但 至 君 德 亢 以 六爻辭 尚 梯 謙 保 極。 不 謙 明 不 卦 錯 謹 恭 不 也,言亂之所 君 謙 謙 其 慎,薦 慎 之。 而 以下 九三,能 置, 敬, 則 伐」者,以 語 密 則 禄 謙 不 也 也 失臣 子 咎之有 子 驕, 了,言謙 故 退 位 人,故引 有 也 乃 有 以 藉 德 示不 也。 日 疲 悔,故引 凡 終,吉」 彰 以 日 又 以 其 子 」者,臣 此 勞, 當謹 出户 功 亂 退致 德言 有 引 盛 露 一亢 其 物 薦 H 生 之 爲 有 下 其 卦 獻 而 而

用

苟

何

事。 害成 失身 子合乘 相 密 慎 之所 此、大盜思欲 也,則盜竊之人思欲奪之矣。 處大,以賤貪貴,故引解卦六三以明之也。「負也 致寇至」者,此又明 奪之,故 子 須 臣 乘也者,君子之器」者,言乘車者,君子之器物,言君 人之事 · 盗 密 取,盛衰相 密 也 日 事 也。 慎 爲 不 也 作 則乘此機 車。 若 預 出 《易》 云「作《易》者,其知盗 臣 使 一是 幾 不密 人居 也」、「負」者、檐負於物、合是小人所 户 防 不 在 今應負之人而 庭,於 變,若 以 密 伐之矣。 禍 事 者, 下 一人則 上 -聞之,衆共 君子 危 害。 則失身」者,言臣之言行 不 其 位 密 而 擬 此 此 必 知 若其 慎 則害成」者,「幾」謂 竊之。 乘此機危而害之,猶若 議之道當量身而 爻有釁隙衰弱 義言之,亦謂 盗 驕 密 慢藏 乎」者, 慢, 不 而 、嫉怒, 乘 「易」者,愛惡 不出 密 誨 車,是小人乘君子之器 而 「上慢下暴,盗思伐 乎」。 而 在 盗 害 此 漏 」者,於易言之是身 下 此 結上不密 泄,禍害交起,是 「《易》曰負且 不 必 ,則彼爻乘變 臣 容誨淫 妄出 行,不 暴 既 幾微之事 而 虐,爲 相 殺之,是 有 言 攻,遠 <u>,</u>可 財 失 虧失則 爲也 語 以 之不 身 政 者 乘 也 之 如 之 TTT 沂 失

0 悔 原 作 海 據 嘉 本、 阮 本改

女子妖 故首尾皆稱「《易》曰」,而載《易》之爻辭 「《易》曰 以 比 云,是盗 藏 財 小 冶 物 負且乘,致寇至,盗之招 其容,身不 而 之招 守 居 掌 貴 來也 不 位 謹 一,言自 0 精 慤 則 驕 , 是 教 矜 招 誨 教 而 來。 於 誨 不 也」者, 盜 淫 謹 於盜 者, 者,使 慎 也 以 而 使 又引《易》之 慎 致 來 來 重 寇 淫 取 其 至 己 此 也 也 物

爽云: 有太極 地 減 康 四 生 十二辰、二十八宿 五十,其用 第八章明占筮之法,揲蓍之體 有 之策以爲六十四卦,而生三百八十四爻。「大衍之數 之數五十有五者,其六以象六晝之數,故減之而 五 成 氣 四 五 云: + ,大衍又減 九。」但 欲以 謂 大衍 卦各有六爻,六八四十八,加 「天地之數五十有五 《乾》初九「潛 辰居 四十有 時 北 虚 五十之數,義有多家,各有 生 辰 來實,故 之數」至 位 五. 也。 不動,其 ,故四十九也。」姚 九」者,京房 行, 也,凡五十。其一不用者,天之生 太極 五行生十二月,十二月生二十 用四十 龍 祐 餘 生 勿用」, 兩 四十九轉 一,以五 九焉。」馬季長云: 云:「五十者,謂 神矣」。 儀 ,顯天地之數,定 故 兩 一行 用 信、 儀 運 氣 四 乾 其説, 生 董遇云: 1、坤二 + 通 而 正 日月,日 用 九 義 也。」 凡 也 用, 曰 Ŧī. 乾 : 一天 日 鄭 荀 月 坤 此

> 揲之餘 閏 歸 五十 五十 四 三才也。 就 以 是。 内 明不可言之義。」只如此意,則别 也,故不數之。 蓍者,唯 謂 百二十,其 此 再 四爲數 四十 去其 相 自 四 殘 兩儀之間,於天數之中,分掛其 説 扐 聚 揲 也。 敷以 1然,所 今案 去大略三十二月,在 而 天之數,最 餘 九分而爲二,以象兩儀 一,餘有四十九,合同未分,是象太一也。 歸 後 用 意皆與 分而 「揲之以 以以 數 今依用之。 \pm 此 卦 用 四 須 神 弼 象四 殘 策 此 + 一者,既 云 神 奇 諸 策 顧 者 成 有 時。 四,以 雖非 末 於 懽 儒 演 九。 推 唯 閨 分天地,天於左 之餘 用 所 不同 同 演 天 也。 「分而 歸 數, 天 地 扐之策而 Ŧī. 王 其 象四時」者,分揲其 地 之數,所 歸 + 弼 一不用,以 五歲之中,故 因 奇於扐以 五 萬物之策, 之數,唯 爲二以 此 數 之合於扐 就 歲 也。 説,故顧 而 五十 再 无所以 成數,以法象天道 顯 賴 掛一 閏 象兩」者,五 手, 故故 象閏」者,奇 者 用 而 策中 其 者, 凡 五. 五 掛之一 地 配 懽 虚 虚 自然 以象三」者 有 + + 兩 无, 於 其 云: 凡 歲 萬 其 策 儀,以 蓍,皆 右 前 再 而 非 所 據 立 也 數, 閏」。 閏 千 + 有 所 用 王 後 此 以 此 用 揲 五.

❶ 「比」,嘉本同,阮本作「此」。

所以 數五十 期之日」者,舉合乾、 爻有三十六策,六爻凡有二百一十六策也。乾之少 鬼神」也。「乾之策二百 據坤之老陰,故百 之少陰,一爻有三十二,六爻則 據老陽之策也。 行鬼神之用,言鬼 變化,言變化以此陰陽而成,故云「成變化」也。 十也。 地、陰陽、奇偶之數,非是上文「演天地之策」也 數。「地數三十」者,摠 相得,合爲土 得,合爲木; 合爲水; 歸 、三、五、七、九 爻 之劫 揲 有二十四策,六爻故 成變化 也。 爻有二十八策,六爻則有 「五 位 百 有五」者,是天地二數 而 地 六十 又以 而行鬼神」者,言此 二與 掛 地 相 也。 ·日,舉 之,是 四 74 「坤之策百四十有四」者,坤之老陰, 得 天七 也。 四 神以 「天數二十有五」者, 摠合 與 四十有四 而 揲 (天九相得,合爲金; 天 坤兩策,有三百有六十,當期之 各 再 其 「地數 地 相得,合爲火; 合 扐 有合」者,若天一 此 大 之 一十有六」者,以乾老 陰陽 五偶之數也。❶ 而 略,不數 數 也。 百四 後 五」者,謂二、四、 最 相 掛 有 而 陽奇陰偶之數成就其 一百六十八策。 合爲五十五,此 也。 末之餘,又合 「凡三百 + 得 一百九十二。 五. 有四 宣 「天數 H 一行,故 天三與 與 四 策 凡 有六十,當 地 分 Ŧī. 五」者, 굸 六相 日 地 天 五 與 陽,一 於 一而 此經 若坤 之一 此經 奇之 而宣 乃天 地之 「此 地 八 前 行 相 所

> 九、有 五,而 若兩少 四則 風 此 多 也。 若三者俱少爲老陽 若三者俱多爲老陰,謂 爻有三變,謂 也; 蓍策,乃成易之一變也。「十有八變而 百八也。 也。 也。 爲兩多一少 有八變乃始成卦 百九十二爻,爻則三十六,❷摠有六千九百 ,二篇之爻,摠 日 「是故 陰爻亦一百九十二爻,爻别二十四, 八,是二變也,第三揲亦不四則八,是三變也。 「二篇之策, 月、 有八也,或有二 一箇八而有 其兩多 多爲少陰 Ш 陰陽摠合,萬有一千五百二十,當萬物之數 四營而成易」者,「營」謂經營,謂 澤,於 初 也。 一少爲少陽 萬 大象略 有三百 揲不五 也。 謂 謂 如 有 箇四,或 此三 箇 一 千 初 初得九,第二、第三俱 初與二、三之間,或 「八十 四而 得 則 八 盡 者,謂 變既 + 五 五、第二、第三 九,是一變也; , 是 有 有 而 四 百二十、當 易 畢 二箇 小成 三揲 爻,陰陽 箇九 道 乃 定 八而 之間 小 」者,象天地 成 成。 , 此 一爻,六爻則 卦 摠 各 或或 有 俱 萬 有四,或 爲 第二揲不 四 」者,每 有 半: 引 箇 得 得 物 兩 有 度 _ + = 四 八也 之 四 少 經 千 陽爻 而 五 數 笛 也 伸 有 誉

^{) 「}數」,嘉本同,阮本作「類」。

^{) 「}則」,嘉本、阮本作「别」。

0

却本虚 於无 蓍何 推 殺之象,是不可以无明也。 其 因 易之太極之虚无也。 得成也。 而 非 无,无形之數是非可數也 所以堪用者,從造 故云「不 是 斯易之太極」者,「斯」,此也,言此「其 虚 於无,始知 於有」者,言虚无之體處 來,故易從太一 數之一,摠爲五十,故云「非數而 「故常 不 无也。 一用,其 由 无。 得 須因 於有物之極,而必明其所由之宗」者,言欲 用 即四十九是有形之數,原從非數而 用 而用以 一有 猶若 若欲明虚无之理,必因於有物之境,可 也? 无 有 用 物至 中 春 一從 爲始也。 言「非 化虚无 之通」。 · 有 生、秋殺之事,於 極 生 示 无形 之處,而 殺 用 數 。 ③ 而生 之理,是明无 處皆虚,何可 所 而 就有境之中見其生殺 ,即无數 言「夫无不可以无 而 然有 用 數 也。 來 明 者 以 以以 其 則 形之數,由 若无造化之生,此 數以 之成」者,太 也。 虚 所 四 不 + 无之時 由 必 以 之成」也 用 凡有 不用」者,是 宗。 九 因於有 无説之,明 而 來,故 得 皆從 不見 若易 非 儿明,必 也 用 也 也 由 明 生 无 將 而 虚

2

當

論「用

所以

并言「不用」爲「用

五

十者

^{● 「}報對」,嘉本同,阮本作「對報」

[「]親」下,原行一「〇」,删。

[「]之」,嘉本、阮本作「无」。

太 , 0 有 且 何因 有 由 如此,皆由於 於 无,變 化 虚 由 於 无 自 神, 然 皆 而 是 來 所 也 由 之宗 也

君子將 曰 : 動之狀,故卜之與筮 之道 所用,并言「卜」者,卜雖 法 動 辭 謂 聖 自 爲 道 名數,可 活凶 一人所用 然 而 者 法其爻卦之象,若造弧矢,法「睽」之象,若造杵 興 聖人發言 「小過」之象也。 ,是以君子 出 取 此 動 也。 自然 , 其 有四,又明易之深遠,窮極 吉不取 言 有爲也,將 第九章 營爲,故 知神之所 而 而 與助成神化之功。 「易 之道者,凡 也 以言 施 而 將欲 X 政 有聖人之道四焉」者、言《易》之爲書、有 則 知 也。 施 也。 命 教 能 法 變化」 有行 蓍 政 有 也 知 爲乎」者,言易既 其 上章既 「以卜筮者尚 也。 教 有 所 尚 神 以 陰 以 四事 也 者,貴尚其爻卦 施 化 制 陽 其 龜 問問 至 爲 動者尚 之所爲。 其 變 器者尚 爻卦 明大衍之數,極 之見兆, 焉。 此又廣明易道 將欲 、受命 焉 化。 山此 而 變動 「以言者尚其 幾 其占」者,策 其 以 其變」者 也 之 變 有所 神 亦 言神化 知 象」者,謂 如 言」者,既 有 之占 謂 也 變化 響 有 吉 之辭,發 行 陰陽 也 N N 知 者 調 也。 深遠 往 之道 盡 亦 _ ,聖人之 , **②** 占 是筮之 易道 (辭」者, 變化 聖 不 謂 五 造 蓍 「是 · 聖 行變 一人有 其 理 策 爲 制 IE 臼 問 言 以 有 形 而 不 > 之 義

> 之也。 理 就 陽 或五 事之内 知 象 物之象。 遂定天下之象」者, 其陰陽之數 已上論易 萬 者,言易之告 錯 八命,報 也 天地之文。 相 事告人,人 、悉皆告之也。 ,其孰能 若非 綜其數」者,「錯」謂 窮 變 以 也。 「参伍以變」者,「參」,三也,「伍」,五 相參合,以 至極精 天下 非 人 百四十 道 猶 天下之至變,其孰能與於此」者,言此易之 與於此 吉 「遂成天 也。 若 功深,告人吉凶, 萬 若 因 人 X 妙,誰 極二百 事 此 四策,以定坤之老陰之象,舉 「通其變」者, 吉 青赤 相 「遂知來物」者,「物」,事 如 至極之變化, 」者,言易之功深如 遂 凶,无 謂 地之文」者 改變。 響 能參與於此。 知將 相雜,故稱「文」也。 窮 之 交錯,「綜 極其陰陽之數,以 + 問 應 來之事 略舉三、五、諸數皆 遠 聲 六策,以 使 由交錯 之與 也。 以以 誰 豫知來事,故 」謂摠 能 也。 其 近 與易道 无 與於此者, 定乾 相變,故 摠 此,若非 及 非 泥聚,交 聚,通 有 幽 遠 也, 之老陽 「極其數 定天下 天下之至 同 邃 也,或三 近 能 錯 此 然易以 以 深 極 也 天 然 幽 餘 此 遂 摠 遠 其 下 也 深 口 之 萬 成 陰 萬 聚 結 此

「太一」,嘉本同,阮本作「太」。

0

「將」,阮本同,嘉本作「暫」。

之幾 若非 皆通 此 下 能 如 通 之志」者,言聖人用易道 以 云「君 窮 以 理 故 不 爲 極 前 不 有遠 也。 ·萬事 數變 極 極 神 也 天下之志意 定天下之象」,是 」者,既 須 經 成 響」,「遂 能 \伍以變,錯綜其數,通其變遂成天地之文,極 微、是前 誉 功不 天下 幽 深 天下 論易 也 子將 者 是 近 造 通 也 深 此 而 「感 任 之務 幺 測 故故 之至神, 經明易理神妙 无思无爲,故 理 研 是 此 而 有 知來物」,是通天下之志 幾也」者,言易道弘大,故聖人用之,所以 運 功 深」,是極深 研 而遂通天下之故」也。 結 无 爲,將 `非天下萬事之中至極神妙,其孰 經次節「參伍以變,錯綜其 非天下之至神,其 云事 成 自 深 一者 即 覈 爲 易 也。 然、不關 幾 ,●故云「非 是 誰 聖 研 有 之變化 微 天下之至變」也。 前 能 行,問 人 也。 「寂 幾」也。「唯深 經上 與於此 寂 不測 以極深,故 用 也。 然不 心 之道, 然不動」。 「極深」者,則 易 節 焉 慮是无思 ,故云「非天下之至神」。 研研 天下之至 道 而 「問 也。 孰 . 動 以 故 以 幾」者,上經 能 感感 研 室人 焉 故謂 更 「夫易,聖人之所 言,其受命 也。 與於此」者 幾, 言 而 也 有 而 「易无思 也 以 德 , 故 事 感 精 「與 數,通其變遂 遂 故 前 任 (言,其 唯 ,故,言 深 必 通 聖 能 經 於 幾 也 運自 應,萬事 此 次 初 能 天 通 此 如 也 也 ,言易 八受命 下之 知 故 天下 節 與於 經論 通 其 元 響 也 能 數 事 云 節 天

> 謂也 至 至 形之物,形 象」,「可 章 章末結而成之,故曰「聖人之道 通 也。 天下之功」也。 象无功於天下之事,理絶名 至」,不言「通天下」者,神 以 成 成天下之務」。 一精 首 故 神 下節易之神功也。 能 天 下節 精 」者,章首論聖人之道 地之文」是也 聖 知 神 不 唯 有初之微 得 人之道 神 則 則 須 云唯 也,故 耐 器 微 唯 急 用」者 妙 深 可 疾 子 深 无 也 知 有 今「唯神 而 , 則 不 也 形, 也。 四」者,韓氏 ,則辭也,變也,象也,占 事 日《易》有聖人之道四 疾 能興行 幾」者 以 言「通天下之志」、「 速 是 而 是至變,變 若章 无思无 其无 成,不 速,不 也」直 則 四焉,②章中 其事,故能 中 至理 言不可論也,故 離 也。 須 行 所 爲 注 四焉」是「此之謂」也 云「不疾 无 陳 微妙,不 而 寂 云「此 行 人 則中幾 神 至」者,此 有 則 動 既 然不 有三 成天下 而 无 歷 而 是有初 四 形,則 也; 理 焉 可 唯 動 陳其三事 速 者 也。 者, 測 自 感感 不云「成 幾 不行 存 覆 之事 **3** 知,无 之微 也 至 是 乎 説 此之 而 言 也。 器 中 是 有 而 務 遂 H

- 「功」,阮本無此字。
- ② 「之」,嘉本無此字。

无所不 億,以 象也。 與 通 精 以 乃能制衆物之形象也。 不能制山之形象,山不能制海之形象。 象」者,凡 器象,可得 **摠以**「聖 之可用,故云「可 形象,「占」是占其形狀,並是有體之物。 此 與於斯也」。正義 數 ,无不記 數數物 而无不周」者,言至 四 」、「至神」,三者是 者、无籌策 事」不 ●其變通 [者,即 斯蓋 由 一苞,是 「變」是變化、見其來去、亦是器象也。 知 億 人之道 此 則 自有形象者,不可以 章 得 憶,雖 功用之母,象數所由 而 能 而用 「至精」、「至變」、「至神」所 不 中「三事」不得配 无不 配 非 數則不能苞千億、萬億。 |致章中「三事」,故章中 而 能 不 遺 章 也。」正 四 无 極其 得 周 首 去其數,无以 焉」結之也。 可 籌策 徧。 而 曰 : 物之功用 四四 亂」者,以其心 極 物數,猶 用 義 「非 而 曉達 言 事 云「夫非忘象者,則 」者也。 曰:「辭」是爻辭,爻 不可 雖 遺數者,无以極數 章 萬 變理者 之母。 制他物之形象,猶 岩以 韓 立」者,言「至精」、「至 亂 首 〇 注 : 極 類之變, ○注「夫非 氏 也。 四四 盡 萬而 굸 之至精,理在 於數 歷陳「三事 物之功用,象之 ,能體其 [事]者 由來,故云「象 遺去數 言「至變者,體 「此四 遺忘己象者 同歸 有體 四 數則 也。 者 也 忘象」至 无以 淳 於 名者則 不能 則 辭 者 存 」者,若 若海 是物 是器 存 乎 但 至 之 玄 變 制 苞 是 平

> 數所 來 妙 是其至精 由 曲 太虚 極之玄理也 制 象。 由 太虚 自 立 若非「至精」、「至變」、「至神」,則不得參與 也。 至變也。 然 自 而 然 有象 言 而 象之所以 有數也。 由其至精故能制數,由其至變故 也; 數之所以 是太虚之象,太虚之數 立 有 象者 有數者,豈 贵 由 象 由 而 數而 來,

能

断天下 其占。 第十 斯 開 問其功用之意。 定天下之業, 下之志,極其幽 下之志」者 而已」者,此夫子還自釋「易」之體 「子曰:夫易,何爲」者,言「易」之功用,其 二」至「天九地十」,此言天地 通 ,此也。 章也。 萬物之志,成就 此章明卜筮蓍龜所用,能通神 天一 之疑」者 「易」之體用 ,言易道如 前章 由 地二」至「 深也。 能 「夫易,開物成務,冒天下之道, 以 論《易》有聖人之道 研 此 幾 易道 以 天下之務,有 此,是故聖人以其易道 如此而已。「是故聖人以通 成 務,故定天下之業 定天下之業」者 決斷 謂 陰 之神」。 天下之疑,用 陽自 用之狀,言「易」能 覆冒 四 然奇 知 焉, 也。 正 天下之道 體 偶之數 以以 以 天 義 也。 何爲 其 通 1 此 日 達 易 筮 : 是, 也 以 道 天 天 斯 地 尚 此

0 其」, 嘉本同,阮本作「于」。

四

來,知以 遇凶 之象 以 人吉 心。 常也 也 以 除 方以 吉,又患其失,故《老子》云 者,「凶」雖民 是 者,「貢」,告也。 故 故 占 凶」者,民之所憂 一著以 功 明 卦 蓍 萬物之心,退則不 1 一人以 望 望 用 萬物 之變 叡 知」者 凶 也 數 是盪其惡 其 定 知神武 卦 藏於 圓 民則 物 於始 孰 藏 此 天 則 有疑則卜之,是蕩其 象 通 知 既 則 往 洗心」者,聖人以 能 下 密 神 可 則 神 有 之所患,「吉」亦 是聚於蓍象往 亦 與 是 於 者, 疑 以 而不殺者夫」。 也。 卦 常 无 以 心也。 憂 知 此 危 窮 猶 識 桂 六爻 知 也,上並 哉 患 以 卦 此 前言 也 爲來。 ,神之象 方之有 來是來 象將 明蓍 其吉 「吉凶 方象 知其所以然,萬物日 者 有 「退藏於密」者,言易道 往 是 吉凶 言 來之 M, 卦 知 卦,成 行 止 言「吉 「寵 故 无 去之事,故 此 德 與 誰 也。 也 神 民之所 易道 是與民 八民同 易之ト 一之義, 方 蓍 疑 數 事 同 辱 能 之 可以 心。 卦 也 无 神 若 凶 「六爻之義 百 故 故 象 深遠,以吉凶 德 列 恒 知,知 」,此獨 患」者 於 驚」也。 此 知 變易 患 言 終, 同 爻 行 筮,洗蕩 逆 體 員 也 言 以 也 其 分 善得吉,行 知 而 神以 猶 藏 。 ② 「知以 蓋 於 易 用 以 來 所 將 有 員 神 言 往 是 「神以 蓍 藏 憂 而 告 易 之不 來 定 知 既得 道 一同 進 萬 是 卦 藏 爲 往 患 以 不 人 之事 體 古之 禍 來」。 以 則 物 往 之 往 也 往 也。 患 知 貢 窮 也 知 其 示 知 盪 惡 之

> 閉 易道 户 凡 廣 户 藏 興 明 之所用,故云「以前民用」也 象 故 此 威 闢 齊」,防患日 萬物, 明易 以 物 謂 神物以前 相 於天之道」 易道 服 ,以示於人,以 者,「故」,事 故 户 循 先 自 易道自齊 之坤」者, 萬 謂 굸 道 藏 齊 物 能 若 之乾」者 「闢 陰 戒,又以 之大。❸ 故 威服天下, 而 陽 室之閉 户 民用 後 「戒」。 一者,言 遞 古 謂之乾 出 自 聖人既 中也,易 之 至, 一戒,謂 ,闢户 前 易 者, 聰 故 闔 易 或 民 聖 「以神明其德夫」者,言 道 而 先言 明 也 其 用 之 謂 陽 從 窮 謂 人 神明其己之德 照了吉 不 叡 户**,** 此易 變爲 乾 所 易 變 能 吐 用 坤 知 用。 坤 化 道 明 生 故 刑 而 神 道 陰 萬 聖 興 而 M, 天 而 殺 後 闔 云 武 以 物 定 來, 起 察 道 而 闔 言 之 或 齊 人以此 吉 也,若 化 神 知 也 威 乾。 闢 君 開 戒其 故 天下,此 户 化 X 理 民 服 而 謂 更 也。 於 事 之事 謂 之 謂 闔 室之開 身。 齊戒 之變」者 更 而 明 前 之坤」 也 物 伏 聖人既 閉 察 乾 户 也 犧 已 是 豫 於 洗 民 坤 等 闢 謂 下 或 爲 是 故 心 乃 民 「是 也 也 開 陰 其 閉 又 闔 聖 之 以 曰 法 法 以 用

嘉本同

阮本作「以」。

2 0

聰

是 嘉 阮 本 本 同 同 嘉 阮 本作「憂」。 本 作 「有」。

數」也。 之數也 者,運 通」者 變爲 方 分」者,「方」謂 買 先由天地之數 之爲道, 聖德微妙,故云「謂之神」。 神」者,言聖人以 兆,乃謂之象,言物體 象」者,前 故明易之道,先舉 制 者著 模範, 也。 成 而用之謂之法」者,言聖人裁制其物 稱「方」也 形 陽 而 须 有窮已 地則 _ 是謂 不窮」者,謂團圓之物運 先由 故云「謂之法」。 或 蓍 「往 Œ 往 注「圓者運」至 閉 亦 安,其 器 則 義曰 運 來 而 窮 而 處 恒 變 物, 還 動 不 所, 成, 得 極 利 來 : 卦 開 · 窮」據 不 天地之數」者 故 其 「易以 而 通流,是 既 爲 既 故云「故明易之道、先舉 是 Ė 數, 用,或出或入,使民咸用之,是 E 尚 成,更不移 有 往 「形 微 謂 故 「故 其氣 「利用出 處 乃 極 須 也。 之變 稱 0 「謂 所 以 數通神明之德」者 乃 日 來 員 注「易以 也,氣 則 方也」。 數 謂 之通 「形乃謂 則 也。 轉 也。 ,此章欲 動 是 之器 通 變 人,民咸用之謂 无窮已,猶阪 止 ,亦是止 神 漸 也。 往 言「方者止 耐 極 往 」,言其 明之德 爲 積 正 而 有分。 之器 明 數」至「天 來 聚,露 「見乃 來 義曰: 施用之,垂 一神 不 而 天 隨 窮 有分, 一者,體 之德 調 著 也。 且物 地 見 而 上 謂 須 謂 員 也 之 之 有 走 易 地 萌 改 之 之

是故易有」至「无不利也」。正義曰

象日 天 大悉備,故能 卦定吉凶」也。「吉凶生大業」者,萬事各有吉凶,廣 吉凶」者,八卦既立,爻象變而相 木、乾同兑金, 者,若謂 四 木、水、火禀天地而 日 地」而言「兩儀」者、指其物體、下與「四 曰「太極 氣 易 而 此 一」,即此「太極 地」者,言天地最大也。 季,又地中之别 混 有 象之,成其 第 兩 Ħ, + 而 太極,是生兩儀」者,「太極」,謂天地未分之前 儀」,謂 爲一,即 能 震木、離 生兩儀」,即《老子》云「一生二」也。 章 定 也。 生天下大事 兩體 神 天下之吉凶 加以坤、艮之土,爲八卦也。 」是也。 化。 是太初、太一 前 火、兑金、 ,故唯云「四象 容儀也。 有, 章既 此 故云「兩 又 又謂混 明 業也。❹ 明易道之大,法於 ,成天下之亹 「變通莫大乎四時」者,謂 坎水各主 蓍 「兩儀 卦 也,故《老子》云「道 儀生四 元既分,即有天地,故 有 推,有一 也。 「是故 生 神 明 四 吉有凶,故「八 「四象生八卦 象」,土則 1象 | 者 象」相對,3 時, 之 亹 法象莫大乎 也 用 又巽 「八卦 不言「天 聖 天 謂 一是 地 同 分 人 金 定 Ŧ 明 生 故 則

0

[「]劃」,嘉本司,元本「數」,阮本無此字。

[「]圜」,嘉本同,阮本作「丸」。

[「]下」,阮本同,嘉本作「小」。

[「]生」,嘉本同,阮本作「王」。

六

刀口

詁 ※ 云: 好,❷背其 致遠」也。 高之極, 然,故云「莫大乎聖人」也。「探 莫大乎日月」也。 定天下之吉凶,成天下之亹 探」謂闚探求取,「賾 營爲, 一者,唯 , 爲 鈎 用,建立成就天下之器,以 (天下利,莫大乎聖人」者,謂 富貴之位 天生神物 昧之理,故云「探蹟 凶 時 取之,物 以 ·聖人象之」者,若璿璣、玉衡 议 筮 筮 謂 變 此蓍 春 能求索隱藏之處,故云「索隱」也。 1 故云「莫大乎富貴」。 也 日 得 失而 以此諸 筮 夏,刑以秋冬,是聖人效之。「天垂 亹 一,力能 ,聖人則之」者 月 通 在 能 龜 , 勉 天 中 求 然 遠 是 知 時 其 也。」言天下萬事 事正 「崇高莫大乎富貴 方能 故 故 變中 地 齊一天下之動,而 其好惡 得,是「成 變化 徧 云「莫善乎蓍龜」也 二謂幽 也。 定天下之吉凶、成就天下之亹 招 照 最 派天下, 致之,ト 大 聖人 得失,人 ,謂天生蓍龜,聖 也。 深難見。 「索」謂 亹 爲天下之利,唯 備 「備 天 **賾索隱** 无 者,莫大乎 效之」者,行 天下之物,招 下 八以齊 - 筮能 幽 縣 物 悉動 則 之亹 求 | 者, 不 象 致 道 棄其 然,故 1 鈎 燭,故 著 索,「隱 七 而好 用 濟 ° 筮 以 明 政,是 深致 萬物 悪 人 物在 則 蓍 立 王者居 莫 案:《釋 公云「鈎 也。 生, 云 四 法 而 龜 聖 能 致 成 大 一象,見 遠,以 時 聖 則 「是 取 皆勉 謂 人能 深 闚 天 是 器 乎 者, 之 生 其 深 處 隱 探 下 以 崇 九 明 H

能

藏 级 所

 $\overline{\mathbf{H}}$

繋解 也」,「 謂: 之義 物, 象、 以 七、八、九、六,今則從以爲義。 上「兩儀生四象」,七、八、 之物,「辭」既爻卦之下辭,則 氏以爲: 之」,三也,「河 地變化,聖人效之」,二也,「天垂象,見吉凶,聖人 莊 也 六 吐 象 断者 地符, 之也。 氏 有用象,爲四象也」,今於釋卦之處已破之矣。 何得稱「易有四象」? 此等 於象卦下,所以告其得失 云四 則《 輔 繋辭焉,所以告也」,然則「象」之與「辭」, 嗣之義,未 孔安國以 河 四 四象,謂 謂 春 龍 象,謂六十四卦之中有實象、有假象、 河 事,乃是聖人易外 於 秋 圖 出 繁辭之中,定其行事 出 緯》云: 發 圖 爲,河 圖,洛出書,聖人則之」,四 知 洛 「天生神物,聖人則之」,一也,「天 洛 何從。 龜 出 圖則 河 九、六之謂 書 書 且又云「易 感。」 以 聖 「象」謂爻卦之象 易 別有 通 卦 也。 「繋辭 人 有四 乾 河 是 (則之) 吉 其 出 圖 「定之以 也 也。 象,所 (功,非 天苞, 凶 焉 有 , 洛 有 所 者, 所以 四象,所以 九 故 書則 篇 專易 以 以 諸 如 吉凶,所 告 斷 也 也 示 洛 儒 以 九 鄭 内 有 書 有 相 疇 流 康 者 者 象 則 爲 對 何 義 示 是 有 坤 成

吉 殺 以 故

⁰ 善 本同 本同,阮校云: 阮本作「得」。

順 天之所助唯在 之,❶行 有上九爻辭以證之。 天之所助者,順 易之四 得 , 无所不利 ,又能尊 」者,人之所助 文,下又釋其易 失。 1則鬼神 [象]所 「《易 "尚賢 也 影日 於 以 人, 无 ",唯在 也 順,此 示,繋辭所以 不 自 是以從天已下皆祐助之, 祐 天祐之, 吉无不 子曰 人之所助者 理,故云「子 助,无 於信,此 上九恒 祐 所 者 上九能履 告,吉凶告所 思 不 ·,助 於 信 利, Ĕ : 利 順 也 也 故 祐 |者,言 引 踐 1者,助 一者,上 既 履 於 《易》之大 有 ,而得其 信 信 斷 人 信、 也。 既引 也 思 而 於 思 乎 此

深遠,若言之不能 其言,故云「書不盡言」也。 煩 謂 則聖人之意,其不可見乎」者,此一節夫子自發 易之興廢,存乎其 委曲,非言可 日 碎 聖人之意難見也。 ,是聖人之意 此 ,或楚夏不同,有言无字,雖欲書録,不可 不可見乎?」疑 第十二章 子日 寫,是「言不盡 書 其 也。 盡聖人之意,書之又不能 人事也。 不 盡言」 所以 而 可 此章言立象 問之,故 見 難見者,書所以記 也。 「書不盡言、言不 「言不盡 意 至「乎 也。 故云: 稱 「乎」也。 盡 意」者,意 聖人之意,意又 德 意 「然 繋 行 則 盡聖 子 言 盡 辭 聖 盡 有 其問 言有 意,然 盡 人之 人之 竭 正 曰 深 言。 邃 於 義

> 四 化,立爻以效之,皆從乾、坤 易 起,故乾坤是易道之所 此明易之所立本乎乾坤。 以盡 情僞 Ш 聖人立象以盡 之,「通」謂 還 盡神,其孰能 心,百姓之心自 以盡其 偽」者, 人 意 乾坤,其易之緼邪」者,上明盡 女而爲八卦 立乎其中 府奥藏,故云「乾坤其易之緼邪 自釋 者 立 神」者, 也。 象以 本之根 言 非 聖 雖 「繋解 也。 言 人 唯立象以 盡 推 矣」者, 不盡 此 之意,有可見之理 意」已下,至「幾乎息 與於此? 源,從 而 「變而通之以 其意,繫辭則 一句 焉以 變 然樂順 行之,故 意,立象可 而 盡 夫易者,陰陽變化之謂。 摠結 盡其 乾 相 聖人之意,又設卦以 坤 重 緼 ,若鼓舞然, 故曰 能 立 言」者,雖書不盡言, 而 積 若乾坤不存則易道无由 而 盡 而 以 盡其言,可以 象 之根 盡利 來 有 來。 「鼓之舞之以 物 盡之也。「設 盡 言、 也。 六 故 之利也。 意、繋辭 源 」者,「變」謂化 矣」,此 + 乾 故乾 盡意皆由 也。 而 四 坤 「乾坤 聖 天下從之。 卦、三百 既 生三男、坤 人 是 説 「鼓之舞之 成 盡 與 盡 立 節 化百姓之 盡 桂 列 成列, 於易道 言之美。 神」也 陰 象 繫 百 是 以 八十 陽 夫子 姓 而 辭 以 盡 爲 之 生 變 而 裁 可 情

告 嘉 本 無

易 IF. 義

八

之際 故云 也。 變化 誉 通 而 也 陽氣之化不可久長 之道也,自形内而下者謂之器也。 形,是道在形之上,形在道之下。故自形外已上 有 者謂之道,形而下者謂之器」者,道是无體之名 僅 株毀則枝條不茂。 若枝幹已枯死,其 近乎止息矣。 若易道毀壞,不可見其變 云「无以見易 形 質之稱。 道 有微生,將死不久。 爲事業,故 行之謂之通 而 者,易既從乾坤 而相 形 猶若亢陽之後 陰陽之化自然 「易不可見,則 變 一人亦當 下 化 此 者 在器不在 裁節之,謂之變也,是得以理 理 謂 建 凡有從无而生,形 然 以 也 云「謂之事業」也。 之器」也。 立 幾,近也。 也。 一者,因 爲變 乎 道也。 變爲 相 乾坤 乾 ,而裁節之以 而 「易不可見,則 「舉而錯之天下之民,謂之事 化 坤 裁,聖人 來,乾坤若缺 推 而錯 根株譬乾坤 化 陰 之中 或幾乎息矣」。 此 猶若樹之枝幹 既有形質, 化之理 雨 置於天下之民,凡 以 而裁之謂之變」者, 因 矣。 可 亦 由 變 法 道 陰 陰雨也,是得 此乃自然以 則 乾坤 而 形雖 而 毁 雨 此 乾 也,易譬枝 施 可爲器 乾 則易道 根 而 丽 立 坤 之變也。 或 「是故 一,是先 行 處 株雖 坤 生乎根 行 裁 毁 幾乎息矣 之,謂 之,物 節 道 亦 則 也。 用 壞 未 損 變化 民 理 道 形 无 全死, 株 幹 得 之變 陰 得 者 之 故 兩 而 形 以 而 也 通 開 若 陽 云 謂 其 LI 畔 後 是 上 見

會,不須言而自信也。 乎德行」者,若能 故存於其人,不在易象也。「默而成之,不言 若其人聖則 其人」者,言人能神此易道而顯明之者,存在於其 者,覆説上文「推而行之謂之通」也。 覆説上文「化 也。 乎 故 關 將 言 存乎卦,言觀卦以 「存乎通」、「存乎其人」,廣陳所存之事,所以 何 欲 事 置 「鼓」謂 *業也。 使聖人 而成就 也? 人事 也。 於民 辭」,爲此故,更引其文也。 謂之爻」者 德行」,據賢人之德行 謂觀辭 「極天下之賾存乎卦」者 也。 發揚,「天下之動」,動有得失,「存乎爻卦 以 也 爲下云「極天下之賾存乎卦,鼓天下之動 之,不 法 凡《繫 作《易》者本爲立教故 聖 能 「是故夫象,聖人有以見天下之蹟 易道 以 人 而裁之謂之變」也。 ,於第六章已具其文,今於此更復言 神 知得失也。 言 辭》之説,皆説易 亦 順 而 以 知賾也。 當 而 理足於内,默 明 化成天下,是故 法 信 之,若其 「存乎德行」者,若有德 也。 此 也 錯 「鼓天下之動 若无德 化而裁之存乎變」者,謂 ·,言窮 置 且已下又云「存 人愚則不 前 也,非 然而 變 「推 經 道 化 行 極 易 一神 一神而 以 於 成就之,闇 而行之存乎 則 天下深蹟 是空説 」與聖 能 爲聖 萬 而明之,存 存 不 神 民 乎辭 能 明之存 而 而 使 乎 行 須 易 人 至 明 信,存 恒 之處 與 重 道 成 通 之 存 得 平 論 不 相 其

計一萬三百五十二字

.

周易正義卷第十三

開國子臣孔穎達奉勃撰國子祭酒上護軍曲阜縣

周易繫辭下第八

更具 成列位,萬物之象在其八卦之中 章,覆釋上《繫》第二章象爻、剛柔、吉凶悔吝之事, 而詳之。 八卦成列」至「非曰 「八卦成列,象在其中矣」者,言八卦各 也。 義 因 正 而 義曰: 重之,爻在 此 第

> 卦 卦本而不易 定體爲坤,陽卦兩陰而一 臻趣於時也。 用」之時,乾之上九趣向「亢極」之時。是諸爻之變,皆 所以改變、會通,趣向於時也。 若乾之初九趣向「勿 剛柔、陰陽而來。❶「變通者,趣時者也」,其剛柔之氣 剛柔之象,立在其卦之根本者也。 以 動者也」,上既云動在繫辭之中,動則有吉凶悔吝,所 時,變動好惡故在其繫辭之中也。 者,謂繫辭於爻卦之下而呼 剛柔相推之中。 語其體即謂之剛柔也。 上《繫》第二章云「剛柔相推而生變化」,是變化之道在 卦舉象、在重論爻也。 爻獨在重者,卦則爻少而象多,重則爻多而象少,故在 所重之中矣。 其中矣」者,謂 既與爻爲本,又是摠主其時, 悔吝生在乎所動之中也。 也,則 其「剛柔立本」者,若剛定體爲乾,若柔 然象亦有爻,爻亦有象,所以象獨在卦 因此 剛柔即陰陽也,論其氣即謂之陰陽 上「八卦成列,象在 八卦之象而更重之,萬物之爻在其 「剛柔相推,變在其中矣」者,則 「繋辭焉而命之,動在其中矣 陽,陰卦兩陽而一 命,其卦爻得失吉凶則 「剛柔者,立本者也」,言 故《略 「吉凶悔吝者,生乎 言卦之根本,皆 其 例》云「卦者 中矣」是也 陰,是立其 適 由

[「]而來」,嘉本作「而往來」,阮本作「往來」。

効 簡

此

物之變動

也

象也

者,

像此者也」,言象此物之

爲以

成萬物,是示人簡

矣。 其得

若乾不得

或

有

隤

能

示人易矣。

若坤

不隤

然,或有

確

然

,則不能

記示人

「爻也者

,效此者也」,此釋爻之名也。

言爻者

者,此明地之得

以

一,故

坤

隤

然而

柔,自

然无

无爲,物 明天之得 天下之動

由以

生,

是

示人易也。

「夫坤,隤

然

示

人簡

矣

於純 天地

則

所動遂其性,若失於純

則

所

動乖

其

八理,是

得

正

在

也。

「夫乾,確

然

示人易矣」者,此

之道

,剛質確然,示

人以

和易。

由其

得

也,故以

「貞」而

爲明

也。

「天下之動

,貞夫一者也

日月之外,

天下萬事之動,皆

正乎

純

也。

若得

日月照臨若不以貞正,有二之心,則照不普及,不爲明

得 无疆. 事 大德 天下大象、大理,大者既 云 有 財 以保守其位,必 位是有用之地,實是有用之物。 若不常生則德之不大,以其常生 内 萬 爻象之辭 故功業見於變也。 物之上 形 人「勿用」之情見於初九爻辭 人所用之情 理 聖人之大寶曰位」者,言聖人大可實愛者在於位 其宜 節,正 卦備天下理」者,前注云「備天下之象」,據其 物之意也。 也 狀 備天下 勿使行惡,是謂之「義 財 者,言何 ,故稱「大寶」也。 日 也。 正辭,禁民爲非曰 也。 生者,自此 也。 吉凶 定號令之辭, 也。 之理 爻 ○注「夫八卦」 以聚集人衆,必 ,故觀其 功 象 見乎外」者,其爻象吉凶 若乾之初 言天地之盛德在乎常生,故言「曰 須仁愛,故言「曰 業見乎變」者,言 動 」,據其用 乎 「聖人之情見乎辭 已下,欲明 解 内 出之以 「何以守位曰仁」者,言聖 丽 備 義」者,言聖人治理其 者, 九,其 也。 至「其 知 則 義,宜 其 言 也 須財物, 理,禁 小者亦備矣。 聖 解 言 情 爻之與 功勞、 中矣」。 若以居 萬物,故云「大德」也 仁也。 八 云「潛 也 他 人 也。 卦大略 是 同 皆做 約 故 」者,辭 事 見 象, 天地之德, 其 言以 龍 聖 言「日 「何以 盛 此。 業由 正 於 民 人之情 發 勿 位,能 有 義 卦 此 直是 爲 用 則 動 財 「天地之 E 聚 財 非 言其 外 於卦 行 乃 不 之 人何 生。 見 用 在 僻 廣生 廣 則 也 耳 夫 之 而 之 之 曰 用 聖 平 此

月之道

,貞明者

也」,言

日

月

照

臨

正

得

地載之道,以

貞正得

,故其

功

可

爲物之所觀

也

日

爲明也。

若天覆地

載,不以貞

正

而有二心,則 之道,以貞

天

不

能 而

普覆

地地

不能

兼

載,則不可

以

觀。

由

「貞」乃得觀見也。

則免此

吉

凶之累

也。

天

八地之道

貞

觀

者

也,

謂

天覆

吉凶

唯

守

貞

正

而

能

克

勝

此

吉

凶。

謂

但

能

貞

正

時,故

略 桂

例

云「爻

者趣

時

也

「吉凶

勝 宜

也

二,「貞

二, 正

也。

言

吉之與

X 者

皆

由

所

動

不能 者

守

丽 者 是

也。

既

摠

主

時

爻

則

就

時之中各趣

其

所

也

通

者

趣

時

者

也

則

上

一因

而

重之,爻

在

其

中

者也。 之例詳 遠近相 也。 象其 之備, 違。」此是爻之大略 静,質柔愛剛 之動,非數之所求也。 論彖》云:「彖者何也? 用,觀於爻辭也。 於《彖》、《象》」者、《彖》、《象》謂卦下之辭,説其卦之義 之所存,存於未變之義,「八卦成列,象在其中」是也 所存,存乎已變之義,「因而重之,爻在其中」是 言乎其變者也。 卦之中,各以適當時之所宜以立功也。 ○注「剛柔」至「例詳矣」。 爲主,是卦之大略也。 「貞 動 是 適時之功,則存於爻辭」者,卦者時也,六爻在 未是變之備 吉凶 用」也。 无 追,愛惡 夫衆不能治衆,治衆者至寡者也。」論 者,正也, 貞 傾邪, Ī 者, ○注 能 ,體與情 勝 云「則爻卦之義,所 由 相 變者何也? 「貞 者 其吉凶 云「王氏之例詳矣」者,案:《 也, 動 攻 也。 也 情 而 反,質與願 者 故云「未 屈伸相 」者,言「貞」之爲訓 故合散屈 无差二, 來,若守貞 正 其 統論一 也。 又《論爻》云:「爻者 正義曰: 也 義既廣,不能備 情僞之所 推。 云「夫有 至 極 寂然无 卦之體,明其所 違。」「是 伸與體 其 寸執 静寂 見 變, 云「立卦之義 存各異 情 慮,任 故 欲 動 爲也。 ~,何吉 者 御 故 相 因 則 訓 知適 こ者 E載,是 獲,直 也 情 乖 而 挂 未 運 Œ ", 形 僞相 重 能 何 夫情僞 時之功 何 體 由 而 也。 訓 之,以 王 躁 免乎 凶 往 ,則見 也? 皆以 之主 例 爻之 行 感 之 好 氏 則

> 若 天下。 慼 雖 死,禍變爲福,盛變爲衰,變改不同是萬變殊也。 離乎 至 ? 以貞正天下也。云「萬變雖殊,可以 爲天下貞」者,王侯若不得 自然,何須憂累於死,是不累乎吉凶。 有死,能知此理是盡會通之變。 凶之事者,唯貞 者乎」,言若能窮盡萬物會通 者,「殉」,求也,若不求其 異,皆自然而 寒變爲暑,暑變爲寒,少變爲壯,壯變爲老,老變爲 然,故云「其唯貞者乎」。 者, 而 凶」也。云「盡會通之變而不累於吉凶者,其 乘御於此,是「可以 云 由 若得純粹,无二无邪,則能爲天下貞 寂 其 動 然 求吉,有所 則 不 未 動 有。 一者乃能 則 免 若能 於 无 貪 所 累 (欲,則 執 知其自然,不 可 然也。 吉,无慮无思,凶 也。 御 一,二三其德,則不能 云《老子》曰 累, 改變之理,而不緊累於吉 凶 云 若 也 既知老必 亦將來,故云「殉 猶若少必 殉 動 執 有 吉 唯守貞一,任 造不爲,无喜 誉 王侯得 則 御也 將 求 有 未 禍 也。 死是 則 老、老 離 何 耻 平 運 治 謂 唯 因 吉 累 凶 无 可 其 之 必 貞 未 正 而 將

利天下。 取諸 章,明聖人法自 離 古者包爔」 此 章其義既廣,今各隨文釋之。 此 然 節 之理 至「取諸夬」。 明包犧法天地造作八 而 作《易》, 易 正 義 卦,法離 以 自 日 制 此 此 至 第 而

於益

卦

嗑

設

法以

氏之學, 若耳、目、鼻、口 所附著之處,故 作《易》,物情難 象之,是通 爲罔罟 澤之類是 大之與 也。 器。 若不作八 象大 土,動 麗也,麗謂附著也,言罔罟之用,必 羅 以通 合 此 以 ,皆取卦之爻象之體,今韓氏之意直取卦名 作結繩 且 案: 鳥獣 韓氏乃取名不取象,於義未善矣。 也 物, 也 利 依 節 物 細 益民 達 神 也。 取 上《繫》云「以制器者尚其象」,則取象不 土 云仰 明 此 而爲罔罟,以 之屬 明之德 植 觀 神明之德 於 則 神 釋 也。 此 稱離卦之名爲罔罟也。 知,今作八卦以 物各有 水澤以 舉 噬 鳥 農取 无 之。 神明之德閉 是 遠 則 爓 嗑 所 也。 觀 近 之文與 卦 不 者,言萬事 一者日 象物 罔 也。 則 所 象於天,俯 造器之義。 包 包 「遠取諸物」者,若雷、風 宜 魚 萬事在其中矣。「於是 佃以 也 中爲市 噬 「以 鼈 是 地 齧, 塞 氏 也。 也。 漁 類象,萬物之情皆可 之宜」者, 類萬物之情」者 地之宜」者,若 幽隱,既作八 云爲,皆是神明之 者, 乃 ,聚合天下之貨 則 一蓋 「近取諸身」者 至一 得 觀 者制耒 審知鳥獸 用此罟罔,或 取諸 通 法 案: 取 今既遵 言取象細 也 於 諸 離一者, 地 諸 耜 卦 包 儒 《周 者, 取 因 暰 韓 象 則 始 魚 紀》云: 物。 崩。 皇氏 犧。 胥。 姬 虑 故 犧 姓

見也。

而

陸

畋

以

作八卦

山

禮》五

也。

言取

而

取名

以

制

卦

制器

寶見大電光繞北斗樞星 堯、舜氏作」者,案《世紀》云: 没後,乃至黄帝、堯、舜,通其《易》之變理,於是 次帝直,次帝釐,次帝哀,次帝榆罔,凡八代及軒轅氏 懷之後,本起烈山,或 於尚羊,生炎帝,人身牛首,長於姜水,有聖德。 凡十五世,皆習包犧氏之號也。 曰女登,爲少典正妃,游華山之陽,有神龍首感女,登 氏、皞英氏、有巢氏、朱襄氏、葛天氏、陰康氏、无 氏代立爲女皇,亦風姓也。 者,案《帝 神農氏没」至「吉无不利」。 號日 也。 燧人之世,有大人跡出 納奔水氏,女曰 長於成紀,蛇 此節與下制 中央氏、栗陸氏、驪連 「包犧氏」。 炎帝神農氏,姜姓也 號皇雄氏,在位一 母 王 日 世紀》云: 附 寶,其 器物爲引緒之勢,爲下起文。 身人首 後世音謬,故或謂 聽談,生帝 大皞 先即炎帝母 稱烈山 照 ,有聖德,取 百一十年。 於郊野 帝 女媧氏没,次有大庭氏、 於雷 氏、赫胥 ,母曰任已。 黄帝有熊氏,少典之子, 包 氏,在位一百二十年而 臨 犧 澤,華胥履之而 魁 神農者,案《帝 氏,風 家有蟜氏之女。 感附實,孕二十 ,次帝 此一 氏、尊 之伏 包犧氏没,女媧 犧 有蟜氏 牲 姓 節明神 承 盧 犧 以 也,母 次帝 或謂 氏、 充 「黄帝 廣 懷氏, 包 制 王 混 生 日 明 世 氏 无 沌 之 包 華

舜,姚 譽妃 伊祁 嚳。 皞。 之後至堯舜之前 見大虹,意感 敬康生句芒,句 位 星,貫月 十 大星 于 立不肖而 月 言其名,在位 日 通其變,使民不倦 昌 而 七十八 ·四年而 涿 而 堯、舜之等, 使民用之日新,不有懈 姓,母 [僕,蜀 帝嚳,高 鹿,擒 如 生堯於丹陵,即位 少 生 舉 姓,其先 出 皞 虹,●下臨華 黄 以 如 Ŧī. 年 崩 崩,弟放勛代立,是爲帝 帝名摯,字 帝 Щ 帝 之,在 觀 曰 虹,感女樞於幽房之宫,生顓頊於弱水,在 於壽 前 之終 七十 而 慶 辛 氏之女,爲 河 出 顓 崩。 都,生 以 生 芒 氏,姬姓也,其 遇 頊 丘。 自 位 所 其 始, 舜 生蟜牛,蟜牛生瞽瞍,瞍之妻握 年 高 顓 少皞之孫,蟜極之子代立,是爲帝 赤 者 爲 渚,女節夢接意感: 青陽 於姚 ·而崩。 事 頊。 長 君也。 龍 而神異,常有黄雲覆其上,爲 事 則 九十 百 陽氏,黄帝之孫,昌意之子,母 久 昌意正妃,謂之女樞。 於 腌 姬 少 年 城,故 倦也。 或 久不變則民 顓 姬 皞、 八年 崩。 子帝摰 然陰 窮 姓 頊 水 此 (母不見。 也,母曰女節。 顓 姓姚 生窮 既 前 子 故 龍 風 頊、 堯。 崩。 青 굸 顔 開 神 立,在位 而 蟬, 氏。 倦 黄 陽 帝 通 而 感慶都,孕 生少 有 帝堯,陶 帝舜代立。 譽 帝、 生而 化 其 而 窮蟬 代 聖 此歷 <u>,</u> 之,使 窮。❷ 變, 在 皞 德 即 九年。 生敬 神異,自 其 在 **庇序三皇** 量 瑶光之 是 云 黄 戰 間 唐 民 時 十四四 位 帝 爲 带 康, 也 登 氏 帝 帝 墊 制 尤

> 「通 舜无事、《易 者,謂此九事 諸 《繫》引此 未 王 有 卦以制象。 俱得天之祐,故各引其文也。 覆 能變通則无所不利,❸故引《易》文證結變通之善。 窮 化,使民得 潤 使民各得其宜。 之」者,言所 世紀》載此 則須隨 説上文「通則變」之事。 可 九事之功,故連云「黄帝、堯、 少,事或 乾坤」。 則久」也。 用 也。 文者,證 時改變,所以須變者,變則開通得久長,故 宜也。 《窮乏。 以 此於九事之第一也。 黄帝制 垂衣裳」者 自此已下凡有九事,皆黄帝、堯、舜 九事,皆爲黄帝之功。 「是以 繋》 通 若黄帝已上,衣 明 「易窮則 故以 其 何須連云「堯、舜」? 其初、堯、舜成其末、事 自 變 人事之信順,此 天祐之, 吉无 絲 者, 以前衣皮,其制短小, 麻 所以「通其變」者,言易道 變, 布 欲 、舜」也。 變 「黄帝堯舜」至「取 帛 使 利通 鳥 而 神 何 制 潤 理 若 乃明易道 不 以連 衣裳,是 之皮,其 微 案: 通則 如 利」者,此 則皇甫之言 妙 所 云「堯、 皇 相 而 久」者 論 甫 連 **^**; 則 * 之變通 變 神 後 謐 接 化 取 明 而 堯 共 舜 之, 上 若 若 此 多

❷ 「窮」,嘉本同,阮本作「變」。

❸ 「變通」,嘉本同,阮本作「通變」。❷ 「窮」,嘉本同,阮本作「變」。

事皆以卦名解義,量爲此也。❸ 坤」也。 九事之第六也。 「取諸小過」也。 事之用過而 木爲杵。 義者,特以此豫文,❷取備豫之義,其事相合,故其餘 之所宜也。 楫亦乘水以載運、❶故「取 爲楫」者,楫必須纖長,理當剡削,故曰「剡木」也。 至「取諸隨」。 諸涣」者,「涣」,散也,涣卦之義,取乘理以散動也。 二也。舟必用大木,刳鑿其中,故云「刳木」也。 麻布帛所作衣裳,其制長大,故云「垂衣裳」也。「取 豫」者,取其豫有防備。 重門擊析」至「取 取諸小過」。 弧。 遠,是以人之所用,各得其宜,故「取諸 取 臼須鑿地,故掘 衣裳辯貴賤,乾坤則上下殊體,故云「取 刳木爲 今服用其牛,乘駕其馬,服牛以引 諸睽」者,「睽」謂 濟物, 案: 「弦木爲弧」至「取 此九事之第五 此九事之第三也。 杵臼 (舟」至| 《爾雅》「弧,木弓也」,故云「弦 亦 諸豫」。 韓氏以此九事皆以卦名而 地爲臼。 小 諸涣」也。 「取諸涣」。 乖 事 離 過 也。 「斷木爲杵」至 弧矢所以服 此九事之第四 越 「取諸小過」,以 杵須短木,故 而用以利民,故 「服牛乘 隨」者,謂 諸睽」。 此九事之第 重, 隨」也。 此 「剡木 乘馬 乖 隨 馬 諸乾 「取 也。 此 離 木 小 斷 爲 時 舟 諸 也。 0 壯 以一

以致

乾坤

大於穴居野處,故取「大壯」之名也。 古」,由後物代之也。 皮也,或衣草、衣木,事无定體,故不得稱「上古衣皮 已前有用。不云「上古」者,雖云古者衣皮,必不專衣 古」及「古」者。案:未有衣裳之前則衣鳥獸之皮,亦是 用。今將後用而代前用,欲明前用所有,故本之云「上 古」也。此已下三事皆是未造此物之前,已更别 之前更无餘物之用,非是後物以替前物,故不云「上 或言「上古」,或言「古」,與上不同者,已前,未造此器 稱,故云「天下治」,治亦「利」也。 客」,是亦「利」也。「垂衣裳」不言「利」者,此 柝」非如舟楫、杵臼,故不云「利」也。 楫皆云之「利」,此皆器物益人,故稱 之人,故「取諸 例取也。 若此穴居野處及結繩以治,唯專一事,故可稱「上 此九事之第七也。已前不云「上古」,已下三事 「上古穴居而野處」至「取諸大 睽 也。 「取諸大壯」者,以造制宫室,壯 案: 弧矢、杵臼、服牛、 此皆義便而言,不可 「利」也。 「古之葬者」 變稱 亦隨 一以禦 「重門 乘馬、 有 便 舟 立 暴 擊

亦」,嘉本作「又」,阮本作「以」。

豫」,嘉本、阮本作「象」。

阮本同,嘉本作「蓋」。

文也。 棺也。 也。 載,四 之終也。 時 不 殷已後,則夏已前棺 之以棺椁」者、若《禮記》云「有虞氏瓦棺」、未必用 期无數」者,哀除則止,无日月限數也。「後世聖 爲墳是「不封」也,不種 直云「古」。 直云「古之葬者」,若極遠者則云「上古」,其次遠 取諸 「結繩」之後,故直云「古」也。 決 小結其繩。」義或然也 齊者,但此文舉大略明前後相代之義,不必 故九事上從黄帝、下稱 取諸大過 「上古結繩 海遏密八音,則喪期 大過」也。 則《禮記》又云「殷人之棺椁」,以 取諸 央者決也 結繩」者,鄭康 則厚衣之以 大過」者,送終追遠,欲其甚大過 案:《 而治」至「取諸夬」。 ,造立書契,所以 椁 此 未具 書》稱堯崩,百姓 樹以摽其處是「不樹」也。 九事之第八也。 薪, 成注云: 堯、舜,連延不絶,更相 无數、在堯已前 也。 葬之中 「不封不樹」者,不 所以其 「事大大結其繩 -野,猶 決斷萬 文多 前云 如 不云「上 在「穴 而 喪 此明 事 江[棹],无 差, 棺 考 確 厚,故 妣,三 增 在 居」、 九 積 木爲 人 古, 「喪 事 取 事 脩 自 易 則 後 ±

之安身崇德 明陰陽二卦之體及日 故易者」至 ,德之盛 也。 「德之盛 是 故易者象也 月相推 也 而 成 正 歲 義 聖 但 曰 前 人 章 用 此

之君; 陰」。 奇, 者, 不司其事,故稱「一」也。 者,夫君以无爲統衆,无爲者,爲每事因循,委任臣 之,故云「其德行何也 陽之體,未知陰陽德行之故,故夫子將釋德行,先自問 陽爲君,陰爲 也。「陰卦多陽」, 疵 凶 動 謂卦下彖辭者,論此卦之材德也。 像萬物,猶若乾卦之象法像於天也。 皆 「其故何也」。 易者象也 臣 其尊卑相 則 民,小人之道」者,陰卦則以二爲君,是失其 生而悔吝著」者、動有得失、故吉凶生也。 病,故悔吝著也。 取 」者,謂 陰卦耦」者,陽 此夫子將釋陰 有對 象 陰爲君,陽爲臣也。 乖反於理,上下失序,故 陰卦二陽,故耦爲之主。」「其德行何」者,前 以 每卦六爻,皆倣效天下之物 ,故稱「二」也。 制 正之道,故爲君子之道 器 臣 「象也 「陽卦 也。 以 謂 卦 是 陽二卦不同之意,故先發其問,云 者,像也」者,謂卦 「陽卦多陰, 之故 則以 陰卦 異、離、兑一 多陰」,謂震、坎、艮一 臣則 陽 今陽爻以 則 奇爲 故注云: 易 以 卦 孫稱小 有事代終,各司其 耦爲君,故[二 君,故「一陽而 君而二民,君子之道. 者, 陰而二陽 陰卦多陽, 「爻也者,效天下之 「陽卦二陰,故 者 人之道 寫 爲君, 「彖者,材 也。 而 萬 爲萬物 物 發 陰 也 也。 之形 陽 動 動 也。 象者 陽 二陰」。 也」者 而二 有 「陽卦 (職,有 爲民 故 釋陰 奇爲 細小 而 「吉 何 陰 法 故 動 以

然歲 天下之事 也。 也。 屈,屈以求信是相 「尺蠖之屈以求信」者,覆明上 去藏,故爲屈 則月來,寒往 爲君,是君子 求動也 , 但 蠖之蟲 感 而歲成 (求朋,未能 必 何思何慮」者,言得一之道,心 憧 亦同歸於至真 慮必 成成也。 「天下同歸 若能 動 因 憧 此「一」之爲道 初 憧 静 而 往 有 時 憧 何須思也 虚 利 」者, 也 初 來 殊異 百。 「往者屈也、來者信 然役 蛟 生,則 寂 行 也 之道 朋 則暑來」,自 一也。 蛇 此言不 静 必 以 言 而 其塗路也。 從 用 初 而 屈 來是施用,故爲 也。 也。 純 殊 須 慮 爾思」者,此 上 一,何須 思 蟄是 得 者,欲 也。 雖 云 塗」者,言天下萬 得 須思慮,任運 慮 動 感物 以 言多則不 注云"「天下之動必 爲 百 「明 或或 静 /慮也? 前 然相感而 感物,不思而 種 可 亦 水水在 也 生」、「歲成」是 ,則不 來 「一致而 尚,結 必必 動 以以 蛇之蟄以 或 明 静 後之信 往 也」者,此 歸 如少,動則不如 日 不 此 往 信 既静 須 相 來 於 成 生利之事也。 往 能 存 也。 須 憧 相 然 前文陽 來,自 往 百慮」者,所 身是 无 也 事,終則 寂, 至矣。」「子 存 也。 感, 致也。 憧 後 則月來」至「相 心 覆明上 往 身」者,言 朋 感 後動 屈 屈 「利 然明 歸 言 何假 來 排 從 精 物 信 乎 生 信 義 塗 同 朋 信, 以 爾 使 相 日日 生、 寂 必 致 歸 思 日 自 之 物 , 思 須。 也。 , 則 遞 是 須 往 殊 雖 天 自 於 慮 歸 所 來

推

下

E

以

而來。 德。 精 用精 陰是形器,各有質分,不能 人之道也」。 化之道,乃是聖人德之盛 者以往之事。 己之用,先 利 未之或知」也。 争而 道 不二,君德亦 |者皆人理之極,過 致 對「君」故 而 用之道」至「 者,言 義 也。 用 後動,動 言「利用安身」是静也,言「 粹微妙之義 人神」是 後動 「利用安身以崇德」者,此亦言人 精 須安静 稱「民」,注意解 亦言 一者,言欲利益 正義曰: 義 若能 亦 經云「民」而 先 愈彰矣」。 然,故云「陽,君道也 人神以致用」、「利用安身以崇德」, 由 「窮神知化 静 人於神化,寂 先 過此以 静 其身,不須役 静 也,「以 此二 而 而 「陽,君道」者,陽是虚无爲 來 後 極 者以 正 也。 往則窮 動。 所 注云「臣」者,臣則 純 致 義曰: 也。 用先 陰 德之盛」者,此言過 用」是 一,臣職 「崇德 往 一過 然不 此 其 0 則微妙不可 故 須自安其身,身既 極微妙之神,曉 言 云「利 注 此 思 動 (稱) 臣 後 是 人 以 慮 亦然,故云 陽 乃 動 事之用 「陰,臣 動也 事 往,未 可可 用 能 也 君 也 之道 致 也 道 以 民 是 知,故 言聖 其 之或 道 此 增 言 也。 動 至「小 體, 所 陰 知 此 亦 因 人 知 其 利

也 静

0 静 寂」, 嘉 本 同 阮 本作「寂静

臣

安然後 其身,乃可以增崇其德也。 利益所用以崇德也。 言精粹微 利用由於安身以崇德」者,言欲利益所用, 舉 妙之義,由 動 ,德乃 尊崇。 云「精義由於人神以致其用」者 人神寂然不 若不先安身,身有 動 乃 能 致 患害,何 其用。 先須自 安 云 能

凶也。 高 之,是「非所據而據焉」。 危辱之事以證之也。 身自危辱,何崇德之有? 第四章,凡有九節。 九二,則九二不爲其害,是非 辱」也。「非所據而據焉」者謂九二也。 犯之,非六三之所困。 釋其義,故云「子曰 二,二是剛陽,非己所乘,是下向據於九二之蒺葜也 故以「身」言之云「身必危」也。 六三又无應,是「人其宮,不見其妻」,死期將至,所以 名必辱」者,以 ,四自應初,不納於己,是困於九四之石也。三又乘 墉」至「語成器而動者也」。 「子曰:非所困 易曰困于石」至「勿恒凶 向上 以上章先利用安身可以 困之六三,履非其位,●欲上干於 而 ·而困焉」者,夫子既引《易》文,又 「非所困」謂九四。 進取,故以聲名言之云「名必 而六三彊往干之,而取 「身必危」者,下向安身之處 故此章第一節引困之六三 所據也。 「易曰公用射 以前章先須安身 ____ 今六三彊 若六三能卑下 若六三不往 正 義 崇 日 困 德, 此

> 趾无 陽, 之器而後興動也。 待隼可射之動而射之,則不括結而有礙也。 《易》文於上,下以解之,故言「子曰」也。「君子藏器 引《易》噬嗑初九以證之。 善,若因懲誡而得福也。 藏善道於身,待可動之時 射隼之人也。 用射此六三之隼於下體高墉之上,云自上攻下合於 君子若包藏其器於身,待時 身,待時而動,何不利」者,❷猶若射人持弓矢於身,此 有利也,故引解之上六以證之。 道 可 語成器而後動」者,謂《易》之所説此者, 善不積不足以成名」至「何校滅耳凶」者。 ,故「獲之无不利」也。 以 以處卦初,其過未深,故「履校滅趾」而「无咎」也 此上六處解之極,欲除其悖亂而去其三也 崇 咎」者。 德,故此第二節 「動而不括」者,言射隼之人既持弓矢 此章第三節也。 「子曰小人不耻不仁」至「滅 論 而 此亦證前章「安身」之事,故 明先藏器於身,待 以初九居无位之地,是受刑 「子曰隼者禽也」者,既 興動,亦不滯礙而括結也 而動,何不利之有? 三不應上,又以 明小人之道 語論 猶若君子 時 有見 不能 而 故 陰 動 引 而

❶ 「位」,嘉本同,阮本作「地」。

^{)「}何不利」,阮本同,嘉本作「何不利之有」。

處斷獄 案 也。 引否之九五以證之。 前 足,覆公餗 是故君子今雖獲安,❶心恒不忘傾危之事。 有其治理 有傾危者,由往前安樂於其位,自以爲安,不有畏慎 以上章有「安身」之事,故此節恒須謹慎,可以安身,故 之,體例不同者,蓋夫子隨義而言,不爲例也。 第三已下皆先豫張 將滅亡,乃繫于苞桑之固也。 故致今日危也。「亡者,保其存者」,所以今日滅亡者 危者安其位者也」至「繫于苞桑」。 其亡其亡,繫于苞桑」者,言心恒畏慎,其將滅亡。 章不 大而 章第 往前 恒不忘滅亡之事。 「不勝其任」。 第一、第二節皆先引《易》文於上,其後乃釋之。 亂者,有其治者」,所以今有禍亂者,由往 能 遇 之終,是罪之深極者,故 四 保有其存,恒以 也。 安身之事,故引噬嗑上九 禍 節 其形 也, 也。 謂 恒以 明 渥 故 惡人爲惡之極 卦 凶 引《易》鼎 此第六節。 爲治,不有憂慮,故今致 「危者,安其位者也」,言所以今 政之雖治,心恒不忘禍亂之事。 義於上,然後引《易》於下以 爲存,不有憂懼,故今致滅亡 者, 處 「子曰德 上 卦 有 一體之下 九四 言不能 以 之義以證之。 何 致 以 校 M 而 證 安其身, 薄 滅耳」之凶。 也。 又應 之。 或 此第五節 而 一之雖存. 禍亂也。 子日 位 前 此 初, 尊 知小 自恃 上九 結 其 結 此 既 折 成

由

心

此

引《易》後以此結之。 災及其形,以致渥凶也。 後 離 未動之前,又寂然頓无,兼亦不得稱「幾」也。 纖 動之微。 微,吉之先見」者,此釋「幾」之義也。 於瀆也。 有求焉,未能 道,絶於器,故能上交不諂,下交不瀆。 瀆」者,上謂 幾微,則能與其神道合會也。 幾其神乎」者,神道微妙,寂然不測。 之六二以證之。 前 承 且 [乃成爲吉,此「幾」在吉之先,豫前已見,故云「吉之 无 微而已。 :章云「精義入神」,故此章明知幾人神之事,故引豫 知 施 入有,在有无之際,故 ,幾其神乎」至「萬夫之望」者。 ,非己所堪,故有「折足」之凶。 「動」謂 能无諂、 若其已著之後則心事 道也,下謂器也。 離 於諂也。 云《易》曰介于石,不終日,貞 心動 瀆, 其文少,故不云「子曰 事動。 知幾窮理者乎? 言不勝其任者,此 於器不絶 云「動 「君子上交不諂,下交不 初動之時其理未著, 若聖人知幾窮理,冥 之微 顯露,不得爲幾。 而 人若能 「幾」,微也,是 有交焉,未 既 也。 若於道 「幾者,動 覆 也 夫子之言 敗其美道 此第七 若事著之 豫知事之 「幾」是 不冥 言。 能 之 於 已 唯 免

- 嘉 本同,阮本作「復」。
- 阮本無此字。

於神道、 也。 著也。 日,當 賢 幾其神乎」者也。 之理從微以至彰,知幾之人既知其始,又知其末,是 守介如石,見幾則動,不待終其 之,不得待終其日。 柔,則逆知在後之剛。 幾,❷是知其微; 志耿介,如石不 寧用終日,斷可識矣」者,此夫子解釋此爻之辭 不俟終日」者,言君子既見事之幾微, 諸本或有「凶 先見者 石,不終日,貞吉」者,此豫之六二辭 向吉而背凶,違凶 人唯庶於幾。 、幾合神則爲天下之主,何直只云「萬夫」而已,此 但 「其殆庶幾乎」者,言聖人知幾,顔子亞聖,未能 此第八節。 時 殆近庶慕而已,故云「其殆庶幾乎」,又以「殆」爲 「知柔 也。 故爲萬夫所瞻望也。 則斷 知剛」者 」字者, 可 · 動; 直 雖 既見 識矣。「君子 上節 而 云「吉」不云 子曰 未 纔見幾微,即 其定本則无也。 就言, 言赴「幾」之速也。 能 其 ,剛柔是變化 明其 言凡物之體 知 (幾,逆 幾、故 顔氏之子」至「元吉」 无復有凶 知幾是聖人之德,此 「凶」者 「萬夫」舉大略而 知事 知 引「顔氏之子」以 微 知禍福,何用 日 也。 從柔以 之道 之禍 知彰」者, 也。 故 故 「君子見 凡 則 福, 「《易》曰 特 既 得位居中,故 「介如 豫 須 至 云「吉」也 前 知 是 動 剛,凡 幾 0 知 初 言。 初 知 終 作 幾、皆 石 而 明之 時 其 竟其 節 介于 見 既 而 知 作 若 合 之 知 事 彰 事 應

> 遠則能 復行。 也。 心爲二,則不 絪緼,共相 以崇德也,安身之道在於得 緼 不能 顔子 辭。 生」者,「構」,合也,言男女陰陽相感,任 身,故此節明得一之事也。 故有不善之事,於形器顯著乃自覺悟,所有不善,未嘗 之事,見過則改,未嘗復更行之。 自知也。 絪 故 緼 至 以復卦初 自知 未能知幾,故有不善。 合其精則萬物化生也。 有不善,未嘗不 以去幾既近,尋 復 相 勿恒 於惡。 「知之未嘗復行」者,以顔子近幾,❸既知不善 也,所以 和會 附著之義。 能 九既在 凶 萬 使 此顔子以其近幾,若有不善,未嘗 萬物化 无 物感之變化而 大悔 知 卦初,則 此第 言天地 能 」者,若知幾之人本无不 改 醇 「天地絪 九 而有元吉也。 不近於幾之人,既有不 悔,故 一,若己 也。 若男女无自然之性 節 能 无 也。 心 復於陽道 但顏子於幾理 「男女 引復 精 自 緼,萬物化醇 醇 能 以 然得 也。 得 其自然得 前 卦 構 章 初 精, 一是速 万天 天 則 利用 九 地 唯 可 以 地 闇 善 物 若 安身 明 而 一之 以 而 1,以 絪 之 安 不

性

0 0

辭 嘉 本同, 阮本作「時」。

本 同 阮本作「是」。

近」,嘉本同, 阮本作「通」。

者,此《益》之上九爻辭。 傷之者至矣。 其心而後語,先以心選定其交而後求。 若己之爲得則萬事得,若己之爲失則萬事失也。 受,故云「一人行則得其友」。 更與二人同往承上,則上所不納,是三人俱行,并六 懷差二,則萬物 虚己存誠則衆之所與,躁以有求則物之所不與也 由己建立其心,无能有恒,故凶危也。《易》之此言,若 於天下,先在其身之一,故先須安静其身而後動,和易 安其身而後動」者,此明致一之道,致一者,在身之謂 三,不相納,是「則損 莫益之」也。 人行則得其友」者,此《損》卦六三辭 也。「言致一也」者,此夫子釋此爻之意,謂此爻所 以其醇 一也,故一人獨行乃得其 「《易》曰莫益之,或擊之,立心勿恒,凶 衆怒難犯,是「或擊之」也。 不 化生也。 一人」也。若六三獨行則上所容 在无位高亢,獨唱无和,是 「《易》曰 此言衆不如寡、三不及 (友也。 三人行則損一人, 也。 若其不然,則 「勿」,无也。 「子曰君子 言六三若 欲行

明失得之報也。「子曰乾坤其易之門邪」者,易之變化 曰 乾 也。 此第五章也。 坤 而 此 子曰乾坤其易」至「失得之報」。 起,猶 明「易」之體用辭理遠大,可以 人之興 前章明安身崇德之道,在於知幾 動 從 門 而 出 故 乾 濟民之行,以 坤 是「易之 正 得 義

> 名也雜 戰于野」,或稱「箕子明夷」,或稱「不如西鄰之禴祭」, 也。 《易》解,事類多有悔吝憂虞,❶故云衰亂之世所陳情 此 不憂於禍害。 各依爻卦所宜而言之,是不相 細 故 則 神明之德」者,萬物變化或生或成,是神明之德。 物之象,非 柔也。「以體天地之撰」者,「撰」, 衰 合乃生萬物,或剛或柔,各 有體」者,若陰陽不合則剛柔之體无從而 皆論戰争、 世之意邪」者,「稽」,考也,「類」謂 小之物,若「見豕負塗」之屬 辭理雜碎,各有倫叙而不相乖 象其變化之理, 邪。 0 若盛德之時,物皆遂性,人悉懽娱,无累於吉 而不越」者、《易》之其稱萬物之名,萬事 乾,陽 剛則柔,或以 盛 今《易》所論則 衰之理,故云「衰」意也。 物 是其易能 也。 坤, 剛柔體象天地之數也。 有其 陰 通 有「亢龍 物 踰越也。 ,是雜碎 達 體。 也。 越。《易》之爻辭多載 神明之德也。 數也。 陽多爲剛 陰 有悔」, 也。 事 「於稽其類,其 陽合德 生,以 凡云「邪」者 類。 天地之内,萬 或稱「龍 雖雜 陰 然考 陰 而 以 論 《易 其 陽 剛 説 凶 碎 校 意 通 爲 相 柔

^{■ 「}客」、嘉本同、阮本作「之」。「虞」、阮本同、嘉本作

❷ 「衰」,嘉本同,阮本作「變」。

裳」,是 凡此二 近道 也。 也。 爲 文飾也。 説,論其初微之事,以 是彰 近言龍戰,乃遠明陰陽鬭争、聖人變革,是其旨遠 物,而比喻大事,是所取義 肉」之屬,是其辭 者,言《易 若辨健物正言其龍,若辨順物正言其馬,是辨物正 釋爻卦之義,使各當所象之名,若乾卦當 觀 闇 「闡」,明 是 也。 體言之則云「微顯」也 其《易》辭 疑 例 此 「斷辭則備矣」者,言「開而當名」及 「辨物正言」者,謂辨天下之物,各以 往 而 文」者,不直言所 至 其解 但以 事 事 不 也, 其言隨物屈 也, 終 若「黄裳 定 ,遠明彼事,是其旨意深遠。 》解所稱物名多細小 ,決斷於爻卦之辭則 末 文也。 來 體以 之辭 是 闡明 事 微 微 碎 理,故 豫 也。 而 而 元吉」,不直言得中居職,乃云「黄 「其言曲 也。 小也。「其取類也大」者,言雖 占 幽 之顯 曲 是 闇 至其終 論之事,乃以義理明之,是 而各中其理也。 夫易彰往 别言之。 也,演其 察 ,以理言之則云 從 幽 類而廣大也。「其旨遠」者: 來 而 微 而 末顯 也。 備具矣。 中」者 ,若「見豕負塗」、「噬腊 以 闡 而 「開 義 至 明 著 察來」者,往 理則 一顯,從 而 也。 ,變化无恒 而 也, 若「龍戰 微 「其稱名也 當 「其 類正定言之。 龍 「辨物正 顯見著 「闡幽」,其 顯 言《易》之所 名」者,謂 論 幽以 事 ,坤卦 闡幽 其初 肆 于野」, 事 明 至 而 江其辭 言」, 當馬 時 必 隱 也 小 明 也 開 載

> 《易》明人行失之與得所報應也。 理。 報之以吉,是「明失得之報 而避凶,行善 者,其《易》之所載之事 而 幽隱也。 言《易》因自然 「因貳以 而 不 吉凶二理以濟民之行也,欲 行 濟民行」者,「貳」,二也, 惡 ·, 其 也。 也 解 「以 放 雄 明失得 失則報之以凶,得 顯 露 而 之報」 所 謂 論 令取 吉凶 者, 義 理 則 深

營作。 與 爲 履,德之基」者,以爲憂患,行德 《周易》起於文王及周公也。 辭起於中古。 象可以爲教,又須繫以文辭 第 法以示於後 卦之象,則在上古伏犧之時,但其時理尚質素,聖道 寂,直觀其象足以 古乎」者,謂《易》之爻卦之辭起於中古。 患,須脩德以避患,故明九卦爲德之所用也。 「作《易》者其有憂患乎」者,若无憂患,何思何慮,不須 台区 、脩德防患之事,但於此九卦最是脩德之甚,故特 六六章。 也。 今既作《易》,故 易之興 明所以作《易》,爲其憂患故。 其作《易 ,以防憂患之事,故繫之以文辭,明其失得 則《連山》起於神農,《歸藏》起於黄帝 (也)至 垂教矣。 》憂患,已於初卷詳之也。 知 「巽 有 憂患 示其變動 但中古之時事漸 以 此之所論, 爲本也。 行 也。 權 身 吉凶,故爻卦之 0 作《易》既 既 謂 六十四卦悉 若《易》之爻 患憂, 正 《周易》也 「其於 澆浮, 義 日 須 有 此 而

自

時,恒 益尊而光明也。 此已下明九卦之德也。 也。 至,故可履 制」者,巽 守處不移是德之地也。 德之辨」者,若遭 者,「裕」,寬大也,能以利益於物則 者能自減損於己,故「謙」、一 新,故云「損,德之脩」也。 静默,故爲德之根本也。「恒,德之固」者,言爲德 謙,則德不施用,是謙爲德之柄,猶斧刃 謙 之時,❶先須履踐其禮,敬事於上,故履爲德之初基 以言焉,以 ·井,德之地」者,「改邑不改井」,井是所居 損,德之脩」者,行德之時恒自降損,則其德自益而 此已上 小之時,即 不 厭 「復,德之本」者,言爲德之時先從静默而來,復是 物之厭 能執守,始終不變,則德之堅固 之柄 者,言 明九 申明號令,以 踐 防憂 薄也。2 也」者,言爲德之時以 也。 能辨於物之吉凶 恒 卦各與德爲用 患之事,故 卦雖 「復,小 「謙,尊 困之時守 損 與 言德 示法制,故能與 物 而辨於物」者,言復卦 言履卦 而 先難而 謙 損 雜 履卦爲 光」者,以 操 亦不移動 碎 也。 一,不遠 」别言也。「益,德之裕 不 者論其退下於人,「損 並 與 後易」者 移, 謙爲用 居 履, 德 德更寬大也。「困 物和諧 速復也。 德乃 之初 ,故爲德之固 能 而 也。 和 、德爲制度 常執 謙 , 先自減損是 ,若行 以 基。 而至」者, 可分辨 卑, 之常處,能 而守其 「巽, 德之 柯 守 恒 於 故 柄 德 欲 其 初 其 爲 爲 不 也 也 也。 也 德 細 之 用 增 用 德

> 者,并能 害己,故遠 天,不尤人,是无怨於物,故 己,❸故興利也。 移,是純一 復求身,則 者,性能謙 以和行」者,自此已下,論九卦各有 言履者以禮 而 潤澤,施惠於外也。「巽,稱而隱」者,言巽稱揚 居其所而遷」者,言井卦居得其所,恒 ·巽以行權」者,「巽」,順 困 長養,不空虚妄設其 益 不自彰伐而幽 卦於困窮之時 是增 他,後 施 益於物 害也。 其德也。 自知得 順,可以裁制於禮。 乃 而无私, 敬 無患是 事 隱也。 而能守節 「困以 能 於 失也。 「益以興利」者,既能 人,是調 則 法 「損以遠害」者 長 後易 是義之方 而 寡怨」者,遇困 養寬裕 也。 自此已上辨九卦性 「恒以一德」者,恒 无益也。 也。 ,使道通 既能順 「寡怨」也。 和 於物 「復以自知」者,既 性 益,長 所, 行 困 ,自降損 行 施用而 皆 時合宜,故可以 也。 住不移 故 而 守 裕 因 不屈 辨 窮 益物,物亦為 節不移,不怨 「井以辨 物 而 明 謙 而 德 脩身,无物 有 也。 能 性 不 而能 通 於 以 利 也。 終始 設」者 自 制 義 號令 益 一井 能 也 也。 禮 行 反

本同 阮本作「故」。

厭薄」,嘉本同,阮本作「不正」。

盈」,嘉本同,阮本作「益」。

權 也。 0 若不順 時 制 變,不可以 行 權 也

之虚。 也。 易,❷六位錯綜上下,所易皆不同,是不可爲典 若九月剥卦,一陽上極也,十一月,一陽下來歸 也。 也。 之屬是也。 皆法象陰陽,數數遷改,若《乾》之初九則「潛龍 也。 继 也,言行藏各有其度,不可違失於時,故韓氏云 應變之時所之適也。 或以陰易陽,或以陽易陰,或在初位相易,或在二位 互變動,不恒居 則「見龍」,是屢遷 體皆倣法陰陽,擬議而動,不可遠離陰陽物象而 第七章,明《易》書體用也。 剛 隱致凶」,「明夷以 「柔相易,不可爲典要」者,言陰陽六爻,兩相 知懼 「唯變所適」者,言剛柔相易之時,既无定準,唯 「上下无常」者,初居一位,又居二位,是上无常定 「其爲道也屢遷」者,「屢」,數也。 既窮上位之極,又下來居於初,是上下无常定也。 六位言「虚」者,位本无體,因爻始見,故稱 易之爲書」至「思過半矣」。 」者,外 「周流 内猶隱 體也。 也。 六虚」者,言陰陽周徧,流動 「其出 處昧利貞」,是出入有度 「變動不居」者,言陰陽六爻更 顯, 若一陽生爲復,二陽生 「不可遠」者,言《易 人以度」者,「出 言欲隱顯之人,使知畏懼 言「易」之爲道 正 義 也。 八常要會 在 日 参書 「豐以 交易 初也。 爲臨 行 虚虚 六位 妄爲 相 此

> 行」也。 也。 之人,則不曉達易之道理,❸則易之道不虚空得 辭,揆其義理,知其典常,是易道得行也。 之中,剛之與柔相易,仍不常也,故上云「不可爲典要 常也,故云「既有典常」。「易」雖千變萬化,不可爲 《易》之文辭,而揆度其《易》之義理,則能 故也。 適,是其常典也。 要,然循其辭,度其義,原尋其初,要結其終,皆唯變 事 言有人則易道行,若无人則易道不行,无人而行是「虚 也,「揆」,度也,「方」,義也,言人君若能 行善道,不須有師 畏懼、凶 於易也。 云「如臨父母」也。 也。 「苟非其人,道不虚行」者,言若聖人則能 「无有師保,如臨父母」者,言使人畏懼 非但使人隱顯知懼,又使人明曉於憂患并與 必不 咎而不爲也。 若不應隱而 如此,故云「道 言唯變是常。 保教訓,恒常恭敬,如父母臨之,故 「初率其辭而揆其方」者,「率」, 隱,不應顯而 「又明於憂患與故」者,「故 不虚 既以變爲常,其 行」也。 顯,必 有凶 初始依 若苟 知 「《易》之爲 「易」有典 此易, 咎 循其文 非 行 循 就 通 使 也 所 典 其 事 知

行權

嘉

本同,阮

或」,阮本無此字。

本無此字。

其始,故難知

也。

「卒成之終」者,覆釋「其

上易

是末也。

以事本,故難知;

以事

末,故易知,故云「本末

初

辭

擬之」者,覆

釋「其

初

難

知

也。

初

時

0

稱「末」,互文也。

從經文也。「本末也」者,其初難 云其「上」,則其初宜 其上謂卦之上爻,事已終極,成敗已見,故易知也。 始擬議其端緒,事未顯著,故難知也。 龍勿用」是原始也,又要會其事之終末,若上九「亢龍 貞」之時,有「居貞」之事; 也,「堅冰至」是要終也。「六爻相 「屯」、「邅」之時,是有「屯」、「邅」之事也。 「潛龍」、「亢龍」,是一卦之始終也。諸卦亦然。 也,言《易》之爲書,原 通,皆是也。 「其初難知」者,謂卦之初始起於微 之初六 若《屯》卦初九「磐桓、利居貞」,是「居 卦之中,六爻交相雜錯,唯各會其時 知也。 爲質 言《易》以原始、要終以 以《易經》爻辭言「初」言「上」,故 云「下」也。 也 「履霜,堅冰至」,「履 二,此 窮其事之初始、《乾》初 原始要終,以 六二「屯如, 遭如」, 是乘陽 亦 以 有一爻之中原始、 下亦 知 初既言「初」, 雜,唯其 是本也,其上 明 「其上易知」者 《易》 爲質」者,「質」, 爲體質 略舉 霜」是 時 體 一爻, **①** 則 物」者 (也,此 用,尋 原始 要終 若大 上 細 此 應 爻。 《乾》之九二「見龍在田、利見大人」、九五「飛龍 知也。 以 之辭,言聰明知達 坤之臣道之義也。 其中爻則 矣」者、「噫」者、發聲之辭、 見大人」之時,二之與五 利見大人」,是摠攝乾卦之義 中爻統攝 能 天下之物,撰數衆 知者觀其 直方大」,攝坤卦地道之義, 過半矣。 混盡統卦 爻,不能 噫乎發歎,要定或此卦存之與亡,吉之與 言上是· 居 彖 ○注「夫彖者」至「不亦宜乎」。 然可 解,則思過半矣」者,「彖

也:

故《坤》卦

畜初畜

丽

後

唯各主其事。

物」,事也。

餘爻倣此也。

有悔」

是要終也。

各數其德,欲辨定此六爻之是非,❷則摠歸於中爻,言 夫雜物撰德,辨是與 義,以中爻居一 一卦之義多也。 備具也。 事之卒了 人之德,辨定是之與 謂一卦之内而有六爻,各主其物 非 ¨, 則 而 无 若非中爻,則各守一爻,不 非其中爻不備」者,言雜 成 偏 就終竟,故 故能 非 統卦 易 則非 知 義也。 也。 其 中 若

書,原

始要終,以

其

一解則吉凶可

以

阮本同,嘉本作「二」。

知

矣。

謂

平居

自

知,

不須

誉

爲

也

区

但

辭

謂

文王桂下

之士,觀此

全大

彖

辭

則

能

思

慮

有

正義

日

0 欲」上,嘉本有「故」字,阮本無。

「 噫 !

亦要存亡吉凶,則居

可

知

六五「黄裳元吉」,亦統

卦爻雖

衆,意義必

在

其

統攝乾德。

又《坤》之六二云

也。

乾是陽長,是行「利

在

天

則 乎形」者,「愈」,益也,「 也。 多 於上於下无有偏二,故稱「一」也。 諸德,而用一 「雜物撰德而一以貫之」者,一卦六爻,雜聚諸 舉中爻是約、是簡,存備六爻之義是存博兼衆 貞」,夫子釋云「動於險中,大亨,貞」者,是舉立 注云「能 中爻義意 一,是論中爻之義也。 夫彖者 轉 一,則轉益滯陷於形體,言處 象之綱 , 无爲之稱,故少則近於道 近乎道」者 論中爻之義」者 爲初筮、其唯二乎」,是彖云「初筮」,其 也。 統 舉 也。 立 道以貫穿之。 「舉 象之統 ,若理能 云「論中爻之義」者,言象 立象之統」者,若《屯卦・ 者 ,若《蒙》卦云「蒙亨」、「初筮 云「約以存博,簡以兼衆」者,唯 滯 簡 」謂陷滯 約 「一」謂中爻也,以其居 謂 處妨 文 則 也 Ŧ 轉 礙 卦 也、若事務彌 「其事 轉 也。 下 附 彖 近於道 云「其理 辭 彌繁則 辭 彖 論 舉 物,撰數 象之統 影云 也。 明 量 , 道 彌 更繁 愈 在 此 立 中, 約 以 滯 九 桂 此

道,并 而 陰柔爲道,當須親附於人以得濟。 「柔之爲道,不利遠者」,此覆釋上「四多懼」之意。 也 明《易》興之時,摠贊明易道之大也。 逼於君 明諸 |與四」至「易之道也」。 桂 ,所以多懼 二、三、四、五爻之功用, ,其不宜利於疎遠 今乃遠其親援 正 又明三才之 義 也 各隨 日 其要 文釋 此 第

當紂 《易》之興起 不敢指斥紂惡,故其辭微危而不正 級 法於後使保身,危懼避其患難也。 故吉凶生也。 害,則吉凶不生也。 不當,故吉凶 者,言萬物 有等,故曰 无咎 道 義,唯三材之道也。 者非他,三材之道也」者,言六爻所效法者非更别 「吉凶生焉」,此節明三材之義、六爻相雜之理也。 故「多凶」,五居中處尊故「多功」也。 凶,五多功」之下皆有注,今定本无也。 則 賤之等也。 邪」者,此 「多譽」者, ,以象萬 ,既有變化而移 剋勝其任,故云「其柔危,其 世憂畏滅亡,故作《易 其用柔而 其 用 遞相錯 物之類、故謂之物也。 物」者,「物」,類 言 柔 在 此並 生焉」者,若相與 二所 中 「易之興也」至「易之道也」,此一節 紂之末世,故其辭者,憂其 與五同功」之義,五爲貴,三爲賤,是 居 陽位,若陰柔處之則傾危,陽剛 動,故 者 雜,若玄黄相間, 中也。 以 由文之不當,相 「道有變動,故曰爻」者,言三材之 覆 要 會 重 釋 「貴賤之等,其柔危,其 》辭,多述憂危之事, 无罪 上 畫以象之,而曰爻也。 也,言爻有陰陽、貴賤、等 二二多 、聚居 剛勝 咎而 周氏 物物 也。」今案康伯之注 ,間雜成文,不相 譽 與聚居不當於理、 故謂之文也。 也。 多譽 云:「謂當 相 「易之爲 三居下卦之極 也。 傾 雜,故曰 也。 諸 危 本二三 亦 也。 所 書」 以 有他 剛 以 文 文 **「**爻 明 以 貴 所 勝

案:

坎

卦

彖 》云:

「天險不可升

地

險

Ш

Ш

丘

陵。」言 險者

0

簡

静

阻

也。

大難

日

險,乾以

剛

健,

故

知

其

大難

曰 以

阻 知

坤

以

柔

水順,故

知其

、小難。

知

大

難

E

之所

興。

若不

有

易

則

爲險也,

德行恒簡以

知阻

者, 略

言

,以此之故,知阻之所興

也。

者,謂

乾之德行

恒易略、不

而生。

人情不等,制

辭

各異

也。

道之美,兼明易道愛惡

相

屈

正義曰:

此第九章。

用之道,其大體

如

此

也。

者,言易之爲道,若能終始之懼則无凶咎,此謂易之所 懼於終始,能於始思終,於終思始也。 若其慢易、不循易道者,則使之傾覆,若紂爲凶惡以 蒙大難,文王有天下是危者使平也。 下覆云「危者使平」,則似「危」謂憂危,是非既 「其道甚大,百物不廢」者,言易道功用甚大 「危者使平」者,❶既 於无咎也。 攻,情僞相感,吉凶 坤之德行 「夫乾天下」至「其辭 有艱難,以 自此已下終篇末, 摠明易 「懼以終始」者,言恒能 也。」則 若不簡 「德行恒 故 恒爲 「此之謂易之道 行 「易者使傾」者 此之故 「其要无咎」者 則爲 似 易 簡 周 一易以 以 阻 静 有傾 釋 悔吝 知 難,故 能 爲 不 險 知 危,以 得 有 知 未可 由 險 也 也 行 煩 險 此 至 聖人乘 驗也。 之慮。 人因 物之方也。 祥之應也。 也。 險不云 以是之故,物之或以 爲,皆勉勉不息。 云,或身之所爲也。 下之亹亹」也。 物得失,依之則吉,逆之則 萬物,使令得所。 研諸侯之慮」者,「研」,精也,諸 人,❷則萬物之心无不喜説, 研諸侯之慮」也。 能説諸心」者,萬物之心皆患險阻,今以阻險逆告 「成天下之亹亹」者,「亹亹」,勉也,天下有所 天地所生之性,各成其能,令皆得所也。 謂諸侯以 言易之爲道,有此諸 天地之正,設 阻 「象事. 「占事 故 知 「是故變化云爲」者、《易》既備含諸事 險 此易之道思慮諸物,轉 若依此易 易既 知 知器」者 「定天下之吉凶」 爲 「吉事有祥」者,若行 貴賤 來」者,言卜占之事,則 大 漸變改,或頓從化易,或 能説 難。 之位 ,觀其所象之事, 道 凶,是易能定天下之吉 德 諸 故 險 則 也。 也。 物之心,則 侯既 日 既 所 「能 爲大,明 「天地 爲得成,故云「成 「聖人 者,言易道 有爲於萬物,育 説

若能始終皆懼,要會歸

百種之物賴之不有休

廢

也。

誅滅也。

案:

云:

文

王

與

紂

之事,

危

其

辭

明,所以兩存其釋也。

諸

心」也。

「能

阻

爲

小

也。

於

益

精

粹

云

備

載

諸

凶

能

精妙

諸 故

侯

0 危 者 嘉本無「者」字。

阻 險 阮本同,嘉本作「險阻」。

天

?吉事

有

П

一之所

則

知 則

作

器 嘉

成

能

「人謀鬼

設

位」者,言

知

未

來之

謀, 感之事也。 X 无 近 情 害生」者, 相 吝生1者,遠謂兩卦上下相應之類,近謂比爻共 愛,有所憎惡,兩相攻擊,或愛攻於惡,或惡攻於愛, 者,若泯然无心,事无得失,何吉凶 得凶者,由情遷於惡也。 遷」者,「遷」謂遷移,凡得吉者, 以 親與能人,樂推爲主也。❷ 聖人既先與人謀、鬼神謀,不煩思慮與探射,❶ 兩 動之,使利益於物,是變動 人法之而行。 類 資取,取之不以理,故 相 而居 萬物之情,能 定得失,又卜筮 利言」者,若不變不動,則 也 而 相 白 應,❸則致凶咎。 不 感則利生,若以 攻擊,事有得失,故 姓 相 ,得理則 或害之,悔且吝」者,言若 與 得則 情」謂實情, 能 「剛柔雜居而 一者, 自此已下,又明卦 凶」者,近謂 通 吉,失理則凶,故吉凶可見也。 於 出出 謂 虚 鬼神以考其吉凶,是與鬼 深之理,是其能 聖 若各有應, 偽 人 僞 「吉凶生」也。 「悔吝生」也。 相 吉凶可見矣」者,剛柔二爻相 欲 「是故愛惡 以利 一謂 自此已上,論易道之大,聖 兩 感 舉事 於 爻 則害生 虚 物 而 相 由 僞, 爻剛柔、變動 雖 有損、 之時,先與 言説也。 近, 情 能 之有? 近 虚實相感,若以 也。 也。 遷移於善 相攻 而不相 弘通,不偏 「遠近 不 「情僞相感而 有害。 相得,不必 「凡易之情 則天下百 而吉凶 「吉凶以 相 由 人 得,又各 爲 有所 也。 今變 取 情 自 衆 「變 對 而 僞 謀 生 也 情 動 悔 貪 所 而 相 姓 能 圖

> 之人,述此六人之意,各準望其意而 凡此辭者 者,居不值時,失其所守之志,故其辭屈 辭多也。「誣善之人其辭游」者,「游」謂浮 辭 物, 人,其辭虚漫,故言其辭浮游也。6 定,其辭分散若樹枝也。❹「吉人之辭寡」者,以 其 者,貌雖相 慙」者,此已下 悔及吝也,故云「或害之,悔且吝」也。 其 直,故一 八外物則 解枝」者,「枝」謂樹枝也,中心 盡 竭 「辭寡」也。 順 或 ,皆論《易經》之中 親,辭 道 欲 物豈 説 害之,則 不以實,故「其辭慙」也。「中 人情 害之? 「躁人之辭多」者,以 不同, 有 M 有 今既有心 禍。 其 此 辭 於事疑 六 假令自能 各 「失其守者其 制 種 異。 於物, 之辭 其辭也 橈 放惑,則 其 將 將 不能 游 須 免濟,猶 情 欲 叛 躁 意 誣 其 違 者 心 其 故 申 辭 八吉善 其 罔 心 疑 叛 易 屈 也 不 己

周易正義卷第十三

[「]主」,嘉本同,阮本作「王」。「射」,嘉本同,阮本作「討」。

[「]又」,嘉本同,阮本作「以」。

[「]樹」,嘉本同,阮本作「閒」

[「]浮」,阮本無此字。

周易正義卷第十四

開 國 國 子祭酒上 子臣 孔 護 穎 軍 達 奉 曲 阜 勑 撰 縣

周易説卦第九

獸之文與地之宜,近取 之,觸類而長之,天下之能事畢矣。 所爲也。 成六之意猶自未明,仰觀俯察,近身遠物之象亦爲未 犧氏之王天下也,仰則觀象於天,俯則觀法於地,觀鳥 象在其中矣。因而重之,爻在其中矣。」又云:「古者包 爲六十四卦之本。 言 故謂之《説卦》焉。 ~ 以 故孔子於此,更備説重卦之由及八卦所爲之象 正 通神明之德,以 二《繫》之後、《説卦》之前,以《彖》、《象》附上下 義 E: 孔子以伏犧 《説卦 前《繋辭》中略明八卦小成 先儒以孔子「十翼」之次,乾坤《文 》者,陳説 類 畫 萬物之情。」然引而伸之,重三 諸身,遠取諸物,於是始作八 八卦,後重爲六十四卦,八卦 八卦之德業變化 又曰:「八卦成列 。 引 及法 而 伸 象

倚,立 即伏犧也。 地 倚數」也。 耦數於地,而立七、八、九、六之數,故 聖人作《易》,其「作」如何? 作也,且下《繫》已云「包犧氏之王天下也」、「於是始作 世,謂之「昔」者也。 制 而 者、皆本其事之所由、故云「昔者聖人之作《易》也」。 八卦」,今言作《易》,明是伏犧,❸非文王等。 陰陽 蓍數卦爻,備明天道人事 節將明聖人「引伸」、「因重」□之意,❷故先叙 生用蓍求卦之法,故 也。既用蓍求卦,其揲蓍所 而 昔者聖人」至「以至於命」。 立乾坤等卦,故曰 言其作《易》,聖人本觀察變化之道,象於天 不言「伏犧」 聰明叡知,謂之「聖人」,此 |而云「聖人」者,明以聖知而 日 「幽贊於神明 「觀變 以此聖知深明神明之道 妙極之理。 得, \於陰陽而立卦」也 取 日 奇數於天,取 「參天兩地 而 據 正 生 今 凡言「作 義 一蓍」也 而 聖 聖 日 稱 人 上 而 制 本 此

- 「以」,嘉本同,阮本作「之」字。
- 「□」,嘉本作「卦」字,阮本不空,亦無「卦」字。

0

0

「明」,嘉本同,阮本作「言」。

既

四

也。 人之道 之故也。 皆依《繋辭》云「天數五,地 注「參奇」至「陰數」。正義曰: 不知所以 深明神明之道,便能生用蓍之意,以神道與用蓍相 爲深也。 注 深妙之理,究盡 立,易道周備 爻,故曰 人如響,亦不知所以然而然,與神道爲一,故《繫 蓍之德圓而神」。 和順於道德而 一於一 於數,庶得吉凶之審也。❸ 爲五位相合,以 觀 幽 必「三之以天,兩之以地」者,天三覆,地 「蓍受命如響,不知 象立 乃三之以天, 深」至「而 期所賦之命,莫不窮其短長,定其吉凶 得兩合,謂 德,下以治 贊者, 「發 神之爲道,陰陽不測,妙而无方,生成變化 上卦,又 然而然者也。 揮於剛 ,无理 然也」。 就 理於義,窮理盡性以至於命」也。❷ |生靈所禀之性。物理既窮,生性又盡 佐而助 二與 理斷割人倫之正義, ●又能 桂 其 陰從陽。 不盡。 柔而 兩之以 發 「受命如響」,亦《繫辭》文也。」〇 八四也。 動 成,而 正義曰: 所 蓍則受人命令,告人吉 生爻」也。 揮散 數 聖人用之,上以和 以 地,而倚託大演之數 天得三合,謂一、三與 五,五位 其意皆以《繋解》所云「大 然而然」者,釋聖人所 鄭玄亦云: 令微者得著,故 於剛 先儒馬融、王肅等, 幽者,隱而 柔 蓍數 旧相得而 兩 畫 既 天地之數 而 難見 生, 各有合」 協 窮 生 二載 訓 爻卦 一變動 極 順 一,故曰 辭 X 故 五 爲 萬物 成 解 墨云 + 備 五 此 協 以 訓 明 聖 之 又

至

演之數 至「陰陽」。 包陰之道,故天舉其多,地言其少也。 [三中含兩,有一以包兩」之義,明天有包地之德 之始,三是奇數之初故也。 奇、耦者,蓋古之奇、耦亦以三、兩言之,且以兩 取耦於地,而立七、八、九、六之數也。 七、九爲奇,天數也,六、八爲耦 前 馬融、鄭玄等説。 不用而用以之通,非 韓康伯注《繫辭》云「大演之數五十」,用王 合數,故五十也。 生蓍」,便云「參天兩地 五. 數 易」之「所賴者五十,其用四十有九,則 Ŧi. 」,以爲大演即 明 ,地數五 用蓍得數 五十,其用四十 正 ,五位相得而各有合」,「天地之數五十有 義 而 E: 天 以大衍 然此倚數生數,在生蓍之後,立卦之 布以 地之數。 數 「
掛
則 而數以之成」。 而倚數」,驗文準義,故知 -有九」, 爲 五十,非即天地之數,故不用 卦,故以七、八、九、六當之。 雷 不以一目奇者, 又此上言「幽贊於神 風 明 ,地數也,故取奇於天 相 用 薄, 蓍之數。 用與不 山 何以參、兩爲目 ○注「卦象也 其一 澤通 輔 張 嗣 不用 ·用,本 下 氏 是耦數 意。 云,以 云 如 天 也 此 云 有 末 而

極

也 以

⁰ 割, 嘉 阮 本同 本同,阮本 本無此字。 無此字。

² 庶」,阮本同,嘉本作「度」。

者生之極」也。

此

所

賦

命乃自然之至理

, 故

「窮理

則

盡

日

人所

禀受,有其定分,從生至終,有長短之極,故

觀變」之前。

○注

「命者」至

「其極

也」。

正

-義曰:

爻,故先言「生蓍」,後言「立

卦」,非是聖人「幽贊

元

在

卦,故直言「仰觀」、「俯察」,此則

論

其既重之後端

策 蓍 遂

布

辭

者,謂 於來則 之理未 辭 象 陰 者逆」,注 影論 澤。 陽 變 初 用蓍之法,云「四 用蓍三扐 爲周 逆 化 八卦未 畫 之體 云「八卦 而數之」是 八 備 卦 重 故 二者, 而布一 以 則 此下 相 震 雷風 也。 此 錯 象 言 一云「八 爻,則十有八變爲六爻 變化 雷, 營而成易,十有八變而 各異 「知非八卦」者,先儒皆以 六 以 + 理 卦 · 山 巽 74 備 相 象 挂 澤 錯 風 於往 不通 非 , 數 以 小 成 則順 往 於 艮 之八 者 象 陰 而 順 山 也。 成 知之 卦 以 知 卦 也 然 兑

> 其 極 也

明

即《尚 之理 之義 以順 陽位,迭用六、八之柔爻,七、九之剛 道理,須六畫成卦,故作《易》者因 有二 未備 卦作《易》」也。 人生其間。 有二種之形,日 其終也」。 易》者分布六位 也。 云「履 重 也。 須在 種之氣,日 從天地生 卦之意。 ,所以重三爲六,然後周 書 六畫所 昔者」 霜堅 》云「高明柔克」及《左傳》云「天爲剛 陰陽必 既兼備三才之道,❷而皆兩之,作《易》本 正 立人之道 冰,陰 義曰: 處 成萬 八卦小 順承之柔與持載之剛也。 成物之陰與 「將以順 至「成章 而 備,是以 有其六位,分二、四 始 成爻卦之文章也。 物 「在形而言陰陽 有二 成, 凝 性 性命之理」者,本意將此易 命 是 造 但 ن ه 種之性, 曰 之理 施生之陽也。 也。 化闢設之時,其 有 盡,故云「昔者聖 正 也。 義 畫 而重之,使六畫 在 日 於 於 爻而來居之,故 其天地 爲 氣 愛惠之仁與斷 一者,即 ○注 陰 而 \equiv 此 才 言 位,三、五 其 立 天地既立 、 神・ 之道 德 柔 可或 立天之道 生 節 剛」者 是 地 成 人之畫 就 有 之道 萬物 順 而 陰 爻 卦 爲 割 成 此 陽 位

中矣。

文王又於爻卦之下繫之以辭

明

其爻卦之中

吉 之 四 仰

卦

,然後天地變化,

人事吉凶,莫不周

備、緼在爻卦

俯

察,用

陰陽兩爻

而

畫八卦,後因

而

重之爲六十

直

則用蓍在六爻之後,非三畫之時。蓋伏犧之初,

凶之義。

蓍是數

也。

傳稱

物生而

後有象,

象

而

後

有

卦

滋,滋而後

有數」,然則數

從象生,故

可

用數求象,於是

幽

於神明而

生蓍」,用蓍之法,求取

卦

爻以定吉

凶

繫

解 費

》曰「天生神物、聖人則之、无

有遠

近

幽

深,

知

物

是

也。

《繋辭》言伏

犧

作《易》之

初,不

假

用

成

- 本、 阮 本作「特」。
- 兼」,嘉本同 阮本無此字。

初、上无陰陽定位,此注用王之説也。〇注:「二、四爲陰,三、五爲陽。」正義曰: 王輔嗣以爲

民用 道 知將來之事者,易則逆前而數之。 用,人欲數知既往之事者,「易 既往之事、將來之幾,備在爻卦之中矣。 錯 交互而相重,以 薄,水火不相 以 澤,震、巽象雷、風,坎、離象水、火。 象明重卦之意。 人重卦,令八卦相錯,乾、 云天地定位而合德, 水、火異處,則庶類无生成之用,品物无變化之理 《易》以 因而重之,令八卦相 ,以逆數知來事 ·則《易》之爻卦與天地等,成性 之前,此《繫辭》文,引之以證逆數來事 逆 天地」至「逆數 雖 初 來 備 人 事 知來往之事,莫不假象知之,故 象 而相資。 《易》以乾、坤象 也 也。 天 0 Ш 地、 ○注「作《易》」至「民 澤異 錯 「以前民 坤、震、巽、坎、離、艮、兑莫不 雷、風、水、火、山、澤莫不交 既八卦之用變化如此 也。 ,則天地 體 」則順後而知之; 而 用」者,「易」占 正義曰 通 天、地,艮、兑 命之理、吉凶之數 人事莫不 氣 是故聖人用 若使天、地 不雷風 故《易》之爲 此 也 用。 各 備 聖 人欲數 事 動 矣。 節 , 故 不 象 在 人 正 此 而 就 交 所 Ш 作 義 聖 故 其 相 桂

物之功。 雷以」至「藏之」。 烜,乾 也。 上四舉 正 象、下 義曰: 四 此 舉 卦 節 者 摠 了, 王 明 肅

> 下,嚮 者 若出 萬 而 明聖人法離之事。 天下,嚮明而 東南之卦,斗 東爲春,春時 東方」者,解上「帝出乎震」。 坎 則 則 注。 注意,正引此文。 功 云 帝者,生物之主,興益之宗,出 齊」也者,言萬物之絜齊也,解上「齊乎巽」。 1,明也。 物 萬物皆相 在乎兑,陰 在 也。 互互 ,能成萬物而可 皆 乎 萬物則在乎震, 然《益》卦六二「王用享于 明 相 ,離,致 致 「帝出」至「乎艮」。 而 備 養焉, 萬 治 也, 見也,又位 物皆 陽 役以 也 治、蓋取 柄 萬 故 相 物物 明 指東南之時, 故 定則 則 相 養 E 戰 以 雷 出 云 致 見, 則 萬 絜 輔嗣之意,以此帝爲 離 諸 蓋 生 風 役乎 在 物則 在乎 在 齊萬物 南 爲 此也」者,解上「相 也。 與 取 南 乎 象 方之卦 震、 諸 ,坤」者 在乎 方,故聖 艮 乾,受納 以震是 日之卦,故 此」也。 萬物皆絜齊 齊 也。 則在乎異 帝,吉」,王 巽 震而 正 坤, 乎巽,巽,東 同 也。 義 解 「萬物出 用, 東方之卦 人法 説 齊巽 萬 E. 上「致役 以爲明 聖 物 乾 坤 萬 八、令萬 一人南 勤 南 物 天 者 康 也 見 輔 坤 也。 乎 乎 帝 面 也 勞 而 也 伯 與 者 嗣 乎坤 南 。 王 以 震 可 而 離 則 物 也。 面 注 於 天 地 巽是 離 也 柄指 言 而 在 相 此 日 굸 地 天 出 聽 也 平 者 見 之 因 帝 无 通

「覩」,阮本同,嘉本作「觀」。

0

成始 陰陽 寅 是坎爲勞卦也。 是東北方之卦也。 之卦,斗柄指北,於時爲冬,冬時萬物閉藏,納受爲勞 象水之卦,水行不舍晝夜,所以爲勞卦。 物之所歸也,故曰勞乎坎」者,解上「勞乎坎」。 西北是陰地 正秋而萬物皆説成也。●「戰乎乾,乾,西北之卦 説乎澤,又位是西方之卦,斗柄指西,是正 者,解上「説言乎兑」。 以 致 「戰乎乾」。「坎者,水也,正北方之卦 坤 役乎坤」。 也。」「兑,正秋也 後 也,故曰成言乎艮」者,解上「成言乎艮」也 相薄也 是 歲之初,則是萬物之所成終而所成 象 地之卦,地 」者,解 ,乾是純陽而居之,是陰陽相薄之象也,故 鄭云: 「艮,東北之卦也,萬物之所成終而 東北在寅、丑之間,丑爲前歲之末 上「戰乎乾」。 「坤不言「方」者,所言地之養物 ,萬物之所説 能 以兑是象澤之卦,説 生 養 萬 物, 以乾是西 也,故曰説 是 有 也,勞卦也,萬 其勞 始 又是 北 秋八月 萬物者,莫 也 7役,故 方之卦 言乎兑 以坎 正 也,言 北 也 艮 所 是

无晦 无所 非 别 明 物 跡,不 不成,莫有使之然者。 八 妙 卦生成之用。 神也」至「成萬物 萬 知 物 所以然而 而 爲言 者。 然,況之日 卦運動, 神 而 既 也 求其真宰,无有遠 範 萬物 ___ 童 神 天地,故 也。 變化,應時不失 正 義 然則 曰 : 此之下 神也 此 近,了 者 節

> 害,亦无成物之功,明雖相薄 明性雖不相入而氣相逮及也。上言「雷風 故言「艮」而不言「山」也。 燥潤之功是 變化而 雖 艮,東北方之卦也。 潤 光説萬物者「莫説乎兑」,兑象澤 異」,異象風 物 復 「不相悖」者,二象俱 「水火相逮」者,既不相 相 者「莫 乎坎」,坎象水也。 别 薄而 言乾、坤, 盡 疾乎 不相 成萬物也。 雷風水火,至於終始 也。 悖逆, 震」, 直 乾 舉 燥萬物 六子 震 故水火雖不 Щ 動,動若 終萬物、始萬物 艮不言「山 象 澤雖 人,又不相及,則 雷 以 上章言「水火不相人」,此言 者「莫熯乎 明 也。 相 而不相逆 神 相薄,而 懸 之功 橈 相 萬物於「山」義爲微 也。 」,獨舉卦名者,動 而 散 能 人 用。 萬 也 而 潤 離 者「莫盛乎艮」, 通 相 物 无 濕 氣、然後 相逮及,雷 」, 悖逆則相 相薄」,此 故 者 成物之功 萬物者「莫 \Box 象火 莫 鼓 能 疾 動 也 橈 行 風 平 萬

象風 説 坤, 震象雷, 順也」,坤 ,風行无所不入,故爲入也。 卦 名 乾健 訓。 雷 也」至「兑説也」。 象 乾象天,天 奮 地,地順承於天,故爲順也。 動 萬 物,故 體 爲 運 動 轉 坎 也 不 IE. 陷也」,坎象水 息, 義 巽, 故 日 入也」, 爲 「震,動 此 健 也 節

❶ 「正」,嘉本同,阮本作「立」。

也。 水 處 故爲麗也。 「兑,説也」,兑象澤,澤潤萬物,故爲説 險陷,故 爲陷 「艮,止 也 也」,艮象山 離, 麗 也 一; 山 離 象 體静 火,火 也 止 故 必 爲 著 ıŁ. 於

故爲馬 異主號 止外人,故爲狗也。「兑爲羊」,兑,説也。 文章,故爲雉也。 瀆,豕處污濕,故爲豕也。 説八卦畜獸之象,略明遠取 震爲龍」,震,動 `順從之畜」,●故爲羊也 也。 令,雞能 乾爲馬」至「兑爲羊」。 「坤爲牛」,坤象 知時,故爲 象,龍 「艮爲狗」,艮爲静 動 「離爲雉」,離爲文明, 物, 雞也。 水地,任 諸物也。 故 爲 重 「坎爲豕」,坎主水 龍 止 正 乾象天,天行健 而 也。 順 義 狗 王廙云: ,故爲牛 日 : 「巽 能善守,禁 爲 此 雉有 雞 羊 也 節

乾

坤

順之謂 爲耳 爲手」,艮既爲止 足」,足能動用,故爲足也。 説八卦人身之象,略明近取諸 口」,兑,西方之卦,主言語,故爲口 爲首也。 也。 ,故爲股也。 乾爲首」至「兑爲 「離爲目」, 「坤爲腹」,坤能包藏含容,故爲腹 手 「坎爲耳」,坎,北方之卦,主聽,故 亦能止 南方之卦,主 持其物,故 「巽爲股」,股隨於足則巽 П 身也。 也。 祖, 正 故 乾 爲手也 義曰: 爲目 尊 也 而 也 在 此 「兑爲 「震爲 上, 故 節

乾 天」至「少女」。 正 義 曰 此 節 説 乾

> 坤、 故曰中男。 父母而求其子也。 氣 初 三求得坤氣爲兑,故曰少女。 六子, 求得 爲巽,故曰長女。 乾 明父子之道。 坤三求得乾氣爲艮,故 氣爲震,故曰 得父氣者爲男,得母氣者爲女。② 乾二求得 王 長男。 氏云「索, 坤氣爲離,故曰中女。 坤 日 二求得乾氣爲坎 1少男。 求 也 二,以 乾初求得 乾 坤 爲

坤

也。 健之久也。「爲瘠馬」,取其行健之甚。 冰」,取其西北寒冰之地也。 始也。❸「爲玉、爲金」,取其剛而清明也。垂 運 卦 爲駁馬」,言此馬有牙如倨,❺能食虎豹。 倨牙,食虎豹。」此之謂 轉,故爲園也。 廣明卦象者也。 「爲良馬」,取其行健之善也。 乾爲天」至「木果」。 「爲君、爲父」,取其尊首而爲萬物之 此一節廣明乾象。 也。 「爲大赤」,取其盛陽之色 王廙云 正 「爲老馬」,取其行 義 日 駁馬 乾既爲天,天動 瘠馬 《爾雅》云: 此下 能 ,骨多也 「爲寒、爲 食虎豹 歷 就 八

8 2

從 本同, 阮本無此字。

爲」,嘉本無此字

首」,嘉本同,阮本作「道」。

而」,嘉本同, 阮本作「之」。

倨」,阮本同,嘉本作「鋸」。

爲長子」,如上文釋,震爲長子也。 「爲子母牛」,取 其象雷聲之遠 健也。」「爲木果」,取 既爲地 葦」, 萑 成載也。 也。 地」至「爲黑」。 竹」,竹 日 : 物 「爲 也。 非 取其極陰之色也。 「爲 不轉 ,地受任生育, 大塗」,取 其多蕃育而順之也。「爲大輿」 此 葦,竹之類也。 「爲旉」,取其春時 「爲釜」,取其化生成熟也。 也。 聞 初生之時 文」,取其萬物之色雜也。 移 也。 節 也。 「爲柄」,取 廣明 其果實 一爲 其 「爲均」,取 震 色 萬 故謂 馵 正義曰: 蒼筤,取 象。 著 物之所 「爲決躁」,取 足」,馬後 「其於馬 其生物之本也 完之爲母 木, 震 「爲玄黄」,取 氣至,草 以其地道 有 爲 生 其 此 似 雷」至 出 也 足 也 春 星 也。 其剛 木 平均 之著 白 爲 生 節 「爲 「爲 「爲 善 爲 之 皆 廣 於躁 倍之宜 情多 上釋 之謂 作 風 風 此 之性,前却 吹 近 也。 節 利 於 廣 也。 利 明 也。 巽 其

也。

取

其

載萬物

衆」,

取 能

其

地載物

其於地也

爲黑」,

蕃

鮮

正義

吝嗇」,

取其地

生

布」,

取

其地

廣

明

坤

象

坤

天 取

也。

坤爲

其

至

取其躁人之眼,❸其色多白也。 領闊爲廣顙,髮寡少之義,故爲廣 疎,如人之少髮,亦類於此 前却,不能果敢決斷,亦皆進退之義 之直木也。「爲工」,亦皆取繩直之類。 於人也爲寡髮」,寡,少也 高」,取其風性高遠,又木生而上也。 「爲香臭」也,取 急也。 去塵,故絜白 「巽爲長女」也。 「爲風」, 象。 物,進 其究爲躁卦」,究,極 坎爲水」至「多心」。 「市三倍」,取其木 也。 其風所發 取 其陽在 巽 退之義 「爲 「爲長」,取其風行之遠 爲 ,風落樹 繩 木 ,故爲寡髮 也,又取下風之遠聞。 直 上 也。 摇 木 「爲近利」,取其 取 顙 之華葉 「爲不果」,取 木 可 生 其 也,取 也。 也。 也。 以 「爲進退」,取其 9 蕃 也。 號 輮 「爲 「爲臭」,王 「爲 盛, 小,則 「爲白」, 令齊物 曲 其風之勢極 正 「爲 直 在樹 多 長 於 義 也。 女, 市 躁 白 廣 其 即 曰 眼, 顙 者 則 人之 風 取 如 巽 「爲 其 肅 性 此 其 如 順

字。

鳴」,取: 美也。

馵,取其動

而見也。

「爲作足」,取其

動

而

行

健

也。

「爲

生

始

生 爲

一,戴甲

而

出 取

也。

其究爲健」,究

~, 極

也

於

震 取

動 其

則 鮮

爲健

也。

爲蕃鮮」,鮮,明

也,取

其

春

1時草

蕃

育

而

明

巽

爲木」至「躁

卦

正

義

曰

的

顙」,

頟

的

顙,

亦

動

而

見

也。

其

於

稼

也

爲

反

吐旉· 其相

布

而 而

生

也。

雜

成蒼色

動

也。

「爲蒼筤

「爲

萑

⁰ 皆 出 嘉 嘉 本同 本同,阮本 阮本作 無此 正。

本同 阮本無此字。

本同, 阮本作「近」。

也。 潛竊 穴也 力弱 也。 亟, 色。 卦, 激 也。 痛 其 流 水 離 離 憂險 節 磨 射 曲 急也 0 爲火」,取 如 ° 取其人之有 坎爲勞卦 也 取 爲火」至「上槁」。 直 不 地 廣 取 爲薄 爲中 其於馬也爲美脊」,取 爲 「爲電」,取 盗賊 故 其 難 其 能 而 明 其 矯輮」,取 ,取其中堅 「爲月」 輪者, 也。 水行 重載, 懷陰氣也。 行 坎 剛 女 爲 蹄」,取其 也。 也。 象 南 在 矯 爲 无所 也。 也,又北 運行 於 方之行 輮 常憂災 「其 以其有明 「其於木也 血 取 心 外 其 也。 坎 「爲甲 内 不 其月是水之精 猶 如 病 使 於 水 爲 通 動 以 水行 方主 」, 憂 曲 也。 告 「爲弓輪」,弓者 爲乾卦」,取 輿 流 水一, 地 也。 也 剛 似火之類 也。 者 ·胄」, 也 迫 有 正義 也。 一聽,聽 自 「爲 其險難,故 直 其陽 爲堅多心」,取 爲 水也 地 「爲下首」,取 「爲隱伏 取 捍 爲 取 而 多眚」,取 其 **日**: 日 爲通」,取其 「其於人也爲 也。 矯 行 其 也。 在中也。 北 勞 也。 「爲 其日 剛 也。 則 方 此 使 取 」, 「爲中 之行 在 「爲盜」,取 耳 心 直 其 赤」, 激 其 「爲 所 其 外 於 節 病 者 痛 日 其 其水 烜 剛 矢 也 表 廣 曲 也 也 也 人 水 曳」, 水 爲 亦 是 也。 女」,如上 加 裹有 明 在 爲 也 行 藏 火 流 亟 取 取 憂 離 「爲 内 爲戈 爲 之 有孔 爲 如 水 取 向 心 血 地 爲 也 陰 象。 大 爲 精 行 其 下 之 ľП 耳 取 水 水 中 溝

> 也。 多節 也。 取其 也。 取 具 少 廣 鼠 實 必 鼈 爲 節 也 爲小石 也。 明兑象。 (爲果,草實爲蓏,取 高,故艮象山也。)爲科上稿」,科,空也 女」,如上釋「兑爲少女 廣明 枯 秋 爲 「爲門闕」,取其有徑路,又 也。 物 槁 「其於木也爲堅多節」,取其 取其皆止人家 禁止人也。 蟹 爲口舌」,取 良 成 「爲毀折、爲附決」,兑,西方之卦 也。 页,取 象。 爲 熟 「兑爲澤」至「爲羊」。 「兑爲澤」,取 鸁 稿稈之屬則毁 其 艮 「艮爲山」,取陰在於下爲 爲 良 が蚌、 「爲指」,取其 西 爲 也。 「爲徑路」,取其 Щ 方於 山、又 其 爲 「爲黔 龜 出 陰 至 也。 其 五 於 〈爲陽 折 陰卦之小, 在 多 事 山 皆 内 隊之屬 也 爲 〈崇高 「爲巫」,取其 谷之中 執 取 爲 節 ,果蓏之屬則 言,取 卦之小 山 岡川 止 空, 一之所 也。 Ш 在 物 二,取 正義 雖 木既空中 也。 地 口舌爲 外 也。 止 ,又兑 /生,其 ·者,故 正 「爲果蓏」, 高 類 也 。 陽 i E 其 「爲闇 義 有澗 卑 「爲 口舌之官 Щ E 附 主 也 堅 居之 言 此 爲 在 其 狗、 · 者, 秋 決 道 勁 (寺), 此 小 於 於 也 潤 故 爲 節 爲 木 石 上 木

於」,嘉本同

阮本

無此字。

^{● 「}水」,嘉本同,阮本無此字。

② 「之」,嘉本同,阮本無此字。

取少女 「其於地 也。 從 也 姉 爲 剛 爲 鹵 娣 也 取 水 澤 爲 羊 所 停 則 如 鹹 H 鹵 釋 也。 取 「爲 其 羊 妾」, 性

周易序卦第十

則 四 因 比等,是人事門也。 《易》之緼也。 極 大有須謙,蒙稚待養等,是相須門也。 泰之次否等,是天道運 第四相反門,第五相 序其相次之義,故謂之《序卦》焉。 六門」往攝:第一天道門,第二人事門,第三相 門也。 變以對之,乾坤 「,故云「非《易》之緼」,故以取其人理也。● 篇 卦,二二相耦 致傷等,是相 , 屯蒙、需訟、師 ,其先後之次,其理不見,故孔子 正 義 如 曰:《序 遯 蓋因卦之次,託象以明 極反壯, 病 非覆即 卦 、坎離、 門 比 之類 也。 如因小畜生履,因 須門,第六相病門。 》者,文王既繇六十四卦,分爲上下 動 數 大過 是 變。 韓 門也。 竟歸止等,是相 也。 康伯云: 覆者,表裹視之遂成兩 頤、中孚小過之類是 變者,反覆唯成一 如 其周氏就《序 訟 「序卦之所 義。」不取深緼 就 如賁盡致剥 履故通等,是相 必 有 如乾之次坤 上下二經,各 反門 師 今驗六十 師 也 因門, 明 卦 必 卦 非 進 》以 也 之 如 有

> 之謂也。 義曰: 謙 曰 : 隨。 矣。 「有大而 即 時不忒。 之,而況 人君喜樂歡豫 蒙」,直取始生之意,非重釋屯之名也。 也」,❷盧氏云「物之始生故屯難」,皆以 且 「豫, 剛 言已畢。 剛 屯 變,然則康伯所云 聖人 ,爲物所説,所以 柔始交」以 難」之義。 「吾君不游,吾何以休, 故不用周氏之義。 正義曰: 王肅 應而志 本定先後,若元用 能 建 聖 更言「屯者,物之始生」者,開説下「物,生 王肅云:「歡豫,人必有隨。」「隨 一侯行師 謙必 人以 云「屯,剛 行,順 案:上言「屯者,盈也」,釋屯次乾、 釋「物之始生」也。 鄭玄云:「喜樂而 則以 豫, 順 乎? 八爲豫。 故受之以 動, 爲 以 「因卦之次,託象以明 動,豫。 人所隨。 柔 則 天地以 ○注 孔子《序 刑罰 始交而 人既 吾君不豫,吾何以助。」此 豫」, 屯 順動,故 清 豫,順 説 案:《豫 剛 出 卦》之意 而 難 豫 其 ○注 民 生,故 至 意 人則隨從。」孟 以 自 服 以 日月不過 故 一始 「順以」至 「物之始 動 卦 然隨之, 即即 聖 韓康 義」, 者 則 生 爲 故 人 不 彖》云 1,皆以 也 物 順 此 天 伯 蓋 應 、坤,其 生」釋 始 則 直 非 動 上 地 而 「所 能 云 如 子 引 必 正 74 生 虚 覆

- ●「其」,阮本同,嘉本作「其義」。
- 「物」下,嘉本、阮本皆有「之」字。

2

論之矣。 在養。 之。 節 義, 之於經也。 而周氏等不悟其非,兼以「過失」釋大過之名,已具論 鄭玄、輔嗣義同。 輔嗣注此卦云: 韓康伯云「順以動者,衆之所隨」,在於人君取致豫之 順 過失」之「過」。 則厚」。 ,注破先儒上經明天道,下經明人事,於咸卦之初已 在 然後爲物所隨,所以非斥先儒 君 紂作靡靡之樂,長夜之飲,何爲天下離叛乎? 子雍以爲「過在不養」,違經反義,莫此之尤。 説 正義曰:鄭玄云:「以養賢者宜過於厚。」王 豫 ○注「言咸」至「遠矣」。正義曰: 韓於此 在 案:此《 「音相過之過。」韓氏云「養過則 人也。 唯王肅云「過莫大於不養」,則以爲 若以 《序卦》以大過次頤也,明所過 人 君 喜 也。 樂游 ○注 豫 示 0 八厚」,與 人 養」至 則 故 隨

周 易雜卦第十一

相 卦 故韓康伯云: 以 類 》孔子更以 爲義 ,或以異 正 義日: , 其 相 於 「《雜卦 意 上《序 明也。」虞氏云: 《序卦》之外别言也。」此者聖人之興 錯 雜 卦》依 》者,雜糅衆卦,錯綜其義,或以同 而 對 文王 辨 其次第,不與《序 「《雜卦》者,雜六十四 上下而次序之,此《雜 ,卦》同。

> 也。 人之意,或欲錯綜以濟之,故次《序卦》,以其雜也 因 時 故 而 《歸 作,隨其事 藏》名卦之次, 宜, **②**不 亦 必 多異 皆 相 於 因 時 『襲,當 王道 有 損 踳 益 駮, 之意 聖

周 易正 義卷第十 四

鄉貢進 詳 詳 詳 都 勘 勘 勘 勘 勘官將 官朝 官徵 官承 勘官 勘 勘官許州觀 官承奉郎守太子右赞善大夫柱 王 官文林郎 元貞 奉郎 朝 事郎守太子右對善大夫臣 奉郎守大理評 士 仕 請大夫守國 臣 郎 守 張 察 守開 守 國子毛詩博士柱 大 支 理 使登仕 封 事臣 子司業柱 評 府 事 雍 臣 丘 秦 郎 一縣主簿 劉 試 國 國 奭 大理 賜 賜 國 弼 胡 紫金魚袋臣 臣 緋 臣 司 孫 魚 解 令 直 袋臣 問 兼 貞 監 解 吉 察 孔 御

損

維

史

臣

0 游, 嘉本作「歡」。

事」,阮本作「時」。

详勘官登仕郎守光禄寺丞臣牛 韶详勘官登仕郎守将作監丞臣尹 文化

詳勘官儒林郎守大理寺丞臣畢 道昇詳勘官登仕郎守光禄寺丞臣牛 韶

徵事郎守國子學丞臣劉 弼再校详勘官宣奉郎守太子右贊善大夫臣李

説

宣奉郎守大理寺丞臣畢 道昇再校徽事郎守國子學丞臣劉 弼再校

微事郎守太子右赞善大夫臣胡 令問再校

尚书中书书》中女事主国中环系引国白公儿二下端拱元年戊子十月 日推忠佐理功臣金紫光禄大夫行中散大夫守國子祭酒柱國赐紫金魚袋臣孔 维都校宣奉郎守太子右赞善大夫臣李 说再校

户臣王沔等進尚書户部侍郎参知政事柱國瑯琊縣開國伯食邑七百

柱國隴西縣開國伯食邑七百户臣辛 仲甫

推忠佐

理

一功臣

丘金紫光

禄大夫行尚

書户

部

侍

郎

參

知

政

推忠協 書門 下平章事監 謀 佐 理 功 臣 修國史上柱 光 禄大夫中書侍郎兼户部尚 國東陽 郡 開 國 侯 食邑 書 同 中

千三百户食實封貳伯户臣吕 蒙正

推 伯户臣 忠協謀同德佐 文館大學士上柱 理 功 國許國 臣 開 府儀 公食邑八千户食實封壹阡陸 同三司守太 保兼 侍 中 昭

一四九

周易集解

〔唐〕李鼎祚 撰

目録	小畜 五一	比 四八	師 四四	訟 四〇	卷三	蒙 三三		坤 一九	卷二	乾 一	卷一	周易集解序 一	李氏易傳序	四庫全書提要 一	校點説明		目録		
	大畜 一〇六	无妄 〇三			剥 九六		觀	臨				豫七四			同人 六五	否 六二	泰 五八	卷四	履 五四

夬 一六二	卷九	益 一五七	損 一五三	解 一五〇	蹇 一四三				明夷 三七										頤 一〇九	周易集解
節 []]	<u> </u>	卷十二			旅	豐 二〇五	歸妹二〇二	漸 一九九	卷十一	艮 一九五	震 一九二	鼎 一八八	革 一八四	井 一八〇	卷十	困 一七五	升 一七三	萃 一六九	姤 一六六	

目録		李氏易傳後序 三三四	周易雜卦 三二九	周易序卦 三二一	周易説卦 三〇四	卷十七	周易繫辭下 二八八	卷十六	周易繋辭下 二七一	卷十五	周易繋辭上 二五四	卷十四	周易繋辭上 二三七	卷十三	未濟 二三三	既濟 二三〇	小過 二二七	中 界
----	--	------------	----------	----------	----------	-----	-----------	-----	-----------	-----	-----------	-----	-----------	-----	--------	--------	--------	------------

 \equiv

校點説明

義」。 宗之諱,斷定《周易 書省著作郎, 左 證,謂李鼎祚爲「資州磐石縣人」,唐明皇幸蜀時 記》、《輿地紀勝》,並參之《通志》、《能改齋漫録》等 人劉 仕唐,爲 明儒朱睦樸《周易集解序》中 易》的唯 集 拾 1,作《周易集解跋》,對李鼎祚生平進行了詳細考 祚 解》避太宗、 遺 、毓崧根據李鼎祚《自序》及《元和志》、《寰宇 (《通義堂文集· 進《平胡論》,後召守左拾遺」。 周易 秘閣 一文獻。 代宗登基後、「獻 集 仕至殿中侍御史」。 學士。」並 高宗、肅宗、代宗之諱 由 新、舊《唐書》皆未給李氏立傳。 集解》「成于代宗之朝,更無 唐 周易集解跋》 稱他「以經學稱於世」。 李 鼎 《周易集解》,其時爲秘 祚 <u>-</u> 輯, 劉毓松又據《周 「鼎祚,資州 是 肅宗時「仍官 唐 而 朝 不 保 存 避 清 疑 德

易》學有象數派與義理派之分。兩漢主象

中《 玄、 注 叔堅、《九家易》、《乾鑿度》、《易軌 伏曼容、孔穎 學。 弼 鄭玄、劉表、何晏、宋衷、虞 序》),收録有子夏、孟喜、焦贛、京房、馬融、 朝時 弼)之野文,補康成(鄭玄)之逸象」(《周易集解 玄學義理《易》爲宗。 北 氏、梁丘之《易》亡、孟、京、費《易》人無傳者。 晉時 之代表。 數。 列於學官」(《漢書・ 壽、京房建構或完善之象數《易》學爲西漢《易 、姚信、王廙、張璠、向秀、王凱沖、侯果、蜀才、翟 ,孔穎達奉詔撰定《五經正義》,於《易》則以王 融、鄭玄、荀爽、虞翻之象數《易》學爲代表。 乾鑿度》、孔安國、蔡景君、焦贛、延叔堅、王廙 韓康伯、劉瓛、何妥、崔憬、沈驎士、盧氏、崔覲 並有李鼎祚自加之案語,凡二千七百餘節。 至隋代,王注 期,南尊王弼義理《易》學,北崇鄭玄象數《易》 期, 西漢《易 王弼義理《易》學興起。 至漢宣帝、 達、 》學 姚規、朱仰之、蔡景君、孔安國、延 傳 盛行,鄭學 自 藝文志》)。 元帝時,「有施、 《周易集解》旨在「刊輔嗣(王 漢 初 翻、陸績、干寶、王 田 浸微。 何, 東漢《易》學 》共四十家《易 永嘉之亂後,施 而 孟、 由 唐 孟喜、 梁丘、京氏 初重 一肅、王 荀爽、 南 南北 則 焦 弼 輕 以 魏 延

引及。 學之重視。 千三百節,幾占二分之一,可見李鼎祚對虞氏《易》 僅 各僅二節,向秀三節,子夏《易傳》、 爲 沈 目》云: 四 驎 此書之存矣,是真可寶之古笈也 鄭玄注中所引及,蔡景君、延叔堅爲虞翻 節, 土、 有論及。 孟喜、京房、劉 「千百年後,學者得考見畫卦之本旨者,惟 伏 劉斌僅五節。又馬融雖僅八節,於虞翻 曼容、姚 對其保留漢《易》之功,《四庫全書總 姚信十四節。 規、崔 表、 覲十家各僅 何晏、張 唯 虞翻《易》注 播、朱 王凱 節 沖 仰 獨 之六 兩 注 且 中所 家 近 焦 注 各 家 贛

可見,李鼎祚力圖將象數與 注 易》注五十八節, 中。 但 對當時流行 周易集解》所輯主要爲漢魏以來之象數《易 如 輯 入的王弼《易》注 孔穎 的 義理《易》的 達《易》注亦多達五十三節 義理融 有五十七節, 許多注解 爲 體 亦輯 康伯

之朱睦樗本,其次爲據朱睦樗本之毛晉汲古閣 此 作《序》之本,而今存最早的 本 外尚 刊 之雅 有乾隆丙子年(一七五六)盧見曾據宋慶曆 於《周易集解》之版本,有 雨 堂本、文淵閣《四 是 明 庫全書》本以及 北 嘉 靖 宋 慶 時 曆 據 計 用 曆 本。 FI 本 章

> 依例 悉從 曠閣 於嘉 易集解》的 卦》三篇題。 雅 易序卦》、《周易雜卦》二篇題外,其餘均未 稱,改爲《周易集解》。 傳》,今據李鼎祚《原序》、 解》之原貌。 校本(簡稱照曠閣本)。 諸本皆源於宋慶曆本這一系 繋辭 四庫全書》本(簡稱四 假雅雨堂盧氏本互爲參訂」,「凡毛本訛舛脱佚 》的 雨 補 本「初 盧本改正」,具有一定的 堂本錯 慶十年(一八 分卷等 傳》、《說卦》等傳部分、除了卷十七已加 加《周 就 編 訛 排 問 四 易繫辭上》、《周易繫辭下》、《周易説 雅 汲古本校梓、繼得蘭陵孫觀察本」,又 較少,所以 及分 題 庫本《周易集解 雨 0 有 堂本《周易集解》原 五)的 卷,故予以逐 所闡發,有助於我們 原書卷十三至卷十七爲釋 此外還參校了影印 庫本),力圖呈現《周 以 四庫本、照 張 此 海 校 統。 本 鵬 〈提要〉》對《周 勘 爲 録 價值 照 經過 底本。 置 曠 曠閣 閣 名《李 一,所以: 於 比較可 本。 瞭 卷 本等所 張 文淵 首。 解 易 氏 作 氏 以 《周 《周 集 F 現 集 閣 爲 照

史• 作 藝文志》亦 七卷,宋晁 關 於《周易集 稱 公 武《讀 解 + 》的 卷。 卷數、《新 書志》稱 四 庫本《周 「止有十卷」、《宋 唐 易集解 書 藝文志 》自序

劉毓崧考之較詳,可備一説:作十八卷。至於到底原爲多少卷,實難考之,清人

《略例》一 《集解》止有十卷,而《索引》别七卷。 也。 與《集解》本相輔 篇,或謂其首尾俱全,初無亡失。《中興書目》既言 云: 「其王氏《略例》,得失相參,采葑采菲,無以下 卷者、係總計《集解》、《索引》 逸,卷數未見明文,然以諸家目録參互考之,竊疑 列音義異同,兼以 矣。」據此則李氏之釋《周易》,更有《索引》一書,詳 之不盡,别撰《索引》,錯綜根萌,音義兩存,詳之明 序》云:「至如卦爻彖象,理涉重玄,經注文言,書 即「集解」之異文。 十卷,又言十七卷,尤令閱者無所適從。 自《集解》十卷以外、《索引》當有七卷、是《索引》 仍附經末,式廣未聞。 北宋以後,通行之本皆係十卷,或謂其逸去七 藝文志》載李鼎祚集注《周易》十七卷、「集注. 至於此書卷數,諸家目録各有不同。 卷爲王弼所編,與李氏無關,其餘十七卷 而行,此十七卷之目録所由來也。 發揮爻象錯綜之理,雖其書久 如其所言,則此書原有十七卷 凡成一十八卷。』蓋除 而言,故《自 諸書稱十七 今按《自 序》又 《新 唐

> 《自序》中之卷數,以 十卷爲十七卷,欲以複其 傳,疑爲無據,其誤甚矣。 引》遂沉晦而不彰; 亦未得也。」(《通義堂文集·周易集解跋》) 知有十卷之本,而不知有十七卷之本。 無《索引》,於是《索引》遂湮没而莫考。 特以記載簡略,止標《集解》而遺《索引》,於是《索 加以刊刻流傳,止有《集解》而 遷就調停,而昔人舊目 舊觀,所謂楚則失之,齊 雅雨堂所刻《集解》强 甚至有改 此所以但 相 沿

收有《經典釋文》校點本,故此次校點不再附入。雅雨堂原刻本原附有《易釋文》,現因《儒藏》

校點者 張文智

四庫全書提要

武《讀 郎。 考。 李鼎 其 讀 惟 秘 考》引李燾之言則曰:「鼎祚《自序》止 書《新 閣 諸 書 據《序》末結銜,知其官爲秘書省著 《舊唐· 祚撰。 書 臺,知爲資州人耳。朱睦 學士,不 據袁桷《清容居士集》載,資州有鼎祚 臣等謹案: 亡失也。」朱睦樘《序》作于嘉 所 書 而 亡 唐書· 志 不載 鼎祚、《唐書》無傳、始末未詳, 書·經籍志》稱録 》 曰 失」,豈後 -知何 「今所 是編,知 藝文志》作十七卷。 .'據 周 有 人併之耶? 也。其時代亦 易集解》十七 爲天寶以 止十卷 開元 而 後 始 **《**經 盛 卷, 晁公 末皆 不 靖 時 云十 義 作 爲 兀 可

> 與諸家 《集解》十卷,故與《唐志》不符。 《序》中稱「至如卦爻彖象,理涉重玄,❶經 《索隱》六卷,共成十七卷。《唐志》所載 又改《序》中一十卷爲一十八卷,以 本始析十卷爲十七卷,以合《唐志》之文。 併《索隱》、《畧例》數之,實非舛誤。 本十卷,附《畧例》一卷爲十一卷,尚别 萌,音義兩存,詳之明矣」云云,則《集 注文言,書之不盡,别撰《索隱》。 行毛晉汲古閣本乃作一十七卷,《序》中亦 巳,亦云《自 而《索隱》散佚,刊本又削去《畧例》,僅 (畧例》一卷之數,故又與朱睦 王氏《畧例》附于卷末,凡成一十八卷, 蓋自宋以來,均未究《序》中「别撰《索 所説截然不 序》稱十卷,與燾説 同,殊滋疑 **孝**《序》不 實。 至毛氏刊 同。 錯綜根 合附 今考 至宋 解 存 有

爲「玄」,據改。以下徑改,不再出校。「玄」,原作「元」,避清帝玄燁諱。依《自序》原文,當

0

既 姚規、 容、孔穎達、案: 案: 韓 固 仍 將來之疑。 之故 其 本 義考》所補考。等三十五家之説。 **廙、張璠、向** 衷、虞翻、陸績、干寶、王肅、王弼、姚信、王 詩》分冠小序之例。 以《序卦傳》散綴六十四 贛、京房、馬融、荀爽、鄭玄、劉表、何晏、宋 刊輔 盛 康伯、 不必一一追改也。其書仍用 以毛本著録。 \geq 盧氏《周易注》、《隋志》已佚其名。 ,漢《易》遂亡,千百年後,學者得考見 ,致愈說愈訛耳。 止十卷者 嗣 朱仰之、蔡景君案: 語 劉瓛、 之野文,補 故 秀、王凱沖、侯果、蜀才、翟玄、 至十卷之本,今既未見, 疑者誤 何妥、崔憬、沈驎士、盧氏、 亦 以上三十二家、朱睦樗《序》所考。 蓋篇帙分合,無關 不能 康 所採凡子夏、孟 疑,改者誤 成 解《唐志》稱十 今詳爲考正, 之逸 卦之首,蓋用《毛 以上三家,朱彝尊《經 象」, 崔覲、伏曼 王 改。 自 弼 蓋 序》 喜、焦 宏旨, 本,惟 王 則 以 七 即 學 姑 謂 祛 辨

寶之古笈也。乾隆四十五年七月恭校上畫卦之本旨者,惟賴此書之存矣,是真可

李氏易傳序

皆傳荀氏學。《九家》亦以荀爲主。 乖 象皆假 翔注《易》,其説六爻升降之義,皆荀法也。 之義詮釋經文。 已亡佚。 經,頗得聖人遺意。 翁以《彖》、《象》、《繫辭》、《文言》解説 易傳》,集解共三十餘家,荀、虞獨 一家之業,爲兩漢最。 兩 六朝,王氏之《易》與鄭氏並行。 輔 象 今所傳之《易》乃費《易》也。 漢傳《易》者數十家,唯費 嗣《易》專尚黄老,謂 其後荀慈明 也。 韓康伯 故當時兖、豫言《易》者, 唐有《章句》四 祖述費學,亦以十篇 因之,《易》之大 故 唐資州李氏 卦 中所 氏 多。 爲 [卷, 惜 虞仲 八義始 取之 費長 古文 自孔 上下 撰

附宋 字。 義。 代之《易》,無不博綜玄覽,而求其得聖 嗣之 法 之遺意者,推漢學爲長,以其去古未遠, 氏、毛氏刊本 氏刊王存鄭,此誤解《序》義 猶存故也。 . 野 余學《易》數十年,於唐、宋、元、 荀、虞逸象最多,故李氏《序》云「刊 王伯厚所采鄭氏《易》於後,以存 乾隆丙子德州 今幸《李氏易傳》尚存。 文,補康成之逸象」。 流傳, 爲校正謬誤,刊以 盧見曾序 然板皆迷失,又多 也 前明朱 晁公武 」,爲辨 公行世, 氏 謂 明 而 古 輔 並 訛 IF. 家 胡 李 兀

周易集解序

卑,君 鮮矣。 神,一 既 至若 見之以爲 曲 諸 風 物, 闡 八索成 而男女分,咸恒 成萬物 雨 近 叙 陰一陽之謂道。 家國之教鬱興。 臣位列,五 森羅 巍 取 斯乃顯 曰 巍蕩 在 心諸身, 知 而 萬象 地 形 不 蕩,難 0 元 則 遺 諸 百姓日 氣 四 在 備 運 山 設 絪 天 支百體 澤 仁者見之以 相 而 其 可 而 緼 則 用而 通 藏諸用,神 工 繼,父子道 名焉。 夫婦睦。 三才 範圍天地 日 氣 月運 不 合其度; 陰 鼓之以 知, 陽 成 逮 行 爲 象 不 乎天尊 人倫 彰 无 君子之 而 測 潤 方 神 不過, 雷 知者 之 之以 遠 而 功 .道 謂 取 辈 地 易

之情。 桂 下 以 睽。」「上古結繩爲政,後代易之書契,百 剡 遠,蓋取諸隨。」「古者穴居而野 以 宜 舜 諸 通 人易之以宫室,蓋取諸大壯。」「弦 而 日 也 木爲耒,耒耨之利 -之嘖, 理,萬 以 以 木爲矢,弧矢之利,以威天下,蓋 濟不通,蓋取諸涣。 之」。「刳木爲舟,剡木爲檝,舟檝之利 氏 退,蓋 离。 中爲市,致天下之人,聚天下之貨,交易 三百 作。 行 畫 作結繩 庖犧氏 人 而 其 取 通其變,使人不倦,神其化,使人 擬 以察,蓋取諸夬。」「故聖人 + 典 諸噬嗑 卦,「 諸 四四 禮 *\frac{\times}{\times} 没,神農 而 一。」「觸 形容,象其物宜,而 以 爻,「天下之能 爲 通 網罟, 以教天下,蓋取諸益。 神農氏没,黄帝、堯 神明之德 古 類 氏 服牛乘 者 而 作,斲 以 庖 長之」, 佃 犧 處 馬, 木 以 氏 以 爲 漁 木爲弧 ,後代聖 引重致 王 類 耜, 見 取 其 蓋 天 萬 諸 揉 下 取

照,二 乾,夕 隱。」「 於密 性 遠害」,説以先之,「定其交而後求,安其 不 無 有 莫善乎蓍龜」,「 鈎深致遠,定天下之吉凶,成天下之亹 而 而後動」,「履,和而至,謙,尊而光」,「能 自 其 爲 玩其 人之道 能 有 心,能研諸 旨 精 知 「利 遠 也,問之以言,其受命也 祐 若夫 惕 而 遠 解 義 自然 邇 神 之,吉 若 用安身」。 四焉」,斯之謂 微 幽 其 ; 雜 動則觀其變而玩其占」。 厲」,「無 妙玄 神」。 然虚室 深,遂 辭 卦之德,方以 物 慮」,「是故君子 .: 文,其 神以 撰 通 不 生白, 德 知來 П 聖 深深 利者 有 知來,智以 僻 言 辯 一人以 物一, 矣。 吉祥 師 不 焉 曲 是 也。 智」、「探嘖索隱, 保, 可 不 而 與 識 此 故 能 至 中 非 ,居則 如 至 能 洗 言 止 應之如 藏 臨 其 於 「窮 往」、「將 觀 父 坐 事 終 易 「蓍之 損 困 忘 其 母 退 理 日 肆 亹 象 焉 遺 藏 身 以 而

> 然淆 言。 難 豈 則多參天象,王乃全釋人事,且易之爲道 而 偏 未 尋 笑。 脩身之正 滯 測 傳 亂,各脩局見,莫 原 人事近而易習。 方以 淵 注 夫 於天人者哉? 權 深。 百 類聚 興三 家 術 唯 緜 也 教,鈴 ,其在兹乎? 王 歷 鄭 自 千 相 辨源流。 鍵 則 古。 致使後學之徒, 沿, 1 九 折 商 流, 頗行于代。 楊 雖 人 室 競 黄華, 嗑 實 天象遠 有 開 親 穿鑿, 國、 授 微 鄭 然 而 承

嘖。 迄今巨 觀之士,「得意 先 論 句,愈例發揮。 儒 道豈慚 經注文言,書之不盡 有所未詳,然後 集虞翻 臣 康 唐。 少慕玄風,遊心 成之逸象。 於前 一、荀 采羣賢之遺言, 哲。 忘言」。 俾童 爽三十餘家 至如 各列 蒙之流 輒 當仁 墳籍。 卦爻彖象 加 名 别撰《索 添 義,共契玄宗。 既 議 削。 刊 覽 不 歷 輔 三聖之幽 讓 觀 而 隱 每至 嗣 理 於師 悟, 涉 章 重 達

臣李鼎祚序好,冀將來君子無所疑焉。秘書省著作郎例》,得失相參,采葑采菲,無以下體,仍附經末,式廣未聞。凡成一十八卷,以貽同經末,武廣未聞。凡成一十八卷,以貽同綜根萌,音義兩存,詳之明矣。其王氏《略

唐 州

乾 乾 上 下 乾,元亨利貞。

固,不 則之。 德 也; 日: 故名「乾」不名「天」也。 健 案: 故 爲 出 用 失 日「元亨利 庶 ^ 貞,正也。言乾稟純陽之性 元,始也; 欲 説 其宜。 物」,各得元始,開 使人法天之用, 運行不息,應化 卦》「乾,健 点」矣。 是以君 亨,通 也」,言天之體 子法乾 无窮 不法天之體, 也 ○《子夏 通 ; ,故聖人 和 而 利, 一, 故 行 傳》 能 和 四

初 九,潛 龍 勿用。

九者, 老 陽 之數, 動之所占

> 德在 之位 月,陽 借 象陽 故借龍比君子之德也。 子之道有 故言「勿用」。〇干寶曰: 稱龍者,假象也。 潛伏,故曰 不 故 初。 曰「勿用」。 月之時,自復來 有聖明之德,未被時用 ·彰,是 龍 陽 愚 而乾元所始也。 也 稱 以喻天之陽氣 氣 俗 陽重,故稱「九」。 在 始 以 行藏。 之中,此文王在 田 ○馬融 動 君子韜 「潛龍」也。 潛,隱 ,利見大人。 於 黄 龍之爲物,能 曰 : 天地之氣有升降,君 也。 泉。 光 夏 也 陽處三 也。 待 傳》 時 既 物 初九甲子,天正 龍 初九既 故曰「勿用」。 陽在 티 : ; 未 美 莫大 未 初九,建子之 下 沈 里之爻也。 泉之下,聖 位 萌牙,猶是 隱 成 驎 初 始, 於龍,故 龍, 所 飛能潛 尚潛伏 其 地 士曰: 九,十 故 稱 以 故

九二,見龍

王 弼 曰 : 出 潛 離隱,故 曰 見 龍」。

傳

不偏 此文王免於羑里之日也。 時,自臨來也。二爲地 也。 於 而 三則「乾乾 一於三才爲地 利見大人」,唯二、五焉。 有人功者也 地 〇干寶曰: 雖非 故 君 曰 位, 一在 四則「或躍」, 道,地上 君之德也 陽氣將 田 陽在九二,十二月之 上,田 即 德 施 故曰「利見大 田、故稱 施 ,聖人將顯, Ŀ 周 初 在 鄭玄曰: 則 則 普 地之表 (過亢, 不彰 居 田 中

九三,君子終日乾乾,夕惕若厲,无咎。 息至三,二變成离。 鄭玄曰: 之終而 在人道,君子之象。 夕惕」以 一一一一 一 一 元 一 元 危去陽 爲之君 喻 三於三才爲人道。 臣。 行,故曰「无咎」。 「旦」以 承乾 謂三臣於五 喻君。 ○虞翻 行乾,故曰「 离爲 日 謂三居下 則 曰 : 有乾德 坤 〇干寶 疾 乾 爲夕。 脩 乾 柔 陽 而

> 乾。 事,故 時,自 順,以懷多福,故曰「无咎」矣。 恨早耀文明之德,以蒙大難, 凡无咎者,憂中之喜,善補過者也。文 匪 物、人爲靈、故以人事 速,反復天道,謀始反 於此爻焉。故君子以之憂深思遠,朝 懈。 此蓋 泰來 爻以氣 著「君子」焉。 仰憂嘉會之不序,俯懼義 文王反國,大釐其政之日也。 也。 表 陽氣 繇 以 陽在. 成 始 龍 終,故 天地之功者,在 出 興 地上 九三,正 嫌 曰「終日乾 其 而 增脩柔 和 不 之不 接 月 關 之 夕 動

九四,或躍在淵,无咎。

邪離 崔憬 猶 未能 也。 在 四。 龍自試躍天,疑而 飛於天也。 躍者,暫起之言。 羣,故「无咎」。 티 : 一月之時,自大 言君子進德脩業,欲 四以 處淵 (壯來 〇干寶 初 既 爲 上 下 不安於 應,「淵 也 日 進 四 及 退,非 於 地 初 而 中 氣

也。 也 九 辭疑矣。 經常之教,故聖人不得已而爲之,故其 甲 此 子,龍之所由升也。 守柔順則逆天人之應,通權道則違 武 王舉兵 孟津,觀釁而退之爻 或之者, 疑之

九五,飛龍在天,利見大人。

九、亢龍有悔。 既 龍 之 利見 曰: 明无形,而 鄭玄曰: 以利天下,故曰「飛龍在天」,天下之所 若庖犧觀象於天,造作八卦,備物致用, 在天,故「飛龍在 時,自夬來也。五在天位,故曰「飛 就,萬物既覩,故曰「利見大人」矣。 也。 謂四已變,則 此武王克紂,正位之爻也。 〇干寶曰: 龍 五於三才爲天道。天者, 在 焉,飛之象也。 天,利見大人」也。 五體离。 陽在九五,三月 离爲飛,五 ○虞翻 聖 功 清

王 肅 窮高 曰「亢」,知 進忘 退,故

> 德相濟。武功既成,義在止戈。 之時也。 桀放於南巢,湯有慚德,斯類是也。 終,天之鼓物,寒暑相報,聖人治世,威 反,必陷於悔。 悔 也。 亢,過也。 〇干寶日 案 : 乾 體既 陽 以人事明之,若 在 備,上位 上九 盈而 四 不 既 月

用 九,見羣龍,无首吉。

首」,坤利在「永貞」矣。 劉 爲不正,則佞邪之道也。 居人之首,則物之所不與 九 用天德,乃見羣龍之義焉。 瓛曰: 」也。○王弼曰: 總六爻純九之義,故 九,天之德也 也 故乾吉在 夫以 以 柔 剛 日 順 健 元 用 而 而

《彖》曰:

劉瓛曰: 彖者,斷也 斷 卦之才也。

大哉「乾元」,

《九家易》曰: 曰「大」。 乾者純陽,衆卦所生,天之象 陽稱 大。 六爻純陽,故

惟 也 乾 觀 則 乾之始, 之,故 日 以 大 知 哉 天 --德。 元 惟 天 爲大, 氣之

始 也。

萬物資始,

荀爽曰: 乾,猶萬物之生本於天。• 百二十册,皆受始於乾 謂分爲六十四卦 也 册 萬 取 千五 始於

乃統天。

《九家易》曰: 與天合化也。 乾之爲德, 乃 統 天道

雲行雨施,品物流形。

虞翻 形,萬物化成,故曰[品物流形]也 爲雨,故「雲行雨 曰 : 已成既濟。 施。 乾以雲 上坎爲雲,下坎 一雨流 坤

大明終始,

府 荀爽曰: 而終於坎。 ,故曰「大明終始」也。 乾起坎 离坎者,乾坤之家而 而終於离, 坤 陰陽之 起 於离

> 六位 時 成

爽 曰 : 六爻隨時 而 成

時 乘六龍以御天。

終始,六位以相揭爲時成。 也。六爻效彼而作也。 侯果曰: 「日月終始萬物」,是其義 而 時乘六龍以御天」也。 陶冶變化,運 大明,日也。 四 時 而 統御 大明以 六位,天 故《乾鑿度》 也 言乾乘六 天地 書 地 ·, 故 夜 兀 日 時

貞」。 乾道變化,各正性命,保合大和, 首出庶物,萬國咸寧。 乃 利

劉瓛 咸寧」也。 出庶物」。 曰 : 陽氣爲萬物之所始,故曰「首 立 君而天下皆寧,故曰 「萬 或

《象》曰:

象 也 取 其 法 象 桂 爻

本」, 四 庫本、照曠閣本作「稟」。

四 庫本、 照曠閣本作「像」。

天行健,

詳矣。 懈,以「健」詳其名。 猶如地體不順, 卦獨變名爲健者。○宋衷曰 何妥曰 : 天體不 承弱之勢順 · 健, 餘卦當名,不假於 能行之德健 也 ,所以乾 晝夜不 也

君子以自强不息。

能。 《老子》曰:「自勝者强。」〇干寶曰: 强不息」矣。 昃不暇食,仲尼終夜不寢,顔子欲罷不 虞翻曰:「君子」謂三。 必須在位也。故堯舜一 「君子」,通之於賢也。 凡勉强以德,不 一日一夜過周 自此以下,莫敢淫心舍力,故曰「自 一度,故「自强 乾健故 日萬機,文王日 「强」。天 不息」。

潛龍勿用」,陽在下也。

荀爽曰: 氣微位卑,雖有陽德, 潛藏在

下,故曰「勿用」也。

見龍在田」,德施普也

也。二當升坤五,故曰「見龍在 荀爽曰: 「大人」謂天子。見據尊位,臨長羣陰, 見者、見居其位。「田」謂 田 。 坤

終日乾乾」,反復道也。

德施於下,故曰「德施普也」。

虞翻曰: 至三體復,故「反復道」,謂

「否泰反其類也」。

或躍在淵」,進「无咎」也。

咎也」。 地下稱「淵」也。陽道樂進,故曰「進无 上躍居五者,欲下居坤 荀爽曰: 乾者、君卦。 四者、陰位。 初,求陽之正。 故

飛龍在天」,「大人」造也

荀爽曰: 造制。大人造法,見居天位,「聖人作而 萬物覩」,是其義也。 飛者,喻无所拘。 天者,首事

亢龍 有悔」,盈不可久也。

《九家易》曰: 坤三,屈爲諸侯,故曰「悔」者也。 曰「盈不可久」。若太上皇者也。下之 曰「盈」也。 亢極失位,當下之坤三,故 陽當居五,今乃居上,故

用九」,天德不可爲「首」也。

龍」。 宋衷曰: 者吉,故曰「无首吉」。 能先之,「不可爲首」。 純陽,則「天德」也。 萬物之始,莫 用九,六位皆九,故曰「見羣 先之者凶,隨之

文言》曰:

十二卦皆放焉。 劉瓛曰: 依文而言其理,故曰「文言」。 ○姚信曰: 乾坤爲門户,文説乾坤,六

元」者,善之長也;

《九家易》曰: 乾者,君 當爲君,始而大通,君德會合,故「元」爲 卦 也。 六爻皆

善之長也」。

亨」者,嘉之會也

《九家易》曰: 通者,謂陽合而 衆善相繼,故曰 「嘉之會也」。

利」者,義之和也,

利矣。 荀爽曰: 陰陽相和,各得其宜, 然後

「貞」者,事之幹也。

荀爽曰: 陰陽正而位當,則可以

幹

萬事。

君子體仁足以長人,

爲木,木主春,故配 「元」 爲四德之首。 何妥曰: 此明聖人則天合五常也。仁 「君子體仁」,故有「長人」之義也。

嘉會足以合禮,

何妥曰: 禮是交接會通之道,故以 「通」。五禮有吉凶賓軍嘉,故以「嘉」合 西己

利物足以和義, 於禮也。

六

以 何 利 妥 物 日 : 以 利 合於五常之義。 者,裁 成 也 君 子 體 此 利

貞固足以幹事。

方水 委任 物宜 以合禮。禮主夏養,南方火也。 也 何 水」,則智之 仁主春,生東方木也。「亨」爲 以教化於人。「元」爲善長,故能體 成形」者,仁義禮智信也。言君法 也 ൬ 貞」爲事幹,以 統 妥 事 也。 日 屬 言天運 夫「在天成象」者,「乾,元亨利貞」 於事、故《論 也 於 而 以和義。義主秋 故孔子 君 貞,信 配「信」也 四四 明證矣。不言信者,信主 ,故《中 「首出 時,以生成萬物。 配於智。 也 日「仁者樂 語 ·孚》云「信及 庶物 曰 君子堅 敬 成,西方金 智主 而 山 貞 而 嘉 冬藏,北 「利」爲 正 四 豚 信 此 流會,足 「在地 五常, 釋非 魚 者 時 故 可 以

> 信 弘。 金 亦 生者,土之功也。 忒」者,乾之象也; 由 木,非土不載; ,明矣。 信既 人君 統屬於君,故先言乾而 无爲皇 極 土居 而 德載物」 . 義 奄有天下。 中宫,分王 禮 智,非君 而 後 五. 四 示 水火 行 不 相

君子行此四德者,故曰「乾,元亨利貞」。 敗。 紂 則 所 以化物,觀運知 始也,故夫子留 之懿德。 干寶曰: 道義之門,在於此 敗 以 所 則 利民, 禮 由 四德者,文王所由 妨 用, 是故乾 教淫; 夫純 守正一業所以定俗 其事 「意焉。 陽,天之精氣。 時 廢; 冠卦首,辭表 矣。 所 逆則拂時,其 以 猶《春秋》之備 興; 忘則 順天, 然則體仁 失正,其官 JL 氣用 也。逾亂 篇 愆者,商 四 、功否 Ē 目 行, 隨 己 宜 ; 所 明 五.

初九曰「潛龍勿用」,何謂也?

何妥 夫子假設疑問 也。 後 五 交皆

放此 也

子曰 「龍德而隱者也。

何妥曰: 此直答言聖人有隱 顯之龍

云「勿用」矣。

德。

今居初九窮下之地,隱

而不見,故

不易世,

崔憬曰: 言據當潛之時,不易乎世而

行者,龍之德也

不成名。唐以後本「不易乎世,不成乎名」。

當隱之時,以從世俗,不 ·自殊

異,无所成名也。

遯世无悶,

崔憬曰: 道雖不行,達理无悶 也。

不見是而无悶。

崔憬曰 世人雖 不 己是, 而 己知不 違

道,故「无悶」。

樂則行之,憂則違之。

虞翻 則行之」。 坤死 陽出 稱「憂」。 初震,爲樂、爲行,故 隱 在 坤中,一 遯

世无悶」,故「憂則違之」也。

確乎其不可拔,『潛龍』也。」

虞翻 於上,君子弗用。 曰 : 確,剛貌也。 隱在下位,確乎難拔, 乾剛 潛初,坤亂

潛龍之志也。

九二曰「見龍在田、利見大人」,何謂也?

子曰:「龍德而正中者也。

言能「正中」也

虞翻曰:

中,下之中。二非陽位,故明

庸言之信,

荀爽曰: 處和 應坤, 故曰

庸行之謹。

《九家易》曰: 也。 常 也 以陽居陰位,故曰 謂 言 常 以 信, 行 谨 常 以

謹矣。

閉邪存其誠

和,故以「存誠」言之。 二在非其位,故以「閑邪」言之。能處中宋衷曰: 閑,防也。防其邪而存誠焉。

善世而不伐,

德」,此之謂也。 伐」。故《老子》曰「上德不德,是以有以美德利天下,「不言所利」,即是「不以美德利天下,「不言所利」,即是「不以,家易》曰: 陽升居五,處中居上,始

德博而化。

順從,故物「化」也。 荀爽曰:處五據坤,故「德博」, 羣陰

何謂也? 子曰:「君子進德脩業。九三曰「居子終日乾乾,夕惕若厲,无咎」,

以「進德脩業」也。業,事也。三爲三公。君子處公位,所選坤,謂爲「進德脩業」。○宋衷曰:虞翻曰: 乾爲「德」,坤爲「業」。以乾

忠信,所以進德也,

憬曰: 推忠於人,以信待物,故其德日濯玄曰: 忠於五,所以脩德也。○崔

脩辭立其誠,所以居業也新也。

敬而從之。 玄曰: 居三,脩其教令,立其誠信,民謂「夕惕若厲」,「居業」謂居三也。○翟謂、夕惕若厲」,「居業」謂居三也。○翟

知至至之,可與言幾也;

翟玄曰: 知五可至而至之,故可與行

幾微之事也。

知終終之,可與存義也。

姚信曰: 知終者可以知始。「終」謂三

義」。 之,可 二以 與進脩意 至於九五,可 王進德脩業,所以貽厥武王,至於九五 也 服事殷,終於臣道。終於臣道,可 義 ·與言微 崔憬曰 者 合,故言「知終終之,可與存 宜 與進脩意合,故言 也」。知天下歸周,三分有 也 君子」喻文王也 知存 知 Ļ, 君子之宜 「知至至 言文

是故居上位而不驕,

驕」也。 成,故爲「上」。「夕惕若厲」,故「不成,故爲「上」。「夕惕若厲」,故「不虞翻曰: 天道三才,一乾而以至三乾

在下位而不憂,

之」,故「不憂」。 虞翻曰:「下位」謂初。隱於初,「憂則違

故乾乾因其時而惕,雖危无咎矣。」

則廢,懈怠則曠,故「乾乾因其時而惕,王弼曰: 惕,怵惕也。處事之極,失時

雖危无咎」。

曰:「上下无常,非爲邪也,九四曰「或躍在淵,无咎」,何謂也? 子

陽正位,故曰「上下无常,非爲邪也」。故欲上躍居五。下者,當下居坤初,得荀爽曰: 乾者,君卦。四者,臣位也,

進退无恒,非離羣也。

荀爽曰:「進」謂居五,「退」謂居初,故

「進退无恒,非離羣也」。

君子進德脩業,欲及時也,故无咎。」

崔憬曰: 至公,欲及時濟人,故「无

咎」也。

子曰:「同聲相應, 九五曰「飛龍在天,利見大人」,何謂也?

虞翻 卦 雷 日 風 相薄」,故「相應」 謂震巽 也。 庖 犧 觀 也。 變 而 張 放 璠 八

相應,合德同化,動静不違也。天之聲。號令者,君之聲。明君與天地曰: 天,●陽也。君者,陽也。雷風者,

同氣相求。

氣,相感則火出也。氣,相感則水生, 陽燧與日,同有陽求」也。〇崔憬曰: 方諸與月,同有陰虞翻曰: 謂艮兑。「山澤通氣」,故「相

水流溼,

陰,故曰「溼」也。 荀爽曰: 陽動之坤而爲坎。坤者,純

火就燥。

先流溼,□火先就燥。下」,「水火不相射」。○崔憬曰: 決水陽,故曰「燥」也。○虞翻曰:「离上而坎陽爽曰: 陰動之乾而成离。乾者,純苗爽曰: 陰動之乾而成离。乾者,純

雲從龍,

荀爽曰:「龍」喻王者,謂乾二之坤五爲

故「從龍」也。 坎也。○虞翻曰: 乾爲龍。雲生

風從虎。

地,故「從虎」也。 坤爲「虎」。風生喻國君。○虞翻曰: 坤爲「虎」。風生爲巽而從三也。三者,下體之君,故以荀爽曰:「虎」喻國君。謂坤五之乾二,

聖人作而萬物覩。

曰: 虞翻 在天子之位,功成制作,萬物咸見之矣。 見,故曰「聖人作 乾五、造作八卦、「以 萬物之情」。 曰 : 陽氣至五,萬物茂盛,故譬以聖人 覩,見 五動成 也。 而萬物覩」也。 离,日 通神明之德,以 聖 、則庖 出 照物 皆 陸 績 類

本乎天者親上,

荀爽曰: 謂乾九二本出於乾,故曰「本

● 「天」下,四庫本、照曠閣本有「者」字。

乎 夫」。 丽 居 坤 五,故曰 「親上」。

本乎地者親 下,

荀爽曰 : 謂 坤六五本出於坤,故曰「本

乎地 崔憬曰: -0 降 謂動 居 乾二,故曰「親 物親於天之動,植物 下一也 親

於地之静。

則各從其類也。」

虞翻 曰:「方以類聚,物以羣分」,「乾道

變化,各正性命」,「觸類 而 長」,故「各從

其類」。

上九曰「亢龍有悔」,何謂 也? 子 日 貴

而无位

荀爽曰: 在上故「貴」,失位故「无位」。

高 而 无民,

民」也。夫「率土之濱,莫非 何妥曰: 既不 處 九 五. 帝 王之位,故「无 王臣 二,既非

王 位,則民不隸屬也。

賢人在下位,

荀 「賢人」。 爽曰 : 别體 謂上應三。 在 下,故曰「在下位」。 三陽德 正,故 曰

而无輔

荀爽曰: 兩陽无應,故「无

輔

是以動而有 悔也。」

荀爽曰: 升極當降,故「有悔」。

潛龍勿用」,下也

帝舜耕漁之日,卑賤處下,未爲時用,故 何妥曰: 此第二章,以人事明之。

云「下」。

見龍在田」,時舍也。

何妥曰: 此夫子洙泗之日,開張業

教授門徒。 自非通 舍,孰能 如 此

虞翻曰: 二非王位 ,時暫舍也。

終日乾乾」,行事也

何妥曰: 此當文王 爲西伯之時。 處人

或躍在淵」,自試也。 臣之極,必須事上接下,故言「行事也」。

何妥曰: 王觀兵之日 欲 進 , 欲以試 其 道 猶 觀 物 復疑惑。 也。 此當

飛龍在天」,上治也。

而居高位,在上而治民 何妥曰: 此當堯舜冕旒 也。 之日。 以 聖德

亢龍有悔」,窮之災也

故致悔恨窮斃之災禍 此當桀紂失位之時。 也。 亢極驕盈

元「用九」,天下治也

也。 案 : 以人事明之也。九,陽也。 然之理皆可 則「天下治也」。 夫識物之動,則其 物也。夫能全用剛 爲而天下治矣。〇王弼曰: 下之至治,未之能也。 而 潛而 此當三皇五帝禮讓之時, 田,必 勿用 知 以 也。 何乎 時之通舍也。 直,放遠善柔, 龍之爲德,不 必 故「乾元用 窮 處於下 此一章全 陽,剛直 以爻爲 垂 · 也 ? 非天 拱 九, 所 无

> 也。 人,以位 文王 爲時。 明 夷, 人不妄動, 則 主 一可知 矣。 則時 仲 皆 尼 可 旅 知

人,則國可知矣。

潛龍勿用」,陽氣潛藏。

龍」也。 十一月,陽氣雖 何妥曰: 此第三章,以天道 動,猶在 地 中,故曰 一明之。

見龍在田」,天下文明。

後,建巳之月已來。 寅之間,於時地之萌牙,物有生者,即是 氣漸生,似 之月,九五爲 見地,則九三爲建辰之月,九四爲 百草萌牙孚甲,故曰「文明」。 羣陰既盛,上九不得言「 先儒 先儒以爲九二當太蔟之月, 陽氣上達於地,故曰「見龍 聖人 此 建 説,於理稍 申之月,上九爲建戌 、漸進。 此 九二爻當 宜據十一月之 乖。此 與 孔 在 之陽 時 陽氣 建 穎 丑. 田 偕 之

有陰氣。所以六律六吕,陰陽相關,取功,故陰興之時仍有陽,在陽生之月尚陽氣發見之義也。但陰陽二氣,共成歲

象論義,與此不殊也。

「終日乾乾」,與時偕行。

何妥曰: 此當三月,陽氣浸長,萬物將

盛,與天之運俱行不息也。

「或躍在淵」,乾道乃革。

何妥曰: 此當五月。微陰初起,陽將

改變,故云「乃革」也。

「飛龍在天」,乃位乎天德。

何妥曰: 此當七月。萬物盛長,天功

大成,故云「天德」也。

「亢龍有悔」,與時偕極。

何妥曰: 此當九月。陽氣大衰,向將

極盡,故云「偕極」也。

乾元「用九」,乃見天則。

何妥曰: 陽消,天氣之常。天象法則,

虞翻曰: 乾始開通,以陽通陰,故乾「元」者,始而「亨」者也。

始通。

「利貞」者,性情也。

其正。是故「始而亨」者,必「乾元」也,何能通物之始, 不性其情,何能久行正萬物之情。〇王弼曰: 不爲乾元,干寶曰: 以施化利萬物之性,以純一

利而正者,必「性情」也。

乾始而以美利利天下,今本「而」爲「能」。古

文通。

形一,改「利天下」也。 虞翻曰:「美利」謂「雲行雨施,品物流

不言所利,大矣哉! 形」,故「利天下」也。

○ 「 「 」 「 」 「 」 「 」 「 」 「 」 」 「 」 「 」 」 「 」 」 「 」 「 」 「 」 「 」 「 」 「 」 「 」 「 」 「 」 「 」 「 」 」 「 」 「 」 」 「 」

生焉」,故「利」者,「大」也。

大哉乾乎! 剛健中正,純粹精也,

言乾是純粹之精,故有「剛健中正」之四崔覲曰: 不雜曰「純」,不變曰「粹」。

德也。

六爻發揮,旁通情也;

坤來入乾,以成六十四卦,故曰「旁通情陸績曰: 乾六爻發揮變動,旁通於坤。

也。

時乘六龍,

《九家易》曰: 謂時之元氣,以王而行。

履涉衆爻,是乘六龍也。

以御天也;

荀爽曰: 御者,行也。陽升陰降,天道

行也。

雲行雨施,天下平也。

荀爽曰: 乾升於坤曰「雲行」,坤降於

和均而得其正,故曰「天下平」。 乾曰「雨施」。乾坤二卦成兩既濟,陰陽

君子以成德爲行

度。動以成德,无所苟行也。 干寶曰: 君子之行,動静可觀,進退可

日可見之行也。

爲上德。「雲行雨施」則成离,日新之謂虞翻曰: 謂初。乾稱「君子」,陽出成

上德,故「日可見之行」。

「潛」之爲言也,隱而未見,行而未成,是以

君子弗用也。

乾者,君卦也。不成爲君,故「不用」也。成」謂行之坤四。陽居陰位,未成爲君。荀爽曰:「隱而未見」謂居初也,「行而未

君子學以聚之,問以辯之,

辯之」。《兑·象》:「君子以朋友講習。」言、爲講論,坤爲文,故「學以聚之,問以虞翻曰: 謂二。陽在二,兑爲口,震爲

寬以居之,仁以行之。

仁,「德博而化」也。 虞翻曰: 震爲寬,仁爲行。謂居寬行

《易》曰「見龍在田,利見大人」,君德也。

伐」,信有君德,「後天而奉天時」,故詳虞翻曰: 重言「君德」者,大人「善世不

九三重剛而不中,

言之。

虞翻曰: 以乾接乾,故「重剛」。位非

上不在天,下不在田。二、五,故「不中」也。

何妥曰: 上不及五,故云「不在天」。

下已過二,故云「不在田」。處此之時,

實爲危厄也。

故乾乾因其時而惕,雖危「无咎」矣。

何妥曰: 處危懼之地,而能乾乾懷厲,

九四重剛而不中,

至夕猶惕,乃得「无咎」矣。

非得中,故曰「重剛而不中」也。案: 三居下卦之上,四處上卦之下,俱

上不在天,下不在田,中不在人,

也, 五兼六,天也。四是兼才,非正,一才也。初兼二,地也, 三兼四,人道、有人道,兼三才而兩之」,謂兩爻爲侯果曰: 案下《繫》「易有天道、有地

故言「不在人」也。

故或之。或之者、疑之也、故「无咎」。

虞翻曰: 非其位,故「疑之」也。

夫「大人」者,

《乾鑿度》曰: 聖明德備曰「大人」也。

與天地合其德,

合德,謂居二也。 案: 謂撫育无私,荀爽曰: 與天合德,謂居五也。與地

同天地之覆載。

與日月合其明,

荀爽曰: 謂坤五之乾二成离,离爲日。

乾 二之坤五爲坎,坎爲月。 威

恩遠被,若日月之照臨 也。

與 四 時合其序,

翟 玄曰: 乾坤有消 息,從 四 時 來 也。

又案: 賞罰嚴明 順四時之序也。

與 鬼神合其吉凶。

虞 乾之坤,故與鬼神合其吉凶。 翻 曰 : 謂乾神合吉,坤鬼合凶 以

禍 淫福善,叶鬼神之吉凶矣。

先天 而天弗違,

乾 五。 翻 曰 乾五之坤五,天象在先,故「先天 : 乾爲「天」、爲「先」。 大人在

而天弗違」。 〇崔憬曰: 行人事,合天

心 也。

後天而奉天時。

虞翻 曰 : 奉,承行。 乾四之坤初 成震,

震爲「後」也。 震春兑秋,坎冬离夏,四

時 象具,故「後天而奉天時」。 謂承天時

> 行 政 也。 順 也。 ○崔憬 티 : 奉天時 布政,

聖

天且弗違,況於人乎?

荀爽曰:「人」謂三。

況於鬼神乎?

荀 爽 曰:「神」謂天,「鬼」謂

地

也。

案: 大人「惟德動天,无遠不届」。

草,豈有違忤哉!

神饗德,夷狄來賓。

人神叶從,猶

風

偃

鬼

亢」之爲言也,知進而不知退, 荀爽曰: 陽位 在 五,今乃 居

故

「知進而不知退」也。

知存而不知亡,

荀 爽 日 在上當陰, 今反爲陽, 故曰

知存而不知亡」也。

知得而不知喪。

荀爽 曰:「得」謂陽,「喪」謂陰。 又

此論人君驕盈 過亢,必有喪亡。

即 其 殷 、類矣。 紂 招牧野之災,太康遘洛水之怨,

者 其 ,其唯聖人 唯聖人乎! 乎 知 進 退 存 亡 而 不 失其正

天也」。 也。 者,垂拱无爲,芻狗萬物,「生而不有,功 下治也」。言大寶聖君,若能用九天德 乎」,是其義也。 明終始」,「萬國咸寧」,「時乘六龍,以御 荀爽曰: 能「知進退存亡而不失其正」,故得「大 《文言》再稱「聖人」者,歎美用九之君, 之德者也? 此則三皇五帝,乃聖乃神 成不居」,「百姓日用而不知」,豈荷生成 人謂二也。 保合太和」,而 謂五 再出 斯即 「聖人」者,上聖人謂五,下聖 「進」謂居 ,爲陽位; 案 : 有始 天下自治矣。今夫子 ○崔憬 有卒者,其 此則「乾元用九,天 「亡」謂上,爲陰 五,「退」謂 日: 謂 唯聖 失 居一 人 其 正 位

> 宏綱 遞相 ,斷可知矣。 征伐,失正 燕噲 三王五伯,揖 讓 位 忘退,其 於子之之類 讓 風 徒 頹,專恃干戈, 實繁。 是 也。 略舉

易傳卷第

易傳卷第一

唐資州李鼎祚集解

▓ 坤上 坤,元亨,利牝馬之貞。

貞」矣。 元。 矣。 牝,震爲馬。 乾初子,品物 形,坤含光大,凝乾之元,終於坤亥。 若龍,行地者莫若馬,故乾以 干寶日 馬象也。 ○虞翻曰: 與乾合德,故稱「亨」。 坤,陰類,故稱「利牝馬之貞」 陰氣之始,婦德之常,故 咸亨,故「元亨」也。 初動得正,故「利牝馬之 謂陰極陽生。乾流坤 龍繇,坤以 行天者莫 坤爲

盧氏曰:「坤、臣道也、妻道也」,後而不君子有攸往,先迷,後得主,利。

西南得朋,東北喪朋,安貞吉。

爲「迷」。

主,利」。

○《九家易》曰:

坤爲

陽爲主

當後

而

順

之則利

故

旦「

後

得

先則

迷失道矣,故

日

「先迷」。

陰

以

常,安於承天之正,故言「安貞吉」也。朋,猶迷於失道, 出嫁喪朋,乃順而得非類,故曰「東北喪朋」。以喻在室得東方艮震,北方乾坎。二方皆陽,與坤二方皆陰,與坤同類,故曰「西南得朋」。當憬曰:妻道也。西方坤兑,南方巽离。

《彖》曰: 至哉「坤元」,

之始,地之象也。故又歎言至美。而以生也。坤者,純陰,配乾生物,亦善《九家易》曰: 謂乾氣至坤,萬物資受

萬物資生,

始於乾,由坤而生也。册生於坤,猶萬荀爽曰: 謂萬一千五百二十册,皆受

物成形出乎地也。

乃順承天。

劉瓛曰: 萬物資生於地,故地承天而

生也。

坤厚載物,

蜀才曰: 坤以廣厚之德載含萬物,無

有窮竟也。

德合无疆,

蜀才曰: 天有无疆之德而坤合之,故

云「德合无疆」也。

含弘光大,

荀爽曰: 乾二居坤五爲「含」,坤五居

乾二爲「弘」,坤初居乾四爲「光」,乾

兀

居坤初爲「大」也。

品物咸亨。

荀爽曰: 天地交,萬物生,故「咸亨」。

〇崔憬曰: 含育萬物爲「弘」,光華萬

物爲「大」。動植各遂其性,故言「品物

咸亨」也。

「牝馬」地類,行地无疆

侯果曰: 地之所以含弘物者,以

而承天也。馬之所以行地遠者

以以

其

其

順

子當至順,故作《易》者取象焉。

而伏人也。

而又牝馬,順之至也

誡

柔順「利貞」,君子攸行。

《九家易》曰: 謂坤爻本在柔順

陰位,

則利正之乾,則陽爻來據之,故曰「君子

攸行」。

「先迷」失道,後順得常。

何妥曰: 陰道惡先,故先致迷失。後

順於主,則保其常慶也。

「西南得朋」,乃與類行。

虞翻曰: 謂陽得其類。月朔至望,從

震至乾,與時偕行,故「乃與類行」。

東北喪朋」,乃終有慶。

虞翻曰: 陽喪滅坤,坤終復生。謂月

=

言 癸。 北 陽起於子,至寅三陽,喪 失之甚矣。 陰始從陽,失其黨類,故『東北 故『西南得朋』。 之月,陰氣始著,而坤之位,同類相得, 變而 易道 三日 申三陰,得 坤滅乾,坤爲「喪」故也。馬君云「孟秋 類行」。二十九日,消乙入坤,滅藏於 言》曰「敬義立而德不孤」、《彖》曰「乃與 朋」,故《兑》「君子以朋友講習」。 喪朋』。 南 成震 乙東癸北,故「東北喪朋」。 謂之以 震 陰 南,故「西南得朋」。 以乾變坤而言「喪朋」,經以乾 西得 象 陽 出 出 消 坤一體,故 而 就如荀説,從午至申,經當 朋」,子至寅當言「北 庚,至月八日成兑見 庚,故「乃終有慶」。 息之大要也。 荀君以爲「陰起於午,至 孟春之月,陽 曰『西南 坤 謂 謂二陽 體,故『東 陽 氣 喪朋」, 得朋」。 了。 月 此 始著, 東 三日 指 令文 喪 爲 說

爲喪耶? 此何異於馬也。

「安貞」之「吉」,

正,故「貞吉」。 虞翻曰: 坤道至静,故「安」。 復初得

應地无疆。

坤陰。地道應,故「應地无疆」。 虞翻曰: 震爲「應」。陽正於初,以承

《象》曰: 地勢坤,

王弼 性 地 也。 有 上下九等之差,故 曰 : 地形不 順 矣。 以 形勢言 宋 衷 曰 其

君子以厚德載物。

初六,履霜,堅冰至。 德載物」。《老子》曰「勝人者有力」也。 爲「德」,動在坤下。君子之德車,故「厚虞翻曰: 勢,力也。「君子」謂乾。陽

故生變。占變,故有爻。《繫》曰「爻者,干寶曰: 重陰,故稱「六」。剛柔相推,

「六」也。陽數奇,陰數偶,是以乾用一言乎變者也」,故《易・繫辭》皆稱「九」、

姤來也。陰氣始動乎三泉之下,言陰氣也,坤用二也。陰氣在初,五月之時,自

於「堅冰」,言有漸也。藏器于身,貴其動矣,則必至於「履霜」。「履霜」則必至

之原,欲其先幾,故陰在三泉,而顯以俟時。故陽在潛龍,戒以「勿用」,防禍

「履霜」也。

道,至「堅冰」也。《象》曰:「履霜堅冰」,陰始凝也。馴致其

《九家易》曰:「霜」者,乾之命也。「 乾命令而成堅冰也。 消陽,起于此爻,故 冰」者,陰功成 冰」,五月陰 「順」 始 也,言陽順陰之性,成「堅冰」矣。 姤, 姤 氣 爲 也。 始生地 五 謂坤初六之乾 月。 履 此卦本乾。 中,言始于微 霜」也。 盛 夏 而 「馴」猶 言「堅 四, 陰始 履 堅

終至堅冰,以明漸順至也。

六二,直方大,

之,則應陽出直,布陽于四方。 荀爽曰: 大者,陽也。二應五,五下對

不習无不利。

利也 不方 事 ; 也。 道也」。 也。 成於我而用之於彼。不方以仕學爲政, 陽之所唱,從而 曰「直方大」。 士該九德,然後可以從王 爽曰: 臣貴其直、義尚其方、地體其大、故 陰出地 以 女躬四教,然後 臣之事君,妻之事夫,義成者 陰氣在二,六月之時,自遯 嫁 物 上,佐陽成物,「臣道 唱 爲婦,故曰「不習无不 和之,无不利也。 乃 和,不 可以 敢 配 先 君子。道 有 也,妻 所 來

《象》曰:「六二」之動,直以方也。

《九家易》曰: 謂陽。下動應之則直而

行,布陽氣 於 如方也

不習无不 利,地 道 光 也

干寶曰: 女德光於夫,士德光於國也。

六三,含章可貞

章」。 虞翻曰: 三失位,發得正 貞,正也。 ,故「可貞」也。 以陰包陽,故「含

或從王事,无成有終。

臣然後 成羣。 正。 陰氣 上失其權,位 成而有終,故「无成有終」。 爲事,震爲從,故「或從王事」。 虞翻曰: 四,三公位也。陰升在三,三公事 苟利社稷,專之則可,故曰「或從王 坤爲文。 在三,七月之時,自否來也。 此蓋平襄之王垂拱以賴晉鄭之輔 可 君弱臣强,戒在二國,唯文德之 以遭之,運 謂三已發,成泰。 坤象既成,故曰「含章 在諸侯。 而不失其柔 坤體既具,陰黨 〇干寶曰: 乾爲王, 地道无 順之 陽降 也。 口 坤

> 民,故曰「有終」。 失後順之節,故曰 事 -0 遷都誅 親,疑於專 「无成」。終於濟國安 命,故亦或之。

《象》曰:「含章可貞」,以 時發也

崔憬曰: 陽命則發, 非時則含也

或從王事」,知光大也。

干寶曰: 位彌高,德彌 廣

六四、括囊、无咎、无譽。 虞翻曰: 括,結也。 謂 泰反 成 否。 坤

譽」。 咎」。 業不建故「无譽」也。 時卷舒之爻也。不艱其身則「无咎」,功 智苟容,以觀時疊。 時,自觀來也。天地 多咎也,得位承五,「繫于包桑」,故「无 爲囊,艮爲手,巽爲繩,故「括囊」。 陰 在 干寶曰: 二多譽,而 將閉,賢人必隱,懷 此 陰氣在四, 蓋 遠 **甯戚、蘧瑗與** 在 四、故「无 八月之 在外

象》曰:「括囊无咎」,慎不害也。

氏 慎言 則无咎也

六五,黄裳,元吉

也。 於四海也,故曰「黄裳元吉」也 百官總己,專斷萬機。雖情體 居尊位,若成、昭之主,周、霍之臣 黄,上美爲元,下美則裳。陰登於五 裳,下之飾; 行必篤敬,然後可以取信於神 貌近僭疑,周 ·寶曰: 剥者,反常道 陰氣在 公其猶 元,善之長 五,九月之時,自 也。 病 諸。 黄,中 也。 言必忠信 明,无尤 信順,而 之色; 中美能 剥 也。

象》曰: 「黄裳元吉」,文在中也。

僭之間 中也」。 王肅曰: 也。 而能 坤爲文,五在 寶曰: 終元吉之福者,由文德在 當總己之任,處疑 中,故曰 文在

于

爽 티 : 消 息之位,坤在於亥。下有

> 伏乾,爲其兼于陽,故稱 「龍」也

其血玄黄。

《九家易》曰: 度,以逼乾戰。 乾。乾體純剛,不堪陰盛,故曰「龍戰 之忠於殷 龍,故稱「龍」也。 月卦也。 則同功。 雜,故曰「玄黄」。 坤位未申之維 戌亥,乾之都也,故稱「龍」焉。 六,十月之時也。 亥,窮陰薄陽,所 雜,言乾坤合居也。 稱「血」焉。 「于野」。 戰乎乾」是也。 乾位西 君臣夫 未離陰類,故曰「血」。 ,抑參二之强以 血 一以喻: 而 實本坤體,未離其類,故 妻,其義 郭外曰 以「戰」也,故《說卦》云 北、又當十月。 六稱「龍」者,陰盛 氣溢 言陰陽 〇干寶曰: 爻終於酉而 陰 ○侯果曰: 也。 西戌之間,故 郊,郊郊 一也。 事獨夫之紂 離則異氣,合 玄黄 外日 卦成於 陰陽色 陰窮於 陰 陰在 坤,十 德過 似

義也。 之,是以至於武王,遂有牧野之事,是其 以 蓋欲彌縫其闕 濟生民 也。 而匡救其惡,以祈殷命, 紂 遂長 惡不悛,天命 殛

象》曰:「龍戰于野」,其道窮也。

干寶曰: 君德窮,至於攻戰受誅也。 天道窮,至於陰陽相薄 柔順窮,至 也

用六,利永貞。

於用權變矣。

也矣。 於復子明辟,以終臣節, 義之和,履貞之幹。 干寶曰: 正,是周公始於負扆南面,以先王道,卒 陰體其順,臣守其柔,所以 唯有推變終歸於 故曰「利永貞」 秉

象》曰:「用六永貞」,以大終也。 長正矣,不長正則不能大終陽事也。 侯果曰: 用六,妻道也,臣道也,利在

> 何妥曰: 坤《文言》唯一章者,以一心

奉順於主也。

坤至柔,

荀爽曰: 純陰至順,故「柔」也。

而動也剛,

《九家易》曰: 坤 變而 成震, 陰動生

至静而德方,

陽,故「動也剛」。

方也。 荀爽曰: 坤性至静,得陽 而動,

後得主而有常,

虞翻 曰 : 坤陰先迷,後順得常。 陽 出

含萬物而化光。

初震,爲「主」、爲「常」也。

干寶曰: 光,大也。 謂 坤 含藏 萬物,順

承天施,然後化光也。

坤 道其順乎,承天而時行。

|爽日: 承天之施,因四時而行之也。

布

於四

積善之家 必有餘慶;

乃終有慶」也 陽,滅出復震 日 : 初。 爲 「餘慶」,謂「東北喪朋 乾 爲 積善」。 以 坤 牝

積不

此微言 聖人設教,理貴隨宜,故夫子先論 虞 不生,開國 積善爲本,故於坤爻初六陰始生 欲明陽生陰殺,天道必然。 有餘慶; 於易象,闡揚天道,故曰「積善之家,必 則「不語怪、力、亂、神」,絶四毋必。 通 翻 》云「善不積,不足以成名" 坤,極姤 善之家,必有餘殃。 曰: ,永爲深誠,欲使防 承家,君臣 積不善之家,必有餘殃」者, 生異 坤積不善,以 爲「餘 同 殃 一德者 臣 前杜 也 弑 理國脩身, 也 君。 惡 漸 故《繋 時 不積, 災害 人事, 以乾 案 :

> 故子弑父、臣弑君也。 成 否 翻 1,坤臣 日 弑君。 坤消 至 上下不交,天下 二,艮子弑父。 ·無邦,

非 寒,坤爲暑,相 一夕」,所由來漸矣。 朝 翻 日: 一夕之故,其所由 剛爻爲朝,柔爻爲夕。 推 而 成 歲 來者漸矣, 焉,故「非 乾

爲

朝

由辯之不早辯 也。

之惡也 父不早辯明 孔穎達曰: 臣子所以久包禍 、故也。 此文誡君父防 心, 臣 由 子 君

《易》曰「履霜,堅冰至」,蓋言順 乾、「履霜堅冰、蓋言順也」。 荀爽曰: 而 堅,象臣順 霜者,乾之命令。 君命而 成之。 也 乾 坤 氣 下 · 有 加 之 伏

直其正 虞翻 也 專,其動也直」,故「直其正 曰 也,「方」其義 陽 也。 稱「直 「方」謂

臣

弑

其君,子弑其父,

不

·足以

滅身」,是其義

也

二六

闢。陰開爲「方」。「坤,其静也翕,其動

也闢」,故「方其義也」。

君子敬以直内,義以方外。敬義立而德

不孤。

位 翻 西南得朋, 在外,故「 曰 陽息在二,故「敬 義以方外」。 乃與類行」, 謂 以 故「 陽 直 德不 見 内」。 兑

孤」。孔子曰「必有鄰」也。

不利」,坤之和也。陽唱陰和而无所不荀爽曰:「直方大」,乾之唱也。「不習无直方大,不習无不利」,則不疑其所行也。

陰雖有美,「含」之以從王事,弗敢成也。

利,故「不疑其所行也」。

卦也。雖有伏陽,含藏不顯,以從王事。荀爽曰: 六三陽位,下有伏陽。坤,陰

要待乾命,不敢自成也。

翟玄曰: 坤有此三者也。

地

道

也,妻道也,臣道也

地道「无成」而代「有終」也

得終君事,婦得終夫業, 宋衷曰: 上,不敢有所 臣 子雖 成 名也。 有才美,含藏 地得終 故 曰「而 天 以 (功,臣 代 從 其

天地變化,草木蕃。

終」也。

虞 乾變坤,坤化 變化草木蕃」矣。 翻 :: 謂 陽 升乾,萬 息 坤 成 物出 震,故「天地 天 地 反, 以

天地閉,賢人隱。

禄」,故「賢人隱」矣。人」,隱藏坤中,「以儉德避難,不營以虞翻曰: 謂四。泰反成否。乾稱「賢

《易》曰 穎達 荀爽 譬心藏智也。 成德、當括而囊之、謹慎畏 티 : 티 : 「括囊,无咎,无譽」,蓋言謹也 括,結也。 六四陰位,迫 閉其智而 囊,所以貯 近於五 不用,故曰「 敬也。 物, 雖 孔 以 括

」。不與物忤,故「无咎」,功名不顯,

故「无譽」也。

囊

君子黄中通理,正位居體,

爲理。 艮爲兩肱, 巽爲兩 位,故曰「正位」。 虞翻曰: 以乾通坤,故 謂五。 坤息體 股 艮爲居 稱 ,故曰「黄中通理, 「通理」。 體體調 觀, 地 色黄, 四 五正陽 [支也。 坤

正位居體」。

美在其中,

而暢於四支,

虞翻曰: 陽稱「美」,在五中,「四支」謂

股肱。

發於事業,

《九家易》曰: 天地交而萬物生也。謂

陽德潛藏,變則發見。若五動爲比,乃

事業之盛。

美之至也。

侯果 於正 位,故能 白 : 六五 美 充 以 於 中 中 和 而 通 旁 理 暢 之德 於萬物,

形於事業,无不得宜,是「美之至也」。

陰疑於陽必戰,

孟喜曰: 陰乃上薄,疑似于陽,必與

陽

戰也。

1

《九家易》曰: 陰陽合居,故曰「兼胃爲其兼于陽也,故稱「龍」焉。

謂上六。坤行至亥,下有伏乾。陽者變《九家易》曰: 陰陽合居,故曰「兼陽」。

化,以喻龍焉。

猶未離其類也,故稱「血」焉。

荀爽曰: 實本坤卦,故曰「未離其類

也」。血以喻陰,順陽也。○崔憬曰:

乾坤交會。乾爲大赤,伏陰柔之,故稱

「血」焉。

夫「玄黄」者,天地之雜也。

荀爽曰: 消息之卦,坤位在亥,下有伏

乾。陰陽相和,故言「天地之雜也」。

天玄而地黄。

王凱沖曰: 陰陽交戰,故「血玄黄」。

六

玄也 荷 爽曰 地者,陰,始於西南,故色黄也。 天者,陽,始於東北,故 色

盈 天地之間者 序卦》曰: 也。 屯者,萬物之始生也。 唯萬物,故受之以屯。 有天地,然後萬 物生焉。 屯者,

始交,故萬物資始於乾,而資生於坤。 之先後宜序也。萬物之始生者,言剛柔 崔 不序乾坤之次者,以「一生二,二生三, 三生萬物」,則天地之次第可 憬 三 三 : 此仲尼序文王次卦之意也。 知,而 萬物

坎 震 上 下 屯,元亨,利貞。

虞翻 티 : 之初得正,故「利貞」矣。 坎二之初,剛 柔交震,故 元元

勿用有攸往,利建侯。

震爲 虞翻 之欲應。 侯。 티 : 動而失位 初剛難拔,故利以建侯。 之外稱「往」。初震 ,故「勿用 有攸往」。 得正, 《老 起

> 《彖》曰 子》曰「善建者不拔」也 屯,剛柔始交而難生,

運季業初之際也 寒冰之難、故言「難生」。於人事 交」。 虞翻曰:「乾剛坤柔」,坎二交初,故「始 剛柔始交」。萬物 十二月,陽始浸長而交於陰,故 確乎難拔,故「難生」也。 说萌牙, 生於地中, 〇 崔 則是 有

動乎險中,大亨貞。

荀爽 交」也。 案: 是「動乎險中」也。動則物 曰「動乎險中,大亨貞」也 日 初六升二,九二降初,是「剛柔始 交則成震,震爲動也。 物難在始生。 此本 通 而 坎卦 上有坎, 得正,故 也。

雷 雨之動滿形,今本「形」訛「盈」。

也。 也。 荀爽曰: 謂三已反正,成既濟。 虞 翻 雷震雨 潤, 震 雷, 則 萬物滿 坎 雨 坎 水 坤 形 流 而生

故「滿形」。謂雷動雨施、「品物流

形」也。

天造草昧,

荀爽曰: 謂陽動在下,造生萬物於冥

昧之中也。

宜建侯而不寧。

物也。 也。 荀爽曰: 侯以寧之也。 之難,後王宜蕩之以雷雨之政,故封諸 百姓盈盈,匪君子不寧。天下既遭屯險 日: 乾,故「宜建侯」。 濟定,故曰「不寧」,言寧也。 ○虞翻 水運將終,木德將始,殷周際也。 坤冥爲昧,故「天造草昧」。 成既 天地 曰 : 初 造,造生也。草,草創 開, 動 而 世 遇險,故「不寧」 尚屯難、震 〇 干 位承 寶

《象》曰: 雲雷,屯。

言「屯」者,十二月,雷伏藏地中,未得動《九家易》曰: 雷雨者,興養萬物。今

君子以經論。 出。雖有雲雨,非時長育,故言「屯」也

亞侖艮推也。○姚信曰: 經,緯也。時在常也。○姚信曰: 經,緯也。時在常也。論者,理也。君子以經論,不失常也。論者,理也。君子以經論,不失

經論艱難也。

「君子居其室」、「慎密而不出也」。「盤桓」。得正得民,故「利居貞」。謂虞翻曰:「震起艮止」,「動乎險中」,故初九,盤桓,利居貞,利建侯。

《象》曰: 雖「盤桓」,志行正也。

二動而退居初,雖盤桓,得其正也。荀爽曰: 盤桓者,動而退也。謂陽從

以貴下賤,大得民也。

六二, 屯如邅如,

荀爽曰: 陽動而止,故「屯如」也。陰

乘於陽,故「邅如」也。

乘馬班如,

作足,二乘初,故「乘馬」。 班,躓也。 馬虞翻曰: 屯邅,盤桓,謂初也。 震爲馬

不進,故「班如」矣。

匪寇婚媾。女子貞,不字,十年乃字。

盗應在坎,故「匪寇」。陰陽德正,故「婚虞翻曰: 匪,非也。寇謂五。坎爲寇。

离爲女子,爲大腹,故稱「字」。今失位,媾」。字,妊娠也。三失位,變復體离。

爲坤、离象不見,故「女子貞,不字」。坤

常乃字。謂成既濟定也。數十。三動反正,离女大腹,故十年反

崔憬曰: 下乘初九,故爲之難也。《象》曰:「六二」之難,乘剛也。

「十年乃字」,反常也。

《九家易》曰: 陰出於坤,今還爲坤,故

曰「十年乃字」。
也。去逆就順,陰陽道正,乃能長養,故坤,今還於坤」。謂二從初即逆,應五順坎。今變成震,中有坤體,故言「陰出於」「反常也」。陰出於坤,謂乾再索而得

六三,即鹿无虞,惟入于林中,

者。 无虞,惟入林中」矣。 狐狼,三變,禽走入于林中,故曰 變體坎,坎爲稟木山 坤爲兕虎,震爲麋鹿,又爲驚走。 虞翻曰: 艮爲山,山足 即,就 也。 稱 鹿。 下,故 虞謂虞人,掌禽獸 鹿,林 爾「林 也 「即鹿 艮 中 爲

君子幾,不如舍,往吝。

往必吝窮矣。 險,不可以往。動如失位,故不如舍之,舍,置。吝,疵也。三應於上,之應歷虞翻曰: 君子謂陽已正位。幾,近。

《象》曰:「即鹿无虞」,以從禽也。

虞 翻 日 : 坎 雨 稱 詩》云「 陰 雨

膏之」,1 是其義 也

小貞吉,大貞凶。

君子舍之」,往吝窮也。

辭「王用三驅,失前禽」,是其義也。

總名,爲人所禽制也。」即《比》卦九五爻

《白虎通》云:「禽者何?

鳥獸之

崔憬曰:

君子見動之微,逆知

无虞,

則

崔憬曰: 故「吉」。 至於遠求嘉偶,以行大正,赴 謂與四爲婚媾,施雖未光,小貞之道 二之應,冒難攸往,固宜且凶,故曰「大 得屯難之宜,有膏澤之惠。 也,

貞凶」也。 貞,正也。

坎

爲

象》曰:「屯其膏」,施未光 虞翻曰: 陽陷陰中,故「未光」也。 也。

上六,乘馬班如,

得乘

爲止。馬行而止,故「班如」也。 虞翻曰: 乘五也。坎爲馬,震爲行,艮

難除。 《九家易》曰: 血 下二四爻,雖亦乘陽,皆更得承五 漣如」也。體坎爲血,伏离爲目,互艮 今上无所復承,憂難不解,故「泣 上六乘陽,故「班如」也。

六四,乘馬班如, 之也 不如舍,勿往,往則吝窮也。 也。或説乘 馬,故曰「乘馬」。 虞翻曰: ? 乘三也。 初,初爲建侯,安 馬 在險中,故「班如」 謂三已變。

求婚媾、往吉、无不利。 崔憬曰: 屯難之時,勿用攸往。

象》曰:「求」而「往」,明也。 男求女,「往吉,无不利

作應,班如不進。既比於五

,五來求婚,

泣血漣如

初

雖

九五,屯其膏 虞翻曰: 之外稱「往」,體离故 明」也。

爲手。掩目流血,泣之象也。

象》曰 虞翻 震爲出。 於剛、故「不可長也」。 日: 泣 血. 血 謂三變時,离爲目,坎爲 流出 漣 如」,何可長也? 目,故「泣血 漣 如 Щ,

者,蒙也,物之穉也。《序卦》曰: 物生必蒙,故受之以蒙。蒙

之貌。齊人謂「萌」爲「蒙」也。言「物生必蒙」。○鄭玄曰: 蒙,幼小崔憬曰: 萬物始生之後,漸以長穉,故

月卦也。正月之時,陽氣上達,故屯爲不在寅,故蒙於世爲八月,於消息爲正八月之時。降陽布德,薺麥並生,而息八月之時。降陽布德,薺麥並生,而息柔接,故「亨」。「蒙亨」,以通行時中也。柔翻曰: 艮三之二。「亨」謂二。震剛

公也。故曰「蒙亨」。此蓋以寄成王之遭周人,則「童蒙」也。苟得其運,雖蒙必亨,「物之始生」,蒙爲「物之穉」也。施之於

匪我求童蒙,童蒙求我。

禮有來學,無往教。應也」。艮爲求,二體師象,坎爲經。謂求童蒙」。五陰求陽,故「童蒙求我,志二也。震爲動起,嫌求之五,故曰「匪我」與翻曰:「童蒙」謂五。艮爲童蒙,我謂虞翻曰:「童蒙」謂五。艮爲童蒙,我謂

初筮告,再三瀆。瀆則不告,

「黷」字也。 三,與二爲瀆,故二「不告」也。「瀆」,古則告之。「再三瀆」謂三應於上,四隔於崔憬曰:「初筮」謂六五求決於九二,二

利貞。

貞」。「蒙以養正、聖功也。」 虞翻曰: 二五失位、利變之正、故「私

Dri

彖》曰: 蒙,山 下有險,險 而 止,蒙。

險」。 侯果曰: 險被 艮爲山,坎爲 山止,止則未通,蒙昧之 險,是「山下有

蒙亨」,以亨行時中也

象也。

中也」。 時,令得時中矣。 三,三降居二,剛柔得中,故能 荀爽曰: 此本艮卦也。 故曰「蒙亨,以亨行時 案: 通 二進居 一發蒙

匪我求童蒙,

陸績曰: 六五陰爻在蒙暗, 蒙又 體 艮

童蒙求我」,志應也。

少男,故曰「童蒙」。

荀爽曰: 二與五,志相應也

初筮告」,以剛中也

崔憬曰: 以二剛中,能發於蒙也

再三瀆,瀆則不告」,瀆蒙 也

荀爽曰:「再三」謂三與四也。 皆乘日 陽不

蒙以養正,聖功也。

敬,故曰「瀆」。

瀆不能尊陽,蒙氣不除,

故曰「瀆蒙」也

之功。 蒙,故「聖功也」。 王之年,將以養公正之道,而成三聖 崩,年九十三矣,而成王八歲,言天後成 「聖」謂二。二志 虞翻曰: 體頤,故「養」。 〇干寶曰: 應五,變得正 _ 五 武王之 而 多 功」, 其

《象》曰: 山下出泉,蒙。

虞翻曰: 故「山下出泉」。 艮爲 山,震爲出。 坎泉流出

君子以果行育德。

育,養也。 虞翻曰:「君子」謂二,艮爲果,震爲行。 二至上有頤養象,故以「果行

育德」也。

初六,發蒙,利用刑人,用説桎梏,以 虞翻曰: 發蒙之正。 初爲蒙: 始而失其 往

梏」。 足艮手,互與坎連,故稱「桎 位,發蒙之正 成兑,兑爲説,坎象毁壞,故 之應歷險,故「以往吝」。吝,小 曰「利 用 以成兑。兑爲 刑人」矣。 坎 一梏 爲 刑 曰「用説 人,坤 穿 桎 發

九 曰:「子克家」,剛柔接也。 象》曰:「利用刑人」,以正法也。 疵也。 既 之罪,宜 王將 覺周公至誠之象也。 時,天光始照,故曰「發蒙」。 此成王 法」也。〇干寶曰: 感《金縢》之文,追恨 翻 往吝」。 正 以貞用 四 釋周公之黨,故 國之象也。 坎爲法。 初、二失位,「吝」之由 刑,故「利用刑人」矣。 納婦、吉。 説,解 坎爲法律,寅爲 初六戊寅,平明之 初發之正,故「正 昭德之晚,故 日 子克家。《象》 「用説桎梏」。 也。 正 也。 此 四 成 始 或 貞

乘,兑澤動下,不得之應,故「不有躬」。

失位多凶,故「无攸利」也

六三,勿用娶女,見金夫,不有躬,无攸利 吉。 所淫。 成初,故有「子克家」也。 震爲夫。 三逆乘二陽,所行 初發成兑,故三稱女。兑爲見,陽稱金, 虞翻曰: 爲夫,伏巽爲婦。 女,見金夫」矣。坤身稱躬。 同 翻 體,包 二稱家。震,長子,主器者。 日 上來之三, 陟陰, 故曰「勿用娶 養 坤 謂三,誠上也。 四陰、故「包 爲 包,應五 二以剛 據 蒙 接柔,故 金夫謂二。 初。 不順,爲一 三爲二所 初 納 與 震 剛

獨遠實也。

「四、困蒙、吝。《象》曰:「困蒙」之「吝」,

「漢翻曰: 失位乘剛、故「行不順」也。

一弼曰: 陽稱實也。獨遠於陽,處兩

三六

於蒙昧,不能 陰之中, 習 莫之發,故曰「 比賢以發其 志 困 蒙」也。 亦鄙矣 木

斉」。

六五,童蒙,吉。 於二、動而成巽、故「吉」也 虞翻曰: 艮爲童蒙。 處貴 承上,有應

象》曰:「童蒙」之「吉」,順以 荀爽曰: 用 周、召也。 順於上,巽於二,有似成王任 巽也

上九,擊蒙,不利爲寇,利禦寇。 寇,巽爲高,艮爲山。 爲寇」矣。 變,上動成坎稱「寇」而逆乘陽,故「不利 虞翻 曰: 禦,止 體艮爲手,故「擊」。 也。 登山備下,順 此 寇謂 謂 坎爲 有師 五.

象》曰: 虞翻日 利用「禦寇」,上下順 自上禦下,故「順」也。 也

象,故

「利禦寇」也。

序 *性》曰 需者,飲食之道也 : 物穉不可 不 養也,故受之以

道也」。 實以爲 所託 之職 未至,飲宴之日也。 而 寶 曰: 雨未降,翱翔東西,須之象也。 也。百穀果蓏之所生,禽獸魚鼈之 也,而在遊魂變化之家,即 和味者也。 需,坤之遊 故曰「需者,飲食之 夫坤者,地也,婦人 魂 也。 雲升 烹爨腥 在 王 天

坎 乾 上下 需,有孚,光亨,貞吉

314

亨。 虞翻 日爲「光」。四之五,得位正中,故「光 曰: 「貞吉」謂「壯于大轝之輻」也。 大壯四之五。「孚」謂 五,

利涉大川。 何妥曰: 涉 大川者,大難 既能

以 信

而

待

故

可以「利

也。

須之待

彖》曰: 需,須 也 險 在 前 也

大川」矣。

也。有險在前,不可妄涉,故須待時然何妥曰: 此明得名由於坎也,坎爲險

後動也。

剛健而不陷,其義不困窮矣。

侯果曰: 乾體剛健,遇險能通,險不能

險,「義不窮」也。

中也。「需,有孚,光享,貞吉」,位乎天位,以正

乎天位,以正中也」。四,「有孚,光亨,貞吉」。九四升五,「位蜀才曰: 此本大壯卦。案: 六五降

「利涉大川」,往有功也。

大川,得位應五,故「利涉大川」。「五多虞翻曰: 謂二失位,變而涉坎。坎爲

《象》曰: 雲上於天,需。

功」,故「往有功也」。

宋衷曰: 雲上於天,須時而降也。

君子以飲食宴樂。

故「宴樂」也。「以飲食」。陽在内稱宴,大壯震爲樂,人口爲飲。二失位,變體噬嗑爲食,故虞翻曰:「君子」謂乾。坎水兑口,水流

初九,需于郊,利用恒,无咎。

於必達,故曰「无咎」。雖小稽留,終虚道北郊,未可以進,故曰「需于郊」。處不避汙,出不辭難,臣之常節也。得處不避汙,出不辭難,臣之常節也。得處不避污,出不辭難,臣之常節也。得

恒,无咎」,未失常也。《象》曰:「需于郊」,不犯難行也。「利用

故「无咎」。 其進,不犯難行。雖不應機,可以保常,王弼曰: 居需之時,最遠於險。能抑

九二、需于沙、小有言、終吉。

二變之陰稱小。大壯震爲言,兑爲口。虞翻曰:「沙」謂五,水中之陽稱沙也。

四 應之,故「終吉」。 之五、震象半見、故「小有言」。

象》曰:「需于沙」,衍在中也

虞翻 曰 : 衍,流也。 「中」謂五 也。

荀爽曰: 知前有沙漠而 二應於五,水中 不進 也。 之剛, 體 乾 故 處 曰

和,美德優衍在中而 不 進也。

雖 「小有言」,以吉終也

有言」。 荀爽曰:「二與四同功」而三據之,故「小 五,故「終吉」也。 乾雖 在下,終當升上,二當居

九三、需于泥、致寇至。

荀爽曰: 親與坎接,故稱 泥 須 止

不進,不取於四,不致寇害。

象》曰:「需于泥」,災在外也 憬曰: 泥,近乎外者也。 三逼於坎,

自我致寇,敬慎不敗也。

爲

·險盜,故「致寇至」,是「災在外也」。

敗」。 遯, 臣 虞翻 日 將 : 弑 离爲戎、乾爲敬。 君, 四上壯坤, 故「敬慎不 陰消至五

六四,需于血,出自穴。 出,上升于天。 曰「需于血,出自穴」也 「需于血」。 血以喻陰,陰體卑弱,宜 六四 體坎。 坎爲雲, ○《九家易》曰 自地出者,莫不由穴,故 順從 又爲 陽,故曰 雲從 Ш. 地

《象》曰:「需于血」,順以聽也。

雲欲 則避,「順以聽命」也。 居穴者也。 王弼曰: 升 天,須時當降。 穴者,陰之路也。 九三剛進,四不能距。 〇《九家易》曰: 順以聽五,五爲 四 次始, 見侵

九五,需于酒食,貞吉。

天也

「需者,飲食之道」,故坎在 五互离坎,水在火上, 一需家爲 酒

食」也。 降陽。能正居其所則吉,故曰「需于酒有剛德,處中居正,故能帥羣陰,舉坎以酒食也。雲須時欲降,乾須時當升。五

《象》曰:「酒食貞吉」,以中正也。

吉也。○盧氏曰: 沈湎則凶,中正則也。○盧氏曰: 沈湎則凶,中正則《九家易》曰: 謂乾二當升五正位者

上六,人于穴,

者也。 雲雨入地,則下三陽動而自至穴」。 雲雨入地,則下三陽動而自至于西,崇朝其雨」,則還入地,故曰「入于雪,崇朝其雨」,則還入地,故曰「入于雪,與明降而爲雨,故《詩》云「朝躋雪爽曰: 需道已終,雲當下入穴也。

有不速之客三人來,敬之終吉。

升在上,君位以定。坎降在下,當循臣升,非有召者,故曰「不速之客」焉。乾荀爽曰:「三人」謂下三陽也。須時當

職,故「敬之終吉」也。

位,未大失也。《象》曰:「不速之客來,敬之終吉」,雖不當

實,故「終吉」,无大失矣。 荀爽曰: 上降居三,雖不當位,承陽有

易傳卷第二

三九

易傳卷第三

唐資州李鼎祚集解

鄭玄曰: 訟,猶諍也。言飲食之會恒序卦》曰: 飲食必有訟,故受之以訟也。

多静也。

■ 坎下 訟,有孚,

「訟,有孚」也。 ○荀爽曰: 陽來居二而孚於初,故曰「訟,不親也」,兆民未識天命不同之意。 此天氣將刑殺,聖人將用師之卦也。 此天氣將刑殺,聖人將用師之卦也。

窒惕,中吉,

室,塞止也。惕,懼二也。二失位,故不虞翻曰: 遯三之二也。「孚」謂二。

虞翻曰: 二失位,終止不變則入于淵,

終凶。

吉也。

三來之二,得中,弑不得行,故「中

言貞。

遯將成

否,

則子弑父,臣弑

故「終凶」也。

利見大人,不利涉大川。

「利見」也。訟是陰事,以險涉險,故「不侯果曰:「大人」謂五也。斷決必中,故

利涉大川」。

《彖》曰:「險而健」者,恒好争訟也。《彖》曰:「險而健」者,恒好争訟也。

三降居二,是「剛來而得中」也。 蜀才曰: 此本遯卦。案: 二進居三,一訟,有孚,窒惕,中吉」,剛來而得中也。

「終凶」,訟不可成也。

王弼曰: 凡不和而訟,无施而可,涉難王肅曰: 以訟成功者,終必凶也。〇

四〇

明 ? 其源 正 有善聽之主焉。 終凶」也。 可以 此 · 甚焉。 夫 亦 也。 使訟 凶矣。故雖 爲終,故曰「訟,有孚,窒惕,中吉, 羣小,斷不失中,應其任矣。 而令有信塞懼者乃得其中吉,必 猶復 唯有信 不至,雖每不枉而訟至終竟, 无善聽者,雖有其實,何由得 不 可 其在二乎? 復有信 以 而 終,中 見塞懼者,乃可 而 ·乃吉 見塞懼 以剛而 也 1,猶不 以 不 來 閉 得

正,以 案 : 訟,歸逋竄 何以 懷懼逃歸。 九二居訟之時,自救不暇。 中正」,是其義也。 氏注云「處得尊位、爲訟之主,用其中 之主哉 明之? 斷枉直」,即《彖》云「利見大人,尚 天爲訟善聽之主者,其在 也。 僅得免其終凶 案爻辭九五「訟,元吉」,王 年代縣流,師資道喪,恐傳 自下訟上,患至掇也」, 九二《象》曰「不克 禍,豈能爲善 訟既不克, 一五焉。

寫字誤,以五爲二,後賢當審詳之也。

利見大人」,尚中正也。

不利涉大川」,入于淵也。

荀爽曰: 陽來居二,坎在下爲「潤之利治力」)

君子以作事謀始。

事」。 也。 虞翻 心,故曰 武王故先觀 坎爲謀,「乾知大始」,故「以作 曰:「君子」謂乾。 「作事謀始」也 〇干寶曰: 兵 孟 津,蓋 省民之情 三來變坤,爲「作 以卜天下之 以 制 事

初六,不永所事,小有言,終吉。

爲訟始,故「不永所事」也。「小有言」謂虞翻曰: 永,長也。坤爲事,初失位而

吉也。 見,故「小有言」。 初 四易位成震言,三「食舊德」,震象半 初變得正,故「終

《象》曰:「不永所事」,訟不可長也。 有言」,其辯明也。 雖「小

事不至永。雖有小訟,訟必辯明,故「終 盧氏曰: 初欲應四,而二據之。 蹔争,

九二,不克訟,歸而逋

克」也。 虞翻 曰: 「逋」。乾位剛,在上,坎濡失正,故「不 謂與 、四訟。 坎爲隱伏,故

其邑人三百户,无眚。

虞翻曰: 告,災也。坎爲告。謂二變 應五,乾爲百,坤爲户。三爻,故「三百

《象》曰:「不克訟」,歸逋竄也。

户」。坎化爲坤,故「无眚」。

荀爽曰: 三不克訟,故逋 一而歸。 坤 稱

> 自下訟上,患至掇也。 失邑中之陽人。

邑,二者,邑中之陽人。

逋,逃也。

謂 逃

户,无眚」。二者,下體之君。君不争, 則百姓无害也。 小物而不失也。坤有三爻,故云「三百 荀爽曰: 下與上争,即取患害,如拾掇

六三,食舊德,貞厲,終吉。

貞厲。得位,故「終吉」也。 虞翻曰: 變食乾,故「食舊德」。 二已變之正,三動得位,體噬嗑。 乾爲舊德。「食」 三變在坎,正危 謂 初、四 食四

或從王事、无成。

故「或從王事」。「道无成而代有終」,故 曰「无成」。 虞翻曰: 乾爲王。二變否時,坤爲事, 坤三同義也

《象》曰:「食舊德」,從上吉也

侯果曰: 雖失其位,專心應上,故能保

而皆近不相得。乘二負四,正之危也。全舊恩,「食舊德」者也。處兩剛之間,

剛不能侵,故「終吉」。

貞吉」。謂二已變坤安也。命令,故「復即命渝」。動而得位,故「安也。不克訟,故復位。變而成巽,巽爲虞翻曰: 失位,故「不克訟」。渝,變九四,不克訟,復即命渝,安貞吉。

吉而不失初也。 吉而不失初也。 不克,當反就前理,變其詔命,則安静貞侯果曰: 初既辯明,四訟妄也。訟既《象》曰:「復即命渝,安貞吉」,不失也。

王肅曰: 以中王之惠,尊乖争之谷,正也。 正也。

王肅曰: 「元吉」者也。 則不邪,剛則无 用其中正 以中正 〇王弼 以 之德,齊乖 日 斷 所溺,公則无所 枉 直。 處得尊,●訟 争之俗, 中則不

上九,或錫之鞶帶,偏,故「訟,元吉」。

爲要帶,故「鞶帶」。男子鞶革。初四已易位,三二之正,巽虞翻曰:「錫」謂王之錫命。鞶帶,大帶。

終朝三拕之。

陽,故《象》曰「不足敬也」。〇侯果曰 虞翻 以錫二。終朝者,君道 之有緣。或者,疑之辭也。以三錫二, 褫,解也。乾爲衣、爲言,故以訟受服。 之」。 使變應己,則去其鞶帶。 應在三。三變時,艮 离爲日,乾爲甲。 ○荀爽曰: 疑矣。 日: 位終乾上。二變時,坤爲終, 争競之世,分理未明,故或 二、四争三。三本下體,取 日出 爲手,故「終朝三拕 甲上,故稱 明。 三者,陽成 體坎乘 「朝」。

❶ 「尊」下,照曠閣本有「位爲」二字。「爲」字屬下讀。

玄曰: 於上 得不以讓,故終一朝之間,各一奪之,爲 朝三拕之」也。 功 三拕」。 也 ,上爲宗廟,故曰「鞶帶」也。 君明 上以六三錫下三陽,羣剛交争, 道 盛 鞶帶, 則奪 三與 宗廟之服。 四 一, 故 日 三應 翟 終

象》曰: 虞翻 其服,故「不足敬」也。 毁壞,故「不足敬 初、二、三、四皆 曰:「服」謂鞶 以訟受服 不正。 亦 帶。 不 ○《九家 以不正相訟 足敬 終朝見拕 也。 易 ,乾象 日 而

崔景曰: 图色公司是目女,女「受之从師者,衆也。《序卦》曰: 訟必有衆起,故受之以師。

師」也。 崔憬曰: 因争必起衆相攻,故「受之以

──何晏曰: 師者,軍旅之名,故《周ॗ 坤上 師,貞,丈人吉,无咎。

禮》云

於行 奉天 與日月合明」,「先天 故《乾・文言》曰「夫大人與天地合德 者,必大人也。 《彖》云「師 聖人也。帥師未必聖人,若漢 而王居其一焉。」由是觀之,則知夫爲王 可以王矣」,故《老子》曰:「域 武應此義也。 丈人乃吉。 人」,臆云「嚴莊之稱」,學不師古,匪説 人,嚴莊之稱, 大人」,並 「吉」乃「无咎」。 聞 」是也。 時 師 Ŧi. 乎! 既誤 '。天且不違,而況於人乎」。況 白 : " 人 今 王 違 王者之師 以斯 興役動 爲 於經旨,輒改正作「大人」 有軍 ○崔憬曰: 師 氏 豈以 貞,正 〇 陸 而 曲 也 IE. 論、《子夏傳》作「大 歌,无 而天不違,後天而 丈 者 解「大人」爲「丈 績 也 入 也。能以衆正 也 티 : 王 而 《子夏傳》作 爲 弼 中有四大 爲 丈人 則罪,故 高 案: 師 \exists 王 之 一哉!

明 矣。

《彖》曰: 王矣。 師, 衆 也。 貞, 正 也。 能 以 衆

正,可以

虞翻曰: 上居五位,可以王也。 荀爽曰: 爲比,故「能以衆正」乃「可以 謂二有中和之德而據羣陰, 坤爲衆。 謂二失位,變之五 王矣」。〇

剛 中而應,行險而順,

以 此 六二升上,是「剛中而應,行險而順」也。 蜀 才曰: 毒天下,而民從之。 此本 剥卦。 案 : 上九降二,

用,斬 民 皆所荼毒 所 寶日 「以此 以險民 王之所難也。 明不獲已而用之,故於《彖》、《象》、 刺肌 毒天下,而民從之」。 好凶之人,使服王法者也。故 也。 坎爲險,坤爲 體。六軍之鋒,殘 毒民於險中 毒,茶苦 順。兵革刑獄 而 也。 得 破城邑。 毒以治 五刑之 順道者,

六爻皆著戒懼之辭

吉」又「何咎」矣

而 順且應,行險戡暴,亭毒天下,人皆歸往 崔憬曰:「剛」能進義,「中」能 以爲王,「吉又何咎」矣。 正 衆。 既

《象》曰: 地中有水,師。

陸績曰: 師,衆也。 坤中衆者,莫過於水。 坎在坤内,故曰「地中 ·有

君子以容民畜衆。

衆」矣。 五變「執言」時有頤養象,故以「容民畜 民,衆又畜養也。 翻 曰:「君子」謂二。容,寬也。 陽在二,「寬以 居 之。 坤爲

以律」,失律凶也 初六,師出以律,否 臧凶。 《象》曰: 「師出

凡首 案 : 匪正,雖令不從。 率師,出必以律。 初六以陰居陽, 以斯 行 履失其位。 若不以律,雖臧 師 失律 者也。 位既

四 六

亦 《九家易》曰: 凶, 故 日 「師 出 坎爲 以 法律也 律,失 律 凶 也

日: 九二,在師中,吉,无咎。王三錫命。《象 「在師中吉」,承天寵也。

《九家易》曰: 爲王,定天下以師,故曰「在師中,吉」。 其位,蓋謂武王受命而未即位也。 受命 天所寵,事克功成,故「吉,无咎」。 雖當爲王,尚在 師 中。 二非

王三錫命」,懷萬邦也。 服,三命受位」,是其義也。 荀爽曰:「王」謂二也。三者,陽德成 陰歸之,故曰「王三錫命,懷萬邦也」。 德純道盛,故能上居王位而行錫命。 命」之象。《周禮》云「一命受職,再命受 二互體震。 震木數三,「王三錫

六三,師或輿尸,凶。

人离爲戈兵,爲折首。 失位、乘剛、无 坤爲尸,●坎 八爲車, 多告。 同

> 應,尸在車 上, 故 「輿尸,凶」矣。

象》曰:「師或輿尸」,大无功也。

帥 盧 氏曰: 師,必大敗,故有「輿尸」之「凶」,功業 失位乘剛,内外无應。 以 此

大喪也。

六四,師左次,无咎。 也。 荀爽曰:「左」謂二也。 「二與四同功」,四承五,五无陽,故 陽稱左。次,舍

《象》曰:「左次无咎」,未失常也。

呼二舍於五,四得承之,故「无咎」。

也。 崔憬曰: 偏將軍居左。左次,常備 舍无咎,得位故 師順用柔 與與 也。 險无應,進取不可,次 師

六五,田有禽,利執言,无咎。

五失位,變之正。艮爲執,故「利執言 翻 曰:「田」謂二。陽稱 震

0

中,故「帥師」也。 虞翻曰:「長子」謂二。 震爲長子,在師

弟子輿尸,貞凶。

弟而乾之子,失位乘陽,逆,故「貞凶」。 虞翻曰:「弟子」謂三,三體坎。坎,震之

帥師,以中行也」。
二,二受任帥師,當上升五,故曰「長子一,一受任帥師,當上升五,故曰「長子一,一,一一,故曰「長子」謂九二也。五處中應《象》曰:「長子帥師」,以中行也。

宋衷曰:「弟子」謂六三也。失位乘陽,「弟子輿尸」,使不當也。

不當其職也。死亡,輿尸而還,故曰「弟子輿尸」,謂使處非所據,衆不聽從,師人分北,或敗績

上六,大君有命,

人勿用」,非所能矣。 克予,非朕文考有罪,惟予小子无良」。 文王行,故正開國之辭於宗廟之爻,明 出征,有嘉折首」。上六爲宗廟,武王以 與師人同處于野也。《离》上九曰「王用 開國,封諸侯也。承家,立都邑也。 己之受命,文王之德也。故《書・泰誓》 者,上爲郊也,故易位。 命也。五常爲王位,至師之家而變其例 曰「予克紂,非予武,惟朕文考无罪。 受)干寶曰: 翻曰: 同人乾爲大君,巽爲有命。 大君,聖人 以見武王親征 也, 有命,天

開國承家,

虞翻曰: 承,受也。坤爲國,二稱家。

四八

故 勳,行其賞禄。 如 也。 家 大夫爲差次。 曰 旅 或 已息 也 變乾 武王封周公七百里地 E 承 承家」。「開國」 「開國」。 家 ○宋衷曰: 爲 開 **,既上居五,當封賞有功,立國** 國,封 坤 荀 欲令二上居五爲比 立大夫因采地 陰下之二,在二承五,故 爽 諸侯; 陽當之五,處坤之中, 日 謂析土 :「大君」謂 也。 承家,立大夫 地 名,正其功 以封諸侯, 「承家」,立 故故 命 師 開

小人勿用。

「小人勿用」,必亂邦也。 「正功也」。〇干寶曰: 湯武之事。 虞翻曰: 謂「五多功」。五動正位,故《象》曰:「大君有命」,以正功也。

戸,

而

息

來

在

已,去

陰

居陽,承乾之

比者,坤之歸

魂

也。

亦世

於

義與

師

同

也。

原,卜

也。

^

周禮

干寶曰: 楚靈、齊閔,窮兵之禍也。 ()虞翻曰: 坤反君道,故「亂邦也」。 ()

序卦》曰 也」。 相和 羣類,必有所比矣。 崔憬曰: 親 也。 「方以類聚,物以羣分」,人衆則 衆必有 相黨則相親 所比,故受之以比 上比 ,故言「比者,比 相阿 黨 比

⇒ 坎上 比,吉。

原筮 從,比 虞 今既親比,故云「比,吉也」。 而流,比之象也。 》《子夏傳》曰: 翻 元永貞,无咎。不寧方來,後夫凶 曰 : 而 輔 師二上之五, 之,故「吉」。 夫「凶」者,生乎乖争。 地得水而 得位。 與大 柔,水得土 有旁通 衆 陰 順

人,●必災其身,故曰「後夫凶」也。 人,●必災其身,故曰「後夫凶」也。 人,●必災其身,故曰「後夫凶」也。 人,●必災其身,故曰「後夫凶」。 一曰「原悉元永貞」。 送取順守,居安如曰「原筮元永貞」。 送取順守,居安如曰「原筮元永貞」。 送取順守,居安如曰「原筮元永貞」。 送取順守,居安如四方既同,萬國既親,故曰「比吉」。 考如人,●必災其身,故曰「後夫凶」也。

崔憬曰: 下比於上,是「下順」也。《彖》曰: 比,吉也。比,輔也,下順從也。

原究筮道,以求長正而无咎矣。 九二升五。剛往得中,爲比之主,故能蜀才曰: 此本師卦。案: 六五降二,「原筮元永貞,无咎」,以剛中也。

「不寧方來」,上下應也。

爲方,上下應之,故「方來」也。 虞翻曰: 水性流動,故「不寧」。坤陰

「後夫凶」,

爲後,艮爲背。上位在背後,无應乘陽,虞翻曰:「後」謂上,「夫」謂五也。坎

其道窮也。

故「後夫凶」也。

比聖王,其義當誅,故「其道窮」凶也。荀爽曰:「後夫」謂上六。逆禮乘陽,不

《象》曰: 地上有水,比。

潤,比之義也。何晏曰: 水性潤下,今在地上,更相浸

先王以建萬國,親諸侯。

初六,有孚比之,无咎。《詩》曰「公侯腹心」,是其義也。 《詩》曰「公侯腹心」,是其義也。 腹心親比,故「以建萬國、爲腹,坎爲心。 建、爲諸侯,坤爲萬國、爲腹,坎爲心。 虞翻曰:「先王」謂五。初陽已復,震爲

❶ 「失」,原誤作「夫」,今據四庫本、照曠閣本改。

殊俗,皆來親比,故「无咎」也。 以喻殊俗。聖王之信,光被四表。 故「无咎」也。○荀爽曰: 日 :「孚」謂五。初失位 變來得 初 應外, 絶域 正

有孚盈缶,終來有它,吉。

得正,故「終來有它,吉」。在内稱 成屯。「屯者,盈也」,故「盈缶」。 虞翻曰: 「來」也。 坤器爲缶。坎水流坤,初動 終變

象》曰: 比之「初六」,「有它吉」也。 然後吉也。 荀爽曰: 也。《象》云「有它吉」者,謂信及非應, 盈滿中國,終來及初,非應,故曰「它」 缶者應内,以喻中國。 孚既

六二,比之自内,貞吉。

干寶曰: 得位應五而體寬大,君樂民人自得之象 也,故曰「比之自内,貞吉」矣。 二在坤中。 坤,國之象也。

> 《象》曰:「比之自内」,不自失也 崔憬曰 自内 而比,不失己親

六三,比之匪人。

《象》曰:「比之匪人」,不亦傷乎 干寶曰: 管蔡之象也。比建萬國,唯去此人,故 之家,有土之君也。周爲木德,卯爲木 辰,同姓之國也。爻失其位,辰體陰賊 凶,體剥傷象,弑父弑君,故曰「匪人」。 虞翻曰: 六三乙卯,坤之鬼吏。在比 匪,非也。失位无應,三又多

六四,外比之,貞吉。

曰「比之匪人」,不亦傷王政也。

賢,故「貞吉」也。 虞翻曰: 在外體,故稱「外」。 得位 比

《象》曰:「外比」於賢,以從上也。 干寶曰: 能外親九服賢德之君,務宣上志,綏萬 位,上比聖主,下御列國,方伯之象也。 四爲三公,在比之象而 得其

邦也。 故曰「外比於賢,以從上也」。

九五、顯比。

仁也。 以 虞翻曰: 變體重 五貴多功,得位正中, 明,故「顯 比。 謂「顯諸 初、三

王用三敺,失前禽。

則「失前禽」也。 成震。震爲鹿,爲驚走。 陰。不及於初,故「失前禽」。 虞翻曰: · 坎五稱王。「三敺」謂 「鹿之斯 謂初已變 敺 奔」, 下三

邑人不戒,吉。

吉也 虚无君,使師二上居五中,故「不戒, 虞翻曰: 坤爲邑,師震爲人。 師時坤

(象》曰:「顯比」之「吉」,位正中也。 虞翻 曰 : 謂离象明,正上中也。

舍逆取順,「失前禽」也。

虞翻 E. 背上六,故「舍逆」。 據三陰,

故「取順」。不及初,故「失前禽」。

「邑人不戒」,上使中也。

上六,比之无首,凶。 虞翻曰: 謂二。使師二居五中。

「无首,凶」。 曰 : 无首,不以大終,故「凶」也。 荀爽曰: 首,始也。「陰道无成而代有終」, 陽欲无首,陰以大終。 虞翻 陰而

《象》曰:「比之无首」,无所終也。 虞翻曰: 迷失道,故「无所終也」。

《序卦》曰: 崔憬曰: 畜矣。○韓康伯曰: 小畜」也。 比必有所畜,故受之以小畜。 下 順從而 上下應之,則有所 由比而畜,故曰

— 異乾 上下 小畜,亨。

侯果曰: 四爲畜主,體又稱小,唯九三 被畜,下剛皆通,是以「小畜,亨」也。

Ð

密雲不雨,自我西郊。

故「密雲不

雨,上往也」。

爲雲,墜地

稱

雨。

上變爲陽,坎象半見,

居兑,西郊之象也。既微少,纔作密雲,故未能爲雨。四互既微少,纔作密雲,故未能爲雨。四互雨者,陰之氣也。今小畜五陽而一陰,施澤未通,以明小畜之義。 案:雲 化操 曰:雲如不雨,積我西邑之郊。

小畜。 小畜,柔得位而上下應之,曰

位,而上下應之,三不能陵,小畜之義。一爻者也。體无二陰以分其應,既得其王弼曰: 謂六四也。成卦之義,在此

健而巽,剛中而志行,乃「亨」。

之,故「志行乃亨」也。曰「小畜」。二失位,五剛中正,二變應四之坤初爲復,復小陽潛,所畜者少,故四之坤初爲復,復小陽潛,所畜者少,故虞翻曰: 需上變爲巽,與豫旁通。豫

「密雲不雨」,尚往也。

虞翻曰: 密,小也。兑爲密,需坎升天

《象》曰: 風行天上,小畜。

之義也。 行天上,則是令未下行,畜而未下,小畜《九家易》曰: 風者,天之命令也。今

君子以懿文德。

道」,其義「吉」也。初九,復自道,何其咎,吉。《象》曰:「復自初九,復自道,何其咎,吉。《象》曰:「復自書契,乾离照坤,故「懿文德」也。善莫文,乾爲德,离爲明。初至四體夬爲虞翻曰:「君子」謂乾。懿,美也。豫坤

其咎,吉」。乾稱「道」也。 復自道」,「出 謂從豫四之初,成復卦,故 入无 疾,朋來无 咎」,「何

九二、牽復、吉。

中和,牽復自守,不失於行也。 崔憬曰: 四柔得位,羣剛所應。 二以

象》曰:「牽復」在中,亦不自失也。

虞翻曰: 變應五、故「不自失」。 與比

二同義也。

九三,車説輹,

虞翻曰: 坤象不見,故「車説輹」。 馬君及俗儒皆 乾爲車 一,非也。 豫坤爲車、爲輹。 至三成乾

夫妻反目。

虞翻 内,夫當在外。今妻乘夫,而出在外, 不正,巽多白眼,「夫妻反目」。 爲目。今夫妻共在四,离火動上,目象 曰 : 豫震爲夫、爲反,巽爲妻,离 妻當在

> 《象》曰:「夫妻反目」,不能正室也 之道」。 《九家易》曰: 《象》曰「不能正室」。三體离,需「飲食 以妻乘夫,其道逆,故「不能正室」。 离既不正,五引而上,三引而下,故「反 目」也。 輿以輪成車, 夫以 飲食有訟,故争而反目也 四互體 离,离爲目 妻成室。今 也。

六四,有孚,血去惕出,无咎。

見,故「血去惕出」。得位承五,故「无 惕,憂也。震爲出,變成小畜,坎象不 虞翻曰:「孚」謂五。豫坎爲血,爲惕。

《象》曰:「有孚」「惕出」,上合志也。 咎」也。

荀爽曰: 順五。惕,疾也。 血以 喻陰。 四當去初,疾出從五, 四陰,臣象,有信

故曰「上合志也」。

九五,有孚攣如,富以其鄰。

虞翻曰: 孚五,謂二也。攣,引也。

謂 既濟,與 「富以其鄰」、《象》曰 曰 爲 =; 繩 豫 如」,以及 兑西震東稱 東西鄰同 艮爲手。 也。 義 鄰」。 失位,五 「不獨富」 五貴 稱 二變承三,故 富富 一欲其 (變,故 鄰

象》曰:「有孚攣如」,不獨富 也。

《九家易》曰: 也。 故「孿如」。 如 「不獨富也」。 五以四陰作財, 有信,下三爻也。 謂連接 與下三陽共之,故 人其鄰。 鄰謂 體巽 四

九、既 雨 既 處,尚 得 載, 婦貞厲。 今本「得

作「德」。

虞翻 巽壞,故 在坎 爲雨,巽爲 既雨既處」。 上,故「上得積 曰 : 「婦貞厲」。 處。 既, 已也 坎雲復天,坎爲 謂二 載」。 一已變 應在 ~,三體 巽爲 =; 婦, 車, 坎 坎 河南,故 坎成 積 水 載 零

月 幾 望,君子征凶。

> 妹》、《中孚》「月幾望」義同 虞 爲疑,故「君子征」,「有所疑」矣。 月象對,故「月幾望」。 正 一,需時 翻 티 : 成 次,與 幾, 近 离 也。 相 望。 坎 上變陽消,之坎 月 离 也。 兑西震 日 與《歸 東, 日 已

五四

《象》曰:「既雨既處」,得積載也

虞翻 習爲積也。 티 : 巽 消承坎,故「得積 載」。 坎

君子征凶」,有所疑 虞翻曰: 變坎爲盜,故有所疑 也。

序卦》曰: 後有 先懿文德,然後以禮導之,故言「物畜然 崔憬曰: 禮 也。 履,禮也。 物畜然後有禮,故受之以 物畜不通 ,則君子 履。

乾 兑上下 履虎尾,不咥人,亨,利貞。 今本 脱 利

翻 曰 : 謂 變訟 初 爲 兑 也。 與 謙 旁

也。

九家易》曰:「虎尾」謂三也。

三以

説道

爲虎,乾履兑,非也。 通 故「履虎尾」。 兑悦而應虎 艮爲尾,乾爲 「不咥人」。 以 坤 履乾, 剛當位,故通。 以柔 乾兑乘謙 **兇剛鹵** 履 剛。 口,與上絶,故 震足 ,非柔也。 俗儒皆以兑 謙 坤 爲 蹈 艮

(彖》曰: 履、柔履剛 也

虞翻 三履二非和 五无應,故无元,以乾履兑,故有 履剛」。 티 : 荷 坤柔乾剛, 正,故云「利貞」也。 爽 티 : 謙 謂三履二也。 坤 籍乾,故 六

説 而 應乎乾

是以「履虎尾,不咥人,亨」。 虞翻 以説,其正應天,故虎爲之「不咥人」也。 之君,應天子命以臨 應上,故曰「説而應乎乾」也。 應」也。 티 : ○《九家易》 説, 兑也。 下。 明兑不履乾,故言 曰 承上以巽,據下 動來爲 以喻 党而 或

> 不見 也。 履 「亨」謂於五也。 Ŧī. 之應,上順 咥噬 能異説之道,順應於五 也。 太平之代,虎不食人。 於天,故「不咥 故 故 雖 踐 亨

剛 中正,履帝位而不疾,光明也

明也」。 虞 帝位、坎象不見、故「履帝位而不疾、光 五,帝位。 翻 「剛中正」謂五。 坎爲 疾病,乾爲大明。 謙震 爲帝。 五履

定民志。 《象》曰: 上天下澤,履。 君子以辯上下,

民 時 爲上,兑澤爲 念」也。 翻 坤在乾上,變而爲履,故「辯上下,定 日 :「君子」謂乾。 下 ·, 謙 坤 爲民,坎爲 辩 别也。 志。 乾 天

初九,素履,往无咎

虞翻曰: 失位,變往得正,故「往无咎」。 應在巽,爲白,故「素履」。 初已 得 几

"願也」。 一,使四 在外稱「往」、《象》曰

象》曰:「素履」之「往」,獨行願也。 位,獨行禮義,不失其正,故「无咎」也。 荀爽曰: 而未成」。素履者,謂布衣之士,未得居 初九者,潛位,「隱而未見,行

九二,履道坦坦,幽人貞吉

虞翻曰: 人喜笑,故「貞吉」也。 故稱「幽人」。之正得位,震出兑説,幽 塗,故「履道坦坦」。訟時二在坎獄中, 二失位,變成震爲道,爲大

《象》曰:「幽人貞吉」,中不自亂也。 虞翻曰: 「不自亂」。 雖幽訟獄中,終辯得 Ī, 故

六三,眇而視,跛能履,今本「而」爲「能」。 足。足曳,故「跛而履」。 曰 : 視,上應也。 离目不正,兑爲小,故「 訟坎爲曳,變震 俗儒多以兑刑 時爲 眇 而

履虎尾,咥人凶。

非爲跛也。

爲跛,兑折震足爲刑人。

見刑斷足者,

尾」。 虞 凶」、《象》曰「位不當也」。 又眇,視步 翻 位在虎口中,故「咥人凶」。 曰: 不能,爲虎所 艮爲尾,在兑 下,故 囓,故「咥人 既 履 跛 虎

武人爲于大君。

位,變而得正成乾,故曰「武人爲于大 君,志剛也」。 虞翻曰: 乾象在上爲「武人」。三失

《象》曰:「眇而視」,不足以有明也。 履」,不足以與行也。 跋 而

者也。 視,不足 爲目,巽爲股,體俱非正。 侯果曰: 行」,是其義也。 雖能 以 六三,兑也。 有 履,跛足者也 明。 跛能 互有离巽。 履,不足 雖能 故 白「眇 視, 眇 能 與

咥人」之「凶」,位不當也。

體离兑,水火相刑,故獨唯三被咥凶矣。 通」。今於當爻,以陰處陽,履非其位,互 上剛,尊卑合道,是以「履虎尾,不咥人, 六三爲履卦之主,體説 應乾,下柔

武人爲于大君」,志剛也。

應,故曰「志剛 离爲嚮明,爲于大君南面之象,與乾上 以陰居陽,武人者也。 三互离爻,

九四,履虎尾,愬愬,終吉。

恕」。 變體 體 坎,得位承五 與下絶, 四 應初,故「終 多 故 一愬

吉」、《象》曰「志行也」。

象》曰:「愬愬,終吉」,志行也。

懼,故「終吉」也。 虎尾也。 侯果曰: 逼近至尊,故「恐懼」。 愬愬,恐懼也。 執乎樞密, 履乎兑主,履 以其恐 故「志

> 九 Ŧī. ,夬履,貞厲

履四變五,在坎中 翻曰: 謂三上已變,體 也。爲上所乘,故「貞 夬象,故 夬。

象》曰:「夬履貞厲」,位正當也。

厲」、《象》曰「位正當也」。

主。 恒懼危厲,故曰「夬履貞厲,位正當也」。 干寶曰: 萬方所履,一決於前 夬,決也。 居中履正,爲履貴 恐決失正,

上九,視履考詳,其旋元吉。

也。乾爲積善,故「考詳」。三上易位,故 虞翻曰: 三,故曰「視履考詳」矣。考,稽; 「其旋元吉」、《象》曰「大有慶也」。 應在三。三先視上,故上亦視

《象》曰:「元吉」在上,大有慶也。

盧氏曰: 王者履禮於上,則萬方有慶

易傳卷第三

五七

五八

易傳卷第四

唐資州李鼎祚集解

泰者,通也。《序卦》曰: 履而泰然後安,故受之以泰。

謂「君子以辯上下,定民志」,通而安也。崔憬曰: 以禮導之必通,通然後安,所

Ⅲ ^{埔上} 泰,小往大來,吉享。

爲「小往」,乾陽信内稱「大來」,天地交,虞翻曰: 陽息坤,反否也。 坤陰詘外

《彖》曰:「泰,小往大來,吉亨」。 萬物通,故「吉亨」。

「大」謂陽也。天氣下,地氣上,陰陽交,蜀才曰: 此本坤卦。「小」謂陰也,

萬物通,故「吉亨」。

則 是 得生。 道,本以通 何 下降,各自閉 妥曰 天地交 明萬物生由天地交也。 而 生萬 此 萬 塞,不 別明天 物 物。 通 能相 道 也 若天氣 泰 交,則 也。 夫 萬

騰,

地

氣

無

由

泰

之爲

猶君之與臣,君臣相交感乃可以濟養民何妥曰: 此明人事泰也。上之與下,上下交而其志同也,

内陽而外陰,内健而外順,

也。

天地以氣通,君臣以志同也。

「大來」。居外,故曰「小往」, 健而陽在内,故曰 爻爲語。健順之稱,指卦爲言。順而陰爻爲語。健順之稱,指卦爲言。順而陰何妥曰: 此明天道也。陰陽之名,就

内,健於行事。 崔憬曰: 此明

事

也。

爲

君子,在

陰

「爲小人,在外,順以

聽命。

君子道長,小人道消也。

特言消也。 盛長 也。 《九家易》曰: 陽稱息者,長也 成熟則給用,給用則分散,故 也。 陰言消者,起姤終乾,萬 謂陽 息 起復 而 升 成 陰 巽, 消 陰用 物 萬 而 物 成 降

《象》曰: 天地交,泰。

則爲閉塞。今既相交,乃通泰。下降,以成地道。天地二氣,若時不交,荀爽曰: 坤氣上升,以成天道。乾氣

后以財成天地之道,

聚人以財,故曰「成天地之道」。主,故稱「后」。坤富稱財。守位以人,虞翻曰: 后,君也。陰升乾位,坤女

輔相天地之宜,以左右民。

曰「宜民宜人,受禄于天」。○鄭玄曰:左,兑爲右,坤爲民。謂以陰輔陽,《詩》虞翻曰: 相,贊。左右,助之。震爲

可以成物助民也。仁,夏以長養,秋教收斂,冬敕蓋藏,皆其順陰陽之節,爲出内之政。春崇寬財,節也。輔相,左右,助也。以者,取

初九,拔茅茹,以其彙,征吉。

「以其類,征吉」也。也。上順而應,不爲違距,進皆得志,故也。上順而應,不爲違距,進皆得志,故志在外。初爲類首,己舉則從,若茅茹也。茹,相牽引之貌也。三陽同志,俱王弼曰: 茅之爲物,拔其根而相牽引

「征吉」。「外」謂四也。「拔茅茹以彙」。震爲征。得位應四,茅根。艮爲手。彙,類也。初應四,故虞翻曰:「否泰反其類」,否巽爲茅。茹,《象》曰:「拔茅」「征吉」,志在外也。

九二,包荒。

陽,二上包之。翟玄曰: 荒,虚也。二五相應,五虚无

用 河,不 退遺。

之,故曰「不遐遺」。 欲升,陰性欲 地升天,道雖遼遠,三體俱上,不能止 爽 曰 : 河出於乾,行 承,馮河 而 於地 上,不用舟航 中。 陽 性

朋亡,得尚于中行。

則二上居五而行中和矣。 荀爽曰:「中」謂五,坤爲朋。 朋亡而下,

大也。 《象》曰:「包荒」,「得尚于中行」,以光

虞翻 足,故「用馮河」。 震爲行,故「光大」也。 亡」。二與五易位,故「得上于中行」。 兑爲朋,坤 變得正,體坎。 馮河,涉河。 曰 : 在 虚 遐,遠; 中 無君、欲使二上、故「朋 坎爲大川,爲河。 稱「包」。荒,大川也。 乾爲遠,故不遐遺。 遺,亡也。 失位,

福」也。

九三,无平不陂,无往不復。

虞翻曰:

一五變時,四體离飛,故「翩

艱貞无咎。勿恤其孚,于食有福。 虞翻 貞」。 道」,故「无平不陂,无往不復」。 平,易者使傾」。「往」謂消外,「復」謂息 内。從三至上體復,「終日乾乾,反復 天地分,故「平」。 孚,信也。 險坎爲孚,故「有孚」。 體噬嗑,食也。 虞翻曰: 二上之五據四,則三乘二,故「于食有 티: 坎爲憂,故「勿恤」。陽在五孚。 二之五得正,在坎中, 陂,傾。 艱,險; 天成地平,謂「危者使 謂否上也。 貞,正, 恤,憂; 平謂三, 故「艱

六四 《象》曰:「无平不陂」,天地際也 際也。 故曰「无平不陂,无往不復」也 宋衷曰: ,翩翩,不富以 地平極則險 位在乾極,應在 其鄰。 陂,天行極 坤極,天地之 則還復

六〇

《象》曰「皆失實也」。故稱「其鄰」。三陰乘陽,不得之應,翮」。坤虚无陽,故「不富」。兑西震東,

不戒以孚。

《比》「邑人不戒」同義也。體坎,中正,《象》曰「中心願也」。與册五,信來孚邑,故「不戒以孚」。二上虞翻曰:謂坤。「邑人不戒」,故使二

虚陽實,坤今居上,故言「失實」也。宋衷曰: 四互體震,翩翩之象也。陰《象》曰:「翩翩不富」,皆失實也。

「不戒以孚」,中心願也。

陰得承陽,皆陰心之所願也。《九家易》曰: 乾升坤降,各得其正。

六五,帝乙歸妹,以祉元吉。

姊妹。五在震後,明其爲妹也。五應於是爲「帝乙」。六五以陰處尊位,帝者之《九家易》曰: 五者,帝位。震象稱乙,

祉元吉也。 爲大腹,則妹嫁而孕。 兑妹,故嫁妹 故「元吉」也。○虞翻曰: 「帝乙歸妹」。 一,當下嫁二。婦人謂 。帝乙,紂父。 祉福也。 謂下居二,以中和 歸,謂 得位正中,故「以 謂五變體 嫁曰「歸」,故言 嫁也。 震爲 离,离 震足 帝,坤 相承,

言「中以行願也」。《九家易》曰: 五下於二而得中正,故《象》曰: 以祉元吉」,中以行願也。

上六,城復于隍,

體復象,故「城復于隍」也。池。今泰反否,乾壞爲土,艮城不見而積土。隍,城下溝。無水稱隍,有水稱虞翻曰: 否艮爲城,故稱「城」。坤爲

勿用師。自邑告命,貞吝。

行不順,故「勿用師」。 坤爲自邑,震爲虞翻曰: 謂二動時體師。陰皆乘陽,

實遠應,故「貞吝」。 自邑告命」。 П , 否 命逆不順 巽爲命。 冷陰道 今逆 陵 先 迷,失 陽, 故

《象》曰:「城復于隍」,其命亂 也。

《九家易》曰: 乾當來上,不可用 拒之也。自邑者,謂從坤性而 隍」,國政崩 自相告語,俱下服順 在泰上,故「其命亂也」。 命者,謂下爲巽宣布君之命令也。三陰 也。 坤爲 承乾也。「城復于 亂 ,否巽爲命。 降 也 師 告 而

序卦》曰: 慢日: 物不可以終通,故受之以否。 物 極則 反,故 「不終通」而否

== 乾坤 上下 以 所謂 否之匪人,不利君子貞,大往 陰來 臣 城復于隍」者也 滅 陰 弑 消乾 陽、君子道消、故「不利 其 君 又反 ,子弑其父,故曰「 泰 也 謂三比 小 來。 匪 坤

> 《彖》曰:「否之匪人,不利君子貞 子貞」。 崔憬曰: 天地不交而萬物不通」,與比 人道長,故云「匪人」。 陰信陽詘 否,不通也。 ,故「大往 「君子道消」,故 於不通之時,小 \equiv 小 同 來, 義 則 也 是

大往小來」,

不利君子貞」也。

蜀才曰: 消",「小來」,陰來 此本乾卦。 而息 也 「大往」,陽往 而

則是天地不交而萬物不通也 何妥曰: 此明天道否也。

E 下不交而天下无邦也。

阻 同」,否中云「无邦」者,言人志 何妥曰: 離散而亂邦國。 ,取亂之道,故言「无邦」。 此明人事否也。 ○崔憬日 泰 中言 不 君臣 ·同,必

内 憬 而外陽,内柔 曰 : 陰柔謂 而 外剛 坤,陽剛 謂

乾也。

消也。 内小人而外君子。小人道長,君子道

《象》曰: 天地不交,否。 崔憬曰: 君子在野、小人在位之義也。

氣上升而不下降,地氣沈下又不上升,宋衷曰: 天地不交,猶君臣不接。天

二氣特隔,故云「否」也。

而驕逸也。

吉也。 貞者,正也。謂正居其所則在下也。貞者,正也。謂正居其所則也。合體同包,謂坤三爻同類相連,欲也。合體同包,謂坤三爻同類相連,欲荷爽曰:「拔茅茹」,取其相連。彙者,類初六,拔茅茹,以其彙,貞吉,亨。

六二,包承,小人吉。 大人否,亨。 象》曰:「拔茅」「貞吉」,志在君也。 《九家易》曰: 間象相承,得繫於陽,故「吉」也。 荀爽曰:「二與四同功」,爲四所包,故曰 木,陰爻爲草。 曰「否亨」矣。 人」謂五。 「包承」也。小人,二也。謂一爻獨居, 大人否」也。 初六巽爻,巽爲草木。 乾坤分體,天地否隔,故曰 二 五 初六陰爻,草茅之象也。 陰志 相 在 應,否義 下, 欲承君也。 得 陽爻爲 通,故

升 降 殊隔 卑不犯尊,故「大人吉」也

其亡 其亡,

使亡。 「其亡其亡」。 荀爽曰: 陰 欲 謂 消 坤 陽, 性 由 順 從,不能消乾 四 及五 故 曰

繫于包桑。

九四,有命,无咎,疇離祉。

在下。 也。 其 包,本也。言其堅固不亡,如以 玄下黄, 荀爽曰: 五二包繫,根深蒂固,若山之堅,如地之 上即田也。 時,下包六二。 二互坤艮,艮 有天覆地載之德,故以喻。 ○京房曰: 桑有衣食人之功,聖人亦 與幾同。 案 : 雖欲消乾,繫其本體,不 以象乾 包者,乾 其亡其亡,繫於苞 五互巽木,田上有木,莫過 幾者,近也。 「其亡其亡」,近死之嗟也。 .坤也。 坤相 乾職在上,坤體 包 九五 也 〇陸 山 能亡也 桑」。言 坤地,地 異繩 居否之 績曰 繫

六三,包羞。 不正與陽相 虞 可羞者,以「位不當」故也。 烫 曰: 陰亂弑君,大人不從,故「不亂羣 翻 \exists 《象》曰:「包羞」,位不當 卦性爲否,其義否隔 承,爲四 不 也 所包,違義失正 物三 稱 羣 也。 今以 也。 謂 而 坤

也。 《九家易》曰: 福也。陰皆附之,故曰「有福 據三陰,故「无咎」。 陰離受五四之福也 同功,故陰類皆離 疇者,類也。 巽爲命。謂受五之命 謂 祉 无 四應初 也 命

離,附;

謂

下三

據三,與二

而

據

則

有咎

象》曰:「有命无咎」,志行也 荀爽曰: 謂志行於羣陰也。

九五,休否,大人吉。

故五處和居 九家易》曰: 正,以否絶之。 否者, 消 卦。 乾 陰欲 坤異體 消

玄曰: 之謂。 獻珍異之物,而終免於難,「繫於包桑」 厚者也。 猶紂 雖遭危亂,物莫能害矣。 囚文王於羑里之獄 四臣 〇 鄭

象》曰:「大人」之「吉」,位正當也。

崔憬曰: 得位居中也。

上九,傾否,先否後喜。

喜」也。 猶否,故「先否」也。 侯果曰: 傾爲覆也。 傾畢則 否窮則傾 通,故「後 矣。 傾

象》曰:「否」終則「傾」,何可長也。 虞翻曰: 下反於初,成益,體震,「民説无疆」,故「後 以陰剥陽,故「不可久」也。 否終必傾,盈不可久,故「先否」。

同人。 《序卦》曰: 物不可以終否,故受之以

崔憬曰:「否終則傾」,故同於人,通而利

涉矣。

同人于野,亨。

猶人 巽爲風,天在上。火炎上而從之,是其 通之德大行,故曰「同人于野,亨」。 故謂之「同人」。 事之,以是爲人和同者,君之所爲 性同於天也。 火得風然後炎上益熾,是 鄭玄曰: 君在上,施政教使天下之人和同而 乾爲天,离爲火。 風行无所不偏,徧 卦體有巽 則會 也。

利涉大川,利君子貞。

崔憬曰: 正,同人於二,爲能通天下之志,故能 「利涉大川,利君子之貞」。 以离文明而合乾健。 九五 中

《彖》曰: 同人,

《九家易》曰: 心,故曰「同人」。 天日同明以照于下,君子則之,上下同 謂乾舍於离,同 而爲日。

柔得位得中而應乎乾,曰同人。

降 蜀 上之象,義同於人,故曰「同 二,則「柔得 オ 日 此 本 位 夬 得 卦。 中 而 九二升上, 應乎乾」。 下 上 奉 六

行也。《同人》曰「同人于野,亨,利涉大川」,乾

行也」。 虞翻 師 上 君臣父子兄弟朋友,而故 爲夫,巽爲婦,所謂 野,是「同人于野」而得通者 野,亨」。此孔子所 行耳,故特日 失位,變而體坎,故曰「利涉大川,乾 震爲人。 日 : ○侯果日: 旁通 二得中應 「乾行也」。 師 卦。 「二人同心」,故不稱 以 九二升上,上爲郊 乾,故 明嫌表微。 巽爲同, 言人耳。 \exists ,由乾爻上 乾爲野 同人于 乾 師震 兀

故曰「利君子貞」也。 尚武,乃以文明應,不以邪,乃以中正,何妥曰: 离爲文明,乾爲剛健。健非文明以健,中正而應,君子正也。

唯君子爲能通天下之志。

虞 人臣則不當矣,故爻辭 憬曰:「君子」謂九五 類族辯物」,「聖人作而萬物覩 通,爲志,故「能通天下之志」。 「以通天下之志」。若九三、九四,以其 翻 日 : 唯,獨也。 0 不言「同人」也。 四 變成 能舍己同人, 坎,坎 謂 五以 崔

《象》曰: 天與火,同人。

「同人」也。 荀爽曰: 乾舍於離,相與同居,故曰

君子以類族辯物。

《姤》「天地相遇,品物咸章」,以乾照坤, 族。 虞翻 故「以類族 **羣分」。** 辯,别也。 曰:「君子」謂 孔子曰「君子和 辩物 乾,陽物 乾。 謂 「方以 師 而 坤 坤、陰物。 不同」,故於 類聚,物以 爲類,乾 爲

❶ 「五」,原誤作「二」,今據照曠閣本改

同人家見「以類族辯物」也。

初九,同人于門,无咎。

虞翻曰: 乾爲門。謂同於四,四變應

初,故「无咎」也。

《象》曰:「出門同人」,又誰「咎」也。

九震爻,「帝出乎震」,「震爲大塗」,又爲人,出門之象,「又誰咎矣」。 案: 初崔憬曰: 剛而无應,比二以柔,近同於

日門,「出門」之象也。

與四同功」,五相應,初相近。上下衆陽荀爽曰: 宗者,衆也。三據二陰,「二六二,同人于宗,吝。

皆欲與二爲同,故曰「同人于宗」也。陰

道貞静,從一而終。今宗同之,故

「吝」也。

《象》曰:「同人于宗」,吝道也。

和同者之所仰也。有應在五,唯同於五。侯果曰:「宗」,謂五也。二爲同人之主,

九四,乘其庸,弗克攻,吉。

狹矣。所同雖吝,亦妻臣之道也。過五則否,不能大同於人,則爲主之德吝

九三,伏戎于莽,升其高陵,三歲不興。

謂四變時,三在坎中,隱伏自藏,故「伏虞翻曰: 巽爲伏,震爲草莽,离爲戎。

股升其高陵,爻在三,乾爲歲。興,起戎于莽」也。巽爲高,師震爲陵。以巽

也。動不失位,故「三歲不興」也。

《象》曰:「伏戎于莽」,敵剛也。「三歲不也」 動不失位 故三 崽不郹」也

興」,安行也。

兵,「伏戎于莽」之象也。 其主而忌於五,所以隱兵于野,將以襲其主而忌於五,所以隱兵于野,將以襲 人,故曰「伏戎于莽」。五既居上,故曰 人,故曰「伏戎于莽」。五既居上,故曰 矣。一爻爲一年,自三至五頻 兵,「伏戎于莽」。五既居上,故曰

六

「弗克攻」則「吉」也。庸」。變而承五、體訟。乾剛在上,故虞翻曰: 巽爲庸,四在巽上,故「乘其

困而反則也。《象》曰:「乘其庸」,義弗克也。其「吉」,則

而得吉者,以困而反正則也。禮,衆所不與。勢雖乘墉,義終弗克。犯己。攻三求二,尤而效之。違義傷履非其位,與三争二。二自應五,三非王弼曰: 處上攻下,力能乘庸者也。

師」。二至五體姤,遇也,故「相遇」。爲後笑也。乾爲大,同人反師,故「大故「先號咷」。師震在下,故「後笑」。震虞翻曰: 應在二。巽爲號咷,乾爲先,九五,同人先號咷而後笑,大師克相遇。

師」「相遇」,言相克也。 《象》曰:「同人」之「先」,以中直也。「大

侯果曰: 乾德中直,不私於物。欲天

九,司人于邓,无每。故「笑」也。○《九家易》曰: 乾爲言。故「笑」也。○《九家易》曰: 乾爲言。好,寇阻其途,以言相克,然後始相遇,之,未獲同心,故「先號咷」也。時須同下大同,方始同二矣。三四失義而近據

上九,同人于郊,无悔。

于郊,「志未得也」。 不與内争,无悔吝也。同人之時,唯同 侯果曰: 獨處于外,「同人于郊」也。 《象》曰:「同人于郊」,志未得也。 《象》曰:「同人于郊」,志未得也。 虞翻曰: 乾爲郊。失位无應,與乾上

以大有。《序卦》曰: 與人同者物必歸焉,故受之

大有。 以欲從人,物必歸己,所以成崔憬曰: 以欲從人,物必歸己,所以成

뻬 萬下 大有,元亨。

虞翻曰: 與比旁通。「柔得尊位大中」,

禮通,若周公攝政朝諸侯於明堂是也。 之也。元亨者,又能長羣臣以善,使嘉 明之德、代君爲政、處其位、有其 曰 : 則施 大富 曰: ·應天而時行」,故「元亨」也。○姚 [有也。 生,澤則流潤,離則長茂,秋則成收, 六五體离,處乾之上,猶大臣 互體有兑。 大有則「元亨」矣。 〇鄭 兑爲澤,位在秋 事 也。 有聖 而 會 玄 理 規

之,曰大有。《彖》曰: 大有,柔得尊位,大中而上下應

「大有」之義也。 陰,以分其應。上下應之,靡所不納, 王弼曰:處尊以柔,居中以大,體無二

其德剛健而文明,應乎天而時行,是以「元其德剛健而文明,應乎天而時行,是以「元

春,至二兑爲秋,至三离爲夏,坎爲冬,故「時」謂四時也。大有亨。比初動成震爲虞翻曰: 謂五以日應乾而行於天也。

曰「時行」。以乾亨坤,是以「元亨」。

《象》曰: 火在天上,大有。

君子以遏惡揚善,順天休命。

「揚于王庭」,故「遏惡揚善」。乾爲天善,坤爲遏惡、爲順。以乾滅坤,體《夬》虞翻曰: 遏,絶, 揚,舉也。乾爲揚程,以遙惡辨善 刑ヲ存合

初九,无交害,匪咎,艱則无咎。

休,二變時巽爲命,故「順天休命」。

屯,難也。變得位,「艱則无咎」。匪,非也。艱,難。謂陽動比初成屯。「无交害」。初動震爲交,比坤爲害。虞翻曰:「害」謂四。四离火爲惡人,故

虞翻曰:「害」謂四。

象》曰:

大有「初九」,「无交害」也

虞翻曰: 比坤爲大轝。乾來積上,故九二: 大轝以載,有攸往,无咎。

得正應五,故「有攸往,无咎」矣。 大轝以載」。 「往」謂之五。二失位

象》曰:「大轝以載」,積中不敗也。

體剛履中,可以任 盧氏曰: 乾爲大車,故曰「大車以載」。 重。 有應於五,故所

積皆中而不敗也

九三,公用亨于天子,小人弗克。 亨于天子」。四折鼎足,「覆公餗」,故 虞翻曰:「天子」謂五。三,公位也。「小 「小人不克」也。 人」謂四。 二變得位,體鼎象,故「公用

《象》曰:「公用亨于天子」,「小人」害也。 虞翻曰:「小人」謂四也

九四,匪其尫,无咎。

旁聲,字之誤 行不正。四失位,折震足,故「尫」。 虞翻 曰: 而得正,故「无咎」。 匪,非也。 其 位 「尫」或爲「彭」,作 尫。 足匹,體

> 象》日 虞翻 三百八十四爻,獨无所容也。 艮旅于處,言无所容,在兑睽孤孚厲。 在巽折鼎足,在坎爲鬼方,在 在乾則尫,在坤爲鼠,在震 : 日 「匪其尫,无咎」,明辯折 折之离,故「明辯 魔肺 折 离焚死,在 也」。 得金矢 四

六五,厥孚交如,威如,吉。

虞翻曰: 孚,信也。發而孚二,故「交 如」。乾稱威,發得位,故「威如吉」。

《象》曰:「厥孚交如」,信以發志也。「威 如」之「吉」,易而无備也

有威 乎志,以覃於物。 侯果曰: 其德,翻更畏威,「威如之吉」也。 君物交信,「厥孚交如」也。 不用,唯行簡易,无所 其體文明,其德中順。 物懷其德 防備。 爲卦之主, 應君。 信發

上九,自天右之,吉无不利。 虞翻曰: 謂乾也。右,助 也。 大有通

者,順。 右之」。 比。 爻有三德,盡夫助道,故《繫辭》具焉也。 之代,物不累心,高尚其志,尚賢者也。 王弼曰: 以尚賢,故「自天右之,吉无不利」。 五爲信德而己履焉,履信者也。 坤爲自,乾爲天,兑爲右,故「自天 人之所助者,信。 比坤爲 餘爻皆乘剛,己獨乘柔順也。 順,乾爲信。 履信思順,又 天之所 居豐富 助

右,故吉且利也。● 自謙損。尚賢奉己,上下應之,爲乾所《九家易》曰: 上九説五,以柔處尊而〈象》曰: 大有「上吉」,自天右也。

以謙。《序卦》曰: 有大者不可以盈,故受之

不可盈」,當須謙,天之道也。崔憬曰:「富貴而自遺其咎」,故「有大者

■ 坤上謙,亨。

「剥上來之三」。「天道下濟」,故「亨」。彭城蔡景君説「天道下濟」,故「亨」。彭城蔡景君説虞翻曰: 乾上九來之坤,與履旁通。

君子有終。

有終也。○鄭玄曰: 艮終萬物,故「君 至固,坤之厚順乃能終之,故君子之人 地。山體高,今在地下。其於人道,高 能下下,謙之象。亨者,嘉會之禮,以謙 能下下,謙之象。亨者,嘉會之禮,以謙 。山體高,今在地下。其於人道,高 學玄曰: 艮爲山,坤爲 真翻曰: 「君子」謂三。艮終萬物,故「君

《彖》曰: 謙「亨」。

● 「利」,原誤作「和」,據照曠閣本改。

荀 离,陽來成坎,日月之象,故「光明」也。 爽曰 乾來之坤,故「下濟」。 陰去爲

地道卑而上行,

三、是「天道下濟而光明」也、坤之六三 侯果曰: 此本剥卦。乾之上九來居坤 上升乾位,是「地道卑而上行」者也。

天道虧盈而益謙,

以 曰 : 虧盈」。貴處賤位,故「益謙」。 補不足,天之道也。 曰 : 若日中則昃,月滿則虧。 謂乾盈履上,虧之坤三,故 損有餘 ○崔 憬

地道變盈而流謙,

虞翻曰: 下,水流溼,故「流謙 高岸爲谷,深谷爲陵」,是爲「變盈 謙二以坤變乾,盈 也。 ○崔 坎 動 憬 曰 : 而 而 流 浬

鬼神害盈而福謙 謙」,地之道也

虞翻 曰:「鬼」謂四,「神」謂三。 坤爲鬼

> 稷非馨,明德惟馨」,是其義矣。 害、乾爲神福、故「鬼神害盈 ○崔憬曰:「朱門之家,鬼闞其室」, 而 福 謙 也

人道惡盈而好謙

憬曰:「滿招損,謙受益」,人之道也。 虞翻曰: 乾爲好,爲人。坤爲惡也。故 人道惡盈,從上之三,故「好謙」矣。

謙,尊而光,卑而不可踰,

君子」之「終」也。 卑。坎水就下,險弱難勝,故「不可 虞翻曰: 天道遠,故尊光。三位 踰 展,故

孔穎達曰: 尊者有謙而更光明盛大, 故曰「君子有終」也。 言君子能終其謙之善,而又獲謙之福 卑者有謙 而 不踰越、是「君子之終」也。

《象》曰: 地中有山、謙。

謙之爲道,降己升人。 地 中有 山,以 高 山本地上, 下下,故曰

今居地中,亦降體之義,故爲謙象也。

坎,故「用涉大川,吉」也。 九三體陽,相與成體,故曰「君子」也。 九三體陽,亦爲「謙」,故曰「謙謙」也。 二陰一荀爽曰: 初最在下,爲「謙」。 二陰承初六,謙謙君子,用涉大川,吉。

秦也。 《九家易》曰: 承陽卑謙,以陽自牧《象》曰:「謙謙君子」,卑以自牧也。

六二,鳴謙,貞吉。

曰「鳴謙」。得正處中,故「貞吉」。姚信曰: 三體震爲善鳴,二親承之,故

翻曰:「中正」謂二,坎爲「心」也。崔憬曰: 言中正,心與謙相得。○虞象》曰:「鳴謙貞吉」,中心得也。

有終」,故「吉」也。 荀爽曰: 體坎爲勞,終下二陰,「君子九三,勞謙,君子有終,吉。

上居五位,羣陰順陽,故「萬民服也」。體,君有下國之意也。衆陰皆欲撝陽,荀爽曰: 陽當居五,自卑下衆,降居下《象》曰:「勞謙君子」,萬民服也。

「撝謙」。撝,猶舉也。「无不利」。陰欲撝三,使上居五,故曰荀爽曰: 四得位處正,家性爲謙,故六四,无不利,撝謙。

《象》曰:「无不利,撝謙」,不違則也。

九家易》曰: 陰 撝· 上陽,不違法則。

六五,不富以其鄰

陽。 體,故總言之。 荀爽曰:「鄰」謂四與上也。 乘陽失實,故皆「不富 自 五居 四 以 上 乘

利用侵伐,无不利。

荀爽曰 謂陽利侵伐來上,无敢不利

之者。

《象》曰:「利用侵伐」,征不服 荀爽曰:「不服」謂五也。 也。 案:

六五

离爻。离爲戈兵,「侵伐」之象也。

上六,鳴謙,利用行師,征邑國。

虞翻曰: 象,震爲行,坤爲邑國。 應在震,故曰「 利五之正,己得 鳴謙」。 體 師

從征,故「利用 行師,征 邑國

象》曰: 「鳴謙 」,志未得也。 可「用行 師

征邑國」也。

《九家易》曰: 陰陽相應,故「鳴 謙」也。

> 國」也。 三,征來居五位,故曰「利用 師 雖應不承,故「志未得」。 鳴謙」之象也。 來 上。 坤 案 : 爲邑國 上六兑爻,兑爲 也。 謂下 三應 行 九三 上,上呼 師,征邑 可 行

《序卦》曰: 有大而能謙必豫,故受之

以豫。

豫。 鄭玄曰: 「雷出地奮,豫」,行出 言國 既大而能謙則於政 而 喜樂之意 事恬

- **二** 震坤 上下 豫,利建侯行師。

之象。 而 行師」矣。 豫,喜豫悦樂之貌也。 鄭玄曰: 動 者,莫不 坤又爲衆,師役之象,故「利建侯 ○虞翻 坤,順 . 得 也。 得 曰: 其 震,動也。 所, 震又謂 復初之四,與小 故 謂 雷,諸侯 順其性 之豫

畜 Ŧī. · 體 旁通。 比 象。 坤 爲 四 邦國, 利 復 初,故 震爲 諸 利 侯。 建 侯 初至

三至上,體師象,故「行師」。

《彖》曰: 豫,剛應而志行,

行,故曰「剛應而志行」。 侯果曰: 四爲卦主,五陰應之,剛志大

順以動,豫。

崔憬曰: 坤下震上,「順以動」也。

豫,順以動,故天地如之,

之」者,謂天地亦動,以成四時,而「況建虞翻曰: 小畜乾爲天,坤爲地。「如

侯行師」。言其皆應而豫也。

而況建侯行師乎!

亂 始終,王者盛衰,亦有 除,民所豫樂也。 建侯所以興利,行師所以除 九家易》曰: 而 應天 地、「建侯行師」、奉辭除害、民 震 天地有 爲建侯,坤 选更。 生 害。 一殺,萬 猶武 爲 利興 行 物 王 師 承 有 害

得豫説,君得安樂也

虞翻曰: 豫變通小畜。天地以順動,

坤爲

地

動

初

至三成乾,故「天地以順動」也。

故日月不過而四時不忒,

蓋 謂 虞 位正,故「四時不忒」。「通變之謂 正,故「日月不過」。 四 兑爲秋,至五坎爲 此之類。 翻 變初至 曰 : 需,离爲 「過」謂 失度。 日,坎爲月,皆得其 動初 冬,离爲夏。 忒 時震爲春,至 差 迭 事一, 四時 也

聖人以順動,則刑罰清而民服

罰 刑,至坎爲罰。 坤爲民,乾爲清。 翻 也 案 : 티 : 坤爲衆,順 帝出震,聖人也。 「清」猶 坎兑體 明 而 以 也 乾乘 民 服 正 也。 動 故 故 坤,故「民服 坎爲法律、 刑 初 刑 至 罰 四 兑 清」。 爲

豫之時義大矣哉!

翻 曰 刑罰清 順 動 圃 天地, 民服 」,故「義大」也 使日 月四 時皆不

象》曰: 雷出地奮 豫。

龍 陽氣,亦謂龍 崔憬曰: 生,陰陽相擊 奮迅豫躍之象,故曰「奮豫」。 震在坤上,故言雷出 也。 而成雷聲。雷聲之疾,有 夏至後陽氣極 地。 而一陰

先王以作樂崇德、殷薦之上帝,以配祖考。 也。 也。 物乃豫也。 祀文王於明堂以配上帝」,是也。 祀天帝以配祖考者,使與天 以武得之者作萬舞,各充其德 「王者功成作樂」,以文得之者作籥舞, 玄曰 樂則手欲鼓之,足欲舞之也。崇,充 故《孝經》云「郊祀后稷以配天,宗 殷,盛也。薦,進也。上帝,天也。 奮,動也。雷動於地上而 以者,取其喜佚動摇,猶人 同 而 響 爲制。 其功 萬

初六,鳴豫,凶

王弼曰:

履非其位,承動豫之主。若

凶也。 虞翻日 : 應震善鳴。 失位,故「鳴

《象》曰:「初六鳴豫」,志窮凶也

虞翻曰: 體《剥》「蔑貞」,故「志窮凶也」。

六二,介于石。 虞翻曰: 介,纖 也。

石,故「介于石」。 與四 爲 艮,

艮

爲

不終日,貞吉。

之,故「不終日,貞吉」。 虞翻曰: 與小畜通。 离,离爲日,得位。 欲四急復初,己得休 應在 五,終變 成

《象》曰:「不終日,貞吉」,以中正也。 六三,盱豫悔,遲有悔。《象》曰:「盱豫」 有悔」,位不當也。 變。應時則改,不待終日,故曰豫之正吉。 侯果曰: 得位居中,柔順正 可否,辯趣舍之權宜。 假如堅石,不可移 一,明豫動之

七六

之所 其 睢 盱 睢 而 盱,小人喜悦佞媚之貌也 進 豫,悔亦至焉。 退 離 悔,位不 ·當也。 遲而 不從,豫 向 秀

作「簪」,京作「摺」,荀作「宗」。 九四,由豫,大有得,勿疑,朋盍哉。「哉」,鄭

哉,舊讀作「攢」、作「宗」也 也。 括也。 聚,坤爲衆。 侯果曰: 盍,合也。坤爲盍。哉,聚會也。 五陰,坤以衆順,故「大有得」,得羣陰 得羣物依歸,朋從大合,若以簪篸之固 之以得其豫。體剛心直,志不懷疑,故 坎爲疑,故「勿疑」。 . 爲豫之主,衆陰所宗,莫不由)虞翻 衆陰並應,故「朋盍 티 : 由,自從也。 小畜兑爲朋。 坎爲 據有 哉」。

歡,故其志大行也。 崔憬曰: 以一陽而衆陰從己,合簪交《象》曰:「由豫大有得」,志大行也。

六五,貞疾,恒不死。

絶,故「貞疾,恒不死」也。坤爲死,震爲反生。位在震中,與坤體虞翻曰: 恒,常也。坎爲疾,應在坤。

中未亡也。《象》曰:「六五貞疾」,乘剛也。「恒不死」,

動,非己所乘。乘剛爲政,終亦病若。侯果曰: 六五居尊而乘於四。四以剛

上六,冥豫,成有渝,无咎。「恒不死」者,以其中也。

三失位,无應多凶。變乃得正,體艮成,虞翻曰: 應在三。坤爲冥。渝,變也。

故「成有渝,无咎」。

易傳卷第四

易傳卷第五

資州 李鼎祚 集解

唐

序卦》曰 ___ 兑 震 上 下 韓康伯曰: 隨,元亨利貞 豫 必 順 以 有 隨 動者,衆之所隨 、无咎。 也,故受之以 隨

虞翻 明徴 曰 : 凶 正 長之以善,通其嘉禮,和之以 而隨從之,故謂之隨 德,外説之以言,則天下之人咸慕其行, 得正,故「元亨利貞,无咎」。 「咎焉。 一,則功成而 也。 震,動也。 焦贛曰: 否上之初,「剛來下柔」, 有福。 兑,悦也。 漢高 若无 也。 帝與 此 既見隨從,能 四 義,幹之以 内 項 德,則有 動 籍,其 之以 鄭 初 玄

> 大亨貞,无咎, 荀爽曰: 隨者,震之歸魂。 震歸從巽,

而天下隨時, 陰升,嫌於有咎。 故「大通」。 動爻得正,故「利貞」。 動而得正,故「无咎」。 陽降

虞翻 「時行則行」,故「天下隨時」矣。 秋。三四之正,坎冬离夏。 曰 : 乾爲天, 坤爲下。 四 震 時 春,兑 位

隨 時之義大矣哉!

蜀才曰: 説 柔自初而升上,則内動 義大矣哉」。 也。得時則天下隨之矣,故曰「隨時之 ,隨」也。 此本否卦。 相 隨 而大亨无咎,得於 而外説,是「動 剛 自 上 來 居 初, 而

象》曰: 澤中有雷,隨。

七八

彖》

日

隨,

剛

來

而下柔,動

而

説

隨

下柔」。

動,震,

説, 兑也。

虞翻

曰

否乾上來之坤初

故

「剛來

而

雷藏於澤,則「天下隨時」之象也。《九家易》曰: 兑澤,震雷。八月之時,

君子以嚮晦入宴息。

初九,官有渝,貞吉。出門交有功。

也。陰陽出門,相與交通。陰往之上,得正爲震。震爲子,得土之位,故曰官《九家易》曰: 渝,變也。謂陽來居初,

〈象》曰:「官有渝」,從正「吉」也。「出門交亦不失正,故曰「貞吉」而「交有功」。

鄭玄曰: 震爲大塗,又爲日門,當春分

有功」,不失也。

四門,四門穆穆」,是其義也。 五典克從。納于百揆,百揆時序。實于人交有成功之象也。● 昔舜「慎徽五典,陰陽之所交也。是臣出君門,與四方賢

六二,係小子,失丈夫。

象,夫死大過,故每有欲嫁之義也。有大過象,故與老婦士夫同義。體咸夫」。承四隔三,故「失丈夫」。三至上夫」謂四。體大過老夫,故稱「丈夫」謂四。體大過老夫,故稱「丈」。原翻曰:應在巽。巽爲繩,故稱「係」。

六三,係丈夫,失小子。隨有求,虞翻曰: 已係於五,不兼與四也《象》曰:「係小子」,弗兼與也。

求,得,利

虞翻曰: 隨家陰隨陽。三之上无應,

居貞。

▶ 「人」,原作「方」,今據四庫本、照曠閣本改。

子。 應、利上、承四,故「利居貞」矣。 係於四 艮爲居,爲求。 ,失初小子,故「係丈夫,失小 謂求之正得位,遠

象》曰:「係丈夫」,志舍下也。

九四 何咎。 附 ? 王弼曰: 四處己上,故曰「係丈夫,失小子」也。 何可以妄,故「利居貞」也。初處已下, 无應,亦欲於己隨之,則得其求矣,故曰 隨有求,得」也。應非其正,以係於人, 「,隨有獲,貞凶。 有孚在道,以明, 故舍初係四,志在丈夫也。 雖體下卦,二已據初,將何所 四 俱

虞翻曰: 應初,得位在离,故「有孚在道,以明,何 過死象,故「貞凶」,《象》曰「其義凶」矣。 | 孚 | 謂五。 《象》曰 謂獲三也。失位相據,在大 初震爲道。三已之正,四變 「明功也」。

「隨有獲」,其義「凶」也。

虞翻日 : 死在大過,故「凶」也。

有孚在道」,明功也

明,故「明功也」。 虞翻曰:「功」謂五也。 三四之正,离爲

九五,孚于嘉,吉。

虞翻曰: 坎爲孚,陽稱嘉,位五正,故

「吉也。

《象》曰:「孚于嘉吉」,位正中也。 虞翻曰: 凡五言中正。 中正皆陽得 其

上六,拘係之,乃從維之。

正,以此爲例矣。

隨之上而無所隨,故「維之」。《象》曰 兩係稱維,故「拘係之,乃從維之」。 虞翻 曰: 「上窮」,是其義也。 應在艮。艮手爲拘,巽爲繩。

王用亨于西山。

故「亨」。兑爲西,艮爲山,故「王用亨于 否乾爲王,謂五 也。 有觀象

西山」也。●

《象》曰:「拘係之」,上窮也。

虞翻曰: 乘剛无應,故「上窮也」。

以蠱。蠱者,事也。《序卦》曰: 以喜隨人者必有事,故受之

事,以臨天下,无爲而治也。下利,莫大於聖人」。子修聖道,行父之天下治也。「備物致用,立成器以爲天《九家易》曰: 子行父事,備物致用而

■ 艮上 蠱,元亨。

虞翻 曰 : 以太古之時,无爲无事也。 五史,以書五帝之蠱事」,然爲訓者,正 蠱 柔下,乾坤交,故「元亨」也。 爲事也。 卦之惑亂也。 曰 : 蠱,惑亂也。 泰初之上,與隨旁通。 時 《尚書大傳》云「乃命 萬事從惑而 既漸 澆,物情惑亂 今言 蠱者, 〇伏曼容 起,故以 剛上

惑男,風落山」謂之蠱,是其義也。故事業因之而起惑矣,故《左傳》云「女

利涉大川。

涉大川」也。 虞翻曰: 謂二失位,動而之坎,故「利

先甲三日,後甲三日。

《子夏傳》云:「先甲三日」者,辛壬癸也。 《子夏傳》云:「先甲三日」者,不在東南,故云「後甲」。所以十日之中唯在東南,故云「後甲」。所以十日之中唯在東南,故云「後甲」。所以十日之中唯有明書,世爲十日之首,蠱爲造事之端,令而誅謂之暴,故令先後各三日,欲使令而誅謂之暴,故令先後各三日,欲使令而誅謂之暴,故令先後各三日,欲使有難初而明事始也。言所以三日者,不可姓。 「後甲三日」者,辛壬癸也。 百姓徧習,行而不犯也。

《彖》曰: 蠱,剛上而柔下,巽而止,蠱。

❶ 「王」,原脱,今據四庫本、照曠閣本補

之初,故「柔下」。 止,蠱」也 翻 日 初之上,故 上艮下巽 「剛上」。 。 故 坤 上

蠱,元亨」,而天下治也

荀爽曰: 故「天下治也」。 「元亨」也。 蠱者,巽也。 蠱者,事也。 異歸 「備物致用」, 合震,故

利涉大川」,往有事也

《九家易》曰: 位,戎事不息,故「有事」。 川」也。陽往求五,陰來求二,未得正 「有事也」。此卦泰。● 乾天有 二爻升降,出入乾 陽往據陰,陰來 坤 利 河,坤 承 陽,故 大 地

行也。 先甲三日,後甲三日」,終 則有始, 天

成离,离爲日。 三日」,賁時也。 翻 曰 : 謂 初變成乾,乾爲甲。 謂乾三爻在前,故 變三至四體離,至五成 「先甲 至二

> 爲行,故「天行」也 時 乾。 始,坤爲終,故「終則 也。 乾三爻在後,故「後甲三日」,无 易出 震 消 息 歷 有始」。 乾 坤 乾爲天,震 妄

《象》曰: 山下有風,蠱。

有似君處上而安静,臣在下而行令也 何妥曰: 山者高而静,風 者宣 而疾。

君子以振民育德。

虞翻 養,故以「育德」也。 撫坤,故「振民」。 曰:「君子」謂 泰乾也。 乾稱德,體大畜 坤爲民, 初

初六,幹父之蠱,有子考,无咎,厲,終吉。 父,坤爲事,故「幹父之蠱」。 變而得正,故「无咎,厲,終吉」也。 艮爲子,父死大過 虞翻曰:幹,正; 稱考,故「有子考」。 蠱 事 也。 初上易位,

位陽令首,父之事也。爻陰柔順,

子之質也。

《象》曰:「幹父之蠱」,意承考也。

承,故「意承」而已也。 王弼曰: 幹事之首,時有損益,不可盡

之蠱」,得中道也 九二,幹母之蠱,不可貞。《象》曰:「幹母

虞翻曰: 應在五、泰坤爲母、故「幹母 内,母之象也。 故貞而「得中道也」。 之蠱」。失位,故「不可貞」。變而得正, 案 : 位陰居

九三,幹父之蠱,小有悔,无大咎。《象 曰:「幹父之蠱」,終无咎也。

陽,父之事。 王弼曰: 悔」,終「无大咎」矣。 悔」也。履得其位,以正 以剛幹事而无其應,故「有 幹父,雖「小有 爻位俱

裕父之蠱,往見吝。

得」,是其義也 争子,則身不陷於不義」。 虞翻曰: 而失正,故「往見吝」。《象》曰「往未 「本末弱」,故「裕父之蠱」。 兑爲見,變 裕,不能争也,孔子曰「父有 四陰體大過

《象》曰:「裕父之蠱」,往未得也。 虞翻曰: 往失位、折鼎足、故「未得」。

六五,幹父之蠱,用譽。

幹事,榮譽之道也。 荀爽曰: 體和應中,承陽有實。 用斯

《象》曰:「幹父用譽」,承以德也。

虞翻曰:「譽」謂二也。二五失位,變而 德」。二,乾爻,故稱「德」矣。 得正,故「用譽」。 變二使承五,故「承以

上九,不事王侯, 虞翻 曰: 三、震爲侯。坤象不見、故「不事王侯」。 泰乾爲王,坤爲事。

應在於

高尚其事。

八三

虞翻曰: 謂五已變,巽爲高,艮陽升在

坤上,故「高尚其事」。

《象》曰:「不事王侯」,志可則也。

止,故「不事王侯」。據上臨下,重陰累荀爽曰: 年老事終,不當其位,體艮爲

實,故「志可則」。

臨者,大也。《序卦》曰: 有事而後可大,故受之以臨。

故曰「有事然後可大」也。崔憬曰: 有「蠱元亨」,則可大之業成,

Ⅲ ^{坤上} 臨,元亨利貞。

而長,乾來交坤,動則成乾,故「元亨利虞翻曰: 陽息至二,與遯旁通。剛浸

至于八月有凶。

貞」。

卦也,於周爲八月。遯弒君父,故「至于虞翻曰: 與遯旁通。臨消於遯,六月

云。 也。 戒以 也。 曰 : 而遯卦受之。 爲殷家著興衰之戒,以見周改 陽浸長矣,而 月 + 有凶 N N 臨自周二月用事, 訖其七月至八月 當文王之時 人之情盛則奢淫,奢淫則將亡,故 户, 臨,大也。 言八月,失之甚矣。 臨卦斗建丑 有四 荀公以兑爲八月 此終而復始,王命然矣。 陽氣自此浸而長。 德,齊功於乾,盛之極 紂爲无 而用事,殷之正月 道 ,故於是卦 殷正之數 於 大 周

《彖》曰: 臨,剛浸而長。

浸上,故「浸而長」也。 虞翻曰:「剛」謂二也。兑爲水澤,自下

大亨以 翻 也。 曰: 正」,謂三動成乾,天得正爲泰 四 説,兑; 陰 皆 應 之, 順, 坤 故 也。 而 剛 應」。 中

天地交通,故「亨以正,天之道也」。

「至于八月有凶」,消不久也。

通,是「至于八月有凶」,斯之謂也。月,則成否也。否則天地不交,萬物不也。自建丑之月至建申之月,凡歷八七。自建丑之月至建申之月,凡歷八一大亨利正」也。 案: 臨十二月卦蜀才曰: 此本坤卦。剛長而柔消,故

《象》曰: 澤上有地,臨。

市爽曰: 澤卑地高,高下相臨之象也。

君子以教思无窮,容保民无疆。

容,爲民,故「保民无疆」矣。也。二「寬以居之,仁以行之」。坤爲思,剛浸長,故「以教思无窮」。容,寬思,剛浸長,故「以教思无窮」。容,寬思,剛浸長,故「以教思无窮」。坤爲虞翻曰:「君子」謂二也。震爲言,兑口

長也。

初九,咸臨,貞吉。

虞翻曰: 咸,感也。得正應四,故「貞

《象》曰:「咸臨貞吉」,志行正也。

九二、咸臨、吉、无不利。

初「元吉」,故「无不利」。

虞翻曰: 得中多譽,兼有四陰。體復力二 帰盟 言 ラス和

曰"「甘臨」,位不當也。「既憂之」,咎不六三,甘臨,无攸利。既憂之,无咎。《象》相承,故「无不利」也。陽當居五,陰當相承,故「无不利」也。陽當居五,陰當有爽曰:「咸臨,吉,无不利」,未順命也。

六四,至臨,无咎。
之」。動而成泰,故「咎不可長也」。
陽,故「无攸利」。言三失位无應,故「憂悟甘,兑口銜坤,故曰「甘臨」。失位乘虞翻曰: 兑爲口,坤爲土。土爰稼穑

八六

虞翻曰: 至,下也。謂下至初應,當位

有實,故「无咎」。

《象》曰:「至臨无咎」,位當也。

得承順之,故曰「至臨」也。陽雖未乘,荀爽曰:「四與二同功」,欲升二至五,己

處位居正,故得「无咎」,是「位當」也。

之宜」,行中之謂也。
六五、知臨、大君之宜、吉。《象》曰:「大君

中,故「行中之謂也」。 宜」也。二者處中,行升居五。五亦處宜升上居五位,吉,故曰「知臨,大君之有残曰。 五者,帝位。「大君」謂二也。

上六,敦臨,吉,无咎。

應於陽,敦厚之意,故曰「敦臨,吉,无荀爽曰: 上應於三,欲因三升二。過

《九家易》曰: 志在升二也。陰以陽爲《象》曰:「敦臨」之「吉」,志在内也。

序卦》曰: 物大然後可觀也,

主,故「志在内也」。

以觀。《序卦》曰: 物大然後可觀也,故受之

故「受之以觀」也。 崔憬曰: 言德業大者可以觀政於人,

■ 巽上 觀,盤而不薦,有孚顒若■ 坤下 觀,盤而不薦,有孚顒若

風。 鄭玄曰: 時,及神降薦牲,其禮簡略,不足觀也。 觀,故「觀,盤 觀者,莫盛乎盥也。 闕者,天子宗廟之象也。 鬼門、又爲宫闕。 祭祀。祭祀之盛 盥者,進爵灌地以降神也。 王道之可觀者,莫盛乎宗廟。 國之大事,唯祀與戎」,王道可 九五,天子之爻。 坤爲地、爲衆。巽爲木、爲 而 不薦」也。 地上有木而爲鬼門宫 ,莫過初盤降 至薦 互體有 簡略,不足復 〇王弼 〇馬 此是祭祀盛 宗廟之可 艮 觀,在於 神,故孔 融 , 艮 曰: 曰 : 爲

子曰 下觀上,見其至盛之禮 有孚顒若」。 「禘自 此言及薦 既 灌 孚,信; 簡 而 略, 往 則不足 ,萬民信敬,故云 者,吾不欲 顒,敬也 觀 也 觀 之 以

實受其福」,是其義 案: 也。 德,至誠感 二,故「 斯即「東鄰殺牛,不如西鄰之禴祭, 鬼神害盈,禍淫福 觀盤而不 神,則「黍稷 也。 觀薦」,饗其 善。若人君脩 非馨,明德惟 誠 信者

彖》曰: 大觀在上。

上也。 蜀才曰: 長,剛大在 上,其德可觀,故曰 此本乾 卦。 「大觀在 小沙浸

順 而巽,中正以觀天下。

者,大也」,在觀 虞翻曰: 也。「中正」謂 ,咸服其化,賓於王庭。 謂陽息 Ŧį. 上,故稱 臨二,「直 五以 「大觀 天神道觀示 方大」。 順,坤 「臨 天

> 觀盤 而 不薦有孚顒若」,下觀 而 化 也。

矣」。 薦」, 若,順也。坎爲水,坤爲 孚,信,謂五。 中,故「有孚顒若,下觀 則下觀其德而順其化。上之三,五在坎 坎水,沃之盥之象也。 民,故稱「 顒顒卬卬,如: 翻 孔子曰「禘自既灌,吾不欲 巽爲進退。 曰 : 觀」。 觀, 珪如璋」,君德之義也。 反 盤,沃盤; 顒 臨 容止可觀,進退可度, 顒,君 也 而化」。《詩》曰 故「觀 器。 以 德 五. 薦,羞牲也。 有 陽觀 艮手臨 威 盤 容 觀之 而 示 坤 坤

觀天之神道,而四 同時不太。

虞翻 月象正,故「四 震兑爲春秋。 曰 : 忒,差也。「神 時不忒」。 三上易位,坎冬离夏,日 道 謂 五. 臨

聖人神道設教,而天下服矣。今本「聖人」下有 以一字。

虞翻曰 :「聖人」謂乾。 退藏於密而 齊於

八八

異、以神明其德教、故「聖人設教」、坤民

順從「而天下服矣」。

民設教。《象》曰: 風行地上,觀。先王以省方,觀

初六、童觀、小人无咎、君子吝。

位賤,以小人承君子,故「无咎」。陽伏虞翻曰: 艮爲童,陰小人,陽君子。初

陰下,故「君子吝」矣。

見,故曰「童觀」。處大觀之時而童觀,王弼曰: 失位處下,最遠朝美,无所鑒《象》曰:「初六童觀」,「小人」道也。

子爲之,鄙吝之道。 趣順而已。小人爲之,无可咎責, 君

六二, 闚觀, 利女貞。

觀「女貞」,利不淫視也。爲宫室,坤爲闔户。小人而應五,故「闚反成巽,巽四五得正,故「利女貞」。艮虞翻曰: 臨兑爲女,竊觀稱闚。兑女

《象》曰:「闚觀」「女貞」,亦可醜也。

艮爲門。闕女目近門,闚觀之象也。二离爻,离爲目,又爲中女。外互體艮,觀,女正則利,君子則醜也。 案: 六朝美,不能大觀。處大觀之時而爲闚侯果曰: 得位居中,上應於五。闚觀

六三,觀我生,進退。

象》曰:「觀我生進退」,未失道也。震進之五得正,居中,故《象》曰「未失道」。民也。巽爲進退,故「觀我生進退」。臨民都曰: 坤爲我,臨震爲生。生謂坤生

三欲進 荀 「未失道也」。 爽 曰:「我」謂 觀 於五,四既在前,而三故退, 五也。 生者, 教化生也。

六四,觀國之光,利用賓于王。 虞翻 來王」,是其義也。 爲臣。四在王庭,賓事於五,故「利用賓 光」。「王」謂五陽。 于王」矣。《詩》曰「莫敢不來賓,莫敢不 明」。反上成觀,進 曰 : 坤爲國。 顯天位,故「觀國之 陽尊賓坤,坤爲用, 臨陽至二,「天下文

象》曰:「觀國之光」,尚賓也。

賓」也。 崔憬曰: 搜揚國俊,賓薦王庭,故以進賢爲「尚 得位比尊,承於王者。 職 在

九五、觀我生、君子无咎。

民,故不言民。陽爲君子,在臨 生民。震生象反,坤 我,身也,謂「我生」。 · 爲死 喪。 二失位, 嫌非生 「生」謂

之五得道處中,故「君子无咎」矣。

象》曰:「觀我生」,觀民也。

也。坤體成,故「觀民也」。 當觀民也。○虞翻曰: 下,猶風之靡草。「百姓有 觀之主,當宣文化,光于四表。上之化 人」。君子風著,己乃无咎。欲察己道, 王弼曰:「觀我生」,自觀其道也。 坤 過,在予一 爲民,謂三 爲衆

上九,觀其生,君子无咎。

生」。「君子」謂三。之三得正,故「无 虞翻曰: 應在三。三體臨震,故「觀其

《象》曰:「觀其生」,志未平也。

見,乃得「无咎」。「生」猶動出也。○虞 地,其志未爲平易,不可不慎,故君子德 上極,天下所觀者也。處天下所 王弼曰:「觀其生」,爲人所觀 坎爲志,爲平。上來之三,故 也。 觀 之 處

志未平」矣。

噬 《序卦》 嗑 \Box 嗑 曰 者,合也 言可觀政於人則 可 觀 而 有 所 合,故受之以 有 所 合於 刑

离 震上下 噬 嗑,亨,利 用獄

E I

可觀

而

有所合」。

獄」也。 獄。 明。 四 柔交,故「亨」也。 用 成 翻 四 也。 也。 四以 豐,「折 四 티 : 在 不正而 四 頤 否 互坎 案:「頤 獄 中, 五之坤初,坤初之五。 致 體,坎 齧 係於獄,上當之三,蔽 刑」,故「利 坎爲獄, 艮爲手, 离 中 丽 有物日 後 爲 亨,故 法 律,又 用 噬 獄」。 「利 嗑」,謂 爲 用 刑 爲 剛 坤

彖》曰 頤 中 有 物 曰 噬 嗑

虞翻 无物 日 則口 不噬,故先舉「 調 四 則所 噬 頤 乾 中 脯 有 也 物 曰 頤

> 噬 嗑 也

噬 嗑 而「亨」。

崔 而 有亂羣者,當用刑去之,故言「利用獄」。 合 憬 1, 乃得 曰 : 其 物 、亨焉。 在 頤 中, 以 隔 喻 人 其上下。 於 上下 ·之間 大 製

剛 柔 分,動而 明,雷電合而章

盧氏 分則雷動於下,電照於 初,坤之初六分升乾五 曰 「雷電合而成章」也 目 此 本否卦。 乾之九五分降坤 , 是 上,合成天威,故 剛 柔 分也。

柔得 枉 中而上行」。 侯果曰: 直 中而 ,不失情理,故「利用獄」。 上行,雖不當位,「利用 坤之初六上升乾 雖則失位 文明以 五 獄也 是「柔 中 得 制

雷電 · 噬嗑

宋衷 而 其道 而 日 不明,恐致淫 章 也。 雷 動 用 而威,電 刑之道 濫; 明 動 而 而 明 明, 无威,不能 相 二者合 兼。 若

伏物,故須雷電並合而噬嗑備。

先王以 明罰 勃法

心也。 之、「明罰勑法」,以示萬物、欲萬 雷電震 侯 果 月 : 照則萬物 雷所以動物,電所以照物。 不能懷邪 故先 方一 王則

初九,屨校滅趾,无咎。

戮,故曰「无咎」矣。 得位於初,顧震知懼,小徵大戒,以免刑 之性,以震掩巽,强暴之男也。行侵陵 屨校,貫械也。 虞翻曰: 之罪,以陷屨校之刑 正,故「无咎」。〇干寶曰: 校。震没坎下,故「屨校滅趾」。 屨,貫趾足也。 初居剛躁之家,體貪狼 ,故曰「屨校滅趾」。 震爲足,坎爲 趾,足也。 初位得

象》曰:「屨校滅趾」,不行也。

其亡」。今五變滅初,故坤殺不行也。 虞翻曰: 否坤小人。 以陰消陽,「其亡

> 〇干寶曰: 不敢遂行强 也

六二,噬膚滅鼻,无咎。

乘剛又得正多譽,故无咎。 没水坎中,隱藏不見,故「噬膚滅鼻」。 虞翻曰: 噬,食也。艮爲膚,爲鼻。

象》曰:「噬膚滅鼻」,乘剛也。

鼻」也。 鼻,而「无咎」矣。 也。 體艮,艮爲鼻,又爲黔喙,噬膚滅鼻之象 侯果曰: 乘剛,噬必深。 刑刻雖峻,得所疾也。 居中履正,用刑者也。二互 噬過: 其分,故「滅 雖則滅

六三,噬昔肉,遇毒。 小吝,无咎。 與上易位,「利用獄」成豐,故「无咎」也。 熯之爲「昔」,坎爲毒,故「噬昔肉遇毒」。 虞翻曰: 「毒」謂矢毒也。失位承 三在膚裏,故 四、故「小吝」。 稱「肉」。 离 日

荀爽曰:「昔肉」謂四也。 三以不正噬取 象》曰:「遇毒」,位不當也。

止 一,所欲 家、法當 不得,故「小吝」也。 遇 罪,故 日 遇毒 所 欲 爲 艮 不 得 所

則免於罪,故「无咎」矣。

九 四 , 噬乾胏, 得金矢。 利艱貞, 吉。《象 「利艱貞吉」,未光也。

吉,未爲光大也 有骨之乾肺也。 陸 噬胏雖復艱難,終得信其剛直。 又爲兵矢。 |績日: 肉有骨謂之肺。 失位用刑,物亦 金矢者,取其 不 离爲乾肉 剛 服,若噬 雖獲正 道也。

六五,噬乾肉,得黄金,貞厲,无咎。

正 金 虞翻曰: 剛也。 王 肉」也。 一弼 曰: 厲,危也。 以陰處 陰稱肉。 乾金黄,故「得黄金」。 乾 變而得正,故「无咎」。 肉,堅也。 陽 ,以柔承 位當离,日中烈,故 黄,中 剛,以噬於 也。

> 中而 不正而刑戮得當,故雖「厲」而「无咎」也。 正 而 勝、故曰 能 行 其戮 「噬乾肉,得黄 河剛 勝者 也 金也。 噬 雖不 服,得 己雖

《象》曰 :「貞厲无咎」,得當也

明上,不失其中,所言得當。 荀爽曰: 陰厲陽,正 居 謂陰來正居是而厲陽也。 其 處 而「无咎」者, 以從下

上九,何校滅耳,凶

象也。 坎爲 家。 故宜「凶」矣。 荀爽曰: 五應三,欲盡滅坎。三體坎爲 滅耳凶」。 「惡積而不可弇,罪大而不可解」, 耳。 木在耳上,「何校滅耳」之 上以不正侵欲无已,奪取異 爲五所何,故曰「何校」。 ○鄭玄曰: 耳,故 爲槁木, 日

象》曰:「何校滅耳」,聰不明也。

《九家易》曰: 既不正,今欲滅之,故曰「聰不明」也。 當據离坎以爲聰明。 坎

得尊位而居於中,能行其戮者也

物,物亦不服,故

曰「噬乾肉」也。

然處

履

不

"「賁亨」,柔來而文剛,故「亨」。 分

从重。重广,而见。 《序卦》曰: 物不可以苟合而已,故受之

以賁。賁者,飾也。

文飾之,故「受之以賁」。 崔憬曰: 言物不可苟合於刑,當須以

柔來文剛,陰陽交,故「亨」也。 虞翻曰: 泰上之乾二,乾二之坤上。

小利有攸往。

玄曰: 虞翻 离。 坎艮,艮止於上,坎險於下,夾震在中, 柔仁義之道飾成其德也。 天地二文,相飾成賁者也。 艮爲石,地文也。 天文在 不利大行,小有所之則可矣。 ,然後嘉會禮通,故「亨」也。 以剛文柔,故「小利有攸往」。 曰:「小」謂五。 賁,文飾也。 五失正 离爲 下,地文在上, 剛柔雜,仁義 猶人君以 日,天文也。 動 卦互體 得位 剛 鄭 體

剛上而文柔,故「小利有攸往」。

兼據二陰,故「小利有攸往」矣。也。分乾之二,居坤之上。上飾柔道,乾之中。文飾剛道,交於中和,故「亨」乾爽曰: 此本泰卦。謂陰從上來,居

天文也;

之文也。 离爲文明,日月星辰高麗於上,故稱天艮爲星,离日,坎月,巽爲高。五天位,虞翻曰: 謂五。利變之正,成巽體离。

文明以止,人文也。

二五分則止文三,故以三爲人文也。离, 止,艮也。震動离明,五變據四。虞翻曰:「人」謂三。乾爲人。文明,

觀乎天文,以察時變;

月星辰進退盈縮謂朓側朏也。歷象在春,兑秋,賁坎冬,离夏。巽爲進退。日虞翻曰: 日月星辰爲天文也。泰震

九四

天 成變,故「以察時變」矣。

觀 乎人文,以化成天下。

也。 聖人之化,成乎文章。 虞 通,觀文明而化成天下。 离 翻 象「重明麗正」、故「以 曰 〇干寶曰: 泰乾爲人,五上 四時之變,縣 觀 日月而要其會 化 動 成天下」 體 乎日 既 月。 濟

象》曰:

之象也 形,已如彫 之爲體,層 王廙曰: 山下有火,賁。 山 峰 飾,復加火照,彌見文章, 下有火,文相 峻嶺,峭 嶮參 照 差,直置其 也。 夫山

君子以明庶政,无敢折獄

虞翻 政,故「明庶 ,故「无敢折獄」。 曰:「君子」謂乾。 政 」。坎爲獄,三在 噬嗑四 离 爲 不正,故「利 明, 坤爲庶 口獄,得

初 九 ,實其趾

獄」也

趾 虞 也 翻 曰 應在 震, 震 爲 足,

:

故「

賁

其

舍車而徒。

徒,步行也。 翻 曰 : 應 位在 在 艮, 艮 下,故「舍車而徒」。 爲 舍,坎爲車。

象》曰:「舍車而徒」,義弗乘也。

初也。 崔憬 也。 舍其車,又飾其趾,是徒步也。 初全其義,故曰 夫所乘,謂二也。 近四,棄於二比,故曰「舍車」。 티 : 自飾其行,故曰「賁其趾」。 〇王肅 剛柔 曰 : 相交以 「而徒」。 四乘於剛,艮止其應, 在下,故稱 成飾 徒,塵賤之事 義 我者也。 車,士大 趾 「趾」謂

興也。 六二,實其須。《象》曰:「實其須」,與上

在 侯果曰: 頤下,須之象也。 若能上承於三,與之同德,雖俱无 自三至上,有 上无其應,三亦 頤 之象 也。二 无

坎爲盜,故「疑」。當位乘三,悖禮

應初遠陽,故曰「當位疑也」。

應,可相與而興起也。

之「吉」,終莫之陵也。 九三,賁如濡如,永貞吉。《象》曰:「永貞」

也。體剛履正,故「永貞吉」。與二同如」也。有坎之水以自潤,故曰「濡如」盧氏曰: 有离之文以自飾,故曰「賁

德,故「終莫之陵」也。

六四,賁如皤如,白馬翰如,匪寇婚媾。 象》曰:「六四」,當位疑也。 如。 陸績曰: 其馬,翰如以 懼三之難,故或飾或素,内懷疑懼。 感,不獲交通。 王弼曰: 匪緣寇隔 案 : ,乃爲婚媾,則「終无尤」也。○ 震爲馬,爲白,故曰「白馬翰 有應在初,三爲寇難,二志相 待。 皤亦白素之貌也。 欲静則失初之應,欲進則 雖履正位,未果其志。 鮮絜

「匪寇婚媾」,終无尤也。

也」。 崔憬曰: 以其守正待應,故「終无尤

六五,賁于丘園,束帛戔戔,吝。 終吉。 象》曰:「六五」之「吉」,有喜也。 戔」。 也。 道之君也。故曰「實于丘園,東帛戔 林之間,實飾丘陵,以爲園圃,隱士之象 皆陽爻。「東帛戔戔」,委積之貌。 荀爽曰: 艮山、震林,失其正位。 在 无應,故「吝」。變而得正,故「終吉」矣。 故「東帛」。以艮斷巽,故「戔戔」。 正 虞翻曰: 上成功,故「終吉」而「有喜」也。○虞翻 木果曰園,故「賁于丘 ,動之成巽。巽爲帛,爲繩。艮手持, 五爲王位,體中履和,勤賢之主,尊 君臣失正,故「吝」。能以中和,飾 五變之陽,故「有喜」。凡言喜慶, 艮爲山,五半山,故稱「丘」。 園」也。六五失 。失位

案: 六五离爻,离爲中女,午爲蠶絲,

束帛之象。

上九,白賁,无咎。

虞翻曰: 在巽上,故曰「白賁」。乘五

陰,變而得位,故「无咎」矣。

(象》曰:「白賁无咎」,上得志也。

士之言,以飾其政,故「上得志也」。○干寶曰: 白,素也。延山林之人,采素

虞翻曰: 上之正得位、體成既濟、故曰

「得志」。坎爲志也。

《序卦》曰: 致飾然後通則盡矣,故受之

以剥。剥者,剥也。

「致飾然後通」也。文者致理,極而无救崔憬曰: 以文致飾則上下情通,故曰

則盡矣。盡猶剥也。

■ 艮上 剥,不利有攸往。

虞翻曰: 陰消乾也,與夬旁通。以「柔

君」,故「不利有攸往」也。 變剛」,「小人道長」,「子弑其父,臣弑其

《彖》曰:「剥」,剥也。

盧氏曰: 此本乾卦。羣陰剥陽,故曰

爲「剥」也。●

柔變剛也。

荀爽曰: 謂陰外變五。五者至尊,

陰所變,故曰「剥」也。

「不利有攸往」,小人長也。

順而止之,觀象也。

「觀象也」。 虞翻曰: 坤順艮止,謂五消觀成剥,故

❶ 「曰」,照曠閣本作「名」。

君子尚消息盈虚,天行也。

之耳。 之耳。 之耳。 之耳。 之, 一章, 一章, 也, 。《 易》 虧巽消则, 出入無疾, 反復其道」。《 易》 虧巽消 人, 也, 。 。 。 。 。 。 。 乾息爲盈, 坤消 之耳。

《象》曰: 山附於地,剥。

安其居。
君當厚錫於下,賢當卑降於愚,然後得於地,今附地者,明被剥矣,●屬地時也。虞翻曰: 上,君也。宅,居也。山高絶

初六、剥牀以足、蔑貞凶。

蔑,无; 貞,正也。失位无應,故「蔑貞木爲牀,復震在下爲足,故「剥牀以足」。虞翻曰: 此卦坤變乾也。動初成巽,巽,是, 尋別し人 房具以

以为:「尚木以足」、以或下也。凶」。 震在陰下、《象》曰「以滅下也」。

及於上,則君政崩滅,故曰「以滅下也」。以安人。在下,故稱足。先從下剥,漸盧氏曰: 蔑,滅也。坤所以載物,牀所《象》曰:「剥牀以足」,以滅下也。

六二,剥牀以辨,蔑貞凶。

應在剥,故「蔑貞凶」也。 艮爲指,二在指間,故「剥牀以辨」。 无虞翻曰: 指間稱辨。剥,剥二成艮。

《象》曰:「剥牀以辨」,未有與也。

六三,剥之无咎。❷《象》曰:「剥之无咎」,方三,剥之无咎。❷《象》曰:「剥之无咎」,有舆」也。○崔憬曰: 今以床言之,則辨當也。○崔憬曰: 今以床言之,則辨當也。○崔憬曰: 今以床言之,則辨當如,后 是上稱辨。謂近膝之下,詘鄭玄曰: 足上稱辨。謂近膝之下,詘

)「被」,原作「波」,今據四庫本、照曠閣本改。

^{2 「}之」,原脱,今據四庫本、照曠閣本補。

失 下 也

意,是以「无咎」、《象》曰「失上下也」。 荀爽曰: 衆皆剥陽,三獨應上,无剥 害

,剥牀以膚,凶

牀 人也。 陽,至四乾毀,故「剥 及人身,爲敗滋深,害莫甚焉,故 在 君,子弑父」,故「凶」矣。 虞翻曰: 以膚凶」也 下而安人者, 牀也。在上而 坤以象牀,艮以 辨上稱 膚。 牀以膚」。 象人。 艮爲 膚。 牀 王 處牀者, 肅 剥盡以 以 曰 臣弑 陰 日 一剥 變

象》曰:「剥牀以膚」,切近災也。

崔憬曰:

牀之膚謂薦席,若獸

之有皮

毛也。 牀以剥盡,次及其膚,剥 以大臣

之象,言近身與君也。

六五,貫魚,以宫人寵,无不利。

艮手持繩 翻 曰 : 貫巽,故「貫魚」也。 剥 消觀 五。 巽爲魚, 艮爲宫

> 利」矣。 也。 陰之主,能有貫魚之次第,故得「无不 此則貴賤有章、寵御有序。 者,后夫人嬪妾。 剥之爲卦,下比五陰,駢頭相次,似貫 成觀,故「无不利」也。 人,陰得麗之,故「以 人謂 魚爲陰物,以喻衆陰也。 乾 五。 以 各有次序,不相瀆亂。 陰 宮人 代 陽, 。六五既爲衆 寵 何妥曰: Ŧī. 貫 夫「宮人」 動 乾 得 爲 魚 夫 寵

《象》曰:「以宫人寵」,終无尤也

焉。 崔憬曰: 小大雖殊,寵御則一,故「終无尤也」。 魚大小一貫,若后 魚與宮人皆陰類,以比 夫人嬪婦御女 小人

上九,碩果不食,君子德車,小人剥 以 頤 虞 君子,爲德。 德爲車,小人謂坤,艮爲廬。 翻曰: 頤中无物,故「不食」也。 夬乾爲 艮爲碩 坤爲車,爲民。乾在坤,故 果。 謂三已復位,有 廬

艮,坤陰迷亂,故「小人剥廬」也。

廬」,終不可用也。《象》曰:「君子德車」,民所載也。「小人剥

「剥廬,終不可用」矣。 此,萬姓賴安,若得乘其車輿也。小人此,萬姓賴安,若得乘其車輿也。小人此,萬姓賴安,若得乘其車輿也。小人此,萬姓賴安,若得乘其車輿也。小人成果至碩大,不被剥食矣。君子居以,有剛直之德,羣小人不能傷害侯果曰: 艮爲果,爲廬。坤爲輿。處

易傳卷第五

易傳卷第六

資州 李鼎祚集解

唐

《序卦》曰:

物 不

可

以終盡剥,

窮上反下

日

故受之以復也。

復也。 初,故剥之爲 上憬 曰: 夫易 (道,不可終盡,而受之於 窮 則 有 變,物 極 則 反於

一 坤 震 上 下 復,亨。

至於幾 復反 何妥曰: 而得交通,故云「復亨」也。 盡 ,一陽來下,故稱 復者,歸本之名。 反復。 羣陰 到陽,

出入无疾 ,朋來无咎。

翻 日 十二消息不見坎象,故「出 出震成乾,入巽成 坤。 坎

> 反復其道,七日來復, 陽正 息 而 成兑,故「朋來无咎」矣。

疾」。

兑爲朋。

在内稱

來,五陰從初

初

者也 案 : 於日月,後學尋討,猶未測其端倪。● 舉約文,略陳梗概,以候來悊, 道玄邈,理絶希慕,先儒已論。 六日,復來成震,一陽爻生爲七日,故言 坤卦將盡則復陽來隔,坤之一卦六爻爲 盡於九月之終。 四分日之一,以通閏餘者也。 六十爻,爻主一日,當周天之數,餘五 卦别六爻,爻生一氣。其餘六十卦三百 日四分日之一,以坎震离兑四方正卦 「反復其道,七日來復」,是其義 《易軌》一歲十二月,三百六十五 至十月末,純坤用 剥卦陽氣 如 也。 雖各指 積 天

測 原誤作「側」, 今據四庫本、照曠閣本改。

利有攸往。

道長,故「利有攸往」矣。 虞翻曰: 陽息臨成乾,小人道消,君子

《彖》曰:「復亨」,

虞翻曰: 陽息坤,與姤旁通。剛反交

初,故「亨」。

剛反動而以順行,

明「不遠之復」,入坤出震義也。不從上來反初,故不言剛自外來,是以「反動」。坤順震行,故「而以順行」。陽虞翻曰: 剛從艮入,坤從反震,故曰

是以「出入无疾,朋來无咎」。

人,小人道消也。動而以行,故「出入无侯果曰: 陽上出,君子道長也。陰下

疾,朋來无咎」矣。

「反復其道,七日來復」,天行也。

陽爲道,故「復其道」。剛爲書,日消乾虞翻曰:謂乾成坤,反出於震而來復。

明矣。 也。 日」,周之二月也。 烈。」「一之日」,周之正月也。 「二之 七月,故曰「七日來復」。 天行也」。 六爻爲六日,剛 陽復而陰升也。十一月天行至子,陰復 而陽升也。 《豳詩》曰:「一之日觱發,二之日栗 ○侯果曰: 天地運往,陰陽升復,凡歷 來反 則古人呼月爲日 初,故「七日來復, 五月天行 此天之運行 至午,

利有攸往」,剛長也。

荀爽曰: 利往居五,剛道浸長也。

復,其見天地之心乎!

象》曰: 雷在地中,復。先王以至日閉所始,吉凶之先,故曰「見天地之心」矣。「見天地之心」也。○荀爽曰: 復者,見,坎爲心。陽息臨成泰,乾天坤地,故 農翻曰: 坤爲復。謂三復位時离爲

__

關,商旅不行,后不省方。

三倍。 始。 耳。 日。 虞翻 言「后」也。 者,爲君之業也。 《姤•象》曰「后以施命誥四方」,今隱 成致君道也。 公侯,不省四方之事。 更言后。后,君也。 下,故「后不省方」。 天地之始,陰陽之首,已言先王,又 坤闔爲閉 〇宋衷曰: 曰:「先王」 姤巽 伏 制之者,王者之事。 關 謂乾 初, ,巽爲商 故上言「先王」,而下 商旅不行,自天子至 六十四卦,唯此 復爲陽始,姤 故 初。 將以 一商 旅,爲 至 旅 輔遂陽體, 日,冬至之 不 近 奉之 行」。 則 利 重 陰 復 市

崔憬曰:從坤反震而變此爻,「不遠初九,不遠復,无祇悔,元吉。

從道也。

六四,中行獨復。《象》曰:「中行獨復」,以

侯果曰: 祇,大也。往被陰剥,所以有《象》曰:「不遠」之「復」,以脩身也。

復」也。復而有應,故獲「元吉」也。

顔子之分矣。 悔。覺非遠復,故无大咎。以此脩身,

以下仁也。 《象》曰:「休復」之「吉」,六二,休復,吉。《象》曰:「休復」之「吉」,

復之休也。 既處中位,親仁善鄰,之,下仁之謂也。 既處中位,親仁善鄰,王弼曰: 得位居中,比初之上而附順

六三,頻復,厲,无咎。

厲」。動而之正,故「无咎」也。 虞翻曰: 頻,蹙也。三失位,故「頻復,

危,頻蹙而復,履危反道,義亦无咎也。侯果曰: 處震之極,以陰居陽,懼其將《象》曰:「頻復」之「厲」,義「无咎」也。

復,以從道也」。俗説以四位在五陰之故稱「獨」。四得正應初,故曰「中行獨虞翻曰:「中」謂初,震爲行。初一陽爻,

中 象,不在二五,何得稱「中行」耳? 而 獨應復,非 也。 四在外體,又非 内

六五 中以自考也 ,敦復,无悔。《象》曰:「敦復无悔」,

柔 侯果曰: 居剛,无應失位 ,動不失中,故曰「无悔」矣。 坤爲厚載,故曰「敦復」。 一所以 有悔。 能 自 考

上六,迷復,凶,有災眚。

五變正時,坎爲災眚,故「有災眚」也。 虞翻曰: 坤冥爲迷。 高而无應,故

用 師」。 行師,終有大敗,以其國君凶。 敗 於初,陽息上升,必消羣陰,故「終有 坤爲衆,故「用行師」也。 謂上行 爲異邦,故「國君 虞翻曰: 終有大敗」。 陰逆不順,坤爲死喪,坎 或 .君」謂初也。受命復道,當從 三復位時而體 姤乾爲君,滅藏 凶」矣。 師象,故「用 〇荀 流 於坤,坤 爽 師 血,故 而 日 大 行 距

> 或 下升。今上六行師,王誅必加,故「以其 君凶」也。

至于十年不克征

民 ? 之象也。 道, 爲師象,故曰「行師」。 失道已遠。 喪君而无征 故「不克征」。 虞翻曰: 須進善納諫。 以此行師,必敗績矣。 坤爲先迷,故 坤爲至,爲十年。 雖復十年乃征,无所克矣。 也。 謂五變設險,故 迷而不復,安可牧 何妥曰: 曰「迷復」。 坤數十,「十年」 敗乃思復, 陰逆坎臨 帥 理國之 師敗

象》曰:「迷復」之「凶」,反 虞翻 君凶」,故曰「反君道也」。 曰 : **姤乾爲君**,坤陰滅之。 君 道 也。 以

序卦》曰 崔憬曰: 復則不妄矣,故受之以无妄。 物復其本則爲成實,故言復

解

則无妄矣。

一

東

下

天

安

・

齊,不敢虚妄也。 何妥曰: 乾上震下,天威下行,物皆絜

元亨,利貞。

非大壯則遯來也。剛來交初, 虞翻曰: 「元亨」。三四失位,故「利貞」也。 遯上之初,此所謂四陽二陰, 體乾,故

其匪正有眚,不利有攸往

右,故「不利有攸往」矣。 虞翻曰:「非正」謂上也。四已之正,上 動成坎,故「有眚」。變而逆乘,天命不

彖》曰: 蜀才曰: 爲主於初,故「動而健,剛中而應」也。 大亨,乃天道恒命也。 於是乎邪妄之道消,大通以正矣。无妄 无妄,剛自外來而爲主於内, 此本遯卦。案: 剛自上降,

動 而健,剛中而應。大「亨」以正,天之命

> 也。 變四承五。乾爲天,巽爲命,故曰「大亨 乾。「剛中」謂五而應二。「大亨以正」, 虞翻曰: 「其匪正有眚,不利有攸往」。 動,震也。 「健」、「大亨」謂

无妄之往,何之矣。

以正,天之命也」。

泣血漣如,故「何之矣」。 虞翻曰: 謂四已變,上動體屯。

天命不右,行矣哉!

巽命,故「天命不右,行矣哉」,言不可行 也。 虞翻曰: 也。馬君云「天命不右行」,非矣。 四已變成坤,天道助順,上動逆乘 天,五也。巽爲命。右, 助

《象》曰: 天下雷行,物與无妄。 《九家易》曰: 曰:「與」謂舉。妄,亡也。謂「雷以動 无有災妄,故曰「物與无妄」也。○虞翻 物不與,故曰「物與」也。物受之以生, 天下雷行,陽氣普徧,無

物皆死,將何畜聚,以此疑也。 遠矣。有无妄然後可畜,不死明矣。若矣,故受之以无妄」,而京氏及俗儒以爲矣,故受之以无妄」,而京氏及俗儒以爲故曰「物與无妄」。《序卦》曰「復則不妄之」,震爲反生,萬物出震,「无妄」者也,

先王以茂對時育萬物。

則利之以嘉遯、是對時而化育也。 對時而育矣。時泰則威之以无妄、時否 聲滑,无物不與,故先王以茂養萬物,乃 時育萬物」。言物皆死、違此甚矣。○ 對時。體頤養象,萬物出震,故「以茂對 對時。體頤養象,萬物出震,故「以茂對 真翻曰:「先王」謂乾。乾盈爲茂、艮爲

初九,无妄,往吉。

吉」。在外稱「往」也。 之正。四變得位、承五、應初,故「往虞翻曰: 謂應四也。四失位,故命變

《象》曰:「无妄」之「往」,得志也。

得志」矣。 虞翻曰: 四變應初,夫妻體正,故「往

利,故「利有攸往」。往應五也。 應五,利四變之益則坤體成,有耒耨之 「穫」。田在初,一歲曰菑。在二,二歲 震爲禾稼,艮爲手。禾在手中,故稱 震爲禾稼,艮爲手。禾在手中,故稱 人二,不耕穫,不菑畬,則利有攸往。

《象》曰:「不耕穫」,未富也。

災」也。 《象》曰: 行人得牛,「邑人人之災。《象》曰: 行人得牛,「邑人六三,无妄之災,或繫之牛。行人之得,邑,三,无妄之災,或繫之牛。行人之得,邑虞翻曰: 四動坤虚,故「未富也」。

繩。繫牛鼻而止桑下,故「或繫之牛」之正,坤爲牛,艮爲鼻、爲止,巽爲桑、爲虞翻曰: 上動體坎,故稱「災」。四動

也。 乾爲 行人,坤爲邑人,乾四

行人之得」。 三係於四,故「邑人之

災」。 喪,故曰「行人得牛,邑人災也」。 或説以四變則牛應初,震坤爲死

九四,可貞,无咎。

虞翻曰: 動則正,故「可貞」。 承五 應

初,故「无咎」也。

《象》曰:「可貞无咎」,固有之也。

虞翻曰: 動陰承陽,故「固有之也」。

九五,无妄之疾,勿藥有喜。

虞翻曰: 疾,故曰「无妄之疾」也。巽爲木,艮 四已之正,上動體坎,坎爲 爲

石,故稱「藥」。 坎爲多眚,藥不可試,故 「勿藥有喜」。「康子饋藥,丘未達,故不

嘗」,此之謂也。

象》曰:「无妄」之「藥」,不可試 也

姓有過,在予一人」,三四妄處,五乃憂 侯果曰: 位正居尊,爲无妄貴主。「百

> 疾,非 不治自愈,故曰「勿藥有喜」也。 乖攝則藥 不可試,若下皆 不 妄 則

上九,无妄,行有眚,无攸利。

剛逆命,故「无攸利」。「天命不右,行矣 虞翻曰: 動而成坎,故「行有眚」。

哉。

象》曰:「无妄」之「行」,窮之災也。 崔憬曰: 「災」也。 而應三,上下非正,窮而反妄,故爲 居无妄之中,有妄者也。 妄

《序卦》曰: 有无妄然後可畜,故受之以

崔憬曰: 言「有无妄然後可畜」也 有 誠實則 可以 中心藏之,故

—— 艮 乾 上 下 大畜,利貞。

虞翻 與萃旁通。 大壯 二五失位,故「利貞」。 初之上,其德剛 此萃

五之復二成臨。臨者,大也。 至上有頤

養之象,故名「大畜 也。

不家食,吉,利涉大川。

人,家人體噬嗑食,故「利涉大川, 翻曰: 二稱家。謂二五 易 位 .成 應乎 家

天也」。

《彖》曰: 大畜,剛健篤實,輝光日新。

虞翻曰:「剛健」謂乾,「篤實」謂艮。二

已之五,「利涉大川」。 互體离坎,离爲

日,故「輝光日新」也。

其德剛上而尚賢。

蜀才曰: 此本大壯卦。案: 剛自 初

升,爲主於外,剛陽居上,尊尚賢也。

能健止,大正也。

)翻曰: 健,乾; 止,艮 也。 二五易

位,故「大正」。舊讀言「能止健」,誤也。

不家食吉」,養賢也。

虞翻曰: 二五易位成家人,今體頤養

> 下,「不家食」之象。 爲賢人,艮爲宮闕也。 象,故「不家食吉,養賢 也」。 令賢人居於闕

乾

利涉大川」,應乎天也。

川」。五,天位,故曰「應乎天」。 京房曰: 謂二變五體坎,故「利 涉大

《象》曰: 天在山中,大畜。

能止大器,故名「大畜」也。 山中,大畜之象。天爲大器,山則極止。 向秀曰: 止莫若山,大莫若天。 天在

君子以多志前言往行,以畜其德。

虞翻曰:「君子」謂乾。乾爲言,震爲行,

前言往行」。 坎爲志。 「乾知大始」,震在乾前,故「志 有頤養象,故「以 畜其

德」矣。

初九,有厲,利己。

災危,有厲則止,故能「利己」。 王 一弼曰: 四乃畜己,未可 犯 進則

象》曰 「有厲利己」,不犯災也。

曰 : 二變正,四 坎, 故 稱

「災」也

九二,輿説腹。

虞翻曰: 萃坤爲車,爲腹。 坤

故車説腹。「腹」或作「輹」也。

象》曰:「輿説腹」,中无尤也。

心,夾軸之物。處失其正,上應於五 盧氏曰: 乾爲輿。案: 輹,車之鉤

五居畜盛,止不我升,故且説 輹。 停留

待 時而進退得正 ,故「无尤也」。

九三,良馬

逐,利艱貞,吉。日閑輿衛

翻 曰 : 乾爲良馬,震爲驚走,故

貞吉」。离爲日,二至五 逐」也。謂二已變,三在坎中,故 體師象。 利 坎爲

講武閑兵,故曰「日閑 閉習,坤爲車輿,乾人在 興衛」也 上,震爲驚衛

利 有 ·攸往。《象》曰:「利有攸往」,上合

> 志 也

成坎。 志也。 翻 曰 : 坎爲志,故「利有攸往」,與上合 謂上 應 也。 五. 已變 Ī,

六四,童牛之告,元吉。

告」。 繩。 家,惡其觸害。艮爲手、爲小木, 牛。「告」謂以木楅其角。大畜畜 虞翻曰: 喜」謂五也。 繩縛小木,横著牛角,故曰「童牛之 得位承五,故「元吉」而「喜」。 艮爲童,五已之正。 萃 物之 -坤爲 巽爲

象》曰:「六四」「元吉」,有喜也。

也。 不能 也。 侯果曰: 童牛,无角之牛也。 《封人職》曰「設其 初,與无 以木爲之,横施於角,止其觝之威 初欲上進 觸 四,是 角同,所以 坤爲輿,故有牛矣。 四童 而 四牿之,角既被牿,則 初之角也。 「元吉」而「有喜」矣。 四 牿, 楅 能

楅 衡」,注云「 福設於角,衡設於鼻」,止

其 紙觸也

六五,豶豕之牙,吉。

象也。 巽爲白,震爲出。 令不害物。三至上體頤象,五變之剛, 虞翻曰: 動而得位,「豶豕之牙吉」。 二變時坎爲豕。 剛日 從頤 中出 劇 豕 稱 豶

象》曰:「六五」之「吉」,有慶也

雖有其牙,不足害物,是制於人也。 喻九二之剛健失位,若豕之劇,不足畏 崔憬曰: 虞翻 曰: 豬是也。然以豕本剛突,劇乃性 而六五應止之易,故「吉有慶」矣。 九二坎爻,坎爲豕也。 《説文》「豶,劇豕」,今俗猶呼 五變得正,故「有慶也」。 以陽居陰 和,

失其位,若豕被劇之象也。

何,當也。 衢,四交道。 乾爲

> 《象》曰:「何天之衢」,道大行也。 天,震 虞翻曰: 猶云何畜。乃天之衢亨,道大行也。 曰: 處畜之極,畜極則亨。 「亨」,上變坎爲「亨」也。 艮爲道。 謂上據二陰,乾爲天道,震 以震交艮,故「何天之 何,辭 〇王弼

《序卦》曰: 頤者,養也。 物畜然後可養,故受之以頤。

行,故「道大行」矣。

其所養,故言「物畜然後可養」。 崔憬曰:「大畜剛健,輝光日新」, 可以

— 艮 震 上 下 頭,貞吉。

虞翻 之例。或以臨二之上,兑爲口,故有「口 正則吉。 小過、中孚同義,故不從臨觀四陰二陽 曰 反復不衰,與乾、坤、坎、离、大過、 謂三之正,五上易位,故「頤貞 晉四之初,與大過旁通。

實 也

觀

頤

虞 養 也 翻 曰 离 爲 目,故 觀 頤」,「觀 其

所

自求口實。

養也。 謂其 物,則貪廉之情可 頤 而 虞 五. 之名也。 爲 而 \Box 离爻, 上 翻 ,觀其養賢 人所食之物皆 口 實」。 (自養。 ·; 坤 因 티 : 能 輔 皆得 爲 自二至五 震 行養則其幹事,故「吉」矣。 嚼 或以 自 動於下,艮止於上,口 物 中。 與 鄭玄曰: 以 艮 大過兑 不 存焉。 别也 養人,故謂之頤。 爲 离爲 肖 有 求。 也 目 爲 一坤,坤 0 觀 口 П, 頤 ,觀象也。 其求 頤 實, 者 中 或以 頤 載養物, 可 有 中 食之 物 車 車 臨兑 觀 輔

> 明,自求 各 食」,況非 者,所由 得其正則「吉」也。 口 飲 實 其 食 必 食 自 ~乎? 得體宜,是謂 養也。 是故所 君 子「割 宋 「養正 衷 養 曰: 必 不 得賢 也也 Ē 不 頤

觀頭」,觀其 (所養 也

侯果曰: 王者所養,養賢則吉也

自求口實」,觀其自養也。

養」。 降初,則 侯果曰: 可言,震聲也。 成 案 : 頤 此 也。 本觀卦。 實物可食,艮其成 實」謂 是「自求 頤 初 六升五 口 中也。 實,觀 也。 其自 實 九 事 五.

天地養萬物,

翟玄曰: 養賢及萬 陰也。天地 民,此其聖也 天,上, 以元氣養萬 地 物 初 聖 也 人以 萬 物, 道

聖人養賢以 及萬民。

虞 翻 ,故「聖人養賢」。 日 乾爲聖人,艮 坤 陰爲民, 爲賢 人,頤 皆在震 下

姚

信曰:

以陽養陰,動於下,止於上,

頤「貞吉」,養正則吉也

上,「以貴下賤,大得民」,故「以及萬

民一

頤之時大矣哉!

天地養物,聖人養賢以及萬民。人非頤

不生,故「大矣」。

《象》曰: 山下有雷,頤。

劉表曰: 山止於上,雷動於下,頤之

象也。

君子以慎言語,節飲食。

荀爽曰: 雷爲號令,今在山中閉藏,故

慎言語」。雷動於上,以陽食陰,艮以

民」,故「慎言語」,所以養人也。飲食不止之,故「節飲食」也。「言出乎身,加乎

節,殘賊羣生,故「節飲食」以養物。

初九,舍爾靈龜,觀我朵頭,凶。

靈龜」。坤爲我、震爲動。謂四失离人虞翻曰: 晉离爲龜、四之初,故「舍爾

坤,遠應多懼,故「凶」矣。

《象》曰:「觀我朵頤」,亦不足貴也

山。龜自五降初則爲頤矣。是舍爾靈侯果曰: 初本五也。五互體艮,艮爲

龜之德,來觀朵頤之饌,貪禄致凶。

故

六二,顛頤,拂經于丘頤,征凶。

不足貴。

朵,頤垂下動之貌也。

《象》曰:「六二」「征凶」,行失類也。

侯果曰: 正則失養之類。

六三,拂頤,貞凶。 十年勿用,无攸利。

應,故「十年勿用,无攸利」也。 父弑君,故「貞凶」。 坤爲十年,動无所虞翻曰: 三失位,體剥,不正相應,弑

《象》曰:「十年勿用」,道大悖也。

六四,顛頤,吉。 虎視眈眈,其欲逐逐,虞翻曰: 弑父弑君,故「大悖也」。

无咎。

察其所養則養賢,頤爻之貴,斯爲盛矣。故「其欲逐逐」而尚敦實。脩此二者,乃故「其欲逐逐」而尚敦實。脩此二者,乃下,得頤之義,故曰「顛頤吉」。下交近下,得頤之義,故曰「顛頤吉」。下交近王弼曰: 履得其位而應於初,以上養

象》曰:「顛頤」之「吉」,上施光也 頤。 虞翻 貌。 逐 爲目。「眈眈」,下視貌。「逐逐」,心 成离,故「上施光也」。 曰 : 坤爲吝嗇,坎水爲欲,故「其欲 與屯四乘坎馬同義。 得位應初,故「无咎」。 晉四之初。謂三已變,故「顛 坤爲虎,离 謂上已反 煩 逐

陽无應,故「不可涉大川」矣。故「居貞吉」。艮爲居也。涉上成坎,乘虞翻曰:失位,故「拂經」。无應順上,

則吉。 應於下而比於上,●故宜居貞,順而從上王弼曰: 以陰居陽,拂頤之義也。无象》曰:「居貞」之「吉」,順以從上也。

上九,由頤,厲吉。

虞翻曰: 失位,故「厲」。之五得正成慶也。

位,故「大有慶也」。 坎,坎爲大川,故「利渉大川」。變陽得虞翻曰: 失位,故「厲」。之五得正成

六五,拂經,居貞吉,不可涉大川。

❶ 「比」,原誤作「此」,今據四庫本、照曠閣本改

《序卦》曰: 不養則不可動,故受之以

大追

崔憬曰: 養則可動,動則過厚,故受之

以大過也。

₩ ^{異下} 大過,棟橈。

「棟橈」謂三。巽爲長木稱棟,初上陰柔虞翻曰: 大壯五之初,或兑三之初。

本末弱,故「棟橈」也。

利有攸往,亨。

无應,利變應五。之外稱往,故「利有攸虞翻曰: 謂二也。「剛過而中」,失位

往乃亨」也。

《彖》曰: 大過,大者,過也。

虞翻曰: 陽稱大,謂二也。二失位,故

「大者過也」。

「棟橈」,本末弱也。

所以橈,由於初上兩陰爻也。初爲善向秀曰: 棟橈則屋壞,主弱則國荒。

弱,「棟橈」者也。 末,臣也。君臣俱果曰: 本,君也。末,臣也。君臣俱处王弼曰: 初爲本而上爲末也。○侯始,末是令終。始終皆弱,所以「棟橈」。

剛過而中,巽而説行。「利有攸往」乃

亨」。

與遯二同義。「利有攸往」。大壯震五之初,故「亨」。虞翻曰:「剛過而中」謂二。説,兑也,故

大過之時大矣哉!

白茅,女妻有子,繼世承祀,故「大矣真翻曰:「國之大事,在祀與戎」。藉用

《象》曰: 澤滅木,大過。

二五「枯楊」,是其義。水者,楊也。遇澤太過,木則漫滅焉。案。 兑,澤也。巽,木漫也。凡木生近

君子以獨立不懼,遯世无悶。

虞翻 悶」也。 復 「憂則違之」,乾初同義,故「遯世无 一爻,潛龍之德,故 曰:「君子」謂乾。 稱「獨 初陽伏巽中, 立不懼」。 體

初六,藉用白茅,无咎。

虞翻曰: 二過四應五士夫,故「无咎」矣。 「茅」,故「藉用白茅」。失位,咎也。 位在下稱「藉」,巽柔白 承 爲

《象》曰:「藉用白茅」,柔在下也。

有矣。 薦奉,況藉用白茅,重慎之至,何咎之 苟能絜誠,肅恭不怠,雖置羞於地,可以 侯果曰: 以柔處下,履非其正,咎也

九二,枯楊生稊,老夫得其女妻,无不利。 巽爲楊,乾爲老。老楊,故「枯」。 虞翻曰: 枯楊得澤,復生稊。 二也,十二月時,周之二月。兑爲雨澤。 稊, 穉也。楊葉未舒稱稊。 二體乾老,故稱「老 楊在

> 得其女妻」,故「无不利」。 夫」。「女妻」謂上兑。 兑爲少女,故 「女妻」。大過之家,過以 相與。

象》曰:「老夫女妻」,過以相與 也。 獨大過之爻得過其應,故「過以相與 虞翻曰: 謂二過初與五,五過上與二。 也。

不可以有輔也。 九三,棟橈,凶。《象》曰:「棟橈」之「凶」,

虞翻曰: 本末弱,故「橈」。輔之益橈

九四,棟隆,吉。有它吝。

故「不可以有輔」。

陽以陰爲輔也。

五,意在於上,故「棟隆吉」。 失位,動入 虞翻曰: 隆,上也。應在 於初,己與

險而陷於井,故「有它吝」。

象》曰:「棟隆」之「吉」,不橈乎下也 虞翻曰: 乾爲動直,遠初近上,故不橈

下也。

ĮЦ

「枯楊生華」,何可久也。「老婦

九五、枯楊生華、老婦得其士夫、无咎

无譽。

以相 君亦 舊説 謂 五. 今退 「士夫」謂 月。 翻 初 也 陰 E 五 「女妻」。二陽失正,數九 「士夫」。五過二使應上,二過五使取 然。 與,使 末爲老,後之達者,詳其義焉。 得正,數 伏初,故「无譽」。 五得位故「无咎」。 陽得正位 日 以 枯 巽爲婦,乾爲老,故稱「老婦」也 : 初爲女妻,上爲老婦,誤矣。 悲夫學之難 楊 荀公以初陰失正當變,數六, $\frac{\pi}{\circ}$ 《應少夫,《象》曰「亦可醜 陽 得 在 八,爲「老婦」。 澤,故「生華」矣。 大壯震 不變,數七,爲「士夫」。 Ŧī. 也。 然,而以 爲夫,兑爲少,故 體姤淫女,故過 夬,三月時, 陰在二「多譽」, 初本爲小,反 ,爲「老夫」。 「老婦 何 也 周 馬

「士夫」,亦可醜也。

也。 翻 曰: 婦體 乾 淫 爲 故 可 枯 醜 而 也 生 華 故

上六、過涉滅頂、凶、无咎。

咎也 義也。 頂。 足没水,故「過涉」也。 翻 頂没兑水中,故「滅頂凶」。 曰 : 得位,故「无咎」。 大壯震爲足,兑 頂,首 與「滅 爲水澤。 也 乗剛 耳 同

《象》曰:「過涉」之「凶」,不可咎也。

《九家易》 道 諫 遯,不行禮 絶之罪,不可 常,故君子犯 以畏慎爲宜。 化致然,亦不可 而 死 散久矣,如得其情,則哀 是也。 Ĭ. 義,謂當不義則 咎也。 義, 桀紂之民 至於大過之世,不 君子以禮義 小人犯 咎。 大過之世, 君子 曾 刑 可可 子曰「上 争之,若比 ,而家家 比 爲 屋 矜 而 復 失 有 遜 誅

喜」,是其義也。

《序卦》曰: 物不可以終過,故受之以坎。

坎者,陷也。

頂,故曰「物 崔憬曰: 大過不可以極,極則過 不 . 可 以 終過,故受之以 沙 滅

坎」也。

坎上 習坎,有孚,

五。 虞翻曰: 爻,觀上之二。習,常也。 水行往來,「朝宗于海」,不失其時 乾二五之坤,與离旁通。于 孚,信。謂二

維心亨,

如月行天,故習坎爲孚也。

虞翻 **三** 坎爲心。乾二五旁行流坤,

陰陽會合,故「亨」也。

震爲行,動得正應五,故「行有尚,往有 虞翻曰:「行」謂二,「尚」謂五也。 二體

《彖》曰:

虞翻曰: 習坎, 兩 象 重 險 也。 也。 天險,地險,故曰

水流而不盈,

「重險也」。

荀爽曰: 天,滿則虧,不盈溢之義也。 下,不盈溢崖岸也。 中,故「不盈」也。○陸績曰: 陽動陰中,故「流」。 月者,水精。 水 月 在 性趨 陷 陰

行險而不失其信。

行。 其信」矣。 信也。○虞翻曰:「信」謂二也。 荀爽曰: 水性有常,消息與月相應,故「不失 謂陽來爲險而不失中。 中稱 爲

維心亨」,乃以剛 中 也。

侯果曰: 二五剛 而 居中,則「心亨」也。

行有尚」,往有功也。

虞翻曰:「功」謂五。二動應五,故「往有

功也」。

天險,不可升也

虞翻曰: 屯難,故「天險不可升也」。 謂五。 在天位,五從乾來,體

地 險,山 川丘陵也。

虞翻 稱陵,故曰「地險,山川丘陵也」。 險」。艮爲山,坎爲川。 日 坤爲地。乾二之坤,故曰「地 半山稱丘

王公設險,以守其邦。

爲水也。「王公設險」之象也。 象,故「王公設險以守其邦」。 邦。乾二之坤成坎險,震爲守,有屯難 虞翻 曰: 「王用出 ,王也。六三,三公也。艮爲山城,坎 征,以正邦」是也。 王公,大人。謂乾五。坤爲 案 : 《离》言

險之時用大矣哉!

肅 守險以德,據險以時,成 功

> 習教事 水洊至,習坎。 君子以常德行,

習,爲常。乾爲德,震爲行,巽爲教令, 坤爲事,故「以常德行,習教事」也。 乾。五在乾稱大人,在坎爲君子。 事,如水不息也。○虞翻曰:「君子」謂 常,有似於習。故君子象之以常習教 而溢通流,不舍晝夜。 重重習相 續 曰: 游,再; 習,重也。 水 隨 坎爲 再 以 至

初六,習坎,人于坎窞,凶。

道也。 故曰「入于坎窞凶」矣。 及其不平,則枉濫 災,則泛溢平地而入于坎窞,是水失其 百川之流行乎地中,水之正也。 干寶曰: 窞,坎之深者也。江河淮 刑獄之用,必當于理,刑之正也。 无辜,是法失其道也。 及其爲

象》曰:「習坎入坎」,失道凶 也。

虞翻曰: 習,積也。位下,故「習」。坎

失正,故曰「失道凶」矣。 爲入,坎中小穴稱窞。上无其應,初二

九二,坎有險,求小得。

有實,故「求小得」也。 虞翻曰: 陽陷陰中,故「有險」。 據陰

《象》曰:「求小得」,未出中也。

荀爽曰: 處中而比初三,未足爲援。

雖求小得,未出於險中。

勿用。 六三,來之坎坎,險且枕。入于坎窞,

于坎窞」。 位乘二,則險承五 來之坎坎」。 曰: 體師三輿,故 坎 枕, 在 内 止 隔 稱 也。 來。 四,故「險且 勿 艮爲止。 在 用 坎終 坎,故 三失

者,斥周人觀釁於殷也。枕,安也。「險喻殷之執法者失中之象也。「來之坎」干寶曰: 坎,十一月卦也。又失其位,《象》曰:「來之坎坎」,終无功也。

之心。 且. 曰「來之坎坎,終无功 枕」者,言安忍 淫 刑濫 罰 以 百 暴 也。 姓 政 无 加 所 民 措 ,而无哀 手 之, 矜

六四,尊酒簋,貳用缶。

獻在 酒。 缶 虞 坎酒在上, 尊酒之象。 翻 ,禮有副尊,故「貳用缶」耳。 中,故 簋,黍稷器。 曰 : 震主祭器,故有 爲 簋」。 三至五有頤 坎爲 貮, 副也。 木,震 尊 簋。 口 坎 坤 爲

内約自牖,終无咎。

承陽。 艮 虞 省 時,居多懼之地。 五,故「无咎」。 薄 爲牖。坤爲户,艮 翻 貮 曰 : 脩其絜誠 内約」,文王於紂時 明德惟馨」,故 用缶,故「内 坎爲 ○崔憬 内 ",進其 近三而 也 約 小 (忠信 自 티 : 光 尊 四 ...牖」。 得 陰 行此道 照 位,比 酒 於重 則 小, 户, 簋 得 雖 故 牖之 貮 一險之 位 五. 承 祀 用 而

羑里内約,卒免於難,故 曰「自牖, 終无

咎」也。

象》曰:「尊酒簋」,剛柔際也。

虞翻 曰 乾 剛 坤柔,震爲交,故 曰 剧门

柔際也」。

九五,坎不盈,禔既平,无咎。

安,故「禔既平」。 而 虞翻曰: 不盈」。 坎爲平。 盈,溢也。 得位正中,故「无咎」。 禔,安也。 艮爲止。 謂「水流 艮 止坤

象》曰:「坎不盈」,中未光大也。 體屯五中,故「未光大也」。

虞翻

上六,係用徽纆,寘于叢棘,三歲不得,凶。 虞翻 徽 纆,黑索也。 觀巽爲繩,艮

置 爲手。 也。 坎 上變入坎,故「係用徽纆」。 多心,故「叢棘」。 獄 外種 寘,

棘,故稱「叢棘」。 二變則 五. 體 剥 剥 傷

出 坤殺,故「寘于叢棘」也。 獄。 艮止,坎獄。 乾爲歲,五從乾來, 「不得」謂 不得

> 象》曰:「上六」失道,凶「三歲」也。 案: 案: 《九家易》曰: 徽,兩股爲 馬融云「徽纆,索也」,劉表云「三股爲 坎下巽爻,巽爲繩直,「係用徽纆」也。 棘,面三槐。 人者加明刑,任之以事。 三非其應,故曰「三歲不得凶」矣。 舍,•中罪二年而舍,下罪一年而舍也。 《周禮》王之外朝,左九棘,右九 坎於木堅而多心,「叢棘」之象也。 纆」,皆索名,以繫縛其罪 司寇公卿議獄于其下。害 坎爲叢棘,又爲法律。 上罪三年而

离者,麗也。 序卦》曰: 陷必 有所麗,故受之以离。

崔憬曰: 物 極 則反。 坎雖陷於地,必

0 而 原無,今據四庫本、 照 曠 閣本

有所麗於天,而「受之以离」也。

地。

乾二五之坤成坎震

體

屯。

屯者,

离离上下 离,利貞,亨。

虞翻 爻,遯初之五,柔麗中正,故「利貞亨」。 曰: 坤二五之乾,與 坎旁通。 于

畜牝牛,吉。

俗説皆以离爲牝牛,失之矣。 之坤成坎,體頤 虞翻曰: 畜,養也。坤爲牝牛,乾二五 養象,故「畜牝牛吉」。

彖》曰: 离,麗也。

荀爽曰: 是其别離也。 木,是其附麗 別離,以陰隔陽也。 陰麗於陽,相附 也。 煙酸飛升,炭灰降滯, 离者,火也,託於 麗也。 亦爲

日月麗乎天,

翻 曰 : 乾五 一之坤 成坎,爲月。 离爲

日。 「日月麗天」也。

百穀 草 木麗乎地

日 震爲百 穀,巽爲 草 木, 坤爲

> 也。 震,故「百穀草木麗乎地」。 「盈天地之間者 唯 萬 物 萬 物

重明以麗乎正,乃化成天下。

成天下也。 陽變之坤來化乾,以成萬物。 虞翻曰: 兩象,故重明。「正」 謂离日化 謂五陽。

柔麗乎中正,故「亨」。

出在 「亨」也。 虞翻曰:「柔」謂五陰,「中正」謂五伏陽。 坤 中,「畜牝牛」,故「中 · 正 而

是以「畜牝牛吉」也。

荀爽曰: 者,陰卦。 牝者,陰性。 牛者,土也。 故曰 生土於火。 「畜牝 离

《象》曰: 明兩作,离。

吉」矣。

坎,坤二之乾成离。 虞翻曰: 「兩」謂日與 (月也。 离坎,日月之象。 乾五之坤成

動成萬物,故稱「作」矣。 或以日與火爲 故「明兩作离」。作,成也。 日月在天,

明兩作」也

大人以繼明照于四方。

虞翻曰: 也。乾二五之光,繼日之明。坤爲方。 二五之坤,震東兑西,离南坎北,故曰 照于四方」。 陽氣稱大人,則乾五「大人」

初九,履錯然,敬之,无咎。

二爲三所據,故「敬之」則「无咎」矣。 荀爽曰: 火性炎上,故初欲履錯於二,

《象》曰:「履錯」之「敬」,以辟「咎」也。

始,將進其盛,故宜慎所履,以敬爲務, 王弼曰: 錯然,敬慎之貌也。處离之

辟其咎也。

六二,黄离,元吉。《象》曰:「黄离元吉」,

得中道也。

此本坤爻,故云「黄离」。來

得中道,所以「元吉」也

九三,日昃之离

昃,以喻君道衰也。 荀爽曰: 初爲日出,二爲日中,三爲日

不鼓缶而歌,則大耋之差,凶。

《九家易》曰: 取五也。 奪,五憂嗟窮凶也。火性炎上,故三欲 九耋之。陽稱大也。 者,向下也。今不取二而上取五,則上 仰向上,謂兑爲口而向上取五也。 大腹,瓦缶之象,謂不取二也。歌 鼓缶者以目下視。 嗟者,謂上被三 日昃 离爲

《象》曰:「日昃之离」,何可久也。

《九家易》曰: 日昃當降,何可久長。 五,故曰「不鼓缶而歌」也。 三當據二,以爲鼓缶。 而今與四同取於

九四,衮如,其來如,焚如,死如,棄如。今本

意灭員,故「棄山」也。 (焚如」也。以离入坎,故「死如」也。火終,天命所誅。位喪民畔,下离所害,故如」也。陰以不正,居尊乘陽,歷盡數如」也。陰退居四,灰炭降墜,故「其來如」也。陰退居四,灰炭降墜,故「

息灰損,故「棄如」也。

「无所容也」。 《九家易》曰: 在五見奪,在四見棄,故《象》曰:「衮如其來如」,无所容也。

六五,出涕沱若,

坎,故「出涕沱若」而下,●以順陰陽也。荀爽曰: 六五陰柔,退居於四,出离爲

戚嗟若、吉。

「戚嗟若」。動而得正,尊麗陽,故虞翻曰: 坎爲心,震爲聲,兑爲口,故

「吉也。

《九家易》曰: 戚嗟順陽,附麗於五,故《象》曰:「六五」之「吉」,離王公也。

上下矣。 五當爲王,三則三公也。四處其中,附曰「離王公也」。陽當居五,陰退還四。

 \equiv

无咎。 上九,王用出征,有嘉折首,獲匪其醜

醜无咎」矣。 也。乾征得坤陰類,乾陽物,故「獲非其間坤二來折乾,故「有嘉折首」。醜,類體師象,震爲出,故「王用出征」。「首」慶翻曰:「王」謂乾。乾二五之坤成坎,

虞翻曰: 乾五出征坤,故「正邦也」。《象》曰:「王用出征」,以正邦也。

易傳卷第六

❶ 「若」,原作「嗟」,今據四庫本、照曠閣本改。

易傳卷第七

唐資州李鼎祚集解

《序卦》曰 然後有上下,有上下然後禮義有所錯。 然後有男女,有男女然後 豈 也。 成卦,三材必備,錯綜天人,以効變化, 咸至未濟爲下經,人事也。 深述其義,以崇人倫之始,而 乎斯,人倫之道莫大夫婦,故夫子慇懃 而 有天道人事偏於上下哉。斯蓋守文 有 康 剛下」、「感應以相與」,夫婦之象莫美 《伯曰: 先儒以乾至离 父子,有父子然後有君臣,有君臣 有天地然後有萬物,有 言咸卦之義也。 爲上 有夫婦 經,天道也, 夫《易》六畫 不係之离 咸「柔上 有夫 萬 婦婦 物

鸞翎曰: 或,惑也。申三뻬 見下 咸,亨,利貞,取女吉。而不求義,失之遠矣。

之則吉也。 三德,以下二十之女。 和順於義,幹事能正。 物、故曰「咸」也。其於人也、嘉會禮通、 山 鄭玄曰: 虞翻 説,男下女」,故「通,利貞,取女吉」。 〇 上之三成男。 氣下,澤氣上,二氣通而 曰 : 咸,感也。艮爲山,兑爲澤。 咸,感也。坤三之上成女,乾 乾坤氣交以相與,「止 正而相親説,取 三十之男,有此 相應,以生萬 而

應以相與。《彖》曰: 咸,感也。柔上而剛下,二氣感

相與」也。 上九降三,是「柔上而剛下,二氣交感以蜀才曰: 此本否卦。案: 六三升上,

王肅曰: 山澤以氣通,男女以禮感。止而説,男下女,是以「亨利貞取女吉」也。

君子以虚受人。

而 下女,初婚之所以爲禮也。 通義正

取,女之所以爲吉也。

天地感而萬物化生,

荀 Ш 爽曰 澤。○陸績曰: : 乾下感坤,故「萬物化生」於 天地因山 澤孔 一竅以

通其氣,化生萬物也。

聖人感人心而天下和平。

濟,坎爲心,爲平,故「聖人感人心 翻 目 乾爲聖人。 初四易位 而 成 天 既

下和平」。 此「保合太和」、「品物 流

形」也。

觀其所感,而天地萬物之情可見矣!

見地,縣象著明,萬物見 虞翻曰: 謂四之初 ,以离日見天,坎月 离,故「天地 萬

物之情可見」也。

象》曰: 山上有澤,咸

崔憬曰: Ш 高而 降,澤下 而升,山 澤通

氣,咸之象也。

虞翻 虚。 山在地下爲謙,在澤下爲虚 謂坤虚三受上,故「以虚受人」。 曰:「君子」謂否乾。 乾爲人,坤 艮

初六,咸其母。《象》曰:「咸其母」,志在

外也。

故「志在外」。 母,故「咸其母」。 虞翻曰: 母,足大指也。 謂四也。 失位遠應,之四 艮爲指,坤爲 [得正,

六二,咸其腓,凶。 凶,居吉」,順不害也。 居吉。《象》曰:

三,順止而隨於當禮,故「吉」也。 與,失艮止之禮,故「凶」。 也。得位居中,於五 崔憬曰: 腓,脚膊,次於母上,二之象 一有應。 居 而 若 感 承比於 應 相

九三,咸其股,執其隨,往吝。•

吝」,原作「咎」,今據四庫本、照曠閣本改。

雖

也。 隨」,下比二也。 崔 義,故「往吝」窮也。 而 不前。 憬 剛 曰 : 耐 二隨於己,志在所隨,故「執其 得 股, 胜 中, 雖欲 而遂感上,則失其正 而次於腓上,三之象 感 E 以 居艮 極,止

人,所執下也。 《象》曰:「咸其股」,亦不處也。志在「隨」

執下也」。 執下也」。 與女未用皆稱處矣。志在於二,故「所 所以良陽入兑陰,故「不處也」。凡士 歷險,故「往吝」。巽爲處女也,男已下 歷險,故「往吝」。巽爲處女也,男已下

五,感初隔三,故「憧憧往來」矣。 兑爲也。之内爲來,之外爲往。欲感上隔故「貞吉」而「悔亡」矣。「憧憧」,懷思慮虞翻曰: 失位,悔也。應初,動得正,九四,貞吉,悔亡。憧憧往來,朋從爾思。

曰「朋從爾思」也。明,少女也。艮初變之四,坎心爲思,故

虞翻曰: 坤爲害也。今未感坤初,《象》曰:「貞吉悔亡」,未感害也。

遯弑父,故曰「夫感害也」。

「憧憧往來」,未光大也。

虞翻曰: 未動之离,故「未光大也」。

九五,咸其脢,无悔。

爲脊,故「咸其脢」。得正,故「无悔」。虞翻曰:脢,夾脊肉也。謂四已變,坎

《象》曰:「咸其脢」,志末也。

謂五志感於上也。二、五比於上、故「咸其脢」。「志末」者,案:末、猶上也。四感於初、三隨其

上六,咸其輔,頰舌。

舌」。 目,坎爲耳,兑爲口舌,故曰「咸其輔頰人」 耳目之間稱輔頰。四變爲

象》曰:「咸 虞翻 其輔 媵,送也。 頰舌」,媵 不得之三,「山澤 口説也

通

氣」,故「媵口説也」。

《序卦》曰: 之以恒。 恒者,久也。 夫婦之道不可不久也, 故受

鄭玄曰: 之道,謂咸者也。 言夫婦當有終身之義。 夫婦

一 震 巽 上 下 恒,亨,无咎,利貞。

爲雷。 虞翻 之坤四、「剛柔皆應」,故「通无咎利貞」 事,所行而善矣。 婦以嘉會禮通,故「无咎」。 男,夫婦同 ○鄭玄曰: 曰: 雷風 心而 恒,久也。 相須 成 恒,久也。巽爲風,震 而養物,猶長 家,久長之道 與益旁通。 其能和 女承長 也。 乾 順 初

利有攸往

虞翻曰: 初利往之四,終變成益, 則初

> 彖》曰: 恒,久也。 剛上 而柔下,

攸往」也。

四二五皆得其正,「終則有始」,故「利有

雷風 王弼 相 與,異 日 而動, 剛尊柔卑,得其序也。

與,巽而動」也。 初九升四、是「剛上而柔下」也。 蜀才曰: 坤,雷也。 分坤與乾,風也。 此本泰卦。 是「雷風相 六 四降初, 分乾與

剛柔皆應,恒。

《九家易》曰: 柔皆應,故「通无咎」矣。 初四,二五 雖 不 Ė 而 別川

恒「亨,无咎,利貞」,久於其道也。 荀爽曰: 恒,震世也。巽來乘之,陰陽 合會,故「通无咎」。長男在上,長女在

天地之道,恒久而不已也。

下,夫婦道正

,故「利貞久於其道」也。

虞翻曰: 泰乾坤 爲天地,謂 終則復始,

「有親則可久」也。

「利有攸往」,終則有始也。

也。坤氣上終,始復降下居初者也。荀爽曰: 謂乾氣下終,始復升上居四

日月得天而能久照,

照」也。 至三 坎 爲 月,故 「 日 月 得 天 而 能 久 虞翻曰: 動初成乾爲天,至二离爲日,

四時變化而能久成,

物也。至,故「四時變化而能久成」。謂乾坤成至,故「四時變化而能久成」。謂乾坤成二离夏至,三兑秋至,四震春至,五坎冬虞翻曰: 春夏爲變,秋冬爲化。變至

聖人久於其道,而天下化成。

「化成天下」。各正性命」,有兩离象,「重明麗正」,故正,四五復位,成既濟定。「乾道變化,虞翻曰:「聖人」謂乾。乾爲道,初二已

觀其所恒,而天地萬物之情可見矣,

出震,故「天地萬物之情可見矣」。 與咸虞翻曰: 以离日照乾,坎月照坤,萬物

同義也。

象》曰:

雷風,恒。

節而不易道也。 相薄而爲萬物用,故君子象之以立身守宋衷曰:「雷以動之,風以散之」,二者常

君子以立不易方。

立。坤爲方。乾初之坤四,三正不動,虞翻曰:「君子」謂乾三也。乾爲易,爲

故「立不易方」也。

初六,浚恒,貞凶,无攸利。

象》曰:「浚恒」之「凶」,始求深也。 也。 既 侯果曰: 四,自四 非正,求 故曰「浚恒貞凶无攸利」矣。 居初,始求深厚之位者也。 浚,深; 乃涉邪,以 恒,久也。 此爲正 凶之道 初 本 位

虞 之正,乾爲始,故曰「始求深也」。 浚恒」。 翻 乾初爲淵,故深矣。 浚, 深也。 初下 稱 失位, 浚,故 變 曰

九四,田无禽。《象》曰:

久非其位,安得

乘,是「无所容」。 无居自容,故「貞吝」。

「禽」也。

九二,悔亡。

中多譽,故「悔亡」也。 虞翻曰: 失位,「悔」也。 動而 得正,處

《象》曰:「九二悔亡」,能久中也。 陽據陰,故曰「能久中也」。 荀爽曰: 乾爲久也。能久行中和, 以

九三,不恒其德,或承之羞,貞吝。 荀爽曰: 居其所,不與陰通也。无居自容,故「貞 乘,故「或承之羞」也。「貞吝」者,謂正 恒其德」。與上相應,欲往承之,爲陰所 五爲兑,欲説之隔四。意无所定,故「不 與初同 象,欲據初隔二。與

《象》曰:「不恒其德」,无所容也。 《九家易》曰: 言三取初隔二,應上見

> 六五,恒其德,貞婦人吉,夫子凶。 位,故《象》曰「久非其位安得禽」也。 變承之,故曰「田无禽」。言二五皆非其 虞翻曰:「田」謂二也。地上稱田。「无 禽」謂五也。 九四失位,利二上之五,己

子」。終變成益,震四從巽,死於坤中, 故「夫子凶」也 也。震,乾之子,而爲巽夫,故曰「夫 初,婦得歸陽,從一而終,故「貞婦人吉. 虞翻曰: 人」謂初。 巽爲婦,終變成益,震四復 動正成乾,故「恒其德」。 「婦

《象》曰:「婦人貞吉」,從一而終也 「夫子」制義,從婦「凶」也。 虞翻曰: 初震,故「從一而終」也。 謂初。 終變成益,以巽

應

虞翻曰: 震没從巽入坤,故「從婦

凶」矣。

无功也。 上六,震恒,凶。《象》曰:「震恒」在上,大

陽,故「凶」。終在益上,五遠應,故「无虞翻曰: 在震上,故「震恒」。五動乘

以遯。《序卦》曰: 物不可以久居其所,故受之

而遯者也。物之所居,不可以恒,宜與世升降,有時

韓康伯

曰 :

夫婦之道,以恒爲貴。

而

■ 乾上 遯,亨,

「遯」而「通」則「當位而應,與時行也」。陽,子弑其父,小人道長,避之乃通,故人,乾爲遠。遠山入藏,故「遯」。以陰消虞翻曰: 陰消姤二也。艮爲山,巽爲

小利貞。

辭卿是也。 進以漸,則遠妒忌之害。 昔陳敬仲奔齊 謙,小其和順之道,居小官,幹小事 退,逃去之象。二五得位 體有巽,巽爲進退。君子出 逃去之名也。 正道得禮見召聘。始任他 柔變剛,故「小利貞」。 翻 曰: 小,陰,謂二。 艮爲門闕,乾 ○鄭玄曰: 得位 而 或 門,行 有 有 當尚謙 健德,互 應,是用 浸長,以 有進 其

《彖》曰: 遯「亨」,遯而亨也。

侯果曰: 此本乾卦。陰長剛殞,君子

遯避,遯則通也。

剛當位而應,與時行也。

虞翻曰:「剛」謂五而應二。艮爲時,故

「與時行」矣。

「小利貞」,浸而長也。

荀爽曰: 陰稱小。浸而長則將消陽,

故 利 IE. 居二,與五相應也

遯 之時義 大矣哉

遯殷,四皓遯秦之時也 避,其「義大矣哉」。 陸績曰: 謂陽氣退,陰 〇宋 氣將 衷 害,隨 日 太公 時 遯

象》曰: 天下有山、遯。

遠山,故言「天下有山 浸長,若山之侵天, 崔 天喻君子,山比 遯」也。 君子遯避,若天之 小人。小人

君子以遠小人,不惡而嚴。

浸盛 小人不惡 「小人」謂陰。坤爲惡,爲小人,故「以 虞翻曰:「君子」謂乾。乾爲遠,爲嚴 ,剛德殞削,故君子避之,高尚林 而 嚴 也。 〇侯果 曰 :

初 六,遯尾,厲,勿用有攸往。 「吾家耄遜於荒 也也

野。

但矜嚴

於外,亦不憎惡於内,所謂

陸績曰: 陰氣已至於二,而 初在 上其後,

> 往。 故 日 「遯尾」也。 往 則 與災難 避難當 會,故 在 前 圃 在 用 後, 有 攸 故

《象》曰:「遯尾」之「厲」,不往何 虞翻 正,故「遯尾厲」。之應成坎爲災。 曰 : 艮爲尾也。 初失位,動 災也 而 得

在

艮

六二,執之用黄牛之革,莫之勝説 宜静,若不往於四則无災矣。

説」也。 爲皮。 勝,能; 虞翻曰: 艮爲手。 之,故「執之用 四 説,解也。 持革縛三在坎中,故「莫之勝 變之初則 艮爲手稱執,否坤爲黄牛,艮 黄 牛之革」。 乾爲堅剛, 巽爲繩 坎水濡皮,离日乾 莫,无也。

象》曰:「執用黄牛」,固志 也

獨 履 侯果曰: 守中直、堅如 正,上應貴主,志在輔時。 六二离爻,离爲黄牛。 革束。執此之志,莫之 不隨 物遯, 體艮

勝説。殷之父師,當此爻矣。

九三,係遯,有疾厲,畜臣妾吉。

臣妾,不可施爲大事也。也」。此於六二畜臣妾之象,足以畜其也」。此於六二畜臣妾之象,足以畜其遯」。病此係執而獲危懼,故曰「有疾憊王肅曰: 三上係于二而獲遯,故曰「係象》曰:「係遯」之「厲」,有疾憊也。

「畜臣妾吉」,不可大事也。

臣妾,不可治國之大事。任天下之政。潛遯之世,但可居家畜養大事也」。○荀爽曰:「大事」謂與五同虞翻曰: 三動入坤,坤爲事,故「不可

九四,好遯,君子吉,小人否。

懼,故「小人否」。得位承五,故无凶人。動之初,故「君子吉」。陰在四多虞翻曰: 否乾爲好,爲君子。陰稱小

子吉,小人凶」矣。故能舍之,小人係戀,必不能矣。故「君也。然有應在初,情未能棄,君子剛斷,使果曰: 不處其位而遯於外,好遯者象》曰: 君子好遯,小人否也。

九五,嘉遯,貞吉。

「以正志也」。吉」。謂三已變,上來之三成坎,《象》曰虞翻曰:乾爲嘉,剛當位應二,故「貞

《象》曰:「嘉遯貞吉」,以 也,故曰「貞吉」。 侯果曰: 之高宗當此爻矣。 命,所謂 紐以紊之剛,正 時否德剛, 遯 Щ 雖遯 正志也 得正,則羣小應 羣小之志,則殷 中正,嘉 遯 者

 \equiv

肥遯,无不利

虞翻日 无不利」、《象》曰「无所疑 乾盈爲肥, 二不及上 也」。 故 一肥

象》曰:「肥遯无不利」,无所疑也。

侯果曰: 最處外極,无應於内。 心 无

悶,遯之肥也,故曰 疑戀,超世 一高舉。 「果行育德」,安時无 肥肥 遯 无不利」,則潁

濱巢許當此爻矣。

《序卦》 曰 物 不 可 以 終 遯, 故受之以

而後 韓康伯 通 曰 : 何可 終耶。 遯,「君子以 陽盛 遠 陰消,君子 小人」。 道 遯

勝也。

震 乾上下 大壯,利貞。

翻 [五易位乃得正,故「利貞」也。 四 曰 失位, 陽息泰 爲陰 也。 所 乘, 兑爲 壯,傷也。 毁 折

大壯,大者壯

侯果曰: 此 卦本坤。 柔 消 剛

剛以 動、故壯。

長壯,故曰「大壯」也。

荀爽曰: 乾剛 震 動, 陽從下升

動,故「壯」也。

大壯利貞,大者正 也。

虞翻曰: 謂四進之五乃得正 ,故「大者

正大而天地之情可見矣!

正也」。

日見天,坎月見地,故「天地之情 虞翻曰:「正大」謂四。 之五 立成需

可見」

以离

也矣。

《象》曰: 崔憬曰: 雷在天上,大壯。 乾下震上,故 E 雷 在 天 上。

威, 大壯 」之象也。

曰雷陽氣也,陽

至

於上卦,能

助於天

君子以非禮

中履。

於消除,故《急》从為成,岸豐下夏。 陸續曰: 天尊雷卑,君子見卑乘尊,終

必消除,故《象》以爲戒,非禮不履。

初九, 壯于趾, 征凶, 有孚。

「凶」。坎爲「孚」。謂四上之五成坎,己趾,爲征。初得位,四不征之五,故虞翻曰:「趾」謂四。征,行也。震足爲

得應四,故「有孚」。

《象》曰:「壯于趾」,其「孚」窮也。

九二,貞吉。《象》曰:「九二貞吉」,以虞翻曰: 應在乾終,故「其孚窮也」。

中也。

故「以中也」。 虞翻曰: 變得位,故「貞吉」。 動體离,

九三,小人用壯,君子用罔,貞厲。

人」謂上。上逆、故「用壯」。謂二已變虞翻曰: 應在震也。三陽君子,「小

體乾「夕惕」,故「貞厲」也。

离。

离爲罔,三乘二,故「君

子用

罔

羝羊觸藩,羸其角。

終始陽 觸 荀 爽 四 日 而 :「三與五 位,故曰 危之,四 「羝藩」,謂四也。 同功」爲兑,故 反 羸 其角。 「角」謂 E 羊」。 三欲

五也。

象》曰:「小人用壯 案: 象 壯 故曰「羝羊」。 葦,故稱「藩」也。 五爲羊角, 侯果曰:「藩」謂 也。 觸藩,求應於上,故角被拘羸矣。 自三至五,體兑爲羊。 即「羝羊觸藩 四藩未決,三宜勿往。 四也。 三互乾兑,乾壯兑羊, ,君子罔」也。 九四體震 羸其角」之 四既是藩, 爲竹 用

腹。《象》曰:「藩決不羸」,尚往也。九四,貞吉,悔亡。藩決不羸,壯于大轝之

決」。震四上處五則藩毀壞,故「藩決不「貞吉」而「悔亡」矣。體夬象,故「藩虞翻曰: 失位,悔也。之正得中,故

謂上之五 羸 「壯于大轝之腹」。 坤爲大舉,爲腹。 而《象》曰 四之五折坤,故 「尚往」者

六五,喪羊于易,无悔。

易」。 易,四上之五,兑還 虞翻曰: 動各得正而處中和,故「无悔」矣。 四動成泰,坤爲 屬乾,故「喪羊于 喪也。 乾爲

象》曰:「喪羊于易」,位不當也。

日 「位不當也」。 謂四五陰陽失正。陰陽失正,故

艱則吉。 上六,羝羊觸藩,不能退,不能遂,无攸利,

進也。 得位 失位,上則乘剛,故「无攸利」。 坎爲艱, 巽爲進退,故「不能退,不能遂」。 虞翻曰: |應三利上,故「艱則吉」。 謂四已之五體坎,上能變之巽 應在三、故「羝羊觸 藩」。 退則 遂,

象》曰:「不能退,不能遂」,不詳也。

虞翻 日 : 乾善爲詳,不得三應,故「不

詳也」。

艱則吉」,咎不長也。 之巽,故「咎不長也」。 虞翻曰: 巽爲長。 動失位 爲咎,不變

《序卦》曰: 物不可以終壯,故受之以晉

晉者,進也。

藩。 崔憬曰: 當宜柔進而上行,受兹錫馬 不可 以終壯於陽盛, 自 取 觸

晉,康侯用錫馬蕃庶,晝日三接。

大明。 《彖》曰: 虞翻 康。 故「晝日」。 三陰在下,故「三接」矣。 艮爲多,坤爲衆,故「繁庶」。 离日在上, 「康侯」。震爲馬,坤爲 康,安也。 曰 : 晉,進也。 觀 四之五。 初動體屯,震爲侯,故曰 明出地上,順而麗 用,故「用錫馬」。 晉,進也。 坤 乎

君德也。 主,故言「柔進而上行」也。 而 崔 天,故曰「明出 麗乎大明」。 憬 티 : 臣以功進、君以恩接、是以「順 渾天之義, 地上」。 雖一卦名晉而五爻爲 坤,臣道也。 日從 地 出 而 升于

柔進而上行,

六四進五,是「柔進」。 蜀才曰: 此本觀卦。案: 九五降四,

是以「康侯用錫馬蕃庶,

也。坤爲衆,故曰「蕃庶」矣。 侯」。「馬」謂四也。五以下羣陰錫四之陰,「侯」之象也。陰性安静,故曰「康苟爽曰: 陰進居五,處用事之位,陽中

晝日三接」也。

馬,一晝三覿也」。《采菽》刺幽王侮諸侯謙順於下,美其治物有功,故「蕃錫車子,坤爲衆,坎爲馬。天子至明於上,公侯果曰: 康,美也。四爲諸侯,五爲天

接諸侯之禮也。問再勞,子男三饗一問一勞」,即天子三職》曰「諸公三饗三問三勞,諸侯三饗再侯詩曰「雖无與之,路車乘馬」、《大行人

明德。《象》曰:明出地上,晉。君子以自照

鄭玄曰: 乃著,故君子法之而以 自,离爲明。乾五 虞翻曰:「君子」謂 以 自照明德」也。 地 雖 生萬物,日 觀 動,以离日自照,故 乾。 明自照其德。 乾爲德,坤爲 出 於上, 其 功

「无咎」也。 「无咎」也。 「无咎」也。 一、故「貞吉」。 應离爲罔,四次稱孚,坤 位,故「貞吉」。 應离爲罔,四次稱孚,坤 之,故「晉如」。 失位,故「摧如」。 動得 之,故「晉如」。 失位,故「摧如」。 動得

《象》曰:「晉如摧如」,獨行正也。

= ;

虞翻曰: 初動震爲行。初一稱「獨」也。

「裕无咎」,未受命也。

虞翻曰: 五未之巽,故「未受命也」。

六二,晉如,愁如,貞吉。

得位處中,故「貞吉」也。 虞翻曰: 謂二應在坎上,故「愁如」。

受兹介福,于其王母。

《象》曰:「受兹介福」,以中正也。

《九家易》曰:

五動得正中,故二受大

福矣。「大福」謂馬與蕃庶之物是也。

六三,衆允,悔亡。

故《象》曰「上行」也。此則成小過。小故「衆允」。三失正,與上易位則悔亡,虞翻曰: 坤爲衆。允,信也。土性信,

鼠出入坎穴,蓋取諸此也。過,故有飛鳥之象焉。臼杵之利,見碩

《象》曰:「衆允」之志,上行也。

虞翻曰: 坎爲志,三之上成震,故曰

「上行也」。

九四,晉如碩鼠,貞厲。

《九家易》曰:「碩鼠」喻貪,謂四也。體、如家易》曰:「碩鼠」喻貪,謂四也。 是不出离也。 完不上屋,不至上也。緣不極木,也。飛不上屋,不至上也。緣不極木,為欲升,體坎欲降。游不度瀆,不出坎高欲升,體以欲降。游不度瀆,不出坎之,故曰「晉如碩鼠」也。體

《象》曰:「碩鼠貞厲」,位不當也。

謂雖進承五,然潛據下陰,久居不正之翟玄曰: 碩鼠畫伏夜行,貪猥无已。

地、故有危厲也。

荀爽曰: 五從坤動而來爲离。离者,六五,悔亡,矢得勿恤。往吉,无不利。

射出, 悔」也。 故曰「矢得」。陰 以中盛明,光照四 居 尊 海、故「悔亡」 位,故「有

「勿恤」,「吉无不利」也

象》曰:「矢得勿恤」,往有慶也。

虞翻 有慶也」。 五變得正,坎象不見,故「誓得勿卹,往 「誓」字。誓,信也。勿,无; 曰 : 動之乾,乾爲慶也。 即,憂也。 「矢」,古

上九,晉其角,

稱角,故「晉其角」也。 虞翻曰: 五已變之乾爲首, 位在 . 首 上

惟用伐邑。 厲吉,无咎,貞吝。

吉无咎」而「貞吝」矣。 爲心,故「惟用伐邑」。 虞翻曰: 坤爲邑,動成震而體 得位乘五 師象,坎 故「厲

象》曰:「惟用伐邑」,道未光也。

未光也」。 荀爽曰: 陽 雖在上、動人冥豫、故「道

> 《序卦》曰: 夷者,傷也。 進必有所傷,故受之以明夷。

《九家易》曰: 言進極當降,復入于地,故曰「明夷」也。 日在坤下,其 明傷 也

坤离上下 明夷

虞翻 也。 E. 明入地中,故傷矣。 夷,傷也。臨二 之三而反晉

利艱貞。

位,則 害也。 虞翻 猶聖人君子有明德 明則傷矣,故謂之,「明夷」。 傷也。日出地上,其明乃光,至其入地, 爲艱,故「利艱貞」矣。○鄭玄曰: 曰 : 宜自艱,无幹事 謂五也。五失位,變出 而 遭 政,以避小人之 亂 世,抑 日之明傷。 ;在下 成坎 夷

《彖》曰: 明入地 中,明 夷。

蜀才曰: 九二升三,六三降二,明入地中也。 此本臨 卦也。 **案** 夷,滅

三八

明入地中則明滅也。

内文明而外柔順,以蒙大難,

之象。大難,文王君臣相事,故言「大荀爽曰" 明在地下,爲坤所蔽,「大難」

難」也。

文王以之。

大難」,得身全矣。 諸侯,喻從文王者。紂懼出之,故「以蒙干。三幽坎中,象文王之拘羑里。震爲謂坤。坤爲弑父,迷亂荒淫,若紂殺比謂坤。坤爲弑父,迷亂荒淫,若紂殺比虞翻曰: 以,用也。三喻文王,「大難」

箕子以之。 「利艱貞」,晦其明也。内難而能正其志,

対奴之矣。 (新女·) 一、"以爲志,故「正其志,箕子以之」,而正,以爲志,故「正其志,箕子以之」,而時,箕子正之,出五成坎,體离重明麗,其子正之,出五成坎,體离重明麗之。」 「與一、一、與一、

用晦而明。《象》曰: 明入地中,明夷。君子以莅

女「月海口月」」。。師象,以坎莅坤,坤爲衆、爲晦,离爲明,師象,以坎莅坤,坤爲衆、爲晦,离爲明,虞翻曰: 而,如也。「君子」謂三。體

初九,明夷于飛,垂其翼。君子于行,三日故「用晦如明」也。

不食。

于行,三日不食」也。 在上,初有明德,耻食其禄,故曰 食者,不得食君禄也。 爲君子,三者陽德成也。 荀爽曰: 「于飛」。爲坎所 火性 炎 抑 上,离 ,故曰「垂其翼」。 陽未居 日以 爲飛 喻君。 鳥,故 五,陰暗 | | 君子 不 陽 日

有攸往,主人有言。

《九家易》曰: 「主人」也。 有攸往 震 ,主人有言」也。 也。 初欲上居五 四者 四 五. 體 初 應 ,則衆陰 衆陰 爲雷聲,故曰 在 有言。 上,爲

象》曰:「君子于行」,義不食也。

也。 爽 日 暗昧在上,有明德者義 不 · 食

六二,明夷于左股,用 拯 馬壯,吉。

翼而 也。 《九家易》曰:「左股 足,二居足上,股也。二互體坎,坎主左 中和應天。應天合衆,欲升上三以壯於 馬也。二應與五,「三與五同功」,二以 故曰「明夷于左股」矣。 九三體坎,坎爲 五,故曰「用拯馬壯吉」。 离爲飛鳥,蓋取小過之義。鳥飛舒 行夷者,傷也。今初傷垂翼在下, 」謂初。爲二所 案 : 初爲 夷

《象》曰:「六二」之「吉」,順以則 九三,明夷于南狩,得其大首,不可疾貞。 《九家易》曰: 《九家易》曰: 二欲上三居 坎爲法律,君有法則衆陰當順從之矣。 方,左股之象也。 歲終田獵名曰 五爲天子。 也。 狩也。南

> 者,九 可疾貞」也 暗復明,當以漸次,不可卒正,故曰「不 位,故曰「明夷 道終,三可升 五大陽之位 上 于南狩,得其大首」。 而 ,故稱「南」也。 獵 於五,得 據大陽首 暗 自 昧

象》曰:「南狩」之志,乃大得也 以臣伐君,故假言狩。 北、北主於冬、故曰「南狩」。五居暗主 三處明終,履正 冬獵曰狩也。三互离坎,离南坎 順時,拯難興衰者也。 既獲五上之大

首,而三志乃大得也。

六四,入于左腹,獲明夷之心,于出門庭。 謂五 於順 荀 出門庭,升 故曰「入于左腹,獲 室,二爲户,三爲庭,四爲門,故曰「于出 爽日 首、欲 居坤,坤爲腹也。 陽稱左,謂九三也。「 五 上三居五,以陽爲 君位。 明夷之心」,言三當 〇干寶曰: 四得位 腹 比三,應 腹」者 心也。

一四〇

門庭」矣。

《象》曰:「入于左腹」,獲心意也。

獲心意也」。 爲心。四以坤爻爲腹,故曰「入于左腹,《九家易》曰: 四欲上三,居五爲坎,坎

六五,箕子之明夷,利貞。

故曰「利貞」矣。 故曰「利貞」矣。 故曰「利貞」矣。 故题佯狂,以明爲暗,故曰「箕子之明之惡,無可奈何,同姓恩深,不忍棄去,之惡,無可奈何,同姓恩深,不忍棄去,之惡,無可奈何,同姓恩深,不忍棄去,

不可息也」。

不可息也」。

然以正爲明而不可息,以檢別,其明。然以正爲明而不可息,以檢別,其明。然以正爲明而不可息,以條果曰: 體柔履中,內明外暗,羣陰共保象》曰:「箕子」之「貞」,明不可息也。

上六,不明晦,初登于天,後入于地。

其則。國」。今反在下,故「後入于地」,失國」。今反在下,故「後入于地」,失晦」。晉時在上麗乾,故「登于天,照四虞翻曰: 應在三,离滅坤下,故「不明

地」,失則也。《象》曰:「初登于天」,照四國也。「後入于

易傳卷第七

易傳卷第八

唐資州李鼎祚集解

《序卦》曰: 傷於外者必反於家,故受之

以家人。

韓康伯曰: 傷於外者必反諸内也。

家人,利女貞。

虞翻曰: 遯初之四也。「女」謂离巽。

家人以女爲奧主。長女、中女各得其 二四得正,故「利女貞」也。○馬融曰:

正,故特曰「利女貞」矣。

《彖》曰: 家人,女正位乎内,男正 位

乎外。

王弼曰: 謂二五也。 家人之義,以 内

本者也,故先説女矣。

家人有嚴君焉,父母之謂也。

大義也」。

得天正於五,女得地正於二,故「天地之

荀爽 之謂也」。〇王肅 日: 离巽之中有乾坤,故曰「父母 曰: 凡男女所 以

能

各得其正者,由家人有嚴君也。家人 有

嚴君,故父子夫婦各得其正,家家咸正 而天下之治大定矣。 案 : 二五相

應,爲卦之主。五陽在外,二陰在内,父

母之謂也。

父父子子,兄兄弟弟,

虞翻曰: 遯乾爲父,艮爲子,三五位

爲弟,初位正,故「兄兄弟弟」。 正,故「父父子子」。三動時震爲兄,艮

夫夫婦婦,

虞翻曰: 三動時震爲夫,巽四爲婦,初

男女正,天地之大義也。

翻

遯乾爲天,三動

が坤爲

地。

四

四 位 ĪĒ. ,故「夫夫婦婦」也。

而 家道 īĒ. 正家而天下定矣。

己 聖人教先從家始,家正而天下化之,「脩 各得其正,故「天下定矣」。○陸績曰: 三,「弟」謂初,「夫」謂五,「婦」謂二也。 以安百姓」者也。 爽曰"「父」謂五,「子」謂四,「兄」謂

象》曰: 風自火出,家人。

馬融曰: 之道,相須而成。 「家人」。火生於木,得風 " 木生火,火以木爲家, 而盛,猶夫婦 故曰

君子以言有物而行有恒。 增其烈; 其政」,故「言有物」也。大暑爍金,火不 荀爽曰: 位大言大,位小言小,「不在其位,不謀 火大,物小火小。 行有恒」矣。 大寒凝冰,火不損其熱,故曰 風火相與,必附於物。 君子之言,必因其位, 物大

> 初 志未變也 九,閑有家, 悔亡。《象》曰:「閑 有家」,

事而已。 荀爽曰: 未變從國之事,故曰「志未變也」。 治,可移於官,守之以正,故「悔亡」,而 未得治官,故「悔」。 初在潛位,未干國政,閑習家 居家理

六二,无攸遂,在中饋,貞吉。

荀爽曰: 故曰「貞吉」也 故无所得遂。供肴中饋,酒食是議,故 應有實,陰道之至美者也 曰「中饋」。居中守正,永貞其志則吉, · 六二處和得正,得正有應,有 坤 道 順從,

《象》曰:「六二」之「吉」,順以 《九家易》曰: 謂二居貞,巽順於五則 、巽也

終吝。 九三,家人嗃 嗚, 悔 厲,吉。 婦 子 嘻 嘻

吉矣。

王弼 曰: 以 陽 居陽, 剛 嚴者 也。 處下

也。嘻嘻,笑也。 ○侯果曰: 嗃嗃,嚴嘻」,失家節也。 ○侯果曰: 嗃嗃,嚴以家雖嗃嗃,悔厲猶得吉也。 「婦子嘻以家雖嗃嗃,悔厲猶得吉也。「婦子嘻避乎恭, 家與其瀆也,寧過乎嚴。是體之極,爲一家之長。行與其慢也,寧

子」也。 陽相據」,三五各相據陰,故言「婦樂過節也。「别體異家」謂三五也。「陰《九家易》曰: 别體異家,陰陽相據,喜

在位也。
在位也。
《象》曰:「富家大吉」,順

五矣。曰「富家大吉,順在位也」。謂順於曰「富家大吉,順在位也」。謂順於業。得位應初,順五乘三,比據三陽,故虞翻曰: 三變體艮,艮爲篤實,坤爲大

九五、王假有家、勿恤、吉。

下正之,故无所憂則吉。二,以天下爲家,故曰「王大有家」。天陸績曰: 假,大也。五得尊位,據四應

震,五得交二,初得交四,故「交相愛」。虞翻曰: 乾爲愛也。二稱家,三動成《象》曰:「王假有家」,交相愛也。

震爲交也。

《象》曰:「威如」之「吉」,反身之謂也。坤,故「威如」。易則得位,故「終吉」也。爲孚,故「有孚」。乾爲威如。自上之虞翻曰:謂三已變,與上易位成坎,坎上九,有孚威如,終吉。

睽者,乖也。《序卦》曰: 家道窮必乖,故受之以睽。

則 崔 窮,窮 則 乖,故 婦 子 嘻 曰 家 嘻 道窮必乖」。 過 在 失 節 0 失節

■ 离上 睽,小事吉。

臣,故「小事吉」。 問,故「小事吉」。○鄭玄曰: 睽,乖也。 所,故「吉」。○鄭玄曰: 睽,乖也。 所,故「吉」。○鄭玄曰: 睽,乖也。 以欲上,澤欲下,猶人同居而異志也,故 以欲上,澤欲下,猶人同居而異志也,故 與玄曰: 睽,乖也。

二、河岳,其、云、河丘。 虞翻曰: 离火炎上,澤水潤下也。 《彖》曰: 睽,火動而上,澤動而下。

虞翻曰: 説,兑, 麗,离也。「明」謂説而麗乎明,柔進而上行,得中而應乎剛,

同 无 乾,當言大 「剛」謂應乾五伏陽,非應二也,與鼎五 義也。 妄巽 爲 進, 明 從二 以 麗 一之五, 於晉。 故「上 「柔」 謂 一行」。 五

是以「小事吉」。

柔得其中而進於君,故言「小事吉」也。四民殊業,故「睽而不同」。剛者,君也。酉爽曰: 小事者,臣事也。百官異體,

天地睽而其事同也,

翻 王 「天地睽」。坤爲 事 一肅 曰 : 同」矣。 曰 五. 動乾爲 高卑雖異,同育 事 也。 天, 四 $\overline{\pi}$ 動 動 萬物。 體 坤 爲 同 人,故 地,故

男女睽而其志通也,

乎震,區 崔 爲類,故「其事類 類言亦同 憬 曰 : 以别矣,故「萬物 也。 萬 物 雖 心也。 虞 睽於形 翻 日 睽」。 色, 几 而 動 坤 生 萬 物 性 事

睽之時用大矣哉!

《象》曰: 上火下澤,睽。

「睽」也。 荀爽曰:火性炎上,澤性潤下,故曰

君子以同而異。

咎。《象》曰:「見惡人」,以避咎也。初九,悔亡,喪馬勿逐,自復。見惡人,无共歸於治,故曰「君子以同而異」也。殊職,四民異業,文武並用,威德相反,称爽曰: 大歸雖同,小事當異。百官

虞 以避咎」矣。 人」謂四、動入坤、初四 馬來,故「勿逐自復」也。 自,二至五體復象,故「自復」。 馬」。震爲逐,艮爲止,故「勿逐」。 位,之正入坤,坤爲喪,坎象不見,故「喪 翻 曰 : 應在于 无應,悔 坎, 坎爲 也。 復正,故「見惡人 四 离爲 馬。 動 得 四 見,「惡 四 位, 坤 . 動 而 故 震 失 爲

九二,遇主于巷,无咎。

艮爲徑路。大道而有徑路,故稱「巷」。虞翻曰: 二動體震。震爲主,爲大塗。

《象》曰:「遇主于巷」,未失道也。

變而得正,故「无咎」而「未失道也」。

虞翻 憬 遇者,不期 隔,其志終通 巷者,出門近遇之象。 曰 : 曰: 處 而 睽之時,與五有應。 動得正,故「未失道」。 會主者。 而三比焉,近不相 言二遇三,明非 三爲下卦 男女雖 之主。 得。

四六

背 五,未爲失道 也

六三,見輿曳,其牛幫。

뾬」也。 虞翻曰: 輿曳」。 仰、故稱 四 离爲見,坎爲車,爲曳,故「見 動坤爲牛、爲類。 「觜」。 离上而坎下,「其牛 牛角一低

其 人天且劓,无初有終。

《象》曰「遇剛」,是其義也。 五,以 失位,動 其鼻也。 天,割鼻爲劓。 翻 曰 : 陰墨其天。 **兑**爲 得正成乾,故「无 其人謂四惡人也。 刑人,故「其人天且 无妄乾爲天。 乾五之震二,毁 初 震二 有終」。 黥 一之乾 劓。 艮 額 割

終」,遇剛也 象》曰:「見輿曳」,位不當也。「无初 有

九 四,睽孤,遇元夫。 虞翻曰: 動正成乾,故 交孚,厲,无咎。 週剛

翻

孤,顧也。

在兩陰間, 睽五顧

上九,睽孤,見豕負塗,載鬼一

車。

坎爲孚,動而得正 變,動而 故 日 應 震 睽 孤 ,故「遇元夫」也。 ,故「交孚厲无咎」矣。 震 爲元 夫。 震爲交, 謂

《象》曰:「交孚无咎」,志行也。 虞翻曰: 坎動成震,故「志行」也。

六五,悔亡,厥宗噬膚,往何咎。 乾,乾爲慶,故往无咎而有慶矣。 乾爲宗。二體噬嗑,故曰「噬」。 虞翻曰: 艮爲膚,故曰「厥宗噬膚」也。 往得位,悔亡也。 動 變得正成 而 四變時

象》曰:「厥宗噬膚」,往有慶也

慶也」。 斯而 亡」。「厥宗」謂二也。 王弼曰: 三雖比二,二之所噬非妨己應者也。 噬膚」之象也 往,何咎之有? 案 : 非位,悔 二兑爲口,五爻陰柔, 也。 往必見合,故「有 噬膚者,齧柔也。 有應,故「悔 象》曰:「遇雨」之「吉」,羣疑亡也。

各得其正,故「則吉」也。

虞 泥,故「見豕負塗」矣。 坤爲鬼,坎爲車。 土得雨爲泥塗,四動艮爲背。 豕背有 變在坎上,故「載鬼一車」也。 离爲見,坎爲豕,爲 翻 日 睽三 顧五,故曰「睽 雨 四變時坤爲土。 孤」也。

先張之弧,後説之壺。

兑,故「後説之壺」矣。 兑爲口,离爲大腹,坤爲器。大腹有口, 坎酒在中,「壺」之象也。 張之弧」。 坎爲弧。 虞翻曰: 离爲矢,張弓之象也。 謂五已變,乾爲先。 四動震爲後。説,猶置也。 之應歷險以 應在三, 故「先 與

匪寇婚媾,往遇雨則吉。

故「匪寇」。 虞翻曰: 坎下,故「遇雨」。 匪,非。坎爲寇。之三歷坎 陰陽相應,故「婚媾」。 與上易位,坎象不見,

> 虞翻 敗,故「羣疑亡」矣。 曰: 物三稱羣。 坎爲 疑。 三變坎

《序卦》曰: 者,難也。 乖必有難,故受之以蹇。 蹇

日乖必有難 崔憬曰: 二女同居,其志乖而 也。 難生,故

蹇,利西南

五. 翻 在坤中,坎爲月。月生西南,故 日 觀上反三也。 坤, 西南

不利東北,

南。

「往得中」謂「西南得朋」也。

窮也」,則「東北喪朋」矣。 消於艮,喪乙滅癸,故「不利東北,其道 翻 三 三 : 謂三也。艮,東北之卦。月

利見大人,

虞翻 [應五,故「利見大人,往有功也」。 日 : 离爲見,「大人」謂五。二得

貞吉。

虞翻曰: 謂五「當位」「正邦」,故「

吉也。

《彖》曰: 蹇,難也,險在前也。見險而能

止,知矣哉!

虞翻曰: 离見坎險,艮爲止,觀乾爲

知,故「知矣哉」。

「蹇利西南」,往得中也。

荀爽曰:「西南」謂坤。升二往居坤五

故「得中也」。

「不利東北」,其道窮也。

荀爽曰: 東北,艮也。艮在坎下,見險

而止,故「其道窮也」。

「利見大人」,往有功也。

虞翻曰:「大人」謂五。二往應五,「五多

功」,故「往有功也」。

當位「貞吉」,以正邦也。

荀爽曰: 謂五當尊位正。居是,羣陰

順從,故能正邦國。

蹇之時用大矣哉!

貞

象出庚,兑象見丁,乾象盈甲,巽象虞翻曰: 謂坎月生西南而終東北。

退

則復始,以生萬物,故「用大矣」。

辛,艮象消丙,坤象窮乙,喪滅於癸。

《象》曰: 山上有水,蹇。

崔憬曰: 山上至險,加之以水,蹇之

象也。

君子以反身脩德。

故「以反身脩德」。孔子曰「德之不脩,反三,故「反身」。陽在三,「進德脩業」,虞翻曰:「君子」謂觀乾。坤爲身,觀上

初六,往蹇,來譽。

是吾憂也」。

以陽承二,故來而譽矣。應陰,往歷坎險,故「往蹇」。變而得位,虞翻曰:「譽」謂二,「二多譽」也。失位

象》曰:「往蹇來譽」,宜待時也。

翻 艮爲時。 謂變之正 以 待

也。

六二,王臣蹇蹇,匪躬之故。

正,故「匪躬之故」、《象》曰「終无尤也」。 虞翻曰: 蹇蹇」。觀上之三,折坤之體,臣道得 爲蹇也。之應涉坤,二五俱坎,故「王臣 觀乾爲王,坤爲臣、爲躬,坎

象》曰:「王臣蹇蹇」,終无尤也。

此,終无尤也。 故 坎中,險而又險。志在匡弼,匪惜其躬, 侯果曰: 白「王臣蹇蹇,匪躬之故」。 輔臣以 處艮之二,上應於五。五在

九三,往蹇,來反。

虞翻曰: 應正歷險,故「往蹇」。 反身

據二,故「來反」也

象》曰:「往蹇來反」,内喜之也。 虞翻曰:「内」謂二陰也。

六四,往蹇,來連。

間,進則无應,故「往蹇」。退初介三,故 「來連」也。 翻 連, 輦; 蹇, 難 也。 在 兩坎

《象》曰:「往蹇來連」,當位實也。 之三、不得承陽、故曰「往蹇」也。 荀爽曰: 處正承陽,故曰「當位實也」。 承五,則與至尊相連,故曰「來連」也。 蹇難之世,不安其所。 欲往 來還

九五,大蹇,朋來。

爲朋,故「朋來」也。 虞翻曰: 當位正邦,故「大蹇」。 睽兑

《象》曰:「大蹇朋來」,以中節也。

上六,往蹇來碩,吉,利見大人。 蹇」。此蓋以託文王爲紂所囚也。 干寶曰: 臣能以權智相救也,故曰「以中節也」。 上、據四、應二,衆陰並至,此蓋以託四 在險之中而當王位,故曰「大 承

五 〇

見,「大人」謂五 故「來碩」。 虞 翻 「碩」 日 謂三。 得位有 陰 在 ,故「利見大人」矣。 險上, 艮爲碩。 應,故「吉」也。 變 失 退來之三, 位, 故「往 离爲

人」,以從貴也。《象》曰:「往蹇來碩」,志在内也。「利見大

爲大人。若志在内,心附於五 之,故曰「往蹇」。 侯果曰: 大人」也。 目,五爲大人,「利見大人」之象也。 三德碩大,故曰「來碩」。 處蹇之極,體猶在坎,水无 **案** 來 三互體离,离 而 復 三爲 位 下應 , 則 内主,五 於三, 「利見 明 所

解者,緩也。《序卦》曰: 物不可以終難,故受之以解。

故言「物不可以終難,故受之以解」。崔憬曰: 蹇終則「來碩吉,利見大人」,

農 震上解,利西南。

兀 虞 得 翻 坤衆,故「利 \Box 臨 初 之 西南,往得衆也」。 四 坤 西 南 卦, 初之

无所往,其來復吉。

得正 吉」矣。 虞 四 而无所應,故「無所往」。 翻 來之初 位,故 曰 : 成 「 其 謂四本 屯體復象,故稱「來 來復吉」也。 從 初 之四,失位於外 宜來反初,復 二往之五,

有攸往,夙吉。

也」。早往之五則吉,故「有攸往夙吉,往有功爲甲。日出甲上,故早也。九二失正,虞翻曰: 謂二也。夙,早也。离爲日,

《彖》曰: 解利 虞翻 動之,雨 西南」,往得衆也。 震出 曰: 解,險 險上 險,坎。 以潤之」,物咸 以動 ,故「免乎險 可;動 動,震 而免乎險,解 孚甲 解二月、「雷 萬 物生

荀爽曰: 乾動之坤而得衆。西南,衆

之象也。

「无所往,

荀爽曰: 陰處尊位,陽无所往也。

其來復言」,乃得中也。

荀爽曰: 來復居二,處中成險,故曰

「復吉」也。

「有攸往夙吉」,往有功也。

荀爽曰: 五位无君,二陽又卑,往居之

者則吉。據五解難,故「有功也」。

天地解而雷雨作,

荀爽曰: 謂乾坤交通,動而成解卦。

坎下震上,故「雷雨作」也。

雷雨作而百果草木皆甲宅。今本「宅」作「坼」,

從古文「宅」而訛。

木萌牙、「雷以動之、雨以潤之、日以烜荀爽曰:解者、震世也。仲春之月、草

之」,故「甲宅」也。

解之時大矣哉

非治難時也,故不言「用」也。體盡於解王弼曰: 无所而不釋也。難解之時,

之名,无有幽隱,故不曰「義」也。

初六,无咎。

射隼以解悖」,是其義也。

虞翻曰: 與四易位,體震得正,故「无

咎」也。

《象》曰: 剛柔之際,義「无咎」也。

虞翻曰: 體屯初震,「剛柔始交」,故

「无咎」也。

九二、田獲三狐、得黄矢、貞吉

__. Ті.

五 二

之正得中,故「貞吉」。 艮爲狐,坎爲弓,离爲黄矢。 二之五歷三爻,故「田 翻 日 二稱 田, 獲三狐,得黄矢」。 獵 也。 矢貫狐體, 變之正

《象》曰:「九二」「貞吉」,得中道也。 虞翻曰: 動得正,故「得中道」。

六三,負且乘,

致寇至,貞吝。 謂三以四艮倍五也。 乘君子之器」,故《象》曰「亦可醜也」。 車。三在坤上,故「負且乘」。 翻曰: 負,倍也。 五來寇三時,坤爲 二變時 「小人而 艮 爲背

也。 虞翻 位 寇至貞吝」、《象》曰「自我致戎,又誰咎 [慢五,下暴於二,「慢藏悔盜」,故「致 曰 : 五之二成坎,坎爲寇盜。

《象》曰:「負且乘」,亦可醜也。 自我致戎

> 离兵伐三,故 誰咎也」。 轉 寇爲戎。 艮手招盗,故

虞翻

日

臨

坤 爲

醜

也。

坤爲

自

我,

九四,解而母,朋至斯孚。

母,故「解而母」。 臨兑爲朋,坎爲孚,四 虞翻曰: 二動時艮爲指,四變之坤爲

象》曰:「解而母」,未當位也。 王弼曰:

陽從初,故「朋至斯孚」矣。

附之爲其拇也。三爲之拇則失初之應, 拇之象。 案: 「解其拇」然後「朋至斯孚」而信矣。 九四體震,震爲足。三在足下, 失位不正而比於三,故三得

六五,君子惟有解,吉。有孚于小人。 五。陰爲小人。君子升位則 虞翻曰:「君子」謂二。之五得正成坎, 坎爲心,故「君子惟有解吉」。 「小人」謂 一,故「有孚于小人」。 坎爲孚也。 小人退在

《象》曰:「君子有解」,「小人」退也。

二也。 二陽上之五,五陰小人退之

不利。 上六,公用射隼于高庸之上,獲之,无

象》曰:「公用射隼」,以解悖也。 离爲隼。三在山半,「高墉」之象也。 无不利」也。 案: 二變時體艮,艮爲无不利」也。 案: 二變時體艮,艮爲 是不利」也。 案: 二變時體及,及為之, 與死象,故「公用射隼于高庸之上,獲之 以為軍。三失位,動出成乾貫隼,入大 以為軍, 上應在三公,謂三伏陽也。

君也。陰盜陽位,萬事悖亂,今射去之,鷙鳥也。今捕食雀者,其性疾害,喻暴壞,故「解悖」也。○《九家易》曰: 隼,虞翻曰: 坎爲悖。三出成乾而坎象

〈序卦》曰: 緩必有所失,故受之以損。

故

「以解悖也」。

損」者也。 於政刑,故言「緩必有所失,故受之以崔憬曰: 宥罪緩死,失之於僥倖,有損

艮上 損,

貢獻於天子,故謂之「損」矣。損,增山之高也。猶諸侯損其國之富以爲地。山在地上,澤在地下。澤以自鄭玄曰: 艮爲山,兑爲澤,互體坤,坤

曷之用,二簋可用享。

者也。上」,惟在乎心,何必竭於不足而補有餘肝,惟在乎心,何必竭於不足而補有餘所用。可用二簋而享也。以喻「損下益崔憬曰: 曷,何也。言其道上行,將何

五四四

《彖》曰: 損,損下益上,其道上行。

損而「有孚,

荀爽曰: 謂損乾之三居上孚二陰也。

元吉,无咎。

可貞,

當相承,故曰「可貞」。 荀爽曰: 少男在上,少女雖年尚幼,必

利有攸往,

荀爽曰: 謂陽利往居上。損者,損下

益上,故利往居上。

曷之用,二簋可用享」。

荀爽曰:「二簋」謂上體二陰也。上爲宗

二簋應有時,

廟。

簋者,宗廟之器,故可享獻

也。

秋也。謂春秋祭祀,以時思之。艮爲二月,益正月,春也。損七月,兑八月,虞翻曰:「時」謂春秋也。損二之五。震

損剛益柔有時。

時,震爲應,故「應有時」也。

离夏,故「損剛益柔有時」。 坤爲柔。謂損益上之三成既濟。坎冬虞翻曰: 謂冬夏也。二五已易成益。

損益盈虚,與時偕行。

虞翻 故 五,益上之三,變通 「損益 曰 : 盈虚」。 乾爲盈 謂泰 ,坤爲虚。 趨 初之上,損二之 時, 故「與 損 剛益柔, (時偕

行。

《象》曰: 山下有澤,損。君子以徵忿

室欲。

虞翻曰:「君子」泰乾。乾陽剛武爲忿,

忿」。 坤陰吝嗇爲欲、損乾之初成兑説,故 初上據坤艮爲山,故「室欲」也。 「徴

初九,祀事遄往,无咎,酌損之。

也」。「祀」,舊作「巳」也。 遄,速; 「遄往无咎,酌損之」,《象》曰「上合志 往合志於五、得正无咎、己得之應、故 虞翻曰: 酌,取也。二失正,初利二速 祀,祭祀。 坤爲事,謂二也。

象》曰:「祀事遄往」,上合志也

五也。 虞翻 曰: 終成既濟,謂二上合志於

九二,利貞,征凶,弗損益之。

損益之」矣。 征,行也。震爲征,失正毁折,故不征之 虞翻 曰: 五則凶。二之五成益,小損大益,故「弗 失位,當之正,故「利貞」。

象》曰:「九二利貞」,中以爲志也。 虞翻曰: 動體离中,故「爲志也」。

六三,三人行,則損一人。

「三人行」。 損初之上,故「則損一人」。 虞翻曰: 泰乾三爻爲三人,震爲行,故

人行,則得其友。

柔」,故「一人行」。兑爲友,初之上據坤 虞翻曰: 一人謂泰初之上,「損剛益

《象》曰:「一人行」,「三」則疑也。

應兑,故「則得其友」。言致一也。

行,三陽在下則民衆疑也。 則疑」。〇荀爽曰: 虞翻 曰: 坎爲疑。上益三成坎,故「三 一陽在上則教令

六四,損其疾,使遄有喜,无咎。 遄有喜」。 二上體觀,得正承五,故「无 咎」矣。 坎爲疾也。陽在五稱喜,故「損其疾,使 虞翻曰:「四」謂二也。四得位,遠應初。 二疾上五,己得承之,謂二之五,三上復

《象》曰:「損其疾」,亦可喜也。

使上遄喜。 疑矣。 才 象,故「可喜也」。 日 初, 四 〇虞 當 四之疾也。 承上 翻 曰 : 丽 有 二上之五體大 宜損去其 初 應,必上之

曰:「或之者,疑之也」,故用元龜。價直上,人謀允叶,龜墨不違,故能延上九之上,人謀允叶,龜墨不違,故能延上九之上,人謀允叶,龜墨不違,故能延上九之上,人謀允叶,龜墨不違,故能延上九之上,人謀允叶,龜墨不違,故能延上九之人,以其允叶,龜墨不違,故能延上九之人,以其允叶,龜墨不違,故能延上九之一,以其允叶,龜墨不違,故能延之,以其之。

「朋」也。 違其益之義,故獲「元吉」。雙貝曰二十大貝,龜之最神貴者以決之,不能

既濟,故「大得志」。 得位,故「弗損益之,无咎貞吉」。 動成虞翻曰: 損上益三也。上失正,之三上九,弗損益之,无咎,貞吉。

利有攸往,得臣无家。 虞翻 之極,損極則益,故曰「不損益之」。 羣下共臣,故曰 无咎也,爲下所益,故「无咎」。 人壞,故曰「无家」。 人,故曰「得臣」。 之吉也,故「利有攸往」矣。 三,三陰上附,外内相 二五已動成益坤,爲臣,三變據 軌,故「无家」也。 日: 謂三往之上,故「利有攸 「得臣」矣。 動而應三成既 應,上下交接,正 王肅 得臣則萬方 曰 : 剛陽居上, 據五應 坤 濟 往 則家 成 處 損 非 家

象》曰:「弗損益之」,大得志也。

虞翻 ;定,离坎體正,故「大得志」。 曰 : 謂二五已變,上下益三 成既

序卦》曰: 崔憬曰: 而不已必益」也。 損終則「弗損益之」,故言「損 損而不已必益,故受之以益。

異 震上 下 益,利有攸往,

中正· 虞翻 道大光」,二利往坎應五 三 三 : 有慶」也。 否上之初也。 ,故「利有攸往, 「損 上益 下,其

利涉大川。

虞翻 是天子損其所有以下諸侯也。人君之 爲大川,故「利涉大川」。 陰,臣多於君矣。 義,陽稱爲君,陰稱爲臣。今震一陽二 木道乃行」也。 티 : 謂三失正,動成坎體 而四 ○鄭玄曰: 一體巽,之不應初, 涣,舟檝象, 陰陽之 涣。 坎

> 爲大川,故「利涉大川」矣。 巽爲風。 出教令,臣奉行之,故「利有攸往」。 道,以益下爲德,故謂之益 雷動風行,二者相成,猶人君 也。 震爲雷

《彖》曰: 益,損上益下,

蜀才曰: 九,下處坤初; 「損上益下」者也。 此本否卦。 坤之初六,上升乾四, 案: 乾之上

民説无疆。

笑。「以貴下賤大得 虞翻曰: 上之初,坤爲无疆, 民」,故「説无 震爲 喜

疆」矣。

自上下下,其道大光。

道大光」。 虞翻曰: 或以上之三,离爲大光矣。 乾爲大明,以乾照坤,故「其

利有攸往」,中正有慶。

虞翻曰: 「中正」謂五 而二應之,乾爲

慶也。

五七

Ŧī.

利涉 大川」,木道乃行

見,乾爲

善,坤

爲過

坤

三進之乾四,故

「見善則遷」。

乾上之坤

初,改坤之過,

巽木得水,故「木道乃行」也。 翻 曰 : 謂三動成涣。 涣, 檝 象

益動 而巽,日進无疆

疆」也。 進,坤爲疆。 翻 曰 : 震三動爲离,离爲 日與巽俱進,故「日進无 日, 巽爲

天施地生,其益无方。

震,故「天施地生」。陽在坤初爲无方, 虞翻曰: 「日進无疆」,故「其益无方」也。 乾下之坤,震爲出生,萬物出

凡益之道,與時偕行。

行」也。 虞翻曰: 時,震爲行, 上來益三,四時象正。 與損 同 義, 故「與 艮爲 時 偕

過則改。 象》曰: 風雷 益。 君子以見善則 遷,有

六二,或益之十朋之龜,弗克違,永貞吉。

虞翻曰:

謂上從外來益三,故「或益

之」。 二得正遠應,利三之正,己得承

虞翻曰:「君子」謂乾也。 上之三, 离爲

> 初九,利用爲大作,元吉,无咎。 星鳥」、「敬授民時」、故以耕播也。 咎」,故「元吉无咎」。震,三月卦,「日中 取諸此也。 虞翻曰:「大作」謂耕播,「耒耨之利」,蓋 體復象,「復以自知」,故「有過則改」也。 「利用爲大作」。體復,初得正,「朋來无 坤爲用,乾爲大,震爲作,故

《象》曰:「元吉无咎」,下不厚事也。 畯,則大吉无咎矣。 作。若能不厚勞於下民,不奪時於農 大者,莫大耕植,故初九之利,利爲大 侯果曰:「大作」謂耕植也。處益之始, 居震之初。震爲稼穡,又爲大作。益之

故「十朋之龜」。 故「永貞吉」。 坤數十,損兑爲朋,謂三變离爲龜 坤爲永,上之三得正

王用享于帝,吉。

之象,是則蒼精之帝同始祖矣。 神,故「王用享于帝」。 嗑食,故「王用享于帝」。得位,故「吉」。 體觀象,艮爲宗廟。三變折坤牛,體噬 虞翻曰: 震稱帝,王謂五。 否乾爲王 〇干寶曰: 聖王先成其民而後致力于 在巽之宫,處震

六三、益之用凶事、无咎。 象》曰:「或益之」,自外來也。 虞翻曰: 乾上稱外,來益三:

得正,故「益用凶事无咎」。 虞翻曰: 坤爲事。三多凶,上來益

有孚中行,告公用圭 虞翻曰:「公」謂三伏陽 故「有孚」。震爲「中行」,爲「告」。 也。 三動體坎 位在

> 象》曰:「益用凶事」,固有之矣。 臣,桓文之爻也,故曰「益之用凶事」。 震之動,懷巽之權,是矯命之士,争奪之 弑,功實濟世。六三失位而體姦邪,處 虞翻曰: 民,故曰「无咎」。既乃中行近仁,故 在益之家而居坤中、能保社稷、愛撫人 諸侯,各執之以朝見天子也。 之三,故「告公用圭」。 圭,桓圭 子執穀璧五寸,諸男執蒲璧五寸,五等 諸侯執信圭七寸,諸伯執躬圭七寸,諸 天,以九寸事地也。上公執桓圭九寸, 中,故曰「中行」。三公位。乾爲圭,乾 命,故曰「告公用圭」。 有孚中行」。然後俯列盟會,仰致錫 ○《九家易》曰**:**)干寶曰:「固有」如桓文之徒,罪近篡 三上失正當變,是「固有之」。 天子以尺二寸玄圭事 也。

六四,中行,告公從,

一六〇

公從」矣。位,四利三之正,己得以爲實,故曰「告爲從,故曰「中行」。「公」謂三。三上失虞翻曰:「中行」謂震。位在中,震爲行,

利用爲依遷邦。

徙,故「利用爲依遷邦」也。 虞翻曰: 坤爲邦。遷,徙也。三動坤

像》曰:「告公從」,以益志也。 「以益志也」。○崔憬曰: 益其勤王之 市四上公得藩屏之寄,爲依從之國。若 而四上公得藩屏之寄,爲依從之國。若 而四上公得藩屏之寄,爲依從之國。若 一四上公得藩屏之寄,爲依從之國。若 一四上公得藩屏之寄,爲依從之國。若 一四上公得藩屏之寄,爲依從之國。若 一四上公得藩屏之寄,爲依從之國。若 一四上公得藩屏之寄,爲依從之國。若 一四上公得藩屏之寄,爲依從之國。若 一四上公司。○崔憬曰: 益其勤王之 一四上公司。○崔憬曰: 益其勤王之 一四上公司。○崔憬曰: 益其勤王之 一四上公司。○崔憬曰: 益其勤王之 一四上公司。○ 本司,以益志也。

位,三五體坎,已成既濟,坎爲心,故「有虞翻曰:謂三上也。震爲問。三上易九五,有孚惠心,勿問,元吉。

有孚惠我德。

孚惠

心,

勿問

元吉」、《象》曰「勿

問之

德」,大得志也。《象》曰:「有孚惠心」,勿問之矣。「惠我《象》曰:「有孚惠心」,勿問之矣。「惠我坎爲孚,故「惠我德」、《象》曰「大得志」。虞翻曰: 坤爲我,乾爲德。三之上體

上九,莫益之,

者,唯上當无應,故「莫益之」矣。 虞翻曰: 莫,无也。自非上,无益初

或擊之,

虞翻曰: 謂上不益初,則以剥滅乾,艮

爲手,故「或擊之」。

立心勿恒,凶。

動成坎心,以陰乘陽,故,「立心勿恒虞翻曰: 上體巽,爲進退,故「勿恒」。

凶」矣。

《象》曰:「莫益之」,徧辭也。

虞翻曰: 徧,周帀也。 三體剛凶,故至

上應乃益之矣。

或擊之」,自外來也。

虞翻曰:「外」謂上。上來之三,故曰「自

外來也」。

易傳卷第八

易傳卷第九

資州李鼎 祚集解

唐

《序卦》曰:

益

而

不已必決,故受之以夬。

夬者,決也。

韓康伯曰: 益 ൬ 不已 則盈 ,故必決矣。

—— 兑 乾 上 下 夬,揚于王 庭

虞翻 也。 之,是猶聖人積德,説天下以漸,消去小 之象也。 陽氣浸長至於五。 人,至於受命爲天子,故謂之決。 剥旁通。 揚于王庭」矣。○鄭玄曰: 五互體乾,乾爲君,又居尊位,王庭 티 : 陰爻越其上,小人乘君子,罪 乾爲揚、爲王,剥 陽決陰,息卦 五. ,尊位也,而陰先 也。 艮爲庭,故 剛決柔,與 夬,決也。 揚,越

> 庭」也 惡上聞 於聖人之朝, 故 曰「夬揚 于 王

乎號有厲,

虞 不變則危,故「孚號有厲,其危乃光也」。 也。二失位,動體巽,巽爲號,离爲光。 翻曰: 陽在二五 稱孚。 「孚」謂五

告自邑,不利即戎。

所尚乃窮也」。 衆消滅。 告,坤爲自邑。 虞翻曰: 二變時离爲戎,故「不利即戎 陽息動復,剛長成夬。 央從復升 ,坤逆在 上,民 震爲

利有攸往。

虞翻 利有攸往,剛長乃終」。 曰 陽息 陰消,「君子 道 長」,故

《彖》曰: 虞翻曰: 夬,決也,剛決柔也 乾決坤

健而説,決而 和。

虞 翻 티: 健,乾; 説,兑 也。 以 乾陽

獲陰之和,故「決而 和」也。

揚于王庭」,柔乘五 剛 也。

誅而无忌者也,故可「揚于王庭」。 王弼曰: 剛德浸長,一柔爲逆,衆所 口

孚號有厲」,其危乃光也。

小,功高而意下,故曰「其危乃光也」。 君,君子危之,故曰「有厲」。 號令,故曰「孚號」。以剛決柔,以 則「飛龍在天」之爻也。 荀爽曰: 六,陽乃光明也。○干寶曰: 信其號令於下,衆陽危 應天順 德大即心 民 夬 九五五 臣伐 以發 去 H

告自邑,

翟玄曰: 民告周以紂无道 坤稱! 邑 也。 〇干寶曰: 殷

不利即戎」,所尚乃窮 也。

荀爽曰: 不利即尚兵戎,而 與陽争必

木 窮。

利有攸往」,剛長乃終也。

虞翻曰: 剛,故乃以 終也。 乾體大成以決小人,終乾之

《象》曰: 澤上於天,夬。

陸績曰: 水氣上天,決降成 雨, 故 日

夬」。

君子以施禄及下,居德則忌。

虞翻 忌」。陽極陰生,謂陽忌陰。 及下」。乾爲德,艮爲居,故「居德則 謂剥坤。坤爲衆臣,以乾應坤,故「施禄 曰"「君子」謂乾。乾爲施禄,「下」

初九,壯于前趾,往不勝,爲咎。

之,往如失位,故「往不勝爲咎」。 虞翻曰: 在前,故「壯于前」。剛以 夬變大壯。大壯震爲趾,位 應剛,不能克

《象》曰:「不勝」而「往」,咎也。

虞翻曰: 往失位應陽,故「咎」矣。

九二,惕號,莫夜有戎,勿恤。

虞翻曰: 惕,懼也。二失位,故「惕」。

六四

成既濟定也。 成坎,坎爲憂,坎又得正,故「勿恤」。 變成巽,故「號」。 离,离爲戎,變而 得正,故「有戏」。 剥坤爲莫夜。二動 四 戀 成

象》曰:「有戎勿恤」,得中道也 虞翻曰: 動得正 應五,故「得中道」。

九三,壯于頄,有凶。

稱頄。 凶」也。 翟玄曰: 頄,頰間骨。 頄,面也。 三往壯上,故「有 謂上處乾首之前

君子夬夬,獨行遇雨

陰所施,故 也 同 荀爽曰: 功,二爻俱欲決上,故曰「君子夬夬」 「獨行」謂一爻獨 「遇雨」也。 九三體乾,乾爲君子。 上,與陰相 應,爲

濡 有愠,无咎。

无咎」也。 爽 日 雖 爲 陰 所 濡,能 愠 不說,得

> 象》曰:「君子夬夬」,終无咎也。 爲善。 之不疑,故曰「夬夬」也。若不與陽爲羣 以凶也。君子處之,必能棄夫情累,決 道長。然則處陰長 體上,故曰「頄」也。 王弼曰: 而獨行殊志,應於小人,則受其困 而助柔則凶矣。 遇雨若濡有愠」而終无所咎也。 夫剛長則君子道興,陰盛則 頄,面顴 而三獨應上助小人 而 也,謂上六矣。 剥之六三,以 助 陽則善,處剛 **分人** 應 長 處

九四,臀无膚,其行次且。

虞 行,坎爲破,爲曳,故「其行次且」。 膚,毀滅不見,故「臀无膚」。)翻曰: 二四已變,坎爲臀,剥艮 大壯 震 爲 爲

牽羊悔亡,聞言不信。

持繩,故「牽羊」。 謂四之正,得位承五 虞翻曰: 「悔亡」。震爲言,坎爲耳,震坎象不 兑爲羊,二變巽爲繩,剥艮手 中行无咎。

正 ,故「聞言不信」也

翻

曰 :

莧,説也

。「莧」讀「夫子莧爾

信」,聰不明也。 曰:「其行次且」,位不當 也。 「聞言不

故「聰 正,故「行趑趄」矣。 股,四爲臀。當陰柔,今反 體兑故也。凡卦,初爲足,二爲腓,三爲 臀无膚」。九四震爻,震爲足。 翻 不明」矣。 案 : 离,目。 兑爲 剛 折人於兑, 陽,故 羊 足既不 , 四 五

九五,莧陸夬夬,

堅也。 且赤,以言陰在上六也。陸亦取葉柔根 上,故曰「夬夬」也。 荀爽曰:「莧」謂五,「陸」謂三。 陸」也。 莧」也。 莧根 去陰遠,故言「陸」。 言差堅於 小,陸 三體乾剛在下,根深,故謂之 根大。 莧者,葉柔 五體 兑柔居上, 兩 而 爻決 根 堅

坎,耳。

象》曰:「中行无咎」,中未光也。 虞翻 行无 五 至賤,雖其克勝,未足多也。 柔,以君子除小人也。 易,故曰「夬夬」也。 夬之爲義,以剛決 馬君、荀氏皆從俗言「莧陸」,非也。 王弼曰: 壯震爲行,五在上中,動而 而笑」之「莧」。陸,和睦也。 震爲笑言, 以免咎而已、未爲光益也。 小人,躬自決者也。夫以至尊而敵於 得正位,兑爲説,故「莧陸夬夬」。大 咎」。 曰 : 舊讀言「莧陸」,字之誤也。 莧,草之柔脆者也,夬之至 在坎陰中,故「未光也」。 而五 得正,故「中 處中而行, 處尊位,最

上六,无號,終有凶。

爲號令。 虞翻曰: 見,故「无號」。 四已變坎,之應 應在於三。三動 位 極乘 陽,故「終有 歷 險,巽象不 時

凶」矣。

象》曰:「无號」之「凶」,終不可 虞翻 曰 : 陰道消滅,故「不可長也」。 長 也。

者,遇 《序卦》曰: 也。 決必有遇,故受之以 姤。 姤

崔憬曰:「君子夬夬, 獨行遇雨」,故言

決必有遇」也

乾上 姤,女壯,

虞翻曰: 女。女壯, 傷 消卦也, 也。 陰 與復旁通。 傷陽, 柔消 巽, 長 剛, 故

勿用取女。

「女壯」也。

虞翻曰: 陰息剥陽, 以 柔變剛, 故 一勿

用取女,不可與長也」。

姤, 遇也,柔遇剛 也。 勿 用 取

鄭玄曰: 姤, 遇 也。 陰 承 五 陽,一女

> 婦人以婉娩爲其德也。 當五男,苟 「姤女壯」。 相遇耳。 如是壯健以 非 禮之正 淫,故不可娶。 ,故謂之

不可與長也

長久也。 王肅曰: 女不可取,以其不正,不 可 與

天地相遇,品物咸章也

也。 於离, 荀爽 坤從离出,與乾相遇,故言「天地遇」也。 成於巽。 至四月,六爻成乾。 曰 : ○《九家易》曰: 與乾相 既成,轉舍於离,萬物皆盛大。 謂 乾成 遇,南 於異 巽位在巳,故言乾 方夏位,萬物 謂陽起子, 而 舍於离, 運行 章 坤 明 出

剛遇中正,天下大行也。

翟玄曰:「剛」謂九五。 遇 中 處 Œ, 教化

姤之時義大矣哉! 大行於天下也。

陸績 曰: 天地相遇,萬物亦然,故其義

大也。

《象》曰: 天下有風,姤。

以施令,告化四方之民矣。 翟玄曰: 天下有風,風无不周布,故君

后以施命誥四方。

爲五月矣。 時」,經用周家之月。夫子傳《彖》、《象》 初、故以「誥四方」也。 以下,皆用夏家月,是故復爲十一月,姤 方,巽八月西方,復十一月北 虞翻曰: 稱「后」。 命,爲誥。 與泰 后,繼體之君。 復震二月東方, 姤五 稱 后 同 . 義 也 孔子「行夏之 姤 乾爲 陰在 方,皆總在 下,故 施 一月南 巽

初六,繫于金柅,貞吉。

乾爲金。巽木入金,柅之象也。初四失虞翻曰:「柅」謂二也。巽爲繩,故繋柅。

有攸往,見凶。

正

,易位乃吉,故「貞吉」矣。

吉,故 故以 凶 往 九家易》曰 也也 應四, 喻 〇曰「貞 初 往 宜 八吉」。 則有 繋 三也。 絲 今既爲二所據,不可 凶,故曰「有攸往見 繫 於柅,猶女繫於男, 若能 專心 順二則

羸豕,孚,蹯蹊。

退則躋 得從 **豕**蹄 逐 貌 繫豕者也。 體坎,坎爲豕、爲孚,異繩操之,故 子弑父,否臣 虞翻 曰: 「有攸往見凶」矣。 三夬之四,在夬動 羸豕孚蹄 羸」也。巽爲舞、爲進 也 應,故不安矣。 也。 遯 也。 以 遯」,以喻 巽 〇宋衷 一弑 陰 爲股,又爲進退。 初應於四,爲二所據,不 君,夬時三動离爲見,故 消 陽,「往」謂 目 體巽爲風,動摇之 姤 女望 退,操 羸,大索 一於五 成 而 股而 坤 舞, ~; 所 陽, 進 以 如 故 稱 而 遯

《象》曰:「繫于金柅」,柔道牽也

六

虞翻 陰道柔,巽爲繩,牽於二也。

九二,包有魚,无咎。 不利賓。

白茅包之」。「魚」謂 巽爲白茅,在中稱包、《詩》云 初陰,巽 (爲魚。

雖失位,陰陽相承,故「包有魚无咎」。

「不利賓」。或以包爲庖厨也 賓」謂四。 乾尊稱賓。 二據 四 應,故

象》曰:「包有魚」,義不及賓也。

咎」也。 爲,故「不及賓」。 初自樂來應己之厨,非爲犯應,故「无 不正之陰,處遇之始,不能逆近者也。 王弼曰: 擅人之物,以爲己惠,義所不 初陰而窮下,故稱「魚」也。

九三,臀无膚,其行次且。厲,无大咎。 虞翻 厲,故无大咎矣。 折艮體,故「臀无膚」。復震爲行,其象不 ,故「其行次且」。 曰: 夬時動之坎爲臀,艮爲膚。 三得正位,雖則危 案: 巽爲股,三居

> 一臀也。 爻非柔,「无膚」「行趑趄 也

《象》曰:「其行越且」,行未牽也。

正,故「未牽」也。 虞翻曰: 在夬失位,故牽羊。 在姤

得

九 四,包无魚,起凶。

民 王弼曰: 而動,失應而作,是以凶矣。 二有其 魚,四 放失 之也。

无

象》曰:「无魚」之「凶」,遠民也。

初六矣。 終不遂心,故曰「无魚之凶遠民也」。 其魚而賓不及。 崔憬曰: 雖與初應,而失其位。二有 若起於競,涉遠必難, 謂

九五,以杞苞瓜,含章。

虞翻 兑口,故 陽,己得乘之,故曰「含章」。 爲苞,乾圓 五. 也。 稱「含」也。 稱瓜,故「以杞苞瓜」矣。「含 杞,杞柳,木名也。巽爲杞、 五欲使初四易位,以陰含 〇干寶曰: 初之四 初

體巽爲草木,二又爲田。 田 中之果柔而

蔓者,瓜之象也。

有隕自天。

》翻 曰: 隕,落也。 乾爲天。 謂 四 隕

之初,初上承五,故「有隕自天」矣。

《象》曰:「九五含章」,中正也。「有隕自

天」,志不舍命也。

虞翻曰: 巽爲命也。 欲 初之四承己,

故 「不舍命」矣。

上九,姤其角,吝,无咎。

虞翻曰: 乾爲首。位在首上, 故 稱

而得正,故「无咎」。

《象》曰:「姤其角」,上窮「吝」也

已,故曰「姤其角」也。 王弼曰: 進之於極,无所復遇,遇角 進 而无遇, 獨 恨 而

而已。不與物牽,故曰「上窮吝也」。

《序卦》曰: 物相遇 而後聚,故受之以萃。

萃者,聚也。

相遇而後聚。 崔憬曰:「天地 相遇,品物咸章」,故言物

虞 翻 觀 上之四 廟。 也。 觀乾

利見大人,亨,利貞。

四,故「假有廟,致孝享」矣。

假,至也。

艮爲廟。

體觀

享祀。

爲王。

正,變成离,离爲見,故「利見大人,亨, 虞翻曰:「大人」謂五。三四失位,利之

利貞,聚以正也」。

用大牲,吉,利有攸往。 以順道承事其君,説德居上待之。上下 四,故「利有攸往,順天命也」。○鄭玄 三、折坤得正、故「用大牲吉」。 虞翻 曰: 應,有事而 萃,聚也。 坤爲牛,故曰「大牲」。 和通,故曰「萃亨」也。 坤爲順 ,兑爲説。 三往之 四之

集解

長子。 也。 事,必殺牛而盟。 伏,鬼神之象。長子入闕,升堂祭祖 上,殺牛之象也。 之禮也,故曰「王假有 在闕上,宫室之象也 「利往」。 也 大牲,牛也。 离爲目,居正 五本坎爻,坎爲隱伏。 互有 案 : 艮巽,巽爲木, 言大人有嘉會時可 既盟 坤爲牛。巽木下剋坤 應 Ŧi. 廟」。 則 ,故「利見大人」 兀 可 本震爻,震 艮爲 以 二本离爻 居尊而 往,故 闕。 禰 日 幹 隱 木

故聚也。 萃,聚也。順以説,剛中而應,

從之,故能聚衆也。 荀爽曰: 謂五以剛居中,羣陰順説而

「王假有廟」,

大也。言五親奉上矣。百物以祭其先,諸侯助祭于廟中。假陸績曰: 王,五, 廟,上也。王者聚

致孝享也。

謂「享」。坤牛,故「致孝享」矣。 虞翻曰: 享,享祀也。五至初有觀角

「利見大人亨」,聚以正也。

「利貞,

《九家易》曰: 五以正聚陽,故曰「利

貞」。

觀其所聚,而天地萬物之情可見矣!

可見矣」。與大壯、咸、恒同義也。日,日以見天,月以見地,故「天地之情虞翻曰: 三四易位成离坎。坎月离

《象》曰: 澤上於地,萃。

荀爽曰: 澤者,卑下。流潦歸之,萬物

生焉,故謂之「萃」也

君子以除戎器,戒不虞。 虞翻 器」也。 也。 虞」也。 艮爲石。 在三,四爲脩,坤爲器。 戎兵,甲胄,飛矢。坎爲弓弧,巽爲繩, 《詩》曰「脩爾車馬,弓矢戎兵」。陽 曰:「君子」謂五。 謂救甲胄鍛厲矛矢,故「除戎 坎爲寇,坤爲 三四之正,离爲 除,脩; 亂,故「戒不 戎,兵

初六,有孚,不終,乃亂乃萃。

坎中,故「有孚」。失正當變,坤爲終,故 虞翻曰: 「孚」謂五也。 不終」。萃,聚也。 乃亂乃萃」。失位不變則相聚 坤爲亂,爲聚,故 初 四 爲亂 易位,五

若號,一握爲笑。勿恤,往无咎。 虞翻曰: 《象》曰「其志亂也」。 握」。 初動成震,震爲笑。四 巽爲號,艮爲手,初 稱 一**,** 故 動成

> 恤。 坎,坎爲恤 初之四得正,故「往无咎」矣。 故「若 號,一握爲笑, 勿

《象》曰:「乃亂乃萃」,其志亂也。 虞翻曰: 坎爲志。 初不之四,故「其志

六二,引吉,无咎。

亂也」。

吉」。得正應五,故「无咎」。 初使避己,己得之五也。 翻曰: 應巽爲繩, 艮 爲 手,故 利引四之 引

孚乃利用禴

嘗」,是其義 虞翻 离爲夏,故「禴祭」。《詩》曰「禴祭蒸 象,故「利用禴」。 曰:「孚」謂 五. 四之三,故「用大牲」。 禴,夏祭也。 體觀

《象》曰:「引吉无咎」,中未變也 弼曰: 虞翻曰: 中,己獨履正。與衆相殊,異操而聚。 居萃之時,體柔當位。處坤之 二得正,故「不變」也。〇王

一七二

於鬼神矣。 於害,故必待五引,然後乃吉而无咎。 於害,故必待五引,然後乃吉而无咎。 於害,故必待五引,然後乃吉而无咎。

不當也。 《象》曰「大吉无咎」,位 人四,大吉,无咎。《象》曰「大吉无咎」,位 虞翻曰: 動之四,故「上巽」。

而得正,承五應初,故「大吉」而「无虞翻曰:以陽居陰,故「位不當」。動

九五,萃有位,无咎,匪孚。元永貞,悔亡。

虞翻 初,故「悔亡」。 正,故[元永貞」。 「匪孚」,謂四 曰 : 得位居中,故「有 也。 與比彖同義 四變之正則 位 五 无 四 體 咎」。 動之 皆

上六,齎資涕洟,无咎。 爲鼻。 資涕洟」之哀。 爲進,故「齎資」也。 三之四體 三,故「无咎」。上體大過死象,故有「齎 稱賻,自目曰涕,自鼻稱洟。 虞翻曰: 涕淚流鼻目,故「涕洟」。 齎,持; 資,賻 也。 坤 离坎,艮 爲財, 貨 財 得位應 巽 吧

滅遷移,以喻夏桀殷紂,以上六陰爻代〇荀爽曰: 此本否卦。上九陽爻,見虞翻曰: 乘剛遠應,故「未安上也」。《象》曰:「齎資涕洟」,未安上也。

微子於宋。去其骨 之。若夏之後封東婁公於杞,殷之後 封土,未安居位,故曰「齎資涕洟,未安 肉,臣服異姓,受人 封

上也」。

升也。 《序卦》 E. 聚而上者謂之升,故受之以

也」。 而升爲王矣,故言「聚而上者謂之升 티 : 用大牲而 致孝享,故順天子

■ 坤巽 上下 升,

德日益高大也,故謂之升。升,進益之 鄭玄曰: 中,日長而上。 升,上也。 猶聖人在諸侯之中 坤地巽木,木生地 **-**,明

元亨,

虞翻曰: 應」,故「元亨」也。 臨初之三,又有巽象。 剛 中

用見大人,勿恤

虞翻曰: 坎爲恤。二之五得正,故「用見大人勿 謂二當之五爲大人,离爲見,

南征吉。

恤,有慶也」。

虞翻曰: 「南征吉、志行也」。 离,南方卦。 二之五成离,故

《彖》曰: 柔以時升,

邑无君,二當升五虚。 虞翻曰:「柔」謂坤五也,「升」謂二。 震兑爲春秋,二 坤

升坎离爲冬夏,四時象正,故「柔以時

升」也。

巽而順,剛中而應,是以大亨。

荀爽曰: 能「大亨」,上居尊位也。 謂二以 剛居中而 來應五,故

「用見大人勿恤」,有慶也。

荀爽曰: 大人」。 羣陰有主, 无所復 大人,天子。謂升居五見爲 憂而「 有

南征吉」,志行也。

虞翻曰: · 二之五,坎爲志,震爲行。

象》曰: 地中生木、升。

木,以微至著,升之象也。 荀爽曰:「地」謂坤,「木」謂巽。 地中生

君子以慎德,積小以成高大。

坤爲積,故「慎德積小成高大」。 也。臨初之三,巽爲高,二之五艮爲慎, 復小爲「德之本」。至二成臨。 虞翻曰:「君子」謂三,「小」謂陽息復時, 臨者,大

初六,允升,大吉。

欲與巽一體升居坤上。位尊得正,故 荀爽曰: 謂一體相隨,允然俱升。初

大吉」也。

象》曰:「允升大吉」,上合志也。 《九家易》曰: 謂初失正,乃與二陽允

然合志,俱升五位,「上合志」也

九二,孚乃利用禴,无咎

成坎爲孚。 虞翻曰: 禴,夏祭也。 离爲夏,故「乃利用 「孚」謂二之五 禴无

《象》曰:「九二」之「孚」,有喜也

神。 寶 曰: 其福」。 九五坎,坎爲豕。 虞翻曰: 豕而已,不奢盈於禮,故曰「有喜」矣。 然則文王儉以恤民,四時之祭皆以禴禮 利用禴」,於春時也。非時而 五曰「東鄰殺牛,不如西鄰之禴祭,實受 享德與信,不求備也,故《既濟》九 剛中而應,故「孚」也。又言「乃 升五得位,故「有喜」。 然則禴祭以 祭曰禴 〇 干

九三,升虚邑。

荀爽曰: 上居之,故曰「升虚邑,无所疑 坤稱邑也。五虚无君,利二

《象》曰:「升虚邑」,无所疑也。

虞翻曰: 坎爲疑。上得中,故「无所疑

也。

六四,王用享于岐山,吉,无咎。

與衆陰退避當升者,故「无咎」也。 四能通有兩體,位正衆服,故「吉」也。 四能三成艮。巽爲岐,艮爲山,「王」謂五也。 對爽曰: 此本升卦也。巽升坤上,據

《象》曰:「王用享于岐山」,順事也。

通,避於狄難,順於時事,故「吉无咎」。 王矣,故曰「王用享于岐山」。以其用年成邑,二年成都,三年五倍其初,通而此象太王爲狄所逼,徙居岐山之下。一於五,乘剛於三。宜以進德,不可脩守。

六五,貞吉,升階。

坤爲土,震升高,故「升階」也。 虞翻曰: 二之五,故「貞吉」。巽爲高,

荀爽曰: 陰正居中,爲陽作階。使升《象》曰:「貞吉升階」,大得志也。

「得志」。居五,己下降二,與陽相應,故「吉」而

二六,冥斗,川丘、思之首

[列二天是] [] 。 陰正在上,陽道不息,陰之所利,故曰「冥升」也。陰用事爲消,陽用事爲息。 荀爽曰: 坤性暗昧,今升在上,故曰上六,冥升,利于不息之貞。

《象》曰:「冥升」在上,消不富也。「利于不息之貞」。

荀爽曰:

陰升失實,故「消不富也」。

言「升而不已必困」也。 崔憬曰: 冥升在上,以消不富則窮,故序卦》曰: 升而不已必困,故受之以困。

「困」也。君子雖困,居險能説,是以猶君子處亂代,爲小人所不容,故謂之爲暗昧,日所入也。今上弇日月之明,鄭玄曰: 坎爲月,互體离,离爲日。兑

「通」而「无咎」也。○虞翻曰: 否二之

上,乾坤交,故「通」也。

貞大人吉,无咎。

宜静,則「无咎」,故「貞大人吉无咎」。 虞翻曰:「貞大人吉」謂五也。在困无應

有言不信。

虞翻曰: 震爲言,折入兑,故「有言不

信,尚口乃窮」。

《彖》曰: 困,剛弇也。

荀爽曰: 謂二五爲陰所弇也。

險以說,

荀爽曰: 此本否卦。陽降爲「險」,陰

升爲「説」也。

困而不失其所,亨。其唯君子乎!

與正陰合,故「通」也。喻君子雖陷險荀爽曰: 謂二雖弇陰陷險,猶不失中,

中,不失中和之行也。

「貞大人吉」,以剛中也。

咎」也。 无所應,體剛得中,正居五位,則「吉无荀爽曰: 謂五雖弇於陰,近无所據,遠

有言不信」,尚口乃窮也。

故曰「尚口乃窮也」。 兑爲「有言」,失中爲「不信」,動而乘陽,乃窮」。〇荀爽曰: 陰從二升上六成虞翻曰: 兑爲口,上變口滅,故「尚口

《象》曰: 澤无水,困。

人也。君子固窮,道可忘乎?澤下,困之象也。處困而屈其志者,小王弼曰:澤无水則水在澤下也。水在

君子以致命遂志。

命遂志」也。致,巽爲命,坎爲志。三人陰中,故「致冀,巽爲命,坎爲志。三人陰中,故「致虞翻曰:「君子」謂三伏陽也。否坤爲

初六,臀困于株木,

《九家易》曰:「臀」謂四。株木,三也。

兑爲孔穴,坎爲隱伏。隱伏在下而 穴,臀之象也 爲株也。 三,故曰「臀困 三體爲木。 初者四應,欲進之四。 澤中无水, 兑金 于株木」。 〇干寶 傷木, 四 漏漏孔 故 曰 : 困

人于幽谷,三歲不覿

《九家易》曰: 不得見,故曰「三歲不覿」也 謂陽來入坎,與初同 三者陽數。 謂陽陷險中,爲陰所弇,終 幽谷,二也。此本否卦。 體,故曰「人幽谷」。

《象》曰:「入于幽谷」,幽不明也。 荀爽曰: 爲陰所弇,故「不明」。

九二,困于酒食,朱紱方來。 上爲宗廟。 困于酒食」也。上九 朱紱,宗廟之服。 二本陰位,中饋之職。 今二陰升上則酒食入廟,故 降二、故「朱紱方 乾爲大赤,朱紱 坎爲酒食

> 利 用 亨祀,征 凶 。 无咎。

得居正而皆免咎,故曰 荀 二,雖位不正,得中有實。 用享祀」。 而陷,爲陰 爽 日 所 陰動而上,失中 二升在廟,五親 弇,故曰 「征凶」。 [「无咎」也 陰雖去中,上 - 乘陽。 奉之,故「利 陽降來

《象》曰:「困于酒食」,中有慶也。

陰,故「中有慶也」。 翟玄曰: 陽從上來,居中得位 富

六三,困于石,據于蒺蔾,

虞翻曰: 二變正時,二在艮山下,故 「困于石」。蒺蔾,木名。 坎爲蒺蔾。一

人于其宫,不見其妻,凶。

變艮手據坎,故「據蒺蔾」者也。

虞翻曰: 二也。 在坤 中,死其將至,故「不見其妻 无應也。三在陰下,离象毀壞, 巽爲人,二 動 艮 爲宫,兑爲

: 「據于蒺蔾」,乘剛 也

案 : 三居坎上。 坎爲藂棘 而 木多心

蒺蔾之象。

人于其宫不見其妻」,不詳也

《九家易》曰: 逆,誅將加身。 位不正,上困於民,内无仁恩,親 艮,艮爲門闕,宫之象也。 日「不詳也」。 此本否卦。 入宫无妻,非常之困,故 。 二 四 六三居 同 戚 困 功爲 叛 而

九四,來茶茶,困于金轝,吝,有終。

見險,故「來荼荼」。否乾爲金,坤爲轝。 虞翻曰: 來,欲之初。荼荼,舒遲 也

故「吝有終」矣。

之應歷險,故「困于金轝」。

易位

得正,

象》曰:「來茶茶」,志在下 也。

王弼曰:「下」謂 初。

雖不當位,有與也。

崔 情日: 位雖 不當, 故「吝」也。 有 與

於援,故「有終」也

九五、劓刖,困于赤紱

刑,故「劓刖」也。「赤紱」謂二。 四 翻曰: 動時震爲足,艮爲鼻,离 割鼻曰「劓」,斷 爲 足曰「刖 兵, 兑爲 否乾爲

朱,故「赤」。坤爲紱。二未變應五,故 困于赤紱」也。

乃徐有説,

故「乃徐有説」也 虞翻曰: **兑**爲説 坤 爲 動

利用祭祀。

在 得祭祀。 祭服之飾。 失其大柄,故言「劓刖」也。 時,不崇柔德,以 崔憬曰: 則寡人」,故 困思通。 若《春秋傳》曰「政由寗氏、祭 劓 所以 曰「困于赤紱」。 初雖蹔窮,終則 刖,刑之小者也。於困之 剛遇剛,雖 稱困者,被奪其政,唯 行其小刑 赤紱,天子 居中以直, 必喜,故曰 而

祀」也。 者,在「困于赤紱」乎! 离爲文明,赤紱之象也。 「乃徐有説」。所以險而能説,窮而能 案 : 五應在二,二互體离。 故曰「利 用祭 通

象》曰:「劓刖」,志未得也。

義也。 此言「祭祀」,傳互言耳,无他義也。 陸績曰: 二困五,三困四,五初困上,斯乃迭困之 二言「朱紱」,此言「赤紱」,二言「享祀」, 无據无應,故「志未得」也。 謂

乃徐有説」,以中直也。

崔憬曰: 以其居中當位,故「有説」。

利用祭祀」,受福也。

荀爽曰: 謂五爻合同,據國當位 而主

祭祀,故「受福也」。

上六,困于葛藟,于臲卼。

虞翻曰: 兑爲刑人,故「困于葛藟,于臲卼」也。 巽爲草莽,稱葛藟 ,謂三也。

> 日 動悔有悔、征吉。

虞翻 曰: 乘陽,故「動 三已變正,己得應之,故「征 悔。 變而失正,

《象》曰:「困于葛藟」,未當也。 吉也。

虞翻曰: 謂三未變當位應上故也。

動悔有悔」,吉行也

故「吉行」者也。 虞翻曰:「行」謂三。 變乃得當位之應,

易傳卷第九

一七九

八〇

易傳卷第十

唐資州李鼎祚集解

序卦》曰: 故言「困乎 崔憬曰: 上必反下」也。 困 困乎上必反下,故受之以井。 極 于劓刖,則反下以求安,

一一 坎巽 上下 井,

改邑不改井, 竭,猶人君以政教養天下,惠澤无窮也 澤,泉口也。 鄭玄曰: 水而出井之象也。井以 體离兑。 离外堅中 坎,水也。 言桔槔引瓶 虚,瓶 巽,木桔槔也。 汲人,水无空 ,下入泉口,汲 也。兑爲暗 0 互

虞翻 之五折坤,故「改邑」。 曰: 泰初之五 也。 初爲 坤爲 舊井, 邑,乾 四 初

> 无喪,无得,往來井井。 虞翻曰: 甃之,故「不改井」。

之五,「來」謂之初也。 故「无喪」。五來之初,失位无應,故「无 坎爲通,故「往來井井」。「往」謂 无喪,泰初之五,坤象毁

汔至,亦未繘井。 也。 虞翻曰: 幾至初改、未繘井、「未有功也」。 巽繩爲繘。

汔,幾也,謂二

羸其瓶,凶。

曰: 之亂俗,而不易成湯昭假之法度也 體兑毀缺,瓶缺漏,故「凶」矣。〇干寶 虞翻 曰: 者也。自震化行至於五世,改殷紂比屋 繘,离爲瓶。 手繘折其中,故「羸其瓶」。 曰「改邑不改井」。 二代之制 「徳之地也」,所以養民性命而清絜之主 水,殷德也。 羸, 鈎 羅 木,周德也。 也 0 艮爲手,巽爲 各因 夫井, 故

凶」矣。 聊。比者之間,交受塗炭,故曰「羸其瓶 故曰「亦未繘井」。井泥 宜 窮,故曰「汔至」。 得,往來 損益 井井」也 雖異,括囊 周德雖 則同,故 當 殷 興,未及革正 爲穢,百姓 之末,井道之 曰「无喪无 無

彖》曰: 巽乎水而上水,井,

「上水」謂陽,上爲坎也。木入水出,井 荀爽曰:「巽乎水」謂陰,下爲巽也。 而

井養而不窮也。

之象也。

井」,故「養不窮也」。 虞翻 曰: 兑口飲水, 坎爲通,「往來井

改邑不改井」,乃以剛中也。

得中,故爲「不改井」也。 荀爽曰: 剛得 中,故爲「改邑」。 柔不

无喪无得,

荀爽曰: 陰來居初有實爲「无喪」,失

中爲「无得」也。

往 一來井井,

井、陰來 荀 7爽日: 此本泰卦。 在下亦爲井, 陽往 故 曰 居 一往 五. 得 來 坎 井

爲

汔至亦未繙」

井」也。

汲之具也。 在初,未得應五,故「未繘」也。繘者,綆 也。 荀爽曰: 繘者,所以 汔至者,陰來居初,下至汔竟 出水,通井道也。 今乃

未有功也。

也。 翻 티 : 謂二未變應五,故「未有 功

井羸其瓶」,是以凶 也。

達 曰: 荀爽曰:「井」謂二、「瓶」謂 此喻人德行不恒,不能善始令終,故就 五,今爲二所拘羸,故「凶也」。 計覆 一瓶之水,何足言凶。 初。 初 孔穎 欲 但 應

八

人言之凶也。

《象》曰: 木上有水,井。

王弼曰: 木上有水,上水之象也。水

以養而不窮也。

君子以勞民勸相。

上成坎爲勸,故「勞民勸相」。相,助也。虞翻曰:「君子」謂泰乾也。坤爲民,初

塗。

泥不食,舊井无禽」。

「禽」,古「擒」字。

「禽」猶「獲」也。

无應於上,則是所用之井不汲,以其多

久廢之井不獲,以其時舍,故曰「井

與乾二同義。

〇崔憬曰:

處井之下,

禽」。「時舍也」謂時舍於初,非其位也。

食」也。

乾

爲

舊,位在陰下,故「舊井无

木果,无噬嗑食象。

下而

多泥,故「不

謂以陽助坤矣。

初六、井泥不食、舊井无禽。

食」。此託紂之穢政,不可以養民也。「泥」也。井而爲泥則不可食,故曰「不干寶曰: 在井之下,體本土爻,故曰

无水禽之穢,又況泥土乎! 故「舊井无「舊井」謂「殷之未喪師」也。亦皆清絜,

禽」矣。

《象》曰:「井泥不食」,下也。「舊井无禽」,

時舍也。

虞翻曰: 食,用也。初下稱「泥」,巽爲

九二,井谷射鮒,甕敝漏。

离爲甕。甕瓶毀缺,「羸其瓶凶」,故「甕虞翻曰: 巽爲谷,爲鮒。鮒,小鮮也。

敝漏」也。

《象》曰:「井谷射鮒」,无與 崔憬曰: 注不汲之義也。 比,則是若 之爲道,上汲者也。今與五 井谷射鮒」也。 一谷水不注,唯及於魚,故曰 唯得於鮒,无與於人也。 「甕敝漏 案 : 也。 」者,取其 魚,陰 非 應,與初 蟲 水下

初 處井下,體又陰爻,魚之象也

九三,井渫不食,爲我心惻

惻。 荀爽曰: 得用,故曰「不食」。道既不行,故「我心 者得正,故曰「井渫」。不得據陰,喻不 渫,去穢濁,清絜之意也。

可 用汲,王明,並受其福

天下並受其福 荀爽曰: 謂五可用汲三, 則王道明 而

《象》曰:「井渫不食」,行「惻」也。求「王 明」,「受福」也。

也。 干寶曰: 此託殷之公侯,時有賢者,獨 其王,故曰「求王明,受福也」。 德來被,故曰「王明」。 傷悼也。民乃外附,故曰「可用汲」。 守成湯之法度而不見任,謂微箕之倫 故曰「井渫不食,爲我心惻」。 惻, 王得其民,民得 周

,井甃,无咎。

荀爽 脩 正,以甃輔五,故「无咎」也 曰 : 坎性 下降,嫌於從三。 能自

象》曰:「井甃无咎」,脩井也。

「甃」。 虞翻 爲瓦治象,故曰「井甃无咎,脩井也」。 티 : 。坤爲土,初之五成离。 脩,治也。 以瓦甓壘井 离火燒土 稱

九五,井冽,寒泉食。

食」矣。 夏之五月。陰氣在下,二已變坎十一月 虞翻曰: 爲寒泉,初二已變體噬嗑食,故「冽寒泉 泉自下出稱「井」。周七月,

《象》曰:「寒泉」之「食」,中正也。

崔憬曰: 於上,則是井渫水清。 冽,清絜也。 既寒且絜,汲上 居中得正 而 比

上六,井收勿幕,有孚,元吉。 冈。 可食於人者也

干本「

勿

爲

虞翻 티 : 幕,蓋 也。 收 謂 以 轆 轤 收

八四

吉也。 幕」。 繘 也 「有孚」 坎 爲車、 謂 應巽繩爲繘,故「井收 五坎。 坎爲孚,故 元 勿

象》曰:「元吉」在上,大成也 幕」。 虞翻 民、无薀典 以養生,政 瓶之水也,故曰「井收」。 大成也」。 曰 : 冈幕則教信於民,民服教 以養 禮 謂初二已變, 〇干寶曰: 而 德。 不 興教,故曰 无覆水泉 成既濟定, 幕,覆 處井上 井 則 而 也。 位,在 收 不

以 (字卦 **>** 井道 不 口 不 革 也, 故受之

成也。

故也。 韓 康 伯 曰 : 井 久 則 濁 穢, 宜 革 易 其

兑 离 上 下 革,

鄭 玄 日 革, 改 也。 水火相息 而 更用

已日乃孚,元亨利貞,悔亡。

之革也

事,猶王者受命,

改

正

朔,

易

服

色,

故

謂

故「元亨利貞悔亡」矣。 道變化,各正性命,保合太和, 在坎中,故「已日乃孚」。 亡」。离爲日,「孚」謂坎。 亡謂四 翻 也。 遯上之初, 四失正, 與蒙旁通。 與乾彖同 動 已成既濟,「乾 得位,故 四 動 乃利貞」, 體离,五 義 也。 悔 悔

《彖》曰: 革,水火相息。

化

冈

惠

井

故

《繫》曰「潤之以風 革之正坎見,故獨於此 虞翻曰: 息,長也。 雨」,風巽雨 稱水也。 离爲火,兑爲水。 党也。 四

女同居,其志不相得曰革。 虞翻 爲居,故「二女同居」。 志不相得」。 一女有志。 二女离兑,體同人象。 离火志上,兑水志下,故「其 坎爲志也 四 變體兩 坎象, 蒙艮

「已日乃孚」,革而信之。

文明以説,大「亨」以正。革而當,其「悔」

正」,革而當位,故「悔乃亡」也。亨」謂乾。四動成既濟定,故「大亨以虞翻曰:「文明」謂离。説,兑也。「大

天地革而四時成,

成」也。 具。坤革而成乾,故「天地革而四時震春兑秋。四之正,坎冬离夏,則四時震翻曰:謂五位成乾爲天,蒙坤爲地。

湯武革命,順乎天而應乎人。

天應人」。巽爲命也。謂五,「人」謂三。四動順五應三,故「順虞翻曰:「湯武」謂乾,乾爲聖人。「天」

革之時大矣哉!

民害。天下定,武功成。故「大矣哉」也。干寶曰: 革天地,成四時。誅二叔,除

象》曰: 澤中有火,革。

rvi 从台逐月垮。得,終宜易之,故曰「澤中有火革」也。崔憬曰:「火就燥」,澤資溼,二物不相

君子以治歷明時。

而四時成,故「君子以治歷明時」也。爲星。四動成坎,离日月得正,天地革星辰也。离爲明,坎爲月,离爲日,蒙艮虞翻曰:「君子」,遯乾也。歷象,謂日月

初九,鞏用黄牛之革。

據未可以動,故曰「鞏用黄牛之革」。此本坤,黄牛之象也。在革之初而无應,干寶曰:。鞏,固也。离爲牝牛。离爻

喻文王雖有聖德,天下歸周,三分有二

而服事殷,其義也。

虞翻曰: 得位无應,動而必凶,故「不《象》曰:「鞏用黄牛」,不可以有爲也。

可以有爲也」。

六二,已日乃革之,征吉,无咎。

吉无咎」也。 革之」。上行應五、去卑事尊、故曰「征君、二乃革、意去三應五、故曰「已日乃君。四,也曰「己日乃君,二乃革、意去三應五、故曰「己日乃為。」

《象》曰:「已日革之」,行有嘉也。

之,女可写了了的世之,玩比可喜!。 湯武行善,桀紂行惡,各終其日,然後革 崔憬曰: 得位以正,居中有應。 則是

虞翻曰:「嘉」謂五。乾爲嘉,四動承五,之,故曰「已日乃革之,行此有嘉」。○

故「行有嘉」矣。

九三、征凶、貞厲。

荀爽曰: 三應於上,欲往應之,爲陰所

則五來危之,故曰「貞厲」也。乘,故曰「征凶」。若正居三而據二吟

革言三就,有孚。

據於二陰,故曰「革言三就,有孚」於翟玄曰: 言三就上二陽,乾得共有,信

一矣

《象》曰:「革言三就」,又何之矣。

九四,悔亡,有孚,改命吉。 几 就也。故曰「革言三就」。 囚,封比干墓,式商容間,二就 即行周命,乃反商政,一就也, 以言就之。夫「安者,有其危」也,故受 鹿臺之財,發鉅橋之粟,大賚於四海,三 自危,故曰「貞厲」。是以武王克紂,不 改命,習俗不安,故曰「征凶」。 崔憬曰: 雖得位以正,而未可頓革,故 命之君,雖誅元惡,未改其命者,以即行 動成既濟定,故「又何之矣」。 ○虞翻 也; 釋箕子 猶以 īĖ.

順天應人,故「改命吉」也。 虞 棄、體大過死、傳以比桀紂。 五. 也。 翻 日 巽爲命。 : 四乾爲君,進退无 革而 當, 四 動 其 五坎改巽,故「改 悔 乃亡。「孚」謂 恒。 湯武革命, 在离焚

象》曰:「改命」之「吉」,信志也

信志也」。 至,水德賓服之祥也。 信矣。故曰「有孚」。 故曰「悔亡」也。 中流 虞翻曰: 逆取而四 干寶曰: 海順之,動凶器 爻人上象,喻紂之郊也。 四動成坎,故「信志也」。 而白魚入舟,天命 故曰「改命之吉, 甲子夜, 陣雨甚 而前 歌後舞, 以

九五,大人虎變,未占有孚。

也。 未 翻曰: 占有孚」也。○馬融 离爲占。 傳論湯武以坤 乾爲大人,謂五 四未之正,五未在坎,故 臣 曰 : 爲君。占,視 也。 大人虎 蒙坤

> 變。 德,越裳獻雉 以喻舜舞干羽 虎 變 威 德, ,故曰「未占有孚」矣。 ൬ 折 有 衝 苗 萬 自 里, 服 望 周公脩文 風 间 信。

《象》曰:「大人虎變」,其文炳也。

大明,四動成离,故「其文炳也」。 宋衷曰: 人虎變,其文炳也」。○虞翻曰: 「大人」。兑爲白虎,九者變爻,故 陽稱大。五以陽居中,故 白「大 日

上六,君子豹變,

虞翻曰: 蒙艮爲君子,爲豹。 更,故「君子豹變」也 從乾 而

小人革面,征凶,居貞吉。

蒙艮爲居也。 虞翻曰: 失正,故「征 爲离,以順承五,故「小人革面」。 陰稱小人也。 区。 得位,故「居貞 一面 謂 四。 (古」。 乘陽 革

象》曰:「君子豹變」,其文蔚也。

|續日: 兑之陽爻稱虎,陰爻稱

解

蔇 也。 變其 類 兑小,故 而 文 小 者 蔚 「其文蔚 也。 也 君子小 ○虞翻 也」。 於大人,故

小人革面」,順以從君 虞翻曰: 虎皮。 賢,殷之頑民,皆改志從 豹,虎之屬; 賢,次聖之人。謂若大公周召之徒也。 凶、居貞吉」。 革面」。 天下既定,必倒載干戈,包之以 面之象也。 以 從君也」。 將卒之士,使爲諸 兑爲口,乾爲首。 乾君 乾爲大人虎變也, 兑爲小人 得正 蔚,炳之次 謂五也。 〇干寶 有 也 應,君子之象也。 化,故曰「小人 日 今口 侯 四 也。 變 ,故曰「征 順 在首上, 君聖 君子大 五,故 臣

韓康伯曰:「革去故」,「鼎取新」。以去《序卦》曰: 革物者莫若鼎,故受之以鼎。

面

齊生物,成新之器也,故取象焉。故,則宜制器立法,以治新也。鼎所和

八八

■ 異下 鼎・

鄭玄曰: 孰以養人,猶聖君 含水,爨以木火,鼎亨孰物之象。 互體乾兑。 也,故謂之鼎矣。 鼎,象也。 乾爲金, 兑爲 興仁義之道以教 卦 澤。 有 水 澤鍾金 火 之用。 鼎烹 而

元吉,亨。

吉亨」也。 地交,柔進上行,得中應乾五剛,故「元獎翻曰: 大壯上之初,與屯旁通。天

彖》曰: 虞翻 荀 象也。 於鼎言象, 在外,金在 爽 曰 : E: 〇《九家易》曰: 鼎,象也。 何也? 其 六十四 震入离下,中有乾象。 内 鼎鑊亨飪之象也。 卦, 以木巽火,亨飪 象事 皆觀《繫辭》 知器」,故獨言 鼎言象者,卦 木火 也。 而

466

肉。 鼎 受一 白 姓。 以 足以象三台,足上皆作鼻目爲飾也。 三公之位,上則調和陰陽,下而 也,爨以木火,是鼎鑊亨飪之象。 也 銅。 五斗,天子飾以黄金,諸侯白 金、大夫銅、士鐵。三鼎形同、亨飪 斛,天子飾以黄 鼎能孰物養人 上离陰爻爲肉也 木火互有 豕鼎三斗,天子飾以黄金,諸 乾兑,乾金兑澤。 ,故云「象也」。 金、諸侯白 [金,大夫 金。 撫 澤 牛鼎 者 毓 亦 煮 侯 羊 百

聖人亨以享上帝,而大亨以養聖賢。

畜。 虞翻 「大亨」謂「天地 頤 震爲 象,三動噬嗑食,故「以享上 曰:「聖人」謂乾。 帝,在乾天上,故曰 養萬物,聖人養賢 初 四易位 上 帝 帝」。 以及 體 也。 大

巽 而 耳 目 聰 明

萬

民

賢之能者稱聖人矣。

虞 翻 \Box 謂 三也。 三在巽上,動 成 坎

> 离。 相 不明」,皆有一离 眇 推 而 有 而 視,不足以 兩 明 生 坎 一焉」, 兩 离 一坎象故 有明」、「聞言不信、 故「巽 象, 乃 稱 丽 也 聰 耳 明。 目 聰明」。 日 月 聰

柔進而 同義 虞翻 巽爲進, 也。 曰:「柔」謂五。 上行,得中而應乎剛,是以「元亨」。 震爲行。 非謂 得上中,應乾 應二剛,與 五剛。 八睽五

象》曰: 木上有火,鼎。

荀爽曰: 五. 味,所以養人,鼎之象也 木火 相 因, 金在 其 間 調 和

君子以正位凝命

虞 位 獨三得位 姤,謂陰始凝 翻 凝命」也 日 故「以正位」。 君子謂三也。 初,巽爲命, 鼎 凝 故「君子以正 成成 五爻失 也。 正

初 六,鼎顛 趾

虞 翻 曰 趾 足也。 應在 四、大壯 震

足,折入大過。「大過,顛也」,故「鼎顛

趾也。

利出否,得妾以其子,无咎。

四,故曰「利出」。兑爲妾。四變得正成虞翻曰: 初陰在下,故「否」。利出之

震,震爲長子,繼世守宗廟而爲祭主,故

「得妾以其子无咎」矣。

《象》曰:「鼎顛趾」,未悖也。

荀爽曰: 以陰承陽,故「未悖也」。

「利出否」,以從貴也。

虞翻曰: 出初之四,承乾五,故「以從

貴也」。

九二、鼎有實、我仇有疾、不我能即、吉。

虞翻曰:

二爲實,故「鼎有實」也。

坤

爲我,謂四也。二據四婦,故「相與爲

仇有疾」。四之二歷險,二動得正,故仇」。謂三變時四體坎,坎爲疾,故「我

「不我能即吉」。

《象》曰:「鼎有實」,慎所之也。

虞翻曰: 二變之正,艮爲慎

「我仇有疾」,終无尤也

虞翻曰:「不我能即吉」,故「終无尤也」。「我代有躬」 糸ラブセ

虞翻曰: 動成兩坎,坎爲耳而革在乾九三,鼎耳革,其行塞,雉膏不食。

离爲雉,坎爲膏。初四已變,三動體頤。耳行。伏坎震,折而入乾,故「其行塞」。故「鼎耳革」。初四變時震爲行。鼎以虞鄱巨 動成兩坎 坎爲耳而革在乾

方雨,虧悔,終吉。

頤中无物,离象不見,故「雉膏不食」。

吉」也。 失位,悔也。終復之正,故「方雨虧悔終方,坎爲雨,故曰「方雨」。 三動虧乾而虞翻曰: 謂四已變,三動成坤。坤爲

虞翻曰: 鼎以耳行,耳革行塞,故「失《象》曰:「鼎耳革」,失其義也。

其義也」。

九〇

九四、鼎折足、覆公餗、其刑渥、凶。今本「刑」

作「形」。

凶 。 虞翻 死,凶。 鼎足折則公餗覆,言不勝任。象入大過 兑,故「鼎折足」。 侯,上公之位,故曰「公餗」。 任,傾敗天子之美,故曰「覆餗」也。 鼎謂調五味。 體,猶三公承天子也。三公謂調陰陽, 티 : ○《九家易》曰: 餗者,雉膏之屬。 故「鼎足折, 謂四 足折餗覆,猶三公不勝其 變時 兑爲刑 震爲足。足 覆公餗,其刑渥, 公者,四爲諸 鼎者,三足一 渥,大刑也。 折

《九家易》曰: 渥者,厚大,言罪重也。《象》曰:「覆公餗」,信如何也。

既覆公餗,信有大罪,刑罰當加,无可如

何也。

六五,鼎黄耳,金鉉,利貞。

虞翻曰: 离爲黄,三變坎爲耳,故「鼎

也。 貞」也 曰 : 鉉鼎得其物,施令得其道,故曰「利 黄耳」。「鉉」謂 故「金鉉」動 金喻可貴,中之美也,故曰「金鉉」。 凡舉鼎者,鉉也。 而得正,故 三,貫鼎 「利貞」。 兩 尚三公者,王 耳。 〇干寶 乾爲金,

(象》曰:「鼎黄耳」,中以爲實也。 黄耳」。 陸績日 良 侯謂五也。)宋衷曰: 可柔屈,喻諸侯順天子。 兑爲金,又正 得中承陽,故曰「中以 上尊故玉,下卑故 五當耳,中 秋,故曰 色黄,故 金。 金鉉。 爲 日 實」。 「鼎 和

上九、鼎玉鉉、大吉、无不利。

節」。《彖》曰「巽耳目聰明」,爲此九三成未濟,雖不當位,六位相應,故「剛柔承上,故「大吉无不利」。謂三虧悔應上有》上九「自天右之」。位貴據五,三動虞翻曰:「鉉」謂三。乾爲玉,鉉體《大

亨飪 明之象也。君臣 發 玉鉉之,不失其所。 上爻愈吉也。 人於口,馨香上達,動 吉无不利」也。 也 之事,自鑊升於鼎 〇干寶 鼎主亨飪,不失其和。 曰 相臨, 公卿仁賢,天王 玉又 而 剛柔得節 載於 彌貴,故 貴 於 俎。 金 鼎 者 故 之義 自 聖 曰 俎 凡

相承,剛柔之節也。乾爲玉,故曰「玉鉉」。雖非其位,陰陽宋衷曰:以金承玉,君臣之節。上體宋衷曰:「玉鉉」在「上」,剛柔節也。

震。震者,動也。《序卦》曰: 主器者莫若長子,故受之以

「主器者莫若長子」也。 此器者莫若家適,以爲其祭主也,故言崔憬曰: 鼎所以亨飪,享於上帝。主

■ 震上 震,亨。

鄭 會之禮通矣。 也,故謂之「震」。 雷之發聲,猶人君出 玄曰 : 震 爲 雷 人君有善聲教 政教以 雷 動 動 物 中國之人 う則嘉 氣 也。

震來虩虩,

曰「來」也。 來應己,四失位多懼,故「虩虩」。之内「虩虩」謂四也。來應初。初命四變而虞翻曰: 臨二之四,天地交,故「通」。

笑言啞啞,

有則,故「笑言啞啞,後有則也」。 虞翻曰: 啞啞,笑且言,謂初也。得正

震驚百里,不喪匕鬯。

玄曰: 雷發聲,聞於百里,古者諸侯之體坎得其匕鬯,故「不喪匕鬯」也。○鄭匕,上震爲鬯,坤爲喪。二上之坤成震,舉其大數,故當「震百里」也。坎爲棘舉其大數,故當「震百里」也。坎爲棘虞翻曰: 謂陽。從臨二陰爲百二十,

鬯,秬酒,芬芳脩鬯,因名焉 其宗廟社 不親也。 (君於祭之禮,匕牲體薦鬯而 諸 侯 稷,爲之祭主,不亡 升牢於俎,君匕之,臣載之。 出 教令,能 警戒 其 上上與 或 已,其餘 内 八鬯也。 則

彖》曰: 也」。 虞翻 티 : 震,亨,震來虩虩」,恐致福 懼變承五應初,故「恐致福 也。

笑言啞啞」,後有則也。 虞翻曰: 則,法也。 坎爲. 則也

震驚百里」,驚遠而懼邇也 虞翻曰:「遠」謂四,「近」謂 四出驚遠,初應懼近也 初。 震爲百

謂

出可以守宗廟社稷,以爲祭主也 宗 也。 虞 廟社 翻 殷 〇干寶曰: 日 稷。 侯,殷諸侯之制,其地百里。 爲五出之正。 震爲守, 長子主祭器,故以爲祭主 周木德,震之正象也。 艮爲 是

> 親也。 侯也。 厥 以 K 祭主也。 文王 德 鬯者, 不 小 爲諸侯,故主社稷。 回,以受方國 祭禮薦陳甚多,而經獨言不喪 匕牲 心翼翼, 體 昭 薦 事 一、故以 鬯 上帝 酒, 爲長 百 人君所 聿懷多 里 公子而爲 而 臣諸 福 自

《象》曰: 真」也。 虞翻 以「恐懼脩省」、《老子》曰「脩之身, 以脩身。 曰:「君子」謂臨二。 洊雷,震。君子以恐懼脩省。 坤爲身,二之四以陽照坤,故 二出之坤四體

初九,震來虩虩,後笑言啞啞,吉。 寶 曰: 方國也。 虩虩」,美里之厄也。 虞翻曰:「虩虩」謂 後笑言啞啞」。 得震之正,首震之象者。「震來 得位,故「吉」也。 四 「笑言啞啞」,後受 也。 初位在 下,故 〇干

象》曰:「震來虩虩」,恐致福也

虞翻曰: 陽稱福。

「笑言啞啞」,後有則也。

虞翻曰: 得正,故有則也。

七日得。 六二,震來厲,億喪貝。躋于九陵,勿逐,

時 足,足乘初九 虞 謂四已體復象,故「喪貝」「勿逐」。 稱「貝」。 億,惜辭 翻 离爲日,震數七,故「七日得」者也。 曰 : 也。 在艮 厲, ,故「躋于九陵」。 震爲逐。 坤 Ш 危 爲喪,三動 下,故稱「陵」。 也。 乘 离 剛,故 爲 羸 蚌,故 震爲 三動 厲

《象》曰:「震來厲」,乘剛也。

功 无 辭 應 寶曰: 江 塗 以 也。 被 而以 淮之浦,求盈箱之貝,而以賂紂也, 也 囚 此以喻紂拘文王, 閎夭之徒乃 爲禍 貝,寶貨也。 乘剛爲危。此託文王積德累 六二木爻,震之身 也,故曰「震來厲」。 産乎 東 々也。 方,行乎 得位

> 蘇」,位不當也。 六三,震蘇蘇,震行无眚。《象》曰:「震蘇 《書》曰「誕保文武受命,惟七年」是也 陵。 故 日得」。「七日得」者,七年之日也,故 日 今雖喪之,猶外府也,故 億 喪貝」。貝,水物 而 日 方 「勿逐七 升 于 九

傳》曰「晉獲秦諜,六日而蘇」也。三出得正,坎象不見,故「无眚」。《春秋動出得正,震爲生,故「蘇蘇」。 坎爲眚。虞翻曰: 死而復生稱蘇。 三死坤中,

九四、震遂泥。

[發配] J.。 虞翻曰: 坤土得雨爲泥,位在坎中,故

「遂泥」也。

《象》曰:「震遂泥」,未光也。

虞翻曰: 在坎陰中,與屯五同義,故

六五,震往來,厲。

未光也」。

虞翻曰:「往」謂乘陽,「來」謂應陰。失

位乘剛,故「往來厲」也。

億无喪,有事。

宗廟社稷,爲祭主,故「无喪有事」也。 事。 翻 出 티 : 而 體隨,王享于西 坤爲 喪 也。 「事」謂 山 則 祭祀之 口 以 守

《象》曰:「震往來厲」,危行也。

虞翻曰: 乘剛山頂,故「危行也」。

其事在中,大「无喪」也。

虞翻曰: 動出得正,故「无喪」。

上六、震索索、視矍矍、

「震索索」。三已動,應在离,故「矍矍」虞翻曰:「上」謂四也。欲之三隔坎,故

有言。 征凶。震不于其躬,于其鄰,无咎。婚媾

者也。

五,震東兑西,故稱「鄰」。之五得正,故四變時坤爲躬。「鄰」謂五也。四上之虞翻曰: 上得位,震爲征,故「征凶」。

上應三。震爲言,故「婚媾有言」。「不于其躬于其鄰」。「无咎」謂三已變,

《象》曰:「震索索」,中未得也。

虞翻曰: 四未之五,故「中未得也」。

雖「凶」「无咎」,畏鄰戒也。

戒也」。 謂五正位,己乘之逆,

畏

鄰

以艮。艮者,止也。《序卦》曰: 物不可以終動,止之,故受之

須止之,故言「物不可以終動,止之」矣。崔憬曰: 震極則「征凶,婚媾有言」,當

■ 艮上 艮其背,

不相與通,故謂之艮也。 无相順之時。猶君在上,臣在下,恩敬鄭玄曰: 艮爲山,山立峙,各於其所,

不獲其身,行其庭,不見其人,无咎。

虞翻曰: 觀五之三也。艮爲多節,故

故「艮 稱 背。 其背」。 觀 坤 爲 身,觀五之三折坤爲背 坤象不見,故「不獲 其

震爲行人,艮爲庭,坎爲隱伏,故

行其庭,不見其人」。三得正,故「无 艮爲門闕,今純艮,重其

門闕。 兩門之間,庭中之象也。

彖》曰: 艮,止也。

虞翻曰: 位窮於上,故「止也」。

時止則止,時行則行,

虞翻曰: 「時止」謂上陽窮止,故止。「時

行」謂三體處震爲行 也。

動 (静不失其時,其道光明。

虞翻曰:「動」謂三,「静」謂上。 止,震行則行,故「不失時」。 五動成离, 艮 止則

故 其道光明

艮其止,止其所也。

虞翻曰: 謂兩象各止其所。

上下敵應,不相與 也。

> 虞翻 不相與也」。 티 : 艮其背,背也。 兩象相背, 故

是以「不獲其身,行其庭, 不見其人,无

咎」也。

其義已見繇 辭也

象》曰: 兼山,艮。君子以思不出其位

虞翻 曰:「君子」謂三也。三君子位,震

爲出,坎爲隱伏,爲思,故「以思不出其

位也。

初六,艮其趾,无咎。利永貞。 虞翻曰: 震爲趾,故「艮其趾」矣。

《象》曰:「艮其趾」,未失正也。

位、變得正、故「无咎」「永貞」也。

虞翻曰: 動而得正,故「未失正 也。

六二,艮其腓,不拯其隨,其心不快。

虞翻曰: 巽長爲股,艮小爲腓。 拯,

取 也。 隨謂 下二陰,艮爲止,震爲動,

故「不拯其隨」。 坎爲心,故「其心不

九六

失

快」。

《象》曰:「不拯其隨」,未違聽也。

九三,艮其限,裂其夤,厲閽心。 虞翻曰: 坎爲耳,故「未違聽也」。

馬「勳」,讀作「動」,❶皆非也。 」。坎爲心。厲,危也。荀氏以「熏」 大爲脊,艮爲手。震起艮止,故「裂其 少爲脊,艮爲手。震起艮止,故「裂其 之三,故「艮其限」。夤,脊肉。艮爲背, 之三,故「艮其限」。夤,脊肉。艮爲背, 之三,故「艮其限」。夤,脊肉。艮爲背, 八三,艮其限,裂其夤,厲閻心。

六四,艮其身,无咎。

其身」。得位承五、故「无咎」。或謂妊虞翻曰: 身、腹也。觀坤爲身、故「艮

文王」也。

、故「无咎」。《詩》曰「大任有身,生此之象也,故「艮其身」。得正承五而受陽身也。五動則四體离婦,离爲大腹,孕

《象》曰:「艮其身」,止諸躬也。

虞翻曰: 艮爲止。五動乘四則妊身,

故「止諸躬也」。

六五,艮其輔,言有孚,悔亡。

亡」也。 失位,悔也。動得正,故「言有孚悔失位,悔也。動得正,故「震爲言。五「艮其輔」。謂輔車相依。震爲言。五三至上體頤象,艮爲止,在坎車上,故莫翻曰: 輔,面頰骨,上頰車者也。

虞翻曰: 五動之中,故「以正中也」。《象》曰:「艮其輔」,以中正也。

上九、敦艮、吉。

❶ 「讀作動」,四庫本、照曠閣本作「或誤作動」。

艮吉」也。 虞翻曰: 无應静止,下據二陰,故「敦

易傳卷第十

九八八

易傳卷第十

唐資州李鼎祚集解

《序卦》曰: 物不可以終止,故受之以漸。

漸者,進

也。

進行,故曰「物不 崔憬曰: 漸者進也」。 終止雖獲「敦艮」,時行須漸 可終止,故受之以漸

_{異上}漸,女歸吉,利貞。

虞翻 功」。反成歸妹,兑女歸吉。 嫁也。坤三之四承五,「進得位,往有 「利貞」,「可以正邦」也 日 否三之四。 「女」謂 初上失位, 四。 歸,

彖》曰: 漸之進也,「女歸吉」也。

虞翻日 三進四得位,陰陽體正,故

> 進得位,往有功也。 虞翻曰:「功」謂五。 巽爲進也。

> > 四進承五,故「往有

「吉也」。

進以正,可以正邦也。 其位,剛得中也

虞翻 三也。此可謂上變既濟定者也。 「得中」。《乾・文言》曰「中不在人」,謂 家人道正同義。三在外體之中,故 「進以正,可以正邦。 而上不正,三動成坤爲邦,上來反三,故 曰 : 謂初已變爲家 其位剛得中」, 人。 四進已正 稱 與

止而巽,動不窮也

之三據坤,動震成坎,坎爲通,故「動不 虞翻曰: 窮」、「往來不窮謂之通」。 止,艮也。三變震 爲動。上

善俗。 《象》曰: 山上有木,漸。 君子以居賢德

虞翻曰:「君子」謂否乾。 乾爲賢德,坤

九九

初六,鴻 進也。 居。 三動受上成震,震爲言,故「小子厲有言 艮爲小子。初失位,故「厲」。 小徑。坎水流 翻 小人柔 以陽善陰,故「以居賢德善俗」也。 曰 : 漸于干,小子厲。 小水從山流下稱干,艮爲山,爲 、弱爲 鴻,大鴈也。 下山、故「鴻漸于干」也。 俗。 乾 有言,无咎。 四之 离五,鴻。 坤爲 變得正, 艮, 漸, 爲

下上,焉所三、善,又及方方,后。 《象》曰:「小子」之「厲」,義「无咎」也。

无咎」也。

故「吉」。
並在頤中,故「飲食衎衎」。得正應五,磐。初已之正,體噬嗑食。坎水陽物,虞翻曰: 艮爲山石,坎爲聚。聚石稱六二,鴻漸于磐,飲食衎衎,吉。

虞翻曰: 素,空也。承三應五,故「不《象》曰:「飲食衎衎」,不素飽也。

素飽」。

九三,鴻漸于陸,

爲平,三動之坤,故「鴻漸于陸」。 虞翻曰: 高平稱陸。謂初已變,坎水

夫征不復,

象不見,故「夫征不復」也。 爲征,爲夫,而體復象。坎陽死坤中,坎虞翻曰: 謂初已之正,三動成震。震

婦孕不育,凶。

「婦孕不育凶」。婦,离爲孕。三動成坤,离毁失位,故虞翻曰: 孕,妊娠也。育,生也。巽爲

利用禦寇。

寇,順相保」。保,大也。禦下,三動坤順,坎象不見,故「利用禦艮爲山,离爲戈兵甲胄,坎爲寇。自上虞翻曰:"禦,當也。坤爲用,巽爲高,

(象)曰:「夫征不復」,離羣醜也

虞翻曰: 坤三爻爲醜,物三稱羣也。

「婦孕不育」,失其道也。

虞翻曰: 三動离毀、陽隕坤中、故「失

其道也」。

「利用禦寇」,順相保也。

虞翻曰: 二動坤順,坎象不見,故以

「順相保也」。

六四,鴻漸于木,或得其桷,无咎。

脊,离爲麗。小木麗長木,巽繩束之,象桷。巽爲交,爲長木。艮爲小木,坎爲虞翻曰: 巽爲木。桷,椽也,方者謂之

位順五,故「无咎」。四已承五,又顧得脊之形,椽桷象也,故「或得其桷」。得

三,故「或得其桷」也矣。

《象》曰:「或得其桷」,順以巽也。

四居巽木,爻陰位正,直桷之象也。自虞翻曰: 坤爲順,以巽順五。 案:

二至五體有离坎。离爲飛鳥而居坎水,

漸義,爻皆稱焉。鴻之象也。鴻隨陽鳥,喻女從夫。卦

明

して、毎年である。

九五,鴻漸于陵,婦三歲不孕。

受上時而四體半艮山,故稱「陵」。巽爲虞翻曰: 陵,丘。「婦」謂四也。三動

三歲不孕」。

婦,离爲孕,坎爲歲。三動离壞,故「

婦

終莫之勝、吉。

中,故「莫之勝吉」。上終變之三成既濟虞翻曰: 莫,无, 勝,陵也。得正居

定,坎爲心,故《象》曰「得所願也」。

《象》曰:「終莫之勝吉」,得所願也。

虞翻曰: 上之三,既濟定,故「得所願

也。

上九,鴻漸于陸,

成坤,故稱「陸」也。 虞翻曰:「陸」謂三也。三坎爲平,變而

其羽可用爲儀,吉。

0::

權」,宜无怪焉。 坤。 用 虞 邦」,爲此爻發也。 上,權也。 義。 爲儀吉」。三動失位 翻 《象》曰「不可亂」,《彖》曰 日 上之三得正,离爲鳥,故「其 孔子 謂三變受成 曰「可與適道、未 三已得位,又變受 ,坤爲亂 既 濟, 與 進 家 可與 以 四 羽 正 止 口

象》曰:「其羽可用爲儀吉」,不可 虞翻 既終,母教又明,有德而可受,有儀而 謹巽之全,履坎之通,據离之耀。 位成既濟定,故「不可 ,故曰「其羽可以爲儀,不可亂也」。 曰 : 處漸高位,斷 坤爲 亂。 漸之進,順艮之言, 上來正坤,六爻得 亂 也。 亂 〇干寶 也。 婦德 미

三,女漸歸夫之象也,故云「進必有所崔憬曰:「鴻漸于磐,飲食衎衎」,言六比序卦》曰: 進必有所歸,故受之以歸妹。

■ 農上 歸妹 婦」也。

娶也。 虞翻 日月」, 四,坎月离日,俱歸妹象。「陰陽之義 티 : 「則天 歸, 地交而 嫁 也 萬物通」,故以嫁 兑 爲 妹。 泰 三之 配

征凶,

當位,故「征凶」也。 虞翻曰: 謂四也。震爲征,三之四不

无攸利。

以柔乘剛,故「无攸利」也。 虞翻曰: 謂三也。四之三,失正无應,

《彖》曰: 虞翻 月」則 以离 壬,坤主癸, 地之雜」。 日 曰 萬 坎坎 : 婦妹,天地之大義也。 物 月戦陰 乾天坤地。三之四,天 興,故「天地之大義」。 震東兑西,离南坎 日月會北。 陽。 「陰陽之義 震爲玄黄、「天 北。 地 乾主 配日

四 [卦,此 象最備四 時正卦,故 「天地之大

義 也。

天 地 不交而萬物不 興

地交之義也。 蕃,天地交然後萬物興,故歸妹以 虞 翻 离坎交陰陽,故「天地不交則 |矣。○王肅 曰 乾三之坤四。 티 : 男女交 震 爲 而 興 後 及天 物 天 民 地 不

歸妹,人之終始也。

其禮,子續父業,人道所以相終始也。 歸妹者、衰落之女也。 虞翻曰: 終坤癸,則乾始震 終始」。《雜卦》曰「歸 人始生乾而終於坤,故「人之 庚 也。 妹女之終」,謂陰 父既没矣,兄主 〇干寶曰:

説以 動 ,所歸妹也。

虞 翻 曰: 説, 兑, 動, 震 也。 謂震 嫁

兑, 所歸必妹也。

征凶」,位不當也。

崔憬曰: 正 一嫡,故 征 中四爻皆失位 N N 也。 以 象 歸 妹 非

无攸利」,柔乘剛也。

王肅曰: 有乘剛之進也,●故无所 以征 則 有 不 Ē 利 之凶 以 處 則

象》曰: 澤上有雷,歸妹。

時也。 干寶日 慮將來禍也。 君子象之,故不敢恃當今之虞而 雷薄於澤,八月九月將藏之

君子以永終知敝。

初九 敝。 虞翻 攸利,故「君子以永終知敝」 歸妹,人之始終也。 爲毁折,故「以永 **,**歸妹以娣,跛能履,征吉。 乾爲知。三之四爲永終,四之三兑 曰:「君子」謂乾 終 知 始則征 敝」。 也。 」爲戒者也。 坤爲永終,爲 〇崔憬曰: 凶,終則无

0 照曠閣本作「逆」。

 \mathbf{E} 震爲兄,故嫁妹,謂 也。

在三下, 動 圃 應四,故 稱 「娣」。 禮 初

履」。 也。 初九應變成坎,坎爲曳,故「跛而 應在 震爲征,初爲娣,變爲陰,故

「征吉」也。

《象》曰:「歸妹以娣」,以 恒 也。 「 跛 能

吉」,相承也。

虞翻曰: 陽得正,故「以 恒 恒 動 初

承二,故「吉相承 也。

九二,眇而視,利幽人之貞。

虞翻曰: 不正,故「眇而視」。 視,應五也。震上兑下,离 「幽人」謂二。 初 動 目

二在坎中,故稱「幽 ,故「利幽人之貞」。 變得正,震 與履二 同 喜

兑説 義也。

象》曰:「利幽人之貞」,未變常也 虞翻 恒也。 乘 初,未之五,故

未變常」矣。

六三,歸妹以須,反歸以娣。

虞翻曰: 歸妹以須」。 須,需 「娣」謂初也。 也 初至五 震爲反,反 體需象,故 在

四、見初進之。初在兑後、故「反歸 馬歸也。● 三失位,四反得正,兑進

娣」。

履

《象》曰:「歸妹以須」,位未當也。

虞翻曰: 三未變之陽,故「位未當」。

九四、歸妹愆期、遲歸有時。

虞翻曰: 愆,過也。謂二變,三動之正

見,故「愆期」。坎爲曳,震爲行。行曳, 體大過象。 坎月离日爲期,三變日月不

冬离夏,四時體正,故「歸有時 故「遲」也。「歸」謂反三。 震春 兑秋,坎 也。

象》曰:「愆期」之志,有待而行也。 待男行矣。

四庫本作「爲」。

六五,帝 乙歸妹,其君之袂,不如其娣之

袂良。

《象》曰「以貴行也」矣。 應。 虞 爲小君,則妹也。 良、故「其君之袂、不如其娣之袂良」、故 爲口,乾爲衣,故稱「袂」。謂三失位无 故 翻 曰「帝乙」。 娣袂謂二,得中應五,三動成乾爲 曰 : 三四已正,震爲帝,坤爲乙, 泰乾爲艮,爲君。 袂口,袂之飾也。兑 乾在下

月幾望,吉。

孚》「月幾望」同義也。 東,日月象對,故曰「幾望」。 二之五,四 虞翻曰: 復三得正,故「吉」也。 幾,其也。 坎月离日, 兑西震 與《小畜》、《中

《象》曰: 「帝乙歸妹」,「不 如 其 娣之袂

良」也。

其位在中,以貴行 虞翻曰: 三四復正,乾爲良。 也。

> 虞翻 貴,故「以貴行也」。 曰: 三四復,二之五成既濟,五

上六,女承筐无實,

稱承,震爲筐。以陰應陰,三四復位,坤 虞翻曰:「女」謂應三,兑也。 自下受上

士刲羊无血,无攸利。

爲虚,故「无實」,《象》曰「承虚筐也」。

虞翻 坎象不見,故「无血」。 离爲刀,故「士刲羊」。 曰 : 封, 刺也。震爲士, 兑爲羊, 三柔承剛,故「无 三四復位成泰,

《象》曰:「上六」「无實」,承虚筐也。 攸利」也。

虞翻曰: 泰坤爲虚,故「承虚筐也」。

《序卦》曰: 豐者,大也。 得 其 所歸者必大,故受之以

崔憬曰: 九女,爲大援,故言「得其所歸者 歸妹者,姪娣媵,國三人,凡 必

解

■ 震上 豐,亨。 大」也。

刑。 虞翻 用獄」者,此卦之謂也。 於坎獄 一之四,而豐三從噬 曰 陰陽交,故「通」。 中 而 此卦 成豐,故「君子 三陰三 嗑 上來之三,折 陽之例, 噬 嗑 以 》所謂「利 折 獄 從 致 四

王假之,

也」。 上至五,動之正成乾,故「王假之尚大上至五,動之正成乾,故「王假之尚之問之。謂四宜

勿憂,宜日中。

息 則昃,月盈則食。 宜 虞翻曰: 以其宜中而憂其 日中,當五。 -0 日中」。 干寶曰: 五. 在坎中,坎爲憂,故「勿憂, 動之正,則四變成离。 离象,照天下也。 側 天地 豐坎 也。 宫 盈虚,與 坎爲夜,离爲 陰世在五。 「日中 時消

> 言也。猶《詩》曰「上帝臨爾, 无貮爾 書。 心」,言周德當天人之心,宜居王位,故 天位,而戒懼不怠。 殷,水德。 「宜日中」。 居王位之象也。 以离變坎,至於天位,日中之象也 坎象 書 聖人德大而心 敗 「勿憂」者,勸 而离居之,周 小,既居 勉 伐 之 殷

明則見微,動則成務,故能「大」矣。崔憬曰: 离下震上,「明以動」之象《彖》曰: 豐,大也。明以動,故豐。

「王假之」,尚大也。

之五,得其盛位,謂之「大」。 姚信曰: 四體震王。假,大也。四上

「勿憂,宜日中」,

二〇六

虞 兩 离,重 天下」也。 翻 日 : 明 麗 五. 動 正 一, 故 成乾,乾爲天。 「宜照天下」, 四 動 一化 成

日 中則昃,

成

荀 四,「日昃」之象也。 逐三: 豐者至盛,故「日中」。 下 居

月盈則食。

天地 鬼神乎? 甲。 食,故「則食」。 盈虚 翻 曰: 五動成乾,故「月盈」。 一,與時消息,而況於人乎? 月之行,生震見兑,盈於乾 此「豐其屋, 蔀其家」也。 四變體 況於 噬嗑

象具。 虞翻 與 亦隨時 虚,故「天地盈虚」也。 時消息。 曰 : 乾 消息,謂「人謀鬼謀,百姓與能」, 爲 五息 神人,坤爲 成 乾 爲盈,四消 鬼。 豐之既濟, 鬼神與 入坤 四 爲 時

雷電皆至,

君子以折獄致刑 荀 而 爽 行以豐,故「折獄致刑」,以討除之也。 日 : 豐者,陰據不正,奪陽之位

虞翻 正,故「无敢折獄」也。 故「以折獄致刑」。兑折爲刑。 在坎獄中,故上之三折四,入大過死象, 曰:「君子」謂三。 噬嗑四失正,繫 賁三得

初九,遇其配主,

震 虞 翻曰: 爲主。 Ŧi. 妃,嬪,謂 動 體 姤 四 遇,故 也。 四 遇 失位,在 其 配

雖旬无咎,往有尚 主也。

數十。四上而之五成离,离爲 虞翻曰: 謂四失位,變 成坤、 日。 應 初。 坤

象》曰:「雖旬无咎」,過旬災也。 虞翻 日 體大過,故「過旬災」。

四上

六二,豐其蔀,日中見斗,往得疑疾。

之五,坎爲災也。

二〇八

故 也。 巽爲高。 斗」。四往之五,得正 星 爲 也。 虞 也。 見,象在上爲日中。 翻 「往得疑疾」也。 二利四之五,故 离上之三,隱坎雲下,故「日中見 曰 噬嗑艮爲星,爲止。 舞星止於中而舞者,北斗之象 日 蔽雲中稱蔀。 「豐其蔀 一成坎。 艮爲斗。 蔀,小, 坎爲疑疾, 坎爲北,中 噬 斗,七 嗑 离 几

有孚發若,吉。

動 虞翻曰: 坎爲孚。 而得位,故「有孚發若吉」也。 四發之五成坎孚,

象》曰:「有孚發若」,信以發志也。 順 虞翻 家易》曰: 志。 티 : 四發之五,坎爲志也。 信著於五,然後 乃可 ○
《九 發其

九三,豐其沛, 虞翻 沬,小星也。 日 日中見沫。 在雲下稱 噬 嗑 离爲日,艮爲沫,故 沛 沛,不 明

> 沛。 日 中見沫」。 沬」也。 沫,斗杓後小星也。 ○《九家易》曰: 上之三,日入坎雲下,故 大暗謂之

折其右肱,无咎。

之三得正,故「无咎」也 上來之三,折艮入兑,故 虞翻曰: 兑爲折,爲右。 「折 噬嗑艮爲肱。 其 右

「象》曰:「豐其沛」,不可大事也 折其右肱」,終不可用也。 虞翻曰: 利四之陰,故「不可大事」。

虞翻曰: 四死大過,故「終不可用」。

九四、豐其蔀,

中,故「豐其蔀」、《象》曰「位不當也」。 虞翻曰: 蔀, 蔽 也。 噬 嗑 离 日之坎雲

日

中見斗,

巽,巽爲人。 虞翻曰: 日 中見斗」。 噬 日 嗑 《象》曰「幽不明」,是其 入坎雲下,幽伏不明,故 日在 上爲中,上之三爲

義也。

遇其夷主,吉。

行傷五則吉,故曰「遇其夷主,吉行也」。 其位而比於五,故曰「遇」也。夷者,傷 案: 四處上卦之下,以陽居陰,履非 則三體震爲夷主,故「遇其夷主吉」也。 虞翻曰: 震爲主。四行之正成明夷,

斗」,幽不明也。《象》曰:「豐其蔀」,位不當也。「日中見

明」。坎,幽也。 虞翻曰: 离上變入坎雲下,故「幽不

「遇其夷主」,吉行也。

行」。 動體明夷,震爲行,故曰「吉虞翻曰: 動體明夷,震爲行,故曰「吉

六五,來章,有慶譽,吉。

謂五、陽出稱慶也。「譽」謂二、「二多虞翻曰: 在内稱來。章、顯也。「慶」

譽吉」也。譽」。五發得正則來應二,故「來章有慶

象》曰:「六五」之「吉」,有慶也

虞翻曰: 動而成乾,乾爲慶。

上六、豐其屋、蔀其家。

降祥明」,以大壯爲屋象故也。「蔀其家」。與泰二同義。故《象》曰「天變,上動成家人。大屋見則家人壞,故體大壯屋象,故「豐其屋」。謂四五已虞翻曰: 豐、大, 蔀,小也。三至上

闚其户, 閺其无人。 三歲不覿, 凶。

〇干寶曰: 在豐之家,居乾之位,乾爲 「與。閱人者,言皆不見。坎爲三歲, 「明為空虚,三隱伏坎中,故「関其無人」, 中爲空虚,三隱伏坎中,故「関其無人」, 四動時,坤爲闔。户闔,故「闚其,上」。 」。 「與其無人」, 四動時,坤爲闔。戶園,故「闚其, 」。

<u>:</u>

也。 故曰 多傾 歲」致凶於災。 闚 則璿室之成,三年而後亡國矣。 亦弗之亡也。故曰「三歲不覿,凶」。 其祥,地出其妖,人反其常。 有興亡焉,故王者之亡其家也,必天示 應 地户, 闃寂无人。 震木數三, 故「三 而 三者,天地人之數也。 近户, 闚之象也。 國之女也。 於三、三互离。 「闚其户, 闃其无人」。 璿室玉 故 曰 豐其屋」。 臺 也。 社稷既亡,宫室虚 蔀 巽爲户,离爲目。 既屋豐家蔀,若 其家者,以 此 蓋 凡國於天地 非斯三者, 闃,無 記 紂 之多 記 人 貌 紂

虞翻曰: 謂三隱伏坎中,故「自藏「闚其户,闃其无人」,自藏也。 孟喜曰: 天降下惡祥也。

者也。

以旅。《序卦》曰: 窮大者必失其居,故受之

能久處乎? 故必獲罪去邦,羇旅於外矣。崔憬曰: 諺云「作者不居」,況窮大甚而

■ 离上 旅,小亨。旅,貞吉。

无恒,無所容處,故再言旅惡而愍之。旅貞吉」。再言「旅」者,謂四凶惡,進退得貴位而順剛,麗乎大明,故「旅小亨,往來也。與噬嗑之豐同義。「小」謂柔。虞翻曰: 賁初之四,否三之五,非乾坤

《彖》曰:「旅,小亨」,

居五,與陽通者也。 本體,故曰客旅。○荀爽曰: 謂陰升姚信曰: 此本否卦。三五交易,去其

「小亨旅貞吉」也。 柔得中乎外而順乎剛,止而麗乎明,是以

於剛。九五降三,降不失正。止而麗乎蜀才曰: 否三升五,柔得中於外,上順

明,所以「小亨旅貞吉」也。

旅之時義大矣哉

虞翻 咸願有附,豈非智者有爲之時? 「旅之時義大矣哉」。 者,物失其所居之時也。 大日月」,故「義大」也。 曰: 以离 日麗天、「縣 〇 王 物失所居,則 丽 象著明 日 : 故 旅 日

象》曰: 山上有火,旅。

象也。 侯果曰: 火在山上,勢非 長 旅之

君子以明慎 用刑,而不留 獄。

獄 故 兑爲刑,坎爲獄。 虞翻曰:「君子」謂三。离爲明,艮爲慎, 」同義者也 以 い明慎 用刑, 賁初之四、獄象不見, 而不留獄」,與豐「折

初六,旅瑣瑣,斯其所取災。

陸績曰: 旅 瑣瑣」也。 瑣瑣,小也。艮爲小石,故曰 履非其正,應离之始。离

> 「斯其所取 爲火,艮爲 災」也 Ш 以應火,災焚自取也,故曰

象》曰:「旅瑣瑣」,志窮災也

謂三動應坎,坎爲志,坤稱窮,故曰「志 虞翻曰: 窮災也」。 應,之正介坎。坎爲災眚,艮 瑣瑣,最蔽之貌 也。 手爲取。 失位 遠

六二,旅即次,懷其資,得僮僕貞。

位、正居,是故曰「得僮僕貞」矣。 賤,二得履之,故「得僮僕」。處和、得 《九家易》曰: 次」。承陽有實,故「懷其資」。 財也。以陰居二,即就其舍,故「旅即 即,就, 次,舍; 初者卑

《象》曰:「得僮僕貞」,終无尤也。

九三,旅焚其次,喪其僮僕,貞厲。 僮僕貞」而「終无尤也」。 虞翻 曰: 履正體艮,艮爲閽寺,「僮僕貞」之象也。 艮爲僮僕,得正承三,故「得

厲 坤,故「喪 壞 虞 故 翻 日 焚其次」。 其 僮 爲 一僕」。 火, 坤 艮爲僮 爲喪, 動 而失正 三動 僕。 , 故 三動 艮 滅 「貞 人 艮

《象》曰:「旅焚其次」,亦以傷矣。

以旅與下,其義「喪」也。

虞翻日

三動體剥,故「傷」也

「其義喪也」。 虞翻曰: 三變成坤,坤爲下、爲喪,故

虞翻曰: 巽爲處。四焚棄惡人,失位九四,旅于處,得其資斧,我心不快。

資斧,故「得其資斧」。三動四坎爲心,遠應,故「旅于處」,言无所從也。离爲

〈象》曰:「旅于處」,未得位也。 其位未至,故「我心不快」也。

一得

,其資

也。雖處上體之下,不先於物,然而不王弼曰。 斧所以斫除荆棘以安其舍者

斧」,心未快

也。

不快」。 巽爲木, 兑爲金。 除荆棘之象者也。 得 艮爲山,山 處,不得其次而得其資斧之地,故「其心 其位,不 非平坦之地 獲 案 : 平坦之地者 九四 木貫於金 失位 也 也。 丽 即資斧,斫 四 體 居艮上。 党, 所

六五,射雉,一矢亡。

故「一矢亡」矣。 雉」。五變乾體,矢動雉飛,雉象不見, 虞翻曰: 三變坎爲弓,离爲矢,故「射

終以譽命。

乾,則二來應己,故「終以譽命」。 虞翻曰:「譽」謂二,巽爲命。五終變成

《象》曰:「終以譽命」,上逮也。

其體,矢決於外,射之象也。一陰升乾,退。艮爲手,兑爲決。有木在手,進退干寶曰: 离爲雉,爲矢。巽爲木,爲進虞翻曰: 逮,及也。謂二上及也。○

復射雉,終亦失之,故曰「一矢亡」也。 故 王者後,雖小叛擾,終逮安周室,故曰 終以譽命」矣。 一矢亡者,喻有損而小也。此記禄父爲 曰「一矢」。履非 其位,下又无應,雖

上九,鳥焚其巢,旅人先笑後號咷。 巽象在後,故「後號咷」。 巢象不見,故「鳥焚其巢」。 在前,故「先笑」。應在巽,巽爲號咷。 交翻 曰: 四失位,變震爲筐,巢之象也。今 离爲鳥, 爲火。巽爲木,爲 震爲笑。震

喪牛于易,凶。

易」。失位无應,故「凶」也。五動成遯,六 乾爲易。上失三,五動應二,故 虞翻曰: 二「執之用黄牛之革」,則旅家所喪牛也 以「旅」在「上」,其義 謂三 離火焚巢,故「其義焚也」。 動時坤爲牛,五動成乾 「焚」也。 「喪牛于

喪牛之凶,❶終莫之聞也

有智者,莫之吉也。 物之所惡也。喪牛甚易,求之也難。 風。鳥居木上,巢之象也。 虞翻曰: ○侯果曰: 离爲鳥,爲火。巽爲木,爲 坎耳入兑,故「終莫之聞」。 旅而贍資, 雖

者,人也。 序卦》曰: 旅无所容,故受之以巽。 巽

矣,故曰「旅无所容」,「受之以巽」。 崔憬曰: 旅寄於外而无所容,則必入

一巽上巽,小亨,利有攸往,利見大人。

故「小亨」也。「大人」謂五 虞翻曰: 二失位利正往應五,故「利有攸往,利見 遯二之四,柔得位 离 而 目 順 .爲見, 五 剛

0 喪牛之凶」,四 照曠閣本作喪牛于易

四

日 重巽以申命,

寧也。 陸績 日 巽爲命令。 重命令者,欲丁

剛巽乎中正 而志行,

成坎。坎爲志,終變成震,震爲行也。 陸績曰: ○虞翻曰:「剛中正」謂五也。 二失位,動 剛異乎中正」也。 二得中,五得正,體兩巽,故曰 皆據陰,故「志行」也。

柔皆順乎剛,是以「小亨,

陸績曰 陰爲卦主,故「小亨」。

利 有攸往,利見大人。」 其義已見繇辭。

《象》曰: 令,兩巽相 行,故「行事」也。 象,故「申命」。 虞翻曰:「君子」謂遯乾 令行爲上,貴其必從,故曰「行事」也。 隨風,巽。君子以申命行事。 隨 故「申命」也。 變至三,坤爲 荀爽曰: 也。 巽爲命,重 法教百端 事,震爲 異爲號

初六,進退,利武人之貞。

位,利之正爲乾,故「利武人之貞」矣。 翻 巽爲 進退,乾爲武人。 初 失

象》曰:「進退」,志疑也

荀爽曰: 所據,故「志以疑也」。 風性動,進退,欲承五,爲二

利武人之貞」,志治也。

治」。「乾元用九,天下治」,是其義也。 虞翻曰: 動而成乾、乾爲大明、故「志

九二,巽在牀下,

宋衷曰: 不過軍中事也 者,號令。 下,牀之象也。二无應於上,退而據初, 曰:「牀下」以喻近也。 心在於下,故曰「巽在牀下」也。 〇荀爽 巽爲木,二陽在上,初陰在 故言「牀下」,以明將之所專, 二者,軍帥。

用史巫紛若,吉,无咎。

爽

曰:

史以書勳,巫以告廟。

變而順五則吉,故曰「用史巫紛若吉无臣,軍帥之象。征伐既畢,書勳告廟,當變,若,順也。謂二以陽應陽,君所不

荀爽曰: 謂二以處中和,故能變。《象》曰:「紛若」之「吉」,得中也。

險,故「吝」也。艮,坎爲憂,艮爲鼻,故「頻巽」。 无應在良,坎爲憂,艮爲鼻,故「頻巽」。 无應在虞翻曰: 頻,類也。謂二已變,三體坎九三,頻巽,吝。

行,故「志窮也」。 荀爽曰: 乘陽无據,爲陰所乘,號令不《象》曰:「頻巽」之「吝」,志窮也。

六四,悔亡,田獲三品。 虞翻曰:「田」謂二也。 无應,悔也。 功,故《象》曰「有功」也。 二動得正 欲二之初,已得應之,故 一, 處 地 中 二動艮爲手, 中 應五。 稱 田 五多 失位

先庚三日,後庚三日,吉。 九五,貞吉,悔亡,无不利。无初有終。 象》曰:「田獲三品」,有功也。 初,离 實。 故 虞翻曰: 王弼曰: 利」也。 震巽相薄,雷風无形,當變之震 有益,莫若三品,故曰「有功也」。 行命,必能獲强暴,遠不仁者也。 充君之庖。 爲充君之庖」,注云「上殺中心,乾之爲豆 狩」,田獲三品,「一爲乾豆,二爲賓客,三 傳》曰「春獵曰田,夏曰苗,秋曰蒐,冬曰 雞,二兑爲羊,三离雉也。 曰:「田獲三品」,下三爻也。 稱「獲」。 巽究爲躁 次殺中髀骼,以供賓客。下殺中腹 爲 雉,故「獲三品」矣。 得位處中,故「貞吉悔亡无不 得位承五而依尊履正,以斯 厨尊神敬客之義也」。 謂艮爲狼,坎爲豕。 卦,故「无初有終」也。 謂 艮二之 初巽爲 《穀梁 翟玄 而

二 五

白。 • 虞 故「无初有終吉」。震究爲蕃鮮白 五成离,終上成震。震爻在後,故「後庚 前,故「先庚三日」,謂益時也。 至三成震。 三日」也。巽初失正,終變成震。得位, ·先甲三日,後甲三日」同義。 翻 曰 異究爲躁卦,躁卦謂 震 震 庚 主庚,离 也。 謂 爲 變 日。 初 震 至二成离 也。 震三爻在 動四至 Ŧi. 一,甲巽 動成 與蠱

虞翻曰: 居中得正,故「吉」也。《象》曰:「九五」之「吉」,位正中也。

始終,故經舉甲庚于蠱彖、巽五也。

蠱,乾成于甲,震成于庚。 陰陽,天地之

上九,巽在牀下

廟,然後受行。三軍之命,將之所專,故曰: 上爲宗廟。禮封賞出軍,皆先告當變窮上而復初者也。○《九家易》震,故「巽在牀下」,《象》曰「上窮也」,明虞翻曰:「牀下」爲初也。窮上反下成

曰「巽在牀下」也。

二六

喪其資斧,貞凶。

齊」。 虞 變失位,故「貞凶」。○荀爽曰: 師旋,亦告於廟,還斧於君, 喪,巽爲齊,离爲斧,故「喪其齊斧」。 喪其資斧貞凶」。 翻 曰: 正如其故,不執臣節則凶, 變至三時,離 毁人 坤。 故 一喪 故 軍 坤 資 罷 爲

「喪其齊斧」,正乎「凶」也。 虞翻曰: 陽窮上反下,故曰「上窮也」。 《象》曰:「巽在牀下」,上窮也。

「正乎凶也」。 虞翻曰: 上應於三,三動失正,故曰

兑者,说也。《序卦》曰: 人而後説之,故受之以兑。

❶ 「甲巽白」,四庫本、照曠閣本作「謂巽也」。

崔憬曰: 而後説之,所謂「人忘其勞死」也。 巽以申命行事,入於刑者也。

入刑

一 兑上 兑,亨,利 貞。

貞」也。 虞翻 外,二失正,動 曰 : 大壯五之三也。 應 五承三,故 剛中而 亨利 柔

《彖》曰: 兑,説也。

虞翻曰: 兑口,故「説也」。

剛中 而柔外,説以利貞

也。 虞翻曰:「剛中」謂二五,「柔外」謂三上 二三四利之正,故「説以利貞」也。

是以順乎天而應乎人。

乎人」。 虞翻 謂三矣。 **E** 坤爲順也。 二變順五承三,故「順乎天應 大壯乾爲天,謂五也。「人」

説 以先民、民忘其勞。

喜, 兑説, 謂二四已變成屯。故爲勞 坤爲民,坎爲心。民心喜

説,有順比象,故「忘其勞」也。

説 以 犯難、民忘其死。

其死」。坎心爲忘,或以坤爲死也。 大過死,變成屯,「民 翻 曰 體屯、故「難」也。 説無疆」,故「民忘 三至上 一體

説之大,民勸矣哉!

虞翻曰: 體比順象,故勞而不怨。 震

《象》曰: 爲喜笑,故人勸也。 麗澤,兑。君子以朋友講習。

虞翻曰: 對,故「朋友講習」也。 朋,伏艮爲友,坎爲習,震爲講,兑兩口 「學以聚之,問以辯之」。 兑二陽同類爲 君子,大壯乾也。 陽息見兑,

初九,和兑,吉。

虞翻曰: 得 位, 四 應己, 故 和 兑

吉」矣。

《象》曰:「和兑」之「吉」,行未疑也。 虞翻曰: 四變應初,震爲行,坎爲疑,

故「行未疑」。

九二、孚兑、吉、悔亡。

亡」矣。中稱「孚」,二動得位應之,故「孚兑吉悔中稱「孚」,二動得位應之,故「孚兑吉悔虞翻曰:「孚」謂五也。四已變,五在坎

《象》曰:「孚兑」之「吉」,信志也。

志,故「信志也」。 虞翻曰: 二變應五,謂四已變,坎爲

六三,來兑,凶。

虞翻曰: 從大壯來,失位,故「來兑

凶」矣。

《象》曰:「來兑」之「凶」,位不當也。

案: 以陰居陽,故「位不當」。 諂邪求

悦,所以必凶。

九四,商兑,未寧,介疾有喜。

兑」。變之坎,水性流,震爲行,謂二已虞翻曰: 巽爲近利市三倍,故稱「商

變,體比象,故「未寧」。與比「不寧方

《象》曰:「九四」之「喜」,有慶也。

承五,故「有喜」。

來」同義也。 坎爲疾,故「介疾」。

得位

虞翻曰: 陽爲慶,謂五也。

九五,孚于剥,有厲。

故「孚于剥」。在坎未光,「有厲」也。虞翻曰:「孚」謂五也。二四變體剥象,

《象》曰:「孚于剥」,位正當也。

厲、「位正當也」。 案: 以陽居尊位、應二比四、孚剥有

上六,引兑。

虞翻曰: 无應乘陽,動而之巽爲繩,艮

爲手。應在三,三未之正,故「引兑」也。

《象》曰:「上六引兑」,未光也。

离故「未光也」。 虞翻曰: 二四已變而體屯,上三未爲

易傳卷第十一

易傳卷第十二

唐資州李鼎祚集解

《序卦》曰: 説 而 後散之,故受之以涣。

涣者,離也。

之,故受之涣。 以征役、離之以家邦、故曰「説 崔憬曰: 人説忘其勞死,而後 涣者,離也」。 丽 可 後散 散之

一巽上 涣,亨,

虞翻曰: 否四之二成坎巽,天地交,故

「亨」也。

王假有廟,

虞翻 曰 : 乾爲王。假,至也。 否體 觀

艮爲宗廟。乾四之坤二,故「王假有廟,

王 乃在中也」。

> 利涉大川,利貞。 虞翻曰: 大川,乘木有功」。二失正,變應五,故 「利貞」也。 坎爲大川,涣舟楫象,故「涉

《彖》曰: 涣「亨」,剛來 而不窮,柔得 位 乎

外而上同。

盧氏曰: 中,剛來成坎,水流而 二上升乾四,「柔得位乎外」,上承貴王 此本否卦。 不窮也。 乾之九 四 坤之六 來居 坤

與上同也。

王假有廟」,王乃在中也。

廟。 荀爽曰: 假,大也。言受命之王,居五大位 謂陽來居二,在坤之中爲立

上體之中,上享天帝,下立宗廟也。

利涉大川」,乘木有功也。

虞翻曰: 巽爲木,坎爲水,故口 乘木有

功也」。

《象》曰: 風行水上,涣。 先王以享于帝

立廟

故也。 故以享帝立廟、謂成既濟、有噬嗑食象 帝,爲祭。艮爲廟。 奉,故繼於上。至於宗廟,其實在 地者,陰中之陽,有似廟中之神。 圃 帝,陽下至二爲立廟也。 天帝,下立宗廟也。 曰 : 爽曰: 謂天帝。宗廟之神所配食者,王者所 否乾爲先王。享,祭也。 謂受命之王,收集 四之二殺坤大牲, 陰上至四承五爲 离日上爲宗廟 民,上 〇虞 地。

虞翻曰: 坎爲馬。初失正,動初六,用拯馬壯,吉,悔亡。

得位,故「拯馬壯吉,悔亡」之矣。

象》曰:「初六」之「吉」,順也。

虞翻曰: 承二,故「順也」。

虞翻曰: 震爲奔,坎爲棘,爲矯輮,震九二,涣奔其机,悔亡。

正,故「涣奔其机悔亡」也。 也。涣宗廟中,故設机。二失位,變得爲足。輮棘有足,艮肱據之,憑机之象

《象》曰:「涣奔其机」,得願也。

虞翻曰:動而得位,故「得願也」。

六三,涣其躬,无悔。

荀爽曰: 體中曰躬。謂涣三使承上,

《象》曰:「涣其躬」,志在外也。

爲「志在外」,故「无悔」。

散躬志外,不固所守,與剛合志,故得王弼曰: 涣之爲義,内險而外安者也。

无咎。

六四, 涣其羣, 元吉。

大壯

麦,鼻 注 頁 1. 文 c 记 声 1. J c。 虞翻 曰: 謂 二 已 變 成 坤 。 坤 三 爻 稱

羣,得位順五,故「元吉」也。

涣有丘,匪夷所思。

也。「夷」謂震四。應在初,三變坎爲虞翻曰: 位半艮山,故稱丘。匪,非

点。 有「匪夷」之「思」也。 承尊,故「元吉」也。 互體有艮,艮爲山 思,故「匪夷所思」也。 二居四、離其羣侣、「涣其羣」也。得位 涣羣雖則光大,有丘則非平易,故 ○盧 氏曰: 自

象》曰:「涣其羣,元吉」,光大也。

也。 虞翻曰: 謂三已變成离,故四「光大

九五, 涣汗其大號。

《九家易》曰: 謂五建二爲諸侯,使下 身,不還反 故曰「涣汗其大號」也。 來下處二成坎水,汗之象也。陽稱大, 君國,故宣布號令,百姓被澤,若汗之出 也。此本否卦。 體乾爲首

涣王居,无咎。

荀爽曰: 布其德教,王居其所,故「无

象》曰:「王居无咎」,正位也。

虞翻 四陰順命,故「王居无咎,正位也」。 曰 五爲王,艮爲居。正位居五

上九,涣其血去逖出,无咎。

憂也。 二變爲觀,坎象不見,故「其血去 虞翻曰: 應在三、坎爲血、爲逖。

逖出,无咎」。

《象》曰:「涣其血」,遠害也。 虞翻曰: 乾爲遠,坤爲害,體遯上,故

「遠害也」。

《序卦》曰: 崔憬曰: 止之,故言「物不可以終離,受之以節」。 物不可以終離,故受之以節。 離散之道,不可終行,當宜節

虞翻 位以節,中正以通,故「節亨」也。 日 : 泰三之五,天地交也。 五當

苦節不可貞。

虞翻曰: 謂上也。 應在三,三變成离

生导五,变易,又云了真。 火,「炎上作苦」。位在火上,故「苦節」。

雖得位,乘陽,故「不可貞」。

「苦節不可貞」,其道窮也。

虞翻曰: 位極於上,乘陽,故「窮也」。

説以行險,

虞翻曰: 兑,説, 坎,險, 震爲行

故「説以行險」也。

當位以節,中正以通。

虞翻曰: 中正謂五,坎爲通也。

天地節而四時成。

冬,三動离爲夏,故「天地節而四時虞翻曰: 泰乾天坤地,震春兑秋,坎

成」也。

節以制度,不傷財,不害民。

虞翻 又爲害,爲民,爲財。 節以制度,不傷財,不害民」。 三出復位成既濟定,坤剥 日 : 艮手 稱 制 坤數· 二動體 十爲度。 剥, 不見,故 剥爲 坤

《象》曰: 澤上有水,節。

侯果曰: 澤上有水,以堤防爲節。

君子以制數度,議德行。

五之乾爲「議德行」也。度,議德行」。乾三之五爲「制數度」,坤爲度,震爲議,爲行,乾爲德,故「以制數虞翻曰:「君子」,泰乾也。艮止爲制,坤

初九,不出户庭,无咎。

虞翻曰: 泰坤爲户,艮爲庭,震爲出。

《象》曰:「不出户庭」,知通塞也。初得位應四,故「不出户庭无咎」矣。

〇崔憬曰: 爲節之始,有應於四。四虞翻曰: 坎爲通,二變坤土壅初爲塞。

爲坎險,不通之象。以節崇塞,雖不通,

初九應四,四互坎艮。艮爲門闕,四居守節,故「不出」焉而「无咎」也。 案:可謂「知通塞」矣。户庭,室庭也。慎密

艮中,是爲内户,户庭之象也。

九二,不出門庭,凶。

凶」矣。 位,不變出門應五則凶,故言「不出門庭 虞翻曰: 變而之坤,艮爲門庭。二失

《象》曰:「不出門庭凶」,失時極也。

虞翻曰: 極,中也。未變之正,失時

六三,不節若,則嗟若,无咎。

「節若」。嗟,哀號聲。震爲音聲,爲出。虞翻曰: 三,節家君子也。失位,故

若」。得位乘二,故「无咎」也。三動得正而體离坎,涕流出目,故則「嗟

王弼曰: 若,辭也。以陰處陽,以柔乘《象》曰:「不節」之「嗟」,又誰「咎」也。

所怨咎,故曰「又誰咎」矣。剛,違節之道以至哀嗟。自己所至,无

六四,安節,亨。

五,有應於初,故「安節亨」。 虞翻曰: 二已變,艮止坤安,得正承

《象》曰:「安節」之「亨」,承上道也。

君,故曰「承上道也」。《九家易》曰: 言四得正奉五,上通於

九五、甘節、吉、往有尚。

「往有尚」也。 一失正,變往應五,故言」。「往」謂二。二失正,變往應五,故虞翻曰: 得正居中,坎爲美,故「甘節

· 冀翱曰: · 艮爲居,五爲中,改口《象》曰:「甘節」之「吉」,居位中也。

虞翻曰: 艮爲居,五爲中,故「居位中

上六,苦節,貞凶,悔亡。

也。

苦」,故「苦節」。乘陽,故「貞凶」。得虞翻曰: 二三變在兩离火,「炎上作

三四四

位,故「悔亡」。〇干寶曰:《彖》稱「苦位,故「悔亡」。〇干寶曰:《彖》稱「苦位,故「悔亡」。〇干寶曰:《彖》稱「苦心。」。

異上 中孚,

之例。遯陰未及三,而大壯陽已至四,謂二也,故稱「中孚」。此當從四陽二陰虞翻曰: 訟四之初也。坎孚象在中,

中,有「鳴鶴在陰」之義也。故從訟來。二在訟時體离爲鶴,在坎陰

豚魚吉。

利涉大川,

涉大川,乘木舟虚也」。 利出涉坎,得正體涣。涣舟楫象,故「利虞翻曰: 坎爲大川。謂二已化邦,三

利貞。

孚以利貞,乃應於天也」。 虞翻曰: 謂二利之正而應五也。「中

巽,孚。《彖》曰: 中孚柔在内而剛得中。説而

王 肅 曰 : 三四在内,二五得中。 兑説

而巽順,故「孚」也。

乃化邦也。

虞翻曰: 二化應五成坤。 坤爲邦,故

「化邦也」。

豚魚吉」,信及豚魚也。

荀爽曰: 豚魚謂四三也。 艮爲山陸,

豚所處。 三爲兑澤,魚所在。 豚者卑

賤,魚者幽隱。中信之道,皆及之矣。

利涉大川」,乘木舟虚也。

王肅曰: 中孚之象,外實内虚,有似可

乘虚木之舟也。

中孚以「利貞」,乃應乎天也。

虞翻 曰: 訟乾爲天,二動應乾,故「乃

應乎天也」。

《象》曰: 澤上有風,中孚。

崔憬曰: 流風令於上,布澤惠於下,中

孚之象也。

君子以議獄緩死。

虞翻曰:「君子」謂乾也。

爲議、爲緩,坤爲死。 乾四之初,則二出 訟坎爲 獄,震

坎獄。兑説震喜,坎獄不見,故「議獄緩

死」也。

初九,虞吉,有它不燕。

者乘五,●有它意於四則不安,故曰「有 虞,无意於四則吉,故曰「虞吉」也。 荀爽曰: 虞,安也。 初應於四,宜自安

四

它不燕」也。

象》曰:「初九虞吉」,志未變也。

荀爽曰: 初位潛藏,未得變而應四也。

九二,鳴鶴在陰,其子和之。我有好爵,吾

與爾靡之。

虞翻曰: 坎爲陰夜,鶴知夜半,故「鳴鶴在 靡,共也。 震爲鳴,訟 离

照曠閣本作「承」。

故「吾與爾靡之」矣。 象,故稱「好爵」。 五利二變之正應,以 位 故 陰 同聲者相 稱 也。 ::「我」。 二動 坤爲邦國。 五在艮, 閻寺庭闕之 應,故「其子 成坤體益,五艮爲子。 「吾」謂五也。 和 之。 离爲爵。 坤爲身, 震巽 爵,

實,故「罷」而「泣」之也。得位有位,故「鼓」而「歌」。 三失位無苟爽曰: 三四俱陰,故稱「得」也。四六三,得敵,或鼓或罷,或泣或歌。

克,故「或罷」也。不勝而退,懼見侵陵,敵,故「或鼓」也。四履正位,非己敵所之謂也。以陰居陽,自彊而進。進而閡王弼曰: 三四俱陰,金木異性,●「敵」系》曰:「或鼓或罷」,位不當也。

「或歌」也。歌泣无恒,「位不當也」。故「或泣」也。四履謙巽,不報讐敵,故

震爲奔走,體遯山中,乾坎不見,故「馬故「月幾望」。乾坎兩馬匹。初四易位,東。月在兑二,离在震三。日月象對,虞翻曰: 訟坎爲月,离爲日。兑西震六四,月幾望,馬匹亡,无咎。

類上也」。 虞翻曰: 訟初之四,體與上絶,故「絶 《象》曰:「馬匹亡」,絶類上也。

匹亡」。初、四易位,故「无咎」矣。

象》曰:「有孚攣如」,位正當也。

❶ 「木」,原作「水」,今據照曠閣本改。

案: 以陽居五,有信攣二使變,己是

「位正當也」。

上九,翰音登于天,貞凶。

「翰音」也。

虚音登天,何可久也。是「翰音登天」也。巽爲雞,雞曰翰音。申命,有聲無實。中實内喪,虚華外揚,侯果曰: 窮上失位,信不由中。以此象》曰:「翰音登于天」,何可長也。

、妈。《序卦》曰: 有其信者必行之,故受之以

諒」之道,而以信爲過也,故曰「小過」。韓康伯曰: 守其信者,則失「貞而不

■ 震上 小過,亨,利貞。

也。 蓋取諸 虞 五失正,故「利貞」。 觀之例。 有飛鳥之象,故知從晉來。 翻 曰 : 此。 臨 晉上之三,當從 陽未 柔 得 至三而觀 中 而 「過以利貞,與時行 應乾剛,故「亨」。 四已消 四四 杵臼之利, 陰二陽 也,又

可小事,

故「可小事」也。 虞翻曰:「小」謂五、晉坤爲事。柔得中,

不可大事。

「不可大事」也。 虞翻曰: 大事,四。剛失位而不中,故

彖》曰: 利貞」,與時行也。 小過。 小者過 而 亨 也。 過 以

荀爽曰: 不見應,故曰「小者過而 去。三應上,過五而去。 陰稱 小。 謂四 亨也 五處 應初,過二而 中, 見過

柔得中,是以「小事吉」也。

也。 虞翻曰: 謂五也。陰稱小,故「小事吉

剛失位而不中,是以「不可大事」也。 事也」。 虞翻 曰: 謂四也。陽稱大,故「不可大

有「飛鳥」之象焉,「飛鳥遺之音, 宋衷曰: 而且鳴,鳥去而音止,故曰「遺之音」也。 鳥舒翮之象,故曰「飛鳥」。震爲聲音,飛 二陽在内,上下各陰,有似飛

肅曰: 上宜下,大吉」,上逆而下順 四五失位,故曰「上逆」。二 也。

三得正,故曰「下順」也。

《象》曰: 山上有雷,小過。

於大,故曰「小過」。 侯果曰: 山大而雷小,山上有雷,小過

君子以行過乎恭,

虞翻曰:「君子」謂三也。上貴三賤。 「致恭以順存其位」,與謙三同義。 上之三,震爲行,故「行過乎恭」。 謂三 晉

喪過乎哀,

過,遭死喪,「過乎哀」也。 坎爲涕洟,震爲出。 虞翻曰: 晉坤爲喪,离爲目,艮爲鼻, 涕洟出鼻目,體大

用過乎儉,

兑爲小。 虞翻曰: 小用止,「密雲不雨」,故 坤、爲財用、爲吝嗇、艮爲止、 「用過

初六,飛鳥以凶 乎儉」也。

虞翻曰: 應四,离爲「飛鳥」。上之三,

則四折入大過死,故「飛鳥以凶」。

象》曰:「飛鳥以 虞翻 日 四死大過,故「不可如何也」。 凶」,不可如 何 也

六二,過其祖 ,遇其妣。

三體姤遇,故「遇妣」也。 謂三。坤爲喪,爲母,折入大過死 虞翻曰:「祖」謂祖母,初也。母死 「祖」也。妣二過初,故「過其祖」。 、故稱 稱妣

不及其君,遇其臣,无咎。

咎」也。 虞翻曰: 承三得正,體姤遇象,故「遇其臣无 五隔三,艮爲止,故「不及其君」。 五動爲君,晉坤爲臣。二之 止如

《象》曰:「不及其君」,「臣」不可過也。 可過」。 虞翻曰: 與隨三同 體大過下,止舍,巽下,故「不 義

九三,弗過防之,從或戕之,凶。 防,防四也。失位,從或而欲

> 凶也。 上入坤,折四,死大過中,故「從或戕之 折之初。戕,殺也。 离爲戈兵,三從 离

(象)曰:「從或戕之」,「凶」如 虞翻曰: 三來戕四,故「凶如何也」。 何也

九四,无咎,弗過遇之,

過五,故曰「弗過遇之」矣。 《九家易》曰: 以陽居陰,「行過乎恭」。 體震動。位既不正,當動上居五,不復 今雖失位,進則遇五,故「无咎」也。

往厲必戒,勿用永貞。

荀爽曰: 故「用永貞」。 「往厲必戒」也。 四往危五,戒備於三,故曰 勿長居四,當動上五,

《象》曰:「弗過遇之」,位不當也。「往厲必 戒」,終不可長也

六五,密雲不雨,自我西郊。 虞翻曰: 體否上傾,故「終不可長」矣。

「密雲不雨,自我西郊」也。密,坤爲自我,兑爲西,五動乾爲郊,故地成雨。 上來之三,折坎入兑。 小爲虞翻曰: 密,小也。晉坎在天爲雲,墜

虞翻

日

飛下稱亢。

晉上之三,「已亢

:

也

公弋取彼在穴。

手入穴中,故「公弋取彼在穴」也。繩連鳥,弋人鳥之象。艮爲手,二爲穴。坎爲弓彈,离爲鳥矢。弋,無矢也。巽埃爲弓彈,离爲鳥矢。弋,無矢也。巽虞翻曰:「公」謂三也。弋,矰繳射也。

也」。 謂三坎水已之上六,故「已上《象》曰:「密雲不雨」,已上也。

坎爲災眚,故「是謂災眚」矣。 下入艮手而死,故「飛鳥離之,凶」。晉「弗遇過之」。离爲飛鳥,公弋得之,鳥虞翻曰: 謂四已變之坤,上得之三,故上六,弗遇過之,飛鳥離之,凶,是謂災眚。

《象》曰:「弗遇過之」,已亢也。

《序卦》曰: 有過物者必濟,故受之以

韓康伯曰:「行過乎恭,禮過乎儉」,可以既濟。

···· 矯世厲俗,有所濟也。

★ 次上 既濟,亨,小利貞。

命,保合大和」,故「利貞」矣。得中,故「亨小」。 六爻得位,「各正性虞翻曰: 泰五之二。「小」謂二也。柔

初吉,

中,故「初吉,柔得中也」。始」,故稱「初」。坤五之乾二,得正處虞翻曰: 初,始也。謂泰乾。「乾知大

終亂。

泰,則反成否。「子弑其父,臣弑其君」,虞翻曰: 泰坤稱亂,二上之五,終止於

天下无邦,終窮成坤,故「亂,其道窮」。

(彖) 日 既濟、「亨」。小者、亨也。

荀爽曰: 天地既交,陽升陰降,故「小

者亨也」。

利貞,剛柔正而位當也。

升五,是「剛柔正」,「當位也」。 侯果曰: 此本泰卦。六五降二,九二

初吉」,柔得中也。

虞翻曰:「中」謂二。

終」止則「亂」,其道窮也

也。 虞翻 曰: 曰「終止則亂,其道窮也」。 一曰殷亡周 ○侯果日: 正有終極,濟有息止,止則窮亂,故 反否終坤,故「其道窮 剛得正,柔得中,故「初吉」 也」。

焉 興之卦也。成湯應天,「初吉」也,商辛 物不可窮,窮則復始,周受其未濟而 毒痡,「終止」也。 《乾鑿度》曰:「既濟未濟者,所以明 由止,故物亂而窮也。 圓

戒慎,全王道也。」

《象》曰: 水在火上,既濟。 君子以思患

而豫防之。

荀爽曰: 象之,「思患而豫防之」,治不忘亂也。 六爻既正,必當復亂,故君子

其輪」,義「无咎」也。 初九,曳其輪,濡其尾,无咎。《象》曰:「曳

无咎矣。 濡曳,咎也。 敗,故曰「曳其輪」也。 輿輪之象也。其一在坎中,以火入水必 宋衷曰: 离者,兩陽一陰。陰方陽圓, 得正有應,於義可以危 初在後稱尾。尾 而

六二,婦喪其茀,勿逐,七日得。

虞翻曰: 坎爲盜,故「婦喪其髴」。 乾爲首,坎爲美。 雲,故稱「髮」。《詩》曰:「鬒髮如雲」。 謂鬒髮也。 离爲婦,泰坤爲喪。 名婦人之首飾。 五取乾二之坤爲坎, 泰震爲七,故 坎爲玄 髴,髮,

蔽膝之茀,非也。義。「髴」或作「茀」。俗説以髴爲婦人「勿逐,七日得」。與睽「喪馬勿逐」同

二五相應,故「七日得」也。 其弗鄰於盜也。勿逐自得,履中道也。義也。髴,首飾。坎爲盜,离爲婦。喪王肅曰: 體柔應五,履順承剛,婦人之王肅曰: 體柔應五,履順承剛,婦人之《象》曰:「七日得」,以中道也。

方,故稱「鬼」。在既濟之家而述先代之名。就爲高宗,神爲鬼方。乾二之神名。乾爲高宗,神爲鬼方。乾二之坤五,故「三年立,,小人勿用」。《象》曰「憊也」。〇干寶曰: 高宗,殷中興之君。鬼,北方國也。高宗嘗伐鬼方,或之古,故不三年克之,小人勿用」。《象》曰「憊鬼,北方國也。高宗,殷王武丁。鬼方,國之一,為明三。《象》曰「憊鬼,北方國也。高宗,殷王武丁。鬼方,國之,於稱「鬼」。在既濟之家而述先代之,以為明。

功,以明周因於殷,有所弗革也。

非小人能爲,故曰「小人勿用」。○虞翻「三年克之」。興役動衆,聖猶疲憊,則上六闇極,九三征之。三舉方及,故曰侯果曰: 伐鬼方者,興衰除闇之征也。

六四, 繻有衣袽, 終日戒。

曰:

坎爲勞,故「憊也」。

故「終日戒」也。 整勞,衣服皆敗,鬼方之民,猶或寇竊, 「終日戒」。謂伐鬼方,三年乃克。旅人 如」。离爲日,坎爲盜。在兩坎間,故 也。乾二之五,衣象裂壞,故「繻有衣 虞翻曰: 乾爲衣,故稱「繻」。袽,敗衣

(象》曰:「終日戒」,有所疑也。

袽之道也。四處明闇之際,貴賤无恒,者,殘幣,帛可拂拭器物也。繻有爲衣盧氏曰: 繻者,布帛端末之織也。袽

帝 猶 主,故終日戒慎,有所疑懼也。 或爲衣或爲袽 也。 履多懼之地,上 一承

九 福 **T**i. ,東鄰殺牛,不如西鄰之禴祭, 實受

也。 正,承五 禴,夏祭也。 **眚**,爲陰所 震 翻 動五殺 曰 : 順三,故「實受其福,吉大來 坤,故「東鄰殺牛」。 泰震爲 乘,故「不如西鄰之禴 离爲夏, 兑動二體, 离 東, 兑爲西, 坤爲牛。 在坎多 祭」。 明得

象》曰:「東鄰殺牛」,「不如西鄰」之時也 坎 月 崔憬曰: 春祭之名。 日出東方,「東鄰」之謂也。离又爲牛, 方,「西鄰」之謂也。二應在离,离爲日。 是周受命之日也。 、水克离火、「東鄰殺牛」之象。禴,殷, ,哉生明,王來自商,至于豐。丁未, 居中當位、於既濟之時,則當 案《尚書》克殷之歲,「厥四 五坎爲月。月出 西

> 明西鄰之禴祭,得其時而受祉福也。 祀于周廟」。 四月,殷之三月,春也。 則

實受其福」,吉大來也。

者「吉大來也」。 盧氏曰: 明鬼享德不享味也,故德厚

上六,濡其首,厲。

故「濡其首,厲」。 虞翻曰: 乾爲首,五從二上,在 位極乘陽,故「何可 坎中,

《象》曰:「濡其首厲」,何可久也。 荀爽曰: 危,故「何久也」。• 居上濡 五,處高居盛,必當復

《序卦》曰: 物不可窮也,故受之以未濟

終焉。

崔憬 曰 : 夫易之爲道,窮 則變, 變則

0 何一下,照 曠閣本有「可」字。

通 而 以未濟終者, 亦物不 可 窮 也

未 濟

「未濟」也 交,故「亨」。濟,成也。六爻皆錯 翻 日 否二之五也。 柔得中, 故 天 地

小狐汔濟,

虞翻曰: 狐濟幾度而濡其尾,「未出中也」。 否艮爲小狐, 汔,幾 也。 濟, 濟

濡其尾,无攸利。 虞翻 坎爲狐。《説文》曰:「汔,涸也。」案: 位,故「无攸利,不續終也」〇干寶曰: 「尾」謂二,在坎水 曰: 艮爲尾。狐,獸之長尾者也。 中,故「濡其尾」。

剛柔失正

,故「未濟」也。 五居

中應剛

故「亨」也。

小狐力弱, 汔乃可濟。

水既

未涸,而乃濟之,故尾濡而无所利也。 爽 日: 未濟、「亨」,柔得中也。 柔上居五,與陽合 同, 故

「亨」也

小狐汔濟」,未出 寶 曰: 虞翻曰: 「中」謂二也,困 狐, 謂二未 野獸之妖者, 中 而 也 猶處中故 變,在坎 中也。 以 也。 喻 此 禄 以記

濡其尾,无攸利」,不續終也 紂雖亡國,禄父猶得封矣。

而被誅· 虞翻 父不能敬奉天命,以續既終之禮, 行,故「不續終也」。〇干寶曰: 則亂,其道窮也」。乾五之二,坤 日: 也。 否陰消陽,至剥終坤,「 言禄 終 11:

雖不當位 ,剛柔應也

微子 荀爽曰 濟 也。 更得爲客也。 : 〇干 雖剛柔 寶 相應而 六爻皆 不 以 相 正,由 應, 故

侯果曰: 火在水上,未濟。 火性炎上,水性 潤下。 雖

復

慎 同 辨物宜 體 一,功不相成,所以未濟 ,居之以道,令其功用相得, 也。 故君子 則

物咸 濟矣。

君子以慎辨物居方。

虞翻 二,故「以慎辨物居方」也。 也」。● 艮爲居,坤爲方,乾别五以 辨别也。 曰 : 「物」謂「乾陽物 君子,否乾也。 艮爲慎。 也 ,坤陰物 居坤

初六,濡其尾,吝。

虞翻曰: 故「吝」。 應在四,故「濡其尾」。 失位,

《象》曰:「濡其尾」,亦不知極也。 案: 四在五後,故 稱「尾」。 極,中也。

謂四居坎中,以濡其尾,是不知極也。

九二,曳其輪,貞吉。

姚信曰: 之象也。二應於五而 故「曳其輪」。 坎爲曳,爲輪。兩陰夾陽,輪 處中 隔 而行,故曰「貞 於四,止 而 據

> 古。 曳輪上以承五命,猶東蕃之諸侯,共攻 三監,以康周道,故曰「貞吉」也。 〇干寶曰: 坎爲輪,離爲牛。 牛

《象》曰:「九二貞吉」,中以行正也。 六三,未濟,征凶。 利涉大川。 虞翻曰: 謂初已正,二動成震,故「行正」。

從坎,故「利涉大川」矣。 在内,婚姻未成,征上從四則凶。 荀爽曰: 未濟者,未成也。女在外,男 利下

《象》曰:「未濟征凶」,位不當也。 其位 故曰 故曰「未濟征凶」。 反叛,管蔡與亂。 干寶曰:「吉凶者,言乎其失得也」,禄父 ,猶周公以臣 「利涉大川」,坎也。 而君,故流言作矣。 兵連三年,誅及骨肉 平克四國,以濟大難 以六居三,不當

九四,貞吉,悔亡。

0 原脱, 今據照 曠閣本

了说。 虞翻曰: 動正得位,故「吉」而「悔

亡矣。

震用伐鬼方,三年有賞于大邦。

賞,四在坤中,體既濟,离三,故「三年有「震用伐鬼方」。坤爲年,爲大邦。陽稱虞翻曰: 變之震,體師。坤爲鬼方,故

《象》曰:「貞吉悔亡」,志行也。 賞于大邦」。

「志行也」。 案: 坎爲志,震爲行。四坎變震,故

六五,貞吉,无悔。

虞翻曰: 之正則吉,故「貞吉无悔」。

君子之光,有孚吉。

「貞吉无悔」。制禮作樂,復子明辟,天曰: 以六居五,周公攝政之象也,故曰故「有孚吉」。 坎稱「孚」也。〇干寶光」也。「孚」謂二。二變應,己得有之,虞翻曰: 動之乾,离爲光,故「君子之

有孚吉」矣。

下乃明其道,乃信其誠,故「君子之光,

《象》曰:「君子之光」,其暉「吉」也。

吉也」。 動之正,乾爲大明,故「其暉

失是。 上九,有孚于飲酒,无咎。濡其首,有孚

謂若殷紂沈湎於酒,以失天下也。 」。終變之正,故「无咎」。乾爲首,五 動首在酒中,失位,故「濡其首」矣。孚, 動首在酒中,失位,故「濡其首」矣。孚, 四,故「有孚」。飲酒流頤中,故「有孚於 虞翻曰: 坎爲孚,謂四也。上之三介

首,故「不知節」矣。 虞翻曰: 節,止也。艮爲節,飲酒濡《象》曰:「飲酒濡首」,亦不知節也。

易傳卷第十二

易傳卷第十三

方以類聚,

静。

「分陰分陽,迭用柔剛」。

虞翻

斷, 分也。

乾剛常動,坤柔常

唐資州李鼎祚集解

方,道也。

謂

陽

道

施生,萬物各聚其

《九家易》曰:

謂

姤

卦,陽爻聚於午也。

天尊地卑,乾坤定矣。

周

易繫辭上

謂 翻 成列。 티 : ○荀爽日 天貴故尊,地賤故卑。 謂否卦也。否七 「定」

卑高以陳,貴賤位矣。

月,萬物已成,乾坤各得其位。定矣。

虞翻 也。 賤者存乎位」也。 曰 : 侯果 乾高貴五,坤卑賤二,「列貴 曰 : ○荀爽曰: 天地卑高, 義 謂泰卦 既 陳

動 有常,剛柔斷矣。

萬物貴賤,位宜差矣。

物以羣分, 所也。

《九家易》曰: 謂 復卦,陰爻羣於子也

成,分散天下也,以周人用,故曰「物以 陰主成物,故曰「物」也。 至於萬物一

羣分」也。

吉凶生矣。

虞翻 曰: 類聚」。 乾物 物三 動行,故「以羣分」。 稱羣,坤方道静,故「以

在天成象,在地成形,變化見矣。 故吉,坤殺故凶,則「吉凶生矣」。

庚,兑象見丁,乾象盈甲,巽象伏辛,艮 虞翻曰: 謂日月在天成八卦。震象出

三三七

坤土。 竹、巽木、坎水、离火、艮山、兑澤、乾金、 而生變化」矣。 己,故「在天成 消 丙 在天爲變,在地爲化,「剛柔相推 坤 象 喪 象」也。 Z, 坎 「在地成形」謂震 象流 戊,离 象 就

是故剛柔相摩,八卦相蕩。

离兑。 坤,成震坎 翻 曰 : 旋轉 良。 稱 摩, 坤以二五摩乾,成巽 薄 以二五

鼓之以雷霆,潤之以風 雨。

故「剛柔相摩,則八卦相蕩」也。

虞翻 日 風、巽; 鼓,動; 潤,澤也。

日月運行,一寒一暑。

霆,艮,

雨,兑也。

行往來,「日月相推而 公翻 曰: 日离月坎,寒乾暑 明生焉 坤 寒暑相推 也 運

乾 道 成男,坤 道成女。

而

歲成焉」,故「一寒一暑」也。

荀 爽 曰:「男」謂乾初 適 坤 爲震,二 適 坤

> 爲兑,以成三女也。 謂坤初適乾爲巽,二適 乾爲离,三適乾

爲

坎,三適坤

爲艮,

以成三男也。

女

乾知大始,

《九家易》曰:「始」爲乾。 禀元. 氣, 萬物

資始」也。

坤 化成物。今本「化」爲「作」。

荀爽 日: 物」謂 坤。 任 育體,「萬

資

生。

乾以 易知,坤 簡 能。

虞翻 坤 也。 閱 曰: 藏物,故「以簡能」矣。 乾息昭物,天下文明,故「以易知」。 陽見 稱易,陰藏 爲 簡 簡 閲

易則 易知,簡則易從。

地 坤 虞 道光 翻 陰陽動闢 曰 也。 乾「縣象著明」,故「易知」。 故「易從」。「不習无不利,

易 知 則有親,易從則有功。

附之。以其易從,故物法而有功也。矣。○蜀才曰: 以其易知,故物親而陽從陰,至五「多功」,故「易從則有功」「本乎天者親上」,故「易知則有親」。以虞翻曰: 陽道成乾爲父,震坎艮爲子。

有親則可久,有功則可大。

大」也。萬物生息,種類繁滋,故「可久」也。萬物生息,種類繁滋,故「可苟爽曰: 陰陽相親,雜而不厭,故「可

爲德,坤以富有爲業也。 姚信曰: 賢人,乾坤也。言乾以日新可久則賢人之德,可大則賢人之業。

易簡而天下之理得矣,

荀爽曰: 陽位成於五,五爲上中。陰

位成於二,二爲下中。故「易成位乎其

聖人設卦,

中」也。

六十四卦矣。案: 聖人謂伏羲也。始作八卦,重云

觀象,繫辭焉,

之象,系屬其辭。 案: 文王觀六十四卦,三百八十四爻

而明吉凶。

荀爽曰: 因得明「吉」,因失明「

剛柔相推而生變化。

是故吉凶者,失得之象也; 虞翻曰: 剛推柔生變,柔推剛生化,

虞翻曰: 吉則象「得」,凶則象「失」也。

悔吝者,憂虞之象也;

虞翻曰: 悔則象「憂」,吝則象「虞」也。 一荀爽曰: 憂虞,小疵,故「悔吝」也。○

〇干寶曰: 悔亡則「虞」,有小吝則

X

也

意也。 事有小大,故辭有急緩,各象其凶。事有小大,故辭有急緩,各象其「憂」。 憂虞未至於失得,悔吝不入於吉

變化者,進退之象也,

荀爽曰: 春夏爲變,秋冬爲化。息卦

爲進,消卦爲退也。

剛柔者,晝夜之象也;

爲夜。晝以喻君,夜以喻臣也。 荀爽曰: 剛謂乾,柔謂坤。乾爲晝,坤

六爻之動,

性,人有仁義二行。六爻之動,法乎陸績曰: 天有陰陽二氣,地有剛柔二

三極之道也。

此

也。

陸績曰: 此三才極至之道也。初四下

極,二五中極,三上上極也。

虞翻曰:「君子」謂文王,「象」謂乾二之是故君子所居而安者,易之象也。

所變而翫者,爻之辭也。

也。

通理,正位居體」,故「居而安者,易之象

舊讀「象」誤作「厚」或作「序」,

坤成坎月离

日。

日月爲象,「君子黄

中

非也。

之誤。坤,坤五動則觀其變。舊作「樂」,字虞翻曰:「爻者,言乎變者也」,謂乾五之

是故君子居則觀其象而

翫其辭,

之辭,故「翫其辭」。以离之目,觀天之象。兑口,翫習所繫虞翻曰: 翫,弄也。謂乾五動成大有,

動則觀其變而翫其占,

變」,「占事知來」,故「翫其占」。 虞翻曰: 謂觀爻動也。「以動者尚其

是以「自天右之、吉无不利」。

地日月之象。文王則庖犧,亦與天地合虞翻曰: 謂乾五變之坤成大有,有天

履信思順,故「自天右之,吉无不利」也。 德,日月合明。 天道 助 順,人道助信。

彖者,言乎象者也。

説三才,故「言乎象也」。 虞翻曰:「在天成象」,「八卦以象告」,彖

爻者,言乎變者也。

辭也」。謂九六變化,故「言乎變者也」。 虞翻曰: 爻有六畫,「所變而玩者,爻之

悔吝者,言乎其小疵也。 吉凶者,言乎其失得也。 虞翻曰: 得正言「吉」,失位言「凶」也。

咎。 崔憬曰: 有其小病,比於凶咎,若疾病之與 《繋辭》著悔吝之言,則異凶

无咎者,善補過也

小疵。

虞翻曰: 善補過」。 失位 孔子曰「退思補過」者也。 爲咎悔,變而之正, 故

是故列貴賤者存乎位,

位。 貴賤者存乎位」矣。 侯果曰: 凡爻得位則貴,失位則賤,故曰「列 一五爲功譽位 ,三四爲凶 懼

齊大小者存乎卦,

卦」也。 卦列則小大分,故曰「齊小大者存乎 王肅曰:「齊」猶正也。 陽卦大,陰卦小。

辯吉凶者存乎辭,

小大,故下歷言五者之差也。 乎爻。至於悔吝无咎,其例一也。 凶、悔吝、小疵、无咎,皆生乎變。 吉凶,故大小之義存乎卦,吉凶之狀見 韓康伯曰: 辭,爻辭也,即「爻者言乎 變也」。 言象所以明小大,言變所 以 明 吉

憂悔吝者存乎介,

虞翻曰: 介,纖也。「介如石焉, 識」也,故「存乎介」。 謂識 小疵。 口

震无咎者存乎悔。

— 四 二

故「存乎悔」也。之,知之未嘗復行」,「无咎者善補過」,虞翻曰: 震,動也。「有不善未嘗不知

之間

萬物

陳

列著

於耳

目

者,

謂

泰卦

變成

其所之。 是故卦有小大,辭有險易。辭也者,各指

之情見乎辭」,故「指所之」。 虞翻曰: 陽易指天,陰險指地,「聖人

下」爲「天地」。 易與天地準,故能彌綸天下之道。今本「天

謂易在不 間 虞 翻 則備矣」,故 티 : 天下,包絡 準, 與 同 天地準」也。 萬物,「以言乎天地之 也。 彌, 大。 綸,絡。

仰以觀於天文,俯以察於地理,

陽降之陰則成地之理也。 荀爽曰: 謂陰升之陽則成天之文也,

是故知幽明之故。

荀 也 爽 謂 否 「幽」謂天上 卦變成 未 濟 地下 也 不可 明 謂 得 覩者 天 地

故「原始及終,故知死生之説」矣。交,陰陽分離,物之終也。合則生,離則死,《九家易》曰: 陰陽交合,物之始也。原始及終,故知死生之説。今本「及」作「反」。既濟也。

精氣爲物,遊魂爲變,

泰時,春也。

分離,否時,秋也。

不違。 是故 虞翻 體,變成萬物,故「遊魂爲變」也 坤鬼。乾「純粹精」,故主 知鬼神之情狀。 日 魂,陽物,謂 與天地 乾 一爲 神 物。 也。 相 乾流 似, 變」謂 故 坤

數。 九六 與天地合德,鬼神合吉 翻 鄭玄曰:「精 也。 木火用事 曰 : 七八木火之數也,九六金水之 乾神 而物生,故曰 氣」謂七八也,「遊魂」謂 似天, 坤 凶,故「不違」。 鬼似 地。 氣 人

變」。 生物、金水終物。 金 水 氣 用 謂 事 之神,遊 而 二物變化,其情與天 物 變,故 魂謂之鬼。 日 遊 木火 魂 爲

知周乎萬物,

地

相似,故無所差違之也。

十,當萬物之數,故曰「知周乎萬物」也。荀爽曰: 二篇之册,萬有一千五百二

而道濟天下,故不過。

不遺,亦不過差也。 過也。〇王凱沖曰: 知周道濟,洪纖《九家易》曰: 言乾坤道濟成天下而不

旁行而不流,

《九家易》曰: 主五卦,爻主一 ○侯果日: 應變旁行,周 日,歲 旁行周 既周 合六 被 十四四 而 萬 復始 物 卦,月 而 也。 不

流淫也。

荀爽曰: 坤建於亥,乾立於巳。陰陽樂天知命,故不憂。

故「不憂」。
天」,乾下有伏巽爲「知命」。陰陽合居,孤絶,其法宜憂。坤下有伏乾爲「樂

安土敦乎仁,故能愛。

愛也。 生萬物,故「敦仁」。生息萬物,故謂之「安土」。「敦仁」謂泰卦。天氣下降以荀爽曰:「安土」謂否卦。乾坤相據。故

範圍天地之化而不過,

大火, 树木, 星紀, 玄枵之屬是也。婁, 大梁, 實沈, 鶉首, 鶉火, 鶉尾, 毒星, 二辰也。辰, 日月所會之宿, 謂諏訾, 降也。言乾坤消息, 法周天地而不過於十也。言乾坤消息, 法周天地而不過於十

曲成萬物而不遺。

成物,不遺微細也。 失也。○侯果曰: 言陰陽二氣,委曲荀爽曰: 謂二篇之册,曲成萬物,无遺

通 乎 晝 夜之道而 知

荀 乾坤之道 爽 日 : ,無所不知矣。 晝者謂 乾,夜 者 坤 也 通 於

故 神 无 方而 易无體

流者,易也。 干 之應變化無定體 寶 \Box 否泰盈虚者,神 言神之鼓 也 萬物 也。 無 常 而 周

陰一陽之謂道,

生 體,不 顯,故至乎「神无方而易无體」而道 韓康伯 不通也,无不由也,況之曰 無一以待之。 故窮以 在陽爲無陽、陽以之成、故曰 可爲象。必有之用極 티 : 盡 道者何? 神,因神以明道。 在陰爲無陰,陰以之 无 之稱 道 一而无 寂然 陰 也。 之功 陽 可見 雖 无 无

陰一 陽」也。

之者善也,成之者性 也。

虞翻 曰 繼 統也。 謂乾能 統天生物

> 者見之謂之仁,知者見之謂 之知。

之者性· 也

坤合乾

性,養化

成之,故「

繼

之者善,

成

侯果 仁者] 見道 謂 道 有仁; 知者

見 道 ,謂道有知 也。

百 姓 日 用 而 不知

侯果 Ė; 用道 以 濟,然不知其力。

故君子之道尟矣。

韓

康

伯

曰

體

道

以

爲

用,仁

. 知 則

滯於所見,百姓 君子 日 用 而 不 知 體 斯道者,

不 亦鮮矣乎 故 常 無 欲 以 觀 妙, 可 以

語 至而言極矣。

顯 諸 仁,藏 諸用,

王凱 沖 曰 : 萬物皆 成,仁功著也 不

見 所 爲,藏諸 用 也。

鼓 萬 物 而 不與聖人同憂,

侯 果 . 曰 神道鼓物 : 聖 人成 ,寂然無情,故 務,不 能 無憂也。 無 心 故 有

盛德大業至矣哉!

荀爽曰: 盛德者天,大業者地也。

富有之謂大業,日新之謂盛德,

變化不息,故曰「日新」。 王凱沖曰: 物無不備,故曰「富有」。

生生之謂易。

荀爽曰: 陰陽相易,轉相生也。

成象之謂乾,

案:「道生一,一生二,二生三。」三才既

備,以成乾象也。

爻法之謂坤,❶

案:「爻」猶效也,效乾三天之法,而兩地

成坤之象卦也。

極數知來之謂占,

孔穎達曰: 謂窮極蓍策之數,逆知將

來之事,占其吉凶也。

通變之謂事,

虞翻曰:「事」謂變通趨時,以盡利天下

之民,謂之事業也。

陰陽不測之謂神。

者也。 爲名。 善應, 物 所爲者,窮理體 所以然而況之神矣。 於太虚,歘爾而自造矣。造之非我,理 極爲始,言變化而稱乎神也。 自玄應。化之無主,數自冥運。 萬物之動,豈有使之然哉! 不測」。嘗試論之曰: 韓 康 而爲言」,不可以形詰者也,故 伯 則以道爲稱。 蓋資道 E. 神也者,變化之極,「妙萬 而 化,坐忘遺照。 同 乎道 不思玄覽,則 是以明兩儀 原夫兩儀之運, ,由神而 莫不獨化 夫唯天之 故不知 至虚 「陰陽 於神 以 以太 神 而

夫易廣矣,大矣,

虞翻曰: 乾象動直,故「大」。 坤形動

● 「爻」,四庫本、照曠閣本作「效」。

不

闢,故「廣」也。

以言乎遠則不禦,

虞翻曰: 禦,止也。「遠」謂乾。天高

不禦也。

以言乎邇則静而正,

虞翻曰:「邇」謂坤。「坤至静而德方」,

故「正」也。

以言乎天地之間則備矣。

虞翻曰: 謂易「廣大悉備」,有天地人

道焉,故稱「備」也。

夫乾,其静也專,其動也直,是以大生焉。

養萬物矣。 宋衷曰: 乾静不用事 動 而 用 事 則 則清 直 道 静 而 行 專一,含 ',導出

萬物矣。一專一直,動静有時,而物無

夭瘁,是以「大生」也。

夫坤,其静也翕,其動也闢,是以廣生焉。

藏微伏,應育萬物矣。動而用事則開闢宋衷曰: 翕猶閉也。坤静不用事,閉

失時而物無災害,是以「廣生」也。 基蟄,敬導沈滯矣。一翕一闢,動於

廣大配天地,

荀爽曰: 陰廣陽大配天地

變通配四時,

虞翻曰:「變通」趨時,謂十二月消息也多近四四

否、觀、剥配秋; 坤、復、臨配冬。謂士泰、大壯、夬配春; 乾、姤、遯配夏;

二月消息,相變通而周於四時也。

陰陽之義配日月,

荀爽曰: 謂乾舍於离,配日而居,

坤

舍於坎,配月而居之義是也

易簡之善配至德。

簡 荀 易 爽 日 相 西己 乾德 於天地,故 至 健, 坤 「易簡之善 ·德至 順。 配 乾 坤

悪 一。

子曰:「易,其至矣乎!

崔憬曰: 夫言「子曰」,皆是語之别端,

此更美易之至極也。

夫易,聖人所以崇德而廣業也。

知崇體卑,崇效天,卑法地。今本「體」爲「禮」人實翻曰: 崇德效乾,廣業法坤也。

虞翻曰:「知」謂乾,效天「崇」。「體」謂

坤、法地卑也。

天地設位,而易行乎其中矣。

虞翻曰:「位」謂六畫之位。乾坤各三

無常,周流六虚,故「易行乎其中」也。爻,故「天地設位」。 易出乾入坤,上下

成性存存,道義之門。」

也」。陽在道門、陰在義門、「其易之門道門、坤爲義門。「成性」謂「成之者性虞翻曰:「知終終之、可與存義也。」乾爲

聖人有以見天下之嘖,而擬諸其形容, 虞 噴」謂 翻 初。 乾 自 Ē 稱 議 聖 下 . 稱 擬」。 謂 庖 形 犧 容 也。

邪。

謂陰,「在地成形」者也。

象其物宜,是故謂之象。

天成象」,故「象其物宜」。「象」謂三才虞翻曰:「物宜」謂陽。「遠取諸物」,「在

聖人有以見天下之動,

卦在天也,庖犧重爲六畫也。

謂六爻矣。 虞翻曰: 重言聖人,謂文王也。「動

而觀其會通,

以 孔穎 行其典禮 此 以 定一爻之通 禮、得則爲吉也。 爻下繫屬 達 曰 : ,繋辭焉以斷 文辭 既 變,而 觀 以以 其 若會 斷其吉凶。 有三百 會 其吉凶 通 而行 通 典 禮 + 其 四,於 典 失則 會 通

ĮЦ 八

爲 凶矣。

是故謂之爻。

爻者,效也,效諸物之變通,故上章云 孔穎達曰: 謂 此 會通之事 而爲爻也

「爻者言乎變」也。

言天下之至噴而不可惡也,

宕,以乾簡坤易之至也。 虞翻曰: 至嘖无情,陰陽會通,品物流 「元善之長」,

言天下之至動而不可亂也。 故「不可惡也」。

虞翻曰: 可亂」。「六二之動,直以方」。「動」舊 以陽動陰,萬物以生,故「不

擬之而後言,議之而後動,

誤作「嘖」也。

爲後動,故「擬之而後言,議之而後動」。 虞翻曰: 以陽擬坤而成震,震爲言,議

安其身而後動」,謂當時也矣。

擬議以成其變化

地 生,其益無方」也。 吾與一 爾

虞翻

日

議天成變,

擬地成化。

「天施

靡之。」 鳴鶴在陰,其子和之。我有好爵,

鳴在陰,取同類相應以證之。 孔穎達曰: 九二爻辭也。 上略 明 擬 議 M 動, 此《中孚》 故 引鶴

子曰:「君子居其室,出其言善, 成益卦也。 之,艮爲居,初在艮内,故「居其室」。 震 爲出言,訟乾爲善,故「出言善」。此亦 虞翻曰:「君子」謂初也。 二變五 來 應

則千里之外應之,況其邇者乎!

虞翻 震巽同聲。 坤數十,震爲百里,十之千里也。 「外」謂 況其邇者乎」。 日 「邇」謂坤,坤爲順。二變順初,故 謂二變則五來應之,體益卦。 同聲者相應,故「千里之外應 此「信及遯魚」者也。

居其室,出其言不善,

翻 初陽 動 人陰 成坤, 坤

善也。

則千里之外違之,況其邇者乎

虞翻曰: 謂初變體剥,弑父弑君。二

陽「肥遯」,則坤違之而承於五,故「千里

之外違之,況其邇者乎」。

言出乎身,加乎民。

虞翻 曰 : 震爲出、 爲言、坤爲身、 爲

也。

行發乎邇,見乎遠。

虞翻 震爲行,坤爲邇,乾爲遠,兑

爲見。 謂二發應五 ,則千里之外,故行

發邇見遠 也。

言行,君子之樞 機。 樞 機之發,榮 辱 之

主也。

荀爽曰: 曰「機」也。 艮爲門,故曰「樞」。 〇翟玄曰: 樞 主開 震 爲 閉,

> 機主發動。 開 閉有明暗,發動有中否,

主於榮辱也

言行,君子之所以動天地也,可不慎乎!」

震初以 虞翻曰: 雷動 二已變成益 地。 中孚十一月,雷 ,巽四以 風動天, 動地

中。 艮爲慎,故「可不慎乎」。

同人先號咷而後笑。」

有不應也。 與六二初未好合,故「先號咷」。 同心,故「笑」也。 侯果曰:《同人》九五爻辭也。 引者喻擬議 於事,未 言九五 而後得

子曰:「君子之道,或出或處,或默或語, 故 人反師,震爲出、爲語,坤爲默,巽爲處, 虞翻曰: 「或出或處,或默或語」也。 乾爲道,故稱「君子」也。 同

一人同心,其利斷金。

爲婦。 虞翻 曰:「二人」謂夫婦。 坎爲心, 巽爲同。 六二震巽俱, 師 震 爲夫,巽

五〇

婦處,婦默夫語,故「同心」也。金。以离斷金,故「其利斷金」。謂夫出體師坎,故「二人同心」。異爲利,乾爲

同心之言,其臭如蘭。」

金之言,良藥苦口,故「香若蘭」矣。也。 案: 六三互巽,巽爲臭也。斷言,巽爲蘭,離日燥之,故「其臭如蘭」虞翻曰: 臭,氣也。 蘭,香草。震爲

「初六,藉用白茅,无咎。」

舉初六。

○虞翻曰:「其初難知」,陰又失正,故獨一,自茅无咎」之事,以證謹慎之理也。用白茅无咎」之事,以證謹慎之理也。
「其,則物來應之,故引《大過》初六「藉謹慎,則物來應之,故引《大過》初六「藉

之有? 慎之至也。子曰:「苟錯諸地而可矣,藉之用茅,何咎

地,故「苟錯諸地」。今藉以茅,故「无虞翻曰: 苟,或, 錯,置也。頤坤爲

咎」也。

夫茅之爲物薄,

虞翻曰: 陰道柔賤,故「薄」也。

虞翻曰: 香絜可貴,故「可重」也

而用

可重

也

慎斯術也以往,其無所失矣。」

道者也。但能重慎卑退,則悔吝無從而生。術,但能重慎卑退,則悔吝無從而生。術,誠絜,雖置羞於地,神亦享矣。此章明侯果曰: 言初六柔而在下,苟能恭慎

「勞謙,君子有終,吉。」

證之矣。 又須謙以下人,故引《謙卦》九三爻辭以孔穎達曰: 欲求外物之應,非唯謹慎,

不伐,有功而不德」。艮爲厚,坤爲至,德言至。以上之貴下居三賤,故「勞而虞翻曰: 坎爲勞,「五多功」,乾爲德,子曰:「勞而不伐,有功而不德,厚之至也。

故「厚之至也」。

語以其功下人者也。

虞翻曰: 故「以其功下人者也」。 震爲語,「五多功」,下居三,

德言盛,禮言恭。

禮言恭」 禮。「天道虧盈而益謙」,三從上來,同 之盛德,故「恭」。 虞翻曰: 謙旁通 震爲言,故「德言盛, 履。 乾爲盛德,坤爲

謙也者,致恭以存其位者也。」

虞翻曰: 「以存其位者也」。 坎爲勞,故能恭。三得位,故

亢龍有悔」。

孔穎達曰: 悔」,證驕亢不謙之義也。 謙則有悔,故引《乾》之上九「亢龍有 上既以謙得保安,此 明無

子 曰:「貴而无位,

虞翻 티 : 天尊,故「貴」。 以陽居陰,故

「无位」。

高 而无民,

虞翻曰: 在上,故「高」。 无陰,故「无

民」也。

賢人在下位,

虞翻曰: 「遯世無悶」,故「賢人在下位」 乾稱賢人,「下位」謂 初也。 而不

憂也。

而無輔,是以動而有悔也。」

虞翻 動傾,故「有悔」。文王居三,紂亢極上, 티 : 謂上无民,故「无輔」。 乾盈

故以爲誠也。

不出户庭,无咎。」 孔穎達曰: 又明擬議之道,非 不驕,又當謹慎周密,故引《節》初周密

但

謙 而

子曰:「亂之所生也,則言語以爲階。

之事以明之也。

虞翻曰: 節本泰卦。 坤爲亂,震爲生、

以爲階」也 爲言語 , 坤 稱 階, 故「亂之所生,則言 語

君不密則失臣,臣不密則失身,

故「臣不密則失身」。 稱「密」。乾三之坤五、君臣毀賊、故「君 不密則失臣」。坤五之乾三,坤體 虞翻曰: 泰乾爲君,坤爲臣、爲閉,故 坤爲身也。 毁壊,

幾事不密則害成,

初動則體剥,「子弒其父,臣弒其君」,故 爲事,故「幾事不密」。 虞翻曰: 「害成」。 幾,初也。謂二已變成坤,坤 初利居貞,不密

是以君子慎密而不出也。」

虞翻曰:「君子」謂初。二動坤爲密,故 君子慎密」。 不出」也。 體《屯》「盤桓利居貞」,故

子曰:「爲《易》者,●其知盜乎! 虞翻曰:「爲《易》者」謂文王。否上之二

> 《易》者其知盜乎」。 萃,五之二奪之成解。 成困。三暴慢,以陰乘陽。 坎爲盜,故「爲 二變人宫爲

《易》曰: 『負且乘,致寇至。』

《解》六三爻辭以明之矣。 孔穎達曰: 而行,不可以小處大,以賤貪貴,故引 ` 此又明擬議之道,當量 身

負也者,小人之事也。

貴,違禮悖義,故「小人之事也」。 虞翻曰: 陰稱小人,坤爲事。 以 賤倍

乘也者,君子之器也。

虞翻 大車,故「乘,君子之器也」。 曰:「君子」謂五。器,坤也。 坤爲

小人而乘君子之器,盗思奪之矣。 虞翻曰:「小人」謂三。既違禮倍五。

乘其車。五來之二成坎,坎爲盜,「思奪

「爲《易》者,知盜乎」,此之

謂也。

之矣」。

上慢下暴,盜思伐之矣。

下暴於二,二藏於坤。五來寇二,以離虞翻曰: 三倍五,上慢乾君而乘其器,

戈兵,故稱「伐之」。 坎爲暴也。

藏悔盜,野容悔淫」。水爲淫。二變藏坤則五來奪之,故「慢藏不見,故「慢藏」。三動成乾爲野,坎虞翻曰: 坎心爲悔,坤爲藏,兑爲見。慢藏誨盜,野容誨淫。今本「野」爲「治」。

盗,故「盜之招」。
こ、故「盜之招」。
。二藏坤時,艮手招處言戎,以成二惡。。二藏坤時,艮手招處翻曰: 五來奪,三以離兵伐之,故變

易傳卷第十三

二五四

易傳卷第十四

百資州李鼎祚集解

周易繫辭上

蓍數 衍之數五 其 者 數 法,當參天 於神明而 説卦》云「昔者聖人之作《易》也 四 加 寶 也。 也。 日 至五、七、九,不取於 從二起,逆數 則是説 +, 生蓍,參天兩 艮 此 (兩地。 衍, 因 爲 其 大衍之數 天 少 用 合 陽 地 四十 參天者,謂 也。 而 致 其 至 有九 地 ○崔 數 也。 以 而 配 倚數」,既 憬 從三始 明倚 也 H 卦 坎 數 爲 不 而 兩 幺幺 之 取 取 地 順 中

天數 陽 兀 通 嗣 位 蓍圓而神,象天; 數,故四十九蓍則 七之數也 所 有 离 爲 陽 而 五. 老 其 ,故太一亦爲 之别也。 不管也。 有 不 爲 云「演天地之數所賴 其 用也。 有 一、地 陽 十,故云「大衍之數五 九,其 中 坤 數 所 九 陰,其數 爲老陰,其數六。 其 而 Ŧi. 從 ,數之極 數四者,此 數 數 六十 其 舍一不用者, 來,則 且天 不 九。 以 用 震 一數而守其 千; 之成 四 四 用 地各 是 者, 法長陽七七之數焉。 十 也 卦,既法長陰八八之 卦方而智,象地。 長 爲少 億 數八 有 陽, ·得其 巽 即易之太極 者 但 度 不 九 爲長 言 五. 以象太極, 八卦之數, 陰,其 其 而 用 卦之外,大 者,法長 十」也。 、數,以 位 十,其 言 所 而 也。 陰,其 賴 Ŧi. 守 陽七 有 用 以 也。 其 陰 叮 輔 ; 虚 衍 取 總 數

之義 據。 口 承,而云「八卦之外,在衍之所不管」者, 以 達,及乎自料未免小疵。 雖 所説,而顧歡云「立此五十數以數神, 唯 有 用 不 通 百二十,其用此策,大推演天地之數,唯 五十」以爲「萬 天 乃談 用 其 以以 解。 非數而著,故虚其一數,以明不可言」 四 Ŧi. 可以有對 配五十之數,餘其天 數 也 十策也」。● 也,故不數矣」。又引 Ŧi. 約 二 不 何 有 不用」,以爲「策中 一, 地 非 文 九。 容易哉? ○案: 申義,須 無,五稱五十也。 用 數 而 將爲 其一不用, 五. 物之策,凡有萬 成 又釋 一; 五 崔氏《探玄》病諸先 義 且聖人之言,連環 法 位 二其 則未 指 象 相 既將八 以 歸 其 太 地四 得 用四十 顧 允 即 其 極 所揲蓍 而各有合。 歡 孔 虚 無 同王弼 土 一 千 疏 理 何 无,非 九,則 所禀 陰陽 釋 縦 削 神 五. 賴 口

> 更減 用,斯之謂矣。 理盡性,神妙無方,藏 兼,終極天地,五十五之數也。 結大衍之前 五十 天 大衍之數五十也。 有合」,即將 数二 有 以并五 $\overline{+}$ 五. 此 有 義 五合之數配屬 <u>Fi.</u> 所 也。 ,備設六爻之位。 一, 地 以 成變化而 既云「五 「其用四 往 知來, Ŧī. 一十有 位 凡 行 行 天 相 鬼 也 以 地 自 九 蓍 得 神], 故云 1 性兩 前 然窮 之數 」者, _, 是 而 民

分爲二以象兩,

極也。今分而爲二,以象兩儀矣。崔憬曰: 四十九數,合而未分,是象太

掛一以象三,

揲 之 以 孔 最 小指間 穎 達 四 以 \exists 象 而 : 四 配 就 時 兩 兩 儀 儀之中,分掛 其一 於

■「五十策」之「策」,原作「册」,與上文用「策」義指全

策一時,故四策以象四時也。崔憬曰: 分揲其蓍,皆以四爲數。一

歸奇於扐以象閏。

者也。 餘。 閏月定四時成歲,故「歸奇於扐以象閏 虞 扐, 扐并合掛左手之小指爲一扐, 則以 翻 不一則二,不三則四也。 曰 奇,所 掛 策。 扐, 取奇以 所 揲 歸 之

五歲再閏,故再扐而後掛。

虞翻 者,閏 参五 手第三指間,成一變,則 扐,則再閏 後扐閏 五歲,故「五 謂已二扐又加一爲三,并重合前二扐爲 歸奇於初扐, 曰 以變」。 歲餘十日,五 (餘分,不得言三扐二閏,故從言 也。 謂 歲 ,并掛左手次小 已一劫,復分掛如初揲之, 據此爲三扐。 再 又分扐揲之如初] 再协而 歲 閏 六十日盡矣。 布掛之一爻。 後掛 不言三閏 指 間 而 __ 掛左 爲再 此

「再扐而後掛」者也。

天數五,地數五,

「地數五」謂二、四、六、八、十也。 虞翻曰:「天數五」謂一、三、五、七、九,

五位相得而各有合。

故「五 虞 水,二七合火,三八合木,四九合金,五 辛巽,相得合金,「雷風相薄」也。 地癸,相得合水,言陰陽相 己离,相得合土,「水火相逮」也, 丁兑,相得合火,「山澤通氣」也, 坤,相得合木,謂「天地定位」也 翻 合土也。 曰:「五位」謂五行之位。 立位相 得 而 各有合」。 薄 或以 而戰於乾。 甲 一六合 天壬 乾乙 丙 坎 艮

天數二十有五,

翻 四、六、八、十、故「三

十」也。

天地之數五十有五。

有五」。 虞翻 其奇五而言「五十」也。 티 : 天地數見於此,故大衍之數略 天二十五,地三十,故「五十

此

所以成變化而行鬼神也。 老聃謂子曰「汝何求道」,對曰「吾求諸 坤之變化,能知鬼神之所爲也。○侯果 之數五十有五,分爲爻者,故能成就 爲鬼,在天爲神。○姚信曰: 荀爽曰: 夫通變化,行鬼神,莫近於數,故 明數之妙,通於鬼神矣。 在天爲變,在地爲化; 此天地 在 乾 地

乾之策二百一十有六,

爻皆陽,三六一百八十,六六三十六,合 百一十有六也。陽爻九,合四時,四 户 : 陽爻之策,三十有六。乾六

九三十六,是其義也

坤之策百四十有四,

荀爽 爻皆陰,二六一百二十,四六二十四,合 氣,四六二百四十也。 一百四十有四也。陰爻六,合二十四 曰 陰爻之策,二十有四。 坤

凡三百有六十,當期之日。

期,故云「當期之日」也。 期」,則入十三月六日也。 十二月爲一 四日有奇爲一會。今云「三百六十當 陸績曰: 日月十二交會,積三百五十

數也。 陽爻一百九十二,每爻三十六策,合六 四卦,合三百八十四爻。陰陽各半,則 侯果曰:「二篇」謂上下《經》也,共六十

二篇之策,萬有一千五百二十,當萬物之

每爻二十四策,合四千六百八策。 則二 千九百一十二策。 陰爻亦一百九十二,

數 篇之策, 也。 合萬 一 千 五 百 <u>一</u> 十, 當 萬 物 之

是故四營 而

有八變而成卦, 也 時」,三營也,「歸奇於扐以象閏」,四營 績曰:「分而 荀 爽 以象三」,二營也;「揲之以 謂四度營爲方成《易》之一爻者也。 티 : 成易, 營者, 爲二以象兩」, 謂 七 八 九九六 營也 也 四 以 象 四 掛

間 荀 「十有八變而成卦」也。 爽 滿 而成 二揲策掛 一爻。又六爻三六十八,故 左 手 指 間,三 指

八卦而小成。

成 之象。此八卦未盡 侯果曰: 也。 謂三畫 一成天 萬 物 地雷風日月 情理,故 日 Ш 二小 澤

引 而 翻 信之,觸類 引」謂庖犧引信三才,兼而 而 長 之, 兩

> 取 之以六畫。 几 性 | 類也大」,則「發揮剛柔而生爻」也。 故「引而 觸, 信之,觸 動 也 類 謂 六 而 畫 長之」。「其 以 成六十

天下之能事畢矣。 虞翻 曰 : 謂乾以簡 能、「能説諸

顯 道 道神德行 虞 研諸侯之慮」,故「能事畢」。 离日坎月, 翻 神德行 曰 : 日月 顯 默而 道 在 神 成,不言而信,存於德 德行,乾 天,運行 照物 五五 故 一之坤 顯 成

是故可與酬酢,可 與右神矣。

行」者也

《九家易》曰 於神祕矣。 故 道,又神易 以下至於「能 陰陽相配謂之右神也。 喻以賓主 德行,可與 《 禮 酬 酢 事畢矣」,此足以顯 陽 之禮,所以助前聖發見 飲酒》主人酌賓爲獻 往爲酬,陰 經義 孔子言「大衍 相 棋 來 · 酌也。 爲 明易 酢

賓酌 也 鬼神者也 象陽唱陰和,變化相配, 主人 先舉爲酢,答報爲酬。 爲酢,主人飲之又酌 是助天地明其 怬 取 賓 其 報 爲 以 個

子曰:「知變化之道者,其知神之所爲乎? 者矣。 虞翻 上「子曰」爲章首,而荀、馬又從之,甚非 知變化之道者,故知神之所爲。諸儒皆 稱化,坤五之乾。「陰陽不測之謂 曰: 在陽稱變,乾二之坤。 神一, 在陰

易有聖人之道四焉:

崔憬曰: 聖人德合天地,智周萬物,故 能用此易道。 大略有四、謂尚辭、尚變、

以言者尚其辭;

尚象、尚占也

以 虞翻曰:「聖人之情見於辭」,「《繫辭》焉 盡言」也。

以 動 者尚其變,

> 動」矣。 陸績曰:「 「變」謂爻之變化,當「議之而 後

以制器者尚其象;

荀爽曰:「結繩爲網罟,蓋取諸离」, 此

是也。

以卜筮者尚其占。」

是故君子將有爲也,將有行 虞翻曰: 卜,動則翫其占,故「尚其占」者也。 乾蓍稱筮, 動 离 也,問 爲 龜 焉 龜 而 稱

凶也。 神, 凶。 爲行,爲言問,故「有爲」「有行」。 虞翻曰:「有爲」謂「建侯」,「有行」謂 九筮之法則筮之,謂問於蓍龜以言其吉 師」也。乾二五之坤成震,有師象。 卦德方智」,故史 「爻象動内,吉凶見外」,「蓍德 擬 神智以斷吉 凡應 圓

其受命也 如 以言,

二六〇

「如嚮」也。「如嚮」也。「可聲相應」,故不言善應。乾二五之坤成震巽。巽爲虞翻曰:言神「不疾而速,不行而至」,

无有遠近幽深,遂知來物,

蓍」也。 來」,「感而遂通」,謂「幽贊神明而生ぬ,「深」謂陽來,「物」謂乾神。 「神以知幽,「深」謂陽來,「物」謂乾神。 「神以知虞翻曰:「遠」謂天,「近」謂地,「陰」謂虞翻曰:「遠」謂天,「近」謂地,

非天下之至精,孰能與於此!❶

參五以變,錯綜其數, 虞翻曰: 至精謂乾,「純粹精也」。

數」,則「三天兩地而倚數」者也。而倚六畫之數。卦從下升,故「錯綜其歲再閏,再扐而後掛」,以成一爻之變,處翻曰: 逆上稱錯。綜,理也。謂「五

虞翻曰:「變而通之」,「觀變陰陽始立通其變,遂成天地之文,

極其數,遂定天下之象。

雜,故曰文」。

卦」,乾坤相親,故「成天地之文」,「物相

虞翻曰: 數,六畫之數。「六爻之動。」

非天下之至變,其孰能與於此!

三極之道」,故定天下吉凶之象也。

之義。「六爻之義易以貢」也。❷ 虞翻曰: 謂「參五以變」,故能成六爻

易无思也,无爲也,

一致而百慮」,故无所爲,謂「其静也專」。虞翻曰:「天下何思何慮」,「同歸而殊塗,

「不動」者也。

坤初、機息矣。

專,故

寂然不動,

感而遂通天下之故。

虞翻曰: 感,動也。以陽變陰,通天下

^{●「}孰」上,四庫本、照曠閣本有「其」字。

❷ 「貢」,原作「工」,今據四庫本、照曠閣本改。

之故,謂「發揮剛柔而生爻」者也。

非天下之至神,其孰能與於此!

神乎」。 虞翻 神則不能與於此也。 母、象數所由立、故曰非至精、至變、至 周 无 以制象,非遺數者則无以極數。 (籌策而不可亂,至變者體一而无不 ,至神者寂然而无不應。 斯蓋功用之 曰:「至神」謂易隱初人微,「知 〇韓康 《伯曰: 非忘象 者則无 至精者 幾其

夫易,聖人之所以極深而研幾也。

文王《繫辭》,研盡易幾微者也。 荀爽曰: 謂伏羲畫卦,窮極易幽深

唯深也,故能通天下之志;

幽深,遂知來物」,故「通天下之志」。謂虞翻曰:「深」謂「幽贊神明」,「无有遠近

蓍也。

唯幾也,故能成天下之務,

虞翻曰: 務,事也。謂易研幾開物,故

唯神也,故不疾而速,不行而至。

疾而速」。星「寂然不動」,隨天右周,行一度,月行十三度,從天西轉,故「不虞翻曰:「神」謂易也,謂日月斗在天,日

「感而遂通」,故「不行而至」者也。

聖人以章,故曰「聖人之道」矣。 侯果曰: 言易唯深唯神,蕰此四道,因子曰「易有聖人之道四焉」者,此之謂也。

天 一,

水甲。

地二;

火乙。

天三,

木丙。

地四;

金丁。

天五,

二六

土戊。

地六;

天七, 水己。

火庚。

地八;

天九,

金壬。

地十。

所從生,「聖人以通神明之德,以類萬物土癸。〇此則大衍之數五十有五,蓍龜

之情」。此上虞翻義也。

爲六十四,觸長爻策,至於萬一千五百陸績曰:「開物」謂庖犧引信八卦,重以

人觀象而制網罟耒耜之屬,以成天下之二十,以當萬物之數,故曰「開物」。聖

務,故曰「成務」也。

冒天下之道,如斯而已者也」。

翕乾謂之「成務」。冒·觸也。「觸類而虞翻曰: 以陽闢坤謂之「開物」,以陰

長之」,如此也。

是故聖人以通天下之志,

辭也。謂「以動者尚其變」,「變而通《九家易》曰: 凡言「是故」者,承上之

以定天下之業,

之」、「以通天下之志」也。

「以定天下之業」。也。凡事業之未立,以易道決之,故言《九家易》曰: 謂「以制器者尚其象」

以斷天下之疑。

「占事知來」,故「定天下之疑」。《九家易》曰: 謂「卜筮者尚其占」也。

圓。 物,是「蓍之德圓 崔 六十四,象陰方。 憬日 其爲用也, 蓍之數七七四 變通不定,因之以 而神」也。 其爲用也,爻位有 十 卦之 九, 數 知來 象 陽

六爻之義易以貢。

知」也。

分,因之以藏往知

事,

是「卦之德方以

韓康伯曰: 貢,告也。六爻之變易以

告吉凶也。

聖人以此先心,「先」,韓康伯讀爲「洗」。

韓康伯曰: 洗濯萬物之心者也。

退藏於密,

陸績曰: 受蓍龜之報應,決而藏之於

心也。

吉凶與民同患。

故以先心。陽動入巽,巽爲退,伏坤爲虞翻曰:「聖人」謂庖犧。以蓍神知來,

同患」。謂「作《易》者其有憂患」也。德」。陽吉陰凶、坤爲民、故「吉凶與民閉户、故「藏密」。謂齊於巽、「以神明其

神以知來,知以藏往。

謂「先心」、「往」謂「藏密」也。 虞翻曰: 乾神知來、坤知藏往。 「來

其孰能與於此哉?

虞翻曰: 誰乎能爲此哉? 謂古之聰

古之聰明睿知神武而不殺者夫!明睿知之君也。

虞 而之坤, 翻 曰 與天地 謂 大人 合 也。 聰 明。 庖犧 在坎 在 則聰, 乾 五 在 動

坤坎离,反復不衰,故而「不殺者夫」。离則明。「神武」謂乾,「睿知」謂坤。乾

是以明於天之道,而察於民之故,

故」。坤爲民。 「明天之道」。以坎月照坤,故「察民之虞翻曰: 乾五之坤,以离日照天,故

是 興 神 物 以 前 民用。

吉凶,先民 陸 績 日 而 神物,蓍 用之,民皆從焉 也。 聖 人 興蓍 故 故 日以 以 别

前 民 用 也。

聖人以此齊戒,

韓 康伯曰: 洗心 曰「齋」,防患曰 戒。

以 神 明其德夫!

吉 就 陸 績 利,清絜其身,故曰, 而後行,舉不違失,其德富盛,見稱 曰 : 聖人以蓍能逆知吉凶,除害 以以 此齊 戒」也。 神

是故闔户謂之坤,

明,故

曰「神明其德」也。

虞翻 日 闔, 閉 翕 也。 謂 從巽之坤 坤

柔象夜,故以「閉户」者也。

闢 户謂之乾。

虞翻 曰 : 闢, 開 也。 謂 從震之乾, 乾 剛

象畫,故以 「開户」也。

闔 一闢謂之變,

> 相 推 而 生變化 也。

虞翻

日

陽變闔陰,

陰變闢陽,

剛

柔

:

往 來不 窮 謂之通。

十二消息 荀 爽 日 ,陰陽往來无窮已 謂一冬一夏,陰陽 相 「通」也。 變易也。

見乃謂之象,形乃謂之器,

象也。 荀 爽日 萬 : 物生長,「在地 謂日月星辰,光見在 成形」, 可 天 以 而 爲 成

器用者也。

制而用之謂之法。

用之,可以爲法。 荀 7爽日: 謂觀象於天,觀 形 於 地, 制 而

利用 出人,民咸用之謂之神

遺 知所由來,故「謂之神」也 陸 一、故曰 |績日: 「利用出 聖人制器以 人」也。 周民用,用之不 民皆用 之)而不

是故易有太 極,是生兩儀,

寶曰 發初言「是故」,總衆篇之義

也。〇虞翻曰: 太極,太一也。分爲

天地,故「生兩儀」也。

兩儀生四象,

妹卦備,故象獨稱天地之大義也。兑秋,坎冬,离夏,故「兩儀生四象」。歸坤也。乾二五之坤成坎离震兑,震春,虞翻曰: 四象,四時也。「兩儀」謂乾

四象生八卦,

坎离生冬者也。卦」。乾坤生春,艮兑生夏,震巽生秋,土五之乾則生巽离兑,故「四象生八二五之乾則生巽离兑,故「四象生八虞翻曰: 乾二五之坤則生震坎艮,坤

八卦定吉凶,

上,故不言生而獨言「定吉凶」也。以類聚,物以羣分,吉凶生矣」,已言於虞翻曰: 陽生則吉,陰生則凶。謂「方言」

吉凶生大業。

荀爽曰: 一消一息,萬物豐殖,「富有

之謂大業」。

是故法象莫大乎天地

要通莫大乎四庤,翟玄曰: 見象立法,莫過天地

也。

變通莫大乎四時,

縣象著明莫大乎日月,

辛 ; 中。 明莫大乎日月」者也。 中則离,离象就 坤象滅乙; 虞翻 五. 暮,震象出庚; 日,乾象盈 曰: 「日月相推 二十三日,艮象消丙, 謂日月縣 晦夕朔旦,坎象流戊, 甲, 而明生焉」,故 己。 八日, 兑象見丁, 十七日旦,巽象退 天成八卦象。 戊己土位,象見於 三十日, 「縣象著 三日 日

崇高莫大乎富貴。

以乾通坤,故高大富貴也。 虞翻曰: 謂乾正位於五。五貴坤富,

備物致用,立成器以爲天下利,莫大乎

者也。 之利。 謂之「致用」。 其變,使民不倦,神而化之,使民宜之」, 否四之二,舟楫之利。 之初,耕稼之利。否五之初,市井之利。 否 ·聖人作而萬物覩」,故「莫大乎聖人」 閉 翻 ,取乾之坤謂之「備物」,以坤 日 謂十二「蓋取」「以利天下」,●「通 神農、黄帝、堯、舜 乾爲物,坤爲器用。 否上之初,牛馬 也 之乾 否 民 刀 多

天下之娓娓者,莫善乎蓍龜。「娓娓」今作「亹探嘖索隱,鉤深致遠,以定天下之吉凶,成

虞翻 知 乾爲蓍,乾五之坤,大有 見,故「探嘖索隱 吉,坤 曰 初深,故 殺 探, 知 凶,故「定天下之吉凶」 取; 曰「鉤深 則幽 噴, 离 致 初 贊 也。 爲 遠 神 龜 明 初 謂 乾生 隱 而 生 未

> 也。 之吉凶,坐可 成卦,龜成 物、皆勉勉然 勉之聖也 莫善於蓍龜」也 夫幽 隱 兆 深遠 願 也,雖 觀 知之,然不能 也。 0 之情,吉凶 神道之 是蓍龜 侯果 日 出出 未 成天下勉 也。 密, 兆 未然 之事 及 耆 勉

以

天地變化,聖人效之;

人設三百八十四爻以效之矣。 陸績曰: 天有晝夜四時變化之道,聖

天垂象,見吉凶,聖人象之,

也。 荀 7爽日: [X] ○宋衷日: 日 謂「在旋機玉衡,以 月 薄 蝕,五 天垂陰 星 亂 陽之象,以見 行,聖人象 齊七政」

^{▶ 「}二」,據四庫本、照曠閣本作「三」。

之,亦著九六爻位得失,示人所以有吉

凶之占也

河出圖,洛出書,聖人則之。

制歷象以示天下也。 疇也。○侯果曰: 書感。❶ 苞,洛以流坤吐地符」,河龍 鄭玄曰: 〇孔安國曰:河圖 河圖有九篇,洛書有六篇也。 《春秋緯》云「河以通乾出天 則八卦也,洛書則九 聖人法河圖、洛書 圖發,洛龜

易有四象,所以示也;

象也,圖書也。四者治人之洪範。易有 侯果曰:「四象」謂上神物也,變化也,垂

繫辭》焉,所以告也;

此象,所以示人也。

虞翻曰: 謂《繫》、《彖》、《象》之辭,「八

定之以吉凶,所以斷也。 卦以象告]也

翻 曰:「《繫辭》焉以斷其吉凶」,「八卦

定吉凶」、「以斷天下之疑」也。

《易》曰:「自天右之,吉无不利。」

之」。言人能依四象所示、《繫辭》所告, 也。《大有》上九「履信思順」,「自天右 侯果曰: 利」者也。 又能思順,則天及人皆共右之,「吉无不 此引《大有》上九辭以證之義

子曰:「右者,助也。

虞翻曰: 大有兑爲口, 口助稱「右」。

天之所助者,順也;

助者順也」。 虞翻曰: 大有五 以陰順上,故爲「天所

人之所助者,信也。

虞翻曰:「信」謂二也。乾爲人,爲信

「庸言之信」也

履信思乎順,有以尚賢也

0 四 庫本、照 曠閣本作「成」。

二六八

思 順 翻 0 \mathbf{E} 比坤 大有五應二而順上,故「履信 爲順,坎爲思。 乾

坤 伏乾下,故「有以尚賢」者也。

是以 『自天右之、吉无不利』也。」

賢也」。以「自天右之,吉无不利」,重引 以 崔 也。崇四「匪彭」、「明辯」於五、「又以尚 |憬日: 信也。比五而不應三,思天道 言上九履五「厥孚」,履 之順 人 事

子曰:「書不盡言,言不盡意。」 《易》文以證成其義。

虞翻 足以盡易之所言,言之則不足以盡庖犧 曰 : 謂書《易》之動,九六之變,不

然則聖人之意,其不可見乎?

之意

也。

侯果 設疑 而 問 也。 欲 明 立 象 可 以

聖人言意也

子 曰:「聖人立象以 盡 意

憬 言伏 義仰觀 俯察而立八卦之

象,以盡其意。

設 針以盡: 情僞,

崔憬曰:「設卦」謂「因而 卦之情僞盡在其中 重之」爲六十四

繋解》焉以 盡其言,

立卦之象。象既 崔憬曰: 文王作卦爻之辭, 盡 意,故辭以盡言也。 以 繋伏羲

變而通之以盡利,

以盡天下之利。 陸績曰: 變三百八十四爻, 使相交通

鼓之舞之以盡神。」

虞翻 八十四爻,動行相反其卦,所以 巽爲舞,故「鼓之舞之以 E : 鼓者,動也。 神,易也。陽息震爲鼓, 舞者,行也。 盡 神 謂三百 陰消 荀 爽

乾坤,其易之緼邪?

神也。

翻 曰 : 緼, 藏 也。 易 麗 乾 藏 坤, 故

爲易之鰛 也

乾坤成 列,而易立乎其中矣。

故 侯果曰: 云「立乎其中矣」。 緼,淵隩也。六子因之而生,

乾坤 毁,則无以見易,

荀 爽 户 : 毁乾坤之體, 則无 以 見 陰 陽

之交易也。

易 不可見,則乾坤或 幾乎息矣。

既 侯 果 動 用,則不能 乾 坤者 无毁息矣。 動用之物 天 動 也 極 復 物

静 極 復 動。 雖天地至此,不違變

化 也。

是故形而 理之用 也 就 通 之事業也。 憬 ,用者即 形質之中,有 日 上者謂之道,形而 ,以扶其體,則 此結上文,兼明易之形器變 形 質 凡天 上之 有 地 妙用 用。 是道也。 萬 物 下者謂之器 也 體者即 ,皆有形質。 其體比 言 形質 有妙

> 植 以 器,以萬物 之爲器也。 用,若器之於物,則 物 形 軀 以 枝幹 爲 體 資始資 假令天 爲 爲器,以 器 爲 生 地 是 體,以 爲 圓 靈 體 用爲道。 蓋方軫爲體 識 爲形之下, 爲 生性 用 爲 爲道 動 道。 物 爲

爲用。

化 而財之謂之變,

翟 玄曰: 化變剛 柔 而 財之,故

謂

之

變」也

推 而行之謂之通

翟玄曰: 推行陰陽,故「謂之通」也。

舉而措之天下之民,謂之事業

象,故天下之民尊之得爲事業矣。 家易》曰: 之於天下,民咸用之,以爲事業。 陸績曰: 變通盡利,觀象制器,舉而措 謂聖人畫卦,爲萬民事業之) 九

是故夫象,聖人有以見天下之嘖, E. 此重明易之緼,更引《易》象

及辭以釋之。 言伏羲見天下之深嘖, 即

易之緼者也。

而 擬諸其形容,象其物宜,是故謂之象。

陸績曰: 此明説立象盡圭,❶設卦盡情

僞之意也。

其典禮, (有以見天下之動,而觀 其會通, 以行

侯果曰: 典禮有時而用,有時而去,故

繋辭》焉以斷其吉凶,是故謂之爻。 曰「觀其會通」也

崔憬曰: 言文王見天下之動,所以 繋

象而爲其辭,謂之爲爻。

極天下之嘖者存乎卦,

陸績曰: 言卦象極盡天下之深情也。

鼓天下之動者存乎辭,

宋衷曰: 欲知天下之動者,在於六爻

之辭也。

化 而財之存乎變,推而行之存乎通,

> 裁成之存乎其變。 崔憬曰: 言易道陳陰陽變化之事,而 推 理達 本而行之,在

乎其通。

神而明之,存乎其人,

荀爽曰:「苟非其人,道不虚行」也。

崔憬曰: 能達此理者,存乎其人。 言易神无不通 ,明无不照。 謂文王,述

默而成,不言而信,存乎德行。

今本

「默

而 成 《易》之聖人。

《九家易》曰:「默而成」謂陰陽相 之,在乎合天地之德,聖人之行也。 行者相應也。 十四卦,不有言述而以卦象明之而人信 不言而信」謂陰陽相應也 〇崔憬曰: 言伏羲成六 德者有實. 處也

易傳卷第十四

圭, 四 庫本、 照曠閣本作「意」。

易傳卷第十五

唐資州李鼎祚集解

周易繫辭下

(卦成列,象在其中矣。 虞翻曰 中,故「八卦成列」,則「象在其 坤列東,艮兑列南,震巽列西,坎离在 垂象,見吉凶,聖人象之」是也。 「象」謂三才,成八卦之象。 中」。 一天 乾

因 而重之,爻在其中矣。

之動,三極之道也」。 虞翻曰: 柔」,則「爻在其中」。 謂參重三才爲六爻、「發揮剛 六畫稱爻,「六爻

剛 柔相推,變在其中矣。

辭,故「動在其中」,「鼓天下之動者存乎

辭」者也。

吉凶悔吝者,生乎動者也; 虞翻曰:「動」謂爻也。「爻者,效天下之

動者也」,爻象動内,吉凶見外。 「吉凶

生而悔吝著」,故「生乎動」也。

剛柔者,立本者也;

天稱父,坤地稱母,本天親上,本地親 虞翻曰:「乾剛坤柔」,爲六子父母。 乾

下,故「立本者也」。

變通者,趣時者也;

虞翻曰:「變通配四時」,故「趣時者也」。

吉凶者,貞勝者也,

虞翻曰: 貞,正也。 勝,滅也。 陽生則

虞翻曰: 推 而 生變化,故「變在其中矣」。 謂十二消息,九六相變, 剛柔

繫辭》焉而命之,動在其中矣。

虞翻

曰 :

謂《繫》、《彖》、《象》九六之

Ŀ

L E

吉 「、陰消日 則凶 者 也。

天地之道,貞觀者 也;

陸績曰: 言天地正 可以 觀 瞻爲道 也

日月之道,貞明者也,

荀 曰 言日月正 离,衝爲十五日。 位,然後明也。 亦大圓明,故曰「日月之道,貞明者也」。 爽曰: : 言日月正,以明照爲道矣。 當其 离爲 日。 位 月者,坎也。坎正位衝 月當日衝,正值坎位, 乃大明也。 日 中之 時,正當离 陸 績

天下之動,貞夫一者也。

也 虞 天一陽氣以生,故「天下之動,貞夫一者 梁翻 曰: 謂乾元。 萬物之動,各資

夫乾,確然示人易矣;

虞翻曰 時 也。 「不易世,不成名」,故「示人易」 陽在初弗用,確然无爲,潛龍

者

也。

夫坤,隤然示人簡矣。

虞翻日 能」,閱内萬物,故「示人簡」者也 隤,安; 簡,閱也。 坤 以 簡

爻也者,效此者也;

虞翻 曰:「效法之謂坤」,謂效三才以爲

六畫。

象也者,象此者也

虞翻曰:「成象之謂乾」,謂聖人則天之

象分爲三才也

爻象動乎内,吉凶見乎外,

内則吉見外,陰爻動内則凶見外也。 虞 翻 曰 内,初; 外, 也。 陽象 動

功業見乎變,

荀 陰陽相變, 功業乃成者也。

聖人之情見乎辭。

崔憬曰: 言文王作卦爻之辭 所以 明

天地 聖人之情,陳於易象。 之大德日生,

德,常生萬物 地 孔 之德,廣 穎 達 曰 : 生 萬 而 自 不有,生是其大德 此 物之意也。 以 下,欲 言天 明聖人 地 也 之盛 同 天

聖人之大寶曰位。

下爲寶,而不有位,是其大寶也。地之大德,寶萬乘之天位。謂以道濟天崔憬曰: 言聖人行易之道,當須法天

何以守位曰仁,

仁賢,兼濟天下。 宋衷曰: 守位當得士大夫公侯,有其

何以聚人曰財。

取聚人之本矣。器,備物盡利,以業萬民而聚之也。蓋陸績曰: 人非財不聚,故聖人觀象制

理財正辭,禁民爲非曰義。

辭」。咸得其宜,故謂之義也。○崔憬「理財」。名實相應,萬事得正,爲之「正荀爽曰: 尊卑貴賤,衣食有差,謂之

則必 人寶位之所要也 以此行之,得其宜也,故知仁 禁之,則必不改也。 正之,則必有辱也。 日 : 有敗 夫財貨,人所 也。 言辭, 貪愛,不以義理之, 人之樞 百 此三者皆資於義。 姓 有 非,不以義 要,不以義 義與財,聖

古者庖犧氏之王天下也,

知火化。炮啖犧牲,號庖犧氏也。下,位乎乾五。五動見离,离生于木,故虞翻曰: 庖犧,太昊氏。以木德王天

仰則觀象於天,

火五行八卦之形者也。《九家易》曰: 艮兑爲山澤也。地有水

觀鳥獸之文,

雞」之屬是也。○陸績曰: 謂朱鳥、白荀爽曰:「乾爲馬,坤爲牛,震爲龍,巽爲

二上四四

之文。 虎、蒼 龍、 玄 武, 四 方二十八宿 經 緯

與地之宜,

《九家易》曰: 山澤高卑,五土之宜也。 謂 四 方 四 維 八卦之位

近取諸身,

股」也。 荀爽曰: 「乾爲首、坤爲腹、震爲足、巽 爲

荀

遠

取諸物,

爽 曰: 也。 乾爲 金 玉, 坤 爲 布 釜之類

於是始作八卦,

虞翻 四 也」,則大人造爻象以象天,卦可知也。 卦效之。 前 [象,四 庖犧之所造也。故曰「象者,象此者 讀《易》者咸以爲庖犧之時,天未有八 日 象生八卦」,八卦 「易有太極,是生 謂 庖 犧 觀 鳥 潤 乃 之文,則 兩 四 儀 象所生, 儀生 天

> 象之」,則天已有八卦之象。 卦,恐失之矣。「天垂象,示吉凶

以通神明之德,

震爲雷 荀爽曰: 風, 乾坤爲天地,离坎爲日月, 艮兑爲山澤,此皆 神明之 巽

德也。

以類萬物之情。

作結繩而爲罟,❶以田以 之情」。 《九家易》曰: 唯罟,故「結繩爲罟」。 虞翻曰: 五百二十策。 以此,庖犧重爲六十四卦 离爲目 策類 六十四卦,凡有萬 · 。 巽爲繩。 魚,蓋取諸离。 物,故 坤二五之乾成 日 目之重者 類 明 萬物 一千

庖犧 故「取諸离」也。 氏没,神農氏

离,巽爲魚,坤二

一稱田

以罟取獸曰

田,

- 0 罟上, ,四庫本有「網」字。
- 目」,原作「日」,今據四庫本、照

虞 播種、號神農氏也。 火德繼庖 翻 曰 : 犧王。火生土,故知 没,終; 作,起 也 土 神 則 農 利 民 以

下,蓋取諸益。 断木爲耜,揉木爲耒。耒耨之利,以教天

下。 虞翻曰: 萬物者莫若雷風,故法風雷而作耒耜。 耜,艮手持耒,進退田 籽器也。 小木,手以橈之,故「揉木爲 木爲耜」。耜止 艮爲手,乾爲金。 坤爲田,巽爲股,進退。 巽爲號令,乾爲天,故「以教天 否四之初也。 前所踰 手持金以入木,故「斲 ,因名曰耜。 中,耕之象也。益 巽爲木、爲人, 耒」。 震足動 耒耜, 艮爲

神

而化之,使民宜之。

虞翻曰: 否五之初也。离象正上,故而退,各得其所,蓋取諸噬嗑。日中爲市,致天下之民,聚天下之貨,交易

爲大塗,否乾爲天,坤爲民,故「致天下稱「日中」也。震爲足,艮爲徑路,震又虞翻曰: 否五之初也。离象正上,故

食之道,故取諸此也。各得其所。「噬嗑、食也」,市井交易、飲天下貨」之象也。震升坎降、交易而退,之民」象也。坎水艮山、羣珍所出、「聚

民不倦, 神農氏没,黄帝、堯、舜氏作。 通其變,使

服牛乘馬之類,故「使民不倦」也。虞翻曰:「變而通之以盡利」,謂作舟楫

故「使民宜之」也。物,以利天下。坤爲民也,「象其物宜」,壞翻曰:「神」謂乾。乾動之坤,化成萬

之,吉无不利」也。 易窮則變,變則通,通則久。是以「自天右

陰,天之道也。 陸績曰: 獸以充民食。 教播殖以變之,此窮變之大要也 陰窮則變爲陽,陽 民衆騰 庖犧作網罟, 少 /, 其 道 窮 教 窮 則 民 則 八神農 取 變 禽 則 爲

用,故无所不利也。 變,變則通,與天終始,故可久。民得其

乾坤。 黄帝、堯、舜垂衣裳而天下治,蓋取諸

下。 《九家易》 諸 官以 以 禦寒暑。 上爲衣,坤下 在 象 下含 此 治, 衣取象 也 衣 物也。 裳。 萬民以 至乎 日 乾爲明君,坤 乾,居上 爲裳。 ,黄帝,: 黄帝 察」,故「天下)虞翻 乾坤; 始制 覆 以上,羽皮 物。 衣 爲順臣。「百 萬物之緼,故 裳取象 裳,垂示 乾爲治,在 治」、蓋取 革 木 坤, 天 以

通。 挎木 致遠 爲 舟, 以利天下,蓋取 掞 木 · 爲 楫。 舟楫 諸 涣。 之 利 以 濟 不

艮手持金,故「挎木爲舟,掞木爲楫」也。除也。巽爲長、爲木,艮爲手,乾爲金。楫之象也。此本否卦,九四之二。挎,《九家易》曰: 木在水上,流行若風,舟

矣。法涣而作舟楫,蓋取斯義也。乾爲遠天,故「濟不通,致遠以利天下」

致遠,以 遠、坤爲牛、爲重。 虞 在牛背上,故「服牛」。 在馬上,故「乘馬」。 乾上之初爲「致遠」。 翻 曰 : 利天下」,故取諸隨。 否上之初 坤 巽爲繩,繩束縛物 也。 初之上爲「引重」, 艮爲背,巽爲股, 出否之隨, 否乾 爲馬、爲

重門擊欜,以待虣客,

干寶曰: 卒虣之客,爲奸寇也

蓋取諸豫。

《九家易》曰: 小木,又爲 欜者,兩木相擊以 震復爲艮。 坤爲夜。 上持。 兩 即手 艮對 下有艮象。 行夜 ·持二木,夜行擊欜之 震 合, 爲足, 也。 門」之象 從外 又爲木,爲 艮 爲手,爲 示 也。 之,

待虣客」。既有不虞之備,故「取諸象也。坎爲盗。虣,水虣長无常,故「以

濟,蓋取諸小過。斷木爲杵,闕地爲臼。臼杵之利,萬民以

之象也。故取 也。 言以利天下也。 虞翻曰: 艮手持木以闕 來之三斷艮,故「斷 於下, 臼之象也。 震 出 巽入,艮手持杵出 晉上之三也。 諸 坤三、故「闕地 小 過。 木爲杵 震 動 本无乾象,故不 艮爲小木。 而 人臼中,春 上,杵之象 爲臼」。 坤爲 艮

下,蓋取諸睽。 弦木爲弧,剡木爲矢。 弧矢之利,以威天

「剡木爲矢」。乾爲威。五之二,故「以爲金,艮爲小木。五之二,以金剡艮,故木,坎爲弧,离爲矢,故「弦木爲弧」。乾虞翻曰: 无妄五之二也。巽爲繩、爲

取諸大過。

樹,喪期无

數。

後世聖人易之以棺椁,蓋

古之葬者,

厚衣之以薪,葬之中野,不封不

上棟下宇,以待風雨,蓋取諸大壯。上古穴居而野處,後世聖人易之以宫室。

帝也。 澤 見,兑雨隔震,與乾絶體,故「上棟下宇, 陽 虞 以待風雨,蓋取諸大壯」者也 雨,乾爲高,巽爲長木,反在 故「易以宫室」。艮爲待,巽爲風,兑爲 震爲後世,乾爲聖人。「後世聖人」謂黄 爲處。无妄乾人在路,故「穴居野處」。 上,故稱「上古」。 動起,故「上棟下宇」,謂屋邊也。兑 動下爲下宇。无妄之大壯,巽風不 翻 曰 : 艮爲宫室,變成大壯,乾人入宫 无妄兩 艮爲穴居,乾爲野,巽 象易也。无妄乾 上爲棟,震 在

二七七

七八

孚艮爲 野」。 无 樹」。 聚土爲樹。 虞 月之期數。 象,故不言上古。 數」。 象也,故「取諸大過」。 翻 乾象在中,故「厚衣之以 者。巽爲薪,艮 木而有口,乾人入處棺斂之象。 坤爲 $\overline{\mathbf{H}}$ 穿土稱「封」。「封」,古「窆」字也。 山丘。巽木在裏,棺藏山陵,椁 巽爲木,爲入處。 喪。「期」 中 无坎离 中孚无 孚 上 大過 下 一坤坎象,故「不封 日 」謂從斬衰至緦麻 易象 爲 月坤象,故 乾 厚,乾爲衣、爲 **兑爲口**,乾爲 也。 在 薪,葬之中 中,故但言 本无 一喪 中 期 H 不 乾

官以治,萬民以察,蓋取諸夬。 上古結繩 多少 之事,事大大其 九家易》曰: ′,隨物衆寡 而治,後世聖人易之以 7,各執 (繩,事 古者无文字, 以 小小小 相 考,亦足 其繩 其 書契。 有 約誓 以 結之 相 百

治也。

夬

本坤世,下有伏坤,「書」之象

法夬 坤,二 剥。 象易 夬」。大壯、大過、夬,此三「蓋 契」。乾爲百,剥艮爲官,坤爲衆臣、爲 以 也 妄, 夬本履 坤,故「百官以治,萬民以察」,故「 萬民、爲迷暗,乾爲治。 夬反 後世聖人」,謂黄帝、堯、舜也。 書治 上下相易,故俱言「易之」。 繩,离爲罟,乾爲治,故「結繩以治」。 壯 剥坤爲書,兑爲契,故「易之以 也。 而 谁 察」之象 上 中孚本无乾象,大過乾不在 作 職萬民,以契明其事。 又 而 乾象在上,故復言「上古」。 書契矣。 見 成 卦,乾 乾, 夬,金決竹木 也。 夬 契」之象 象 ○虞翻曰 俱 者, 在上, 決也。 爲書契象,故 也。 剥,以乾 : 大壯 契,刻也。 故言「上 取 夬旁通 取百 以 履上下 本无 直 取 乾 書 官 諸 照 兩 照

❶ 「易象」二字,四庫本、照曠閣本互乙。

之」,明上古時也。但言「古」者。大過亦言「後世聖人易

是故易者,象也。

「縣象著明,莫大日月」是也。○虞翻曰: 易謂日月在天成八卦象。干寶曰: 言「是故」,又總結上義也。

象也者,象也。●

者、「形象」之象也。❷此重釋於象,言易者象於萬物。「象」崔憬曰: 上明取象以制器之義,故以

彖者,材也。

三才,謂天地人道也。 虞翻曰: 彖説三才,則三分天象以爲

則「發揮剛柔而生爻」也。 虞翻曰: 動,發也。謂兩三才爲六畫爻也者,效天下之動者也,

虞翻曰: 爻象動内,則吉凶見外。是故吉凶生而悔吝著也。

陽卦多陰,陰卦多陽,其故何也? 凶悔吝者,生乎動者也」,故曰「著」。

陽卦奇,陰卦耦,其德行何也?「陰卦多陽」謂巽离兑,一陰而二陽也。「陽卦多陰」謂震坎艮,一陽而二陰。崔憬曰: 此明卦象陰陽與德行也。

虞翻曰: 陽卦一陽故奇,陰卦二陽故

耦,謂德行何可者也。

民,小人之道也。 陽一君而二民,君子之道也。陰二君而一

君之德也。二居君位'非其道也。故陽斯陰陽之數'君臣之辯也。以一爲君,代終'有事則二也。故陽爻畫一,以明君,以无爲統衆'无爲則一也。臣以有事韓康伯曰: 陽'君道也。陰,臣道也。

●「象」,四庫本作「像」。

「吉

❷ 「形象」,四庫本作「形像」。

二七九

卦

曰

君子之道也,陰卦

日

小人之道

也

《易》曰:「憧憧往來,朋從爾思。」

卦,三君三民,四獨遠陰,思慮之爻也。翟玄曰: 此咸之九四辭也。咸之爲

思以求朋,未能寂。寂以感物,不思而〇韓康伯曰: 天下之動,必歸於一。

至也。

塗,一致而百慮。 子曰:「天下何思何慮? 天下同歸而殊

識其要,不在博 殊,其歸則 韓康伯曰 : 同 夫「少則 求 慮 雖 百,其致不二。 得 一以貫之,不慮 ,多則惑」,塗 句 雖 而

天下何思何慮?

盡矣。

虞翻曰:「易,无思也」,既濟定,六位得

正,故「何思何慮」。

日往則月來,

虞翻曰: 謂咸初往之四,與五成离,故

「日往」,在内「月來」,此就爻之正者也。「日往」。與二成坎,故「月來」。之外

月往則日來,

往」。四變之初,與二成离,故「日來」虞翻曰: 初變之四,與上成坎,故「月

者也。

焉」。 既濟體兩离坎目月相推而明生焉。

故

明

生

寒往則暑來,

消,從姤至否,故「寒往暑來」也。 虞翻曰: 乾爲寒,坤爲暑。謂陰息陽

暑往則寒來,

往寒來」也。 陰詘陽信,從復至泰,

寒暑相推而歲成焉。

生歲成相推則一,何思何慮於其間哉!崔憬曰: 言日月寒暑往來雖多,而明

)侯果曰

不詘

則

不

信,不蟄則无存,

相

感而後利生矣。

以況无思得

往者、詘也、

「散爽ヨ: 会貳主

荀爽曰: 陰氣往則萬物拙者也。

來者,信也。

旬爽曰: 陽氣來則萬物信者

詘信相感而利生焉。

伏藏。 平」,●故 而 翻 萬物 티 : 「利生」。 化生,聖人感 感,咸象,故「相 「利生」 謂陽出震,陰 心 感」。 而 天下 天 和 地

尺蠖之詘,以求信也。

荀爽曰: 以喻陰陽氣屈以求信也。

龍蛇之蟄,以存身也。

息初 成,十一 虞 坤 翻 爲 巽 티 : 爲 身,故「龍 月復生。 蛇、陽息初 蟄,潛藏 姤巽 蛇之蟄,以 也。 震 在下,龍蛇俱蟄, 龍 爲 潛 龍。 而 存 十月 蛇藏、陰 身 也。 坤

> 謂矣。 於一,萬事畢。 之畜天下者 則 蠖, 詘行 萬 物 歸 其 思 蟲,郭璞云「蝍蛻」也。 无心得,鬼神服。」此之 治一也。」《記》曰 矣。 ◎《莊 子》曰 通 古

精義入神,以致用也。

陰陽在 感 姤 姚 而 理之微,以 得,乃用无 精義、物理之微者 信 逆禍福也 而遂通」者也。 復,故曰 曰 : 初, 深不 陽稱 極 得未然之事, 「致用」也 也。 可 精 陰 也。 測, 理人寂一,則精 〇干寶日 故謂 爲 神,「寂然不動 是以 義,入在 韓康伯 之神。 涉於神 能 初也。 精 義斯 曰 : 變爲 道 義

利用安身,以崇德也。

也。陰升上究則乾伏坤中,詘以求信,《九家易》曰: 利用,陰道用也,謂姤時

) 「感人」,原重文,今據四庫本、照曠閣本删

安身以 理得」 彌 宗,事各本乎其 用 也 利 陽 美 ,利用由 而 用 當 安身以 而 後 ○韓 復 也。 殉 動 升 功美,則 康 若役其 於安以崇其德。 也。 安身 伯 曰 其 根。 精 嘿 思 僞 處 義由於入神以 歸根則寧,「天下之 利用之道,皆「安 慮 彌 崇德,體 也 多 以 求 而 時 理必 動 理 既 卑 愈 用,忘其 由 而 藏 致 德 乎 其 其 其 故

過此以往,未之或知也。

荀爽曰: 出乾之外,无有知之。

窮神知化,德之盛也。」

者能 也。 坤 致之道 侯果曰: 謂 翻 若窮 之 日 知化。 極 於 神理 矣。 夫精義入神,利用崇德, 坤變乾謂之窮神, 乾爲盛德,故「德之盛 過斯以 通於變化,則德之盛 往 · 則 未之能 以 乾 知 亦 通

不見其妻,凶。」《易》曰:「困于石,據于蒺藜。入于其宫,

崇德。 九二 其妻」,「凶」之象也 應初,不納於己,是困于九四之石 孔 困之六三,履非其 三又乘二,二是剛物,非己所乘,是據 穎達 之蒺藜也。 若身危辱,何崇之有? 曰 : 上章 又有「入于其宫,不見 位 先言 ,欲上於四。 利 用 安 身, 此 章 四 可 引 自 以

子曰:「非所困而困焉,名必辱。

辱」也 虞翻 失位 陰則二制坤,故 陰爲 惡 曰 : 人,故 辱。 困 一本咸。 非 以 陽 所 次 之 咸。❶ 咸三人宫,以 木 陰 而 下 木 爲四所 焉 稱 之 几

非所據而據焉,身必危。

❶ 「次」,四庫本、照曠閣本作「決」。

故「身必危」。 一旦時月身。二折坤體,而據焉」。二變時坤爲身。二折坤體,虞翻曰: 謂據二。二失位,故「非所據

既辱且危,死其將至,妻其可得見耶?

爲棺椁死喪之象,故曰「死其將至」,妻陸績曰: 六三從困辱之家,變之大過

不可得見。

不利。」《易》曰:「公用射隼于高庸之上,獲之,无

故引解之上六以證之矣。故此明藏器於身,待時而動,是有利也。孔穎達曰: 前章先須安身,可以崇德,

子曰:「隼者,禽也。

野容,如禽獸焉。 虞翻曰: 离爲隼,故稱「禽」。言其行

弓矢者,器也。

虞翻曰: 离爲矢,坎爲弓,坤爲器。

射之者,人也。

應上,故上令三出而射隼也。而成乾,故曰「射之者人」。人則公。三虞翻曰: 人,賢人也。謂乾三伏陽,出

者也。」 動而不括,是以出而有獲,語成器 君子藏器於身,待時而動,何不利之有 小人,乘君子器,故上觀三出,射去隼也。 身、爲藏器,爲藏弓矢,以待射隼。 出成乾,貫隼入大過死。兩坎象壞,故 待,爲時。 三待五來之二,弓張矢發,動 虞翻曰: 何不利之有」、《象》曰「以解悖」。 · 三伏陽爲君子,二變時 三陰 艮爲 坤爲 而 ? 動

動者也」。 二成坎弓离矢,動以貫隼,故「語成器而二成坎弓离矢,動以貫隼,故「語成器而虞翻曰: 括,作也。震爲語,乾五之坤

義。坤爲恥,爲義, 乾爲仁,爲畏者也。虞翻曰: 謂否也。以坤滅乾爲不仁不子曰:「小人不恥不仁,不畏不義,

不 · 見 利 不 動 ,不威不徵

坤,故「不威不徵」,震爲徵也。 震爲動,故「不見利不動」。 五之初 翻 否五之初成噬嗑市,离日見乾爲見利。 曰 : 否乾爲威,爲 利。 巽 爲 近 利

小徵而大誡,此小人之福 也。

坤爲 虞翻 疆,故小人之福也。 坤殺不行,震 티 : 小人,乾爲福。 艮爲小,乾爲大。五下威 懼虩 虩,故「小徵大戒」。 以陽下陰、民説 無

《易》曰: 《九家易》曰: 『屨校滅趾,无咎。』此之謂也。 噬嗑六五,本先在初,處

罪,終以致害。 无咎。〇侯果曰: 非其位,小人者也。故歷説小 雖欲爲惡,能止不行則 噬嗑初 九爻辭也。 人所 以 爲

校者,以木夾足止行 也。 此明小人因小

刑 而大戒,乃福 也。

善不 積,不足以成名; 惡不 積,不 · 足 以

滅身。

虞翻 惡,爲身。 曰: 以乾滅坤、故「滅身」者也 乾 爲 積善、陽 稱名。 坤 爲 積

小人以小善爲無益而弗爲也,

虞翻曰:「小善」爲復初。

以小惡爲无傷而弗去也 虞翻 曰:「小惡」謂姤

初。

故惡積 而 不 ·可 弇,

虞 翻 曰 謂陰息姤 至遯, 一子弑

罪大而不可 解,

故

一惡

積而

不可弇」。

虞翻曰: 陰息 遯 成 否, 以 臣 弑 故

罪大而不可解」也

《易》曰: 『何校滅耳,凶。』」

所滅。 明」者,聞善不聽,聞戒不改,故「凶」也。 《九家易》曰: 初升五,所在失正,積惡而罪大,故爲上 「善不積」,斥五陰爻也。「聰不 噬嗑上九爻辭也。 陰自

其父」

子曰:「危者,安其位者也;

崔憬曰: 言有危之慮,則能安其位,不

失也。

亡者,保其存者也,

崔 慢 : 言有亡之慮,則能保其存

者也。

亂者,有其治者也。

崔憬曰: 言有防亂之慮, 則能有其治

者也。

是故君子安而不忘危,

虞翻曰:「君子」、「大人」,謂否五也。 否

坤爲安,「危」謂上也。 〇翟玄曰:

在

安慮危。

存而不忘亡,

荀爽曰: 謂「除戎器,戒不虞」也。

翟玄曰: 在存而慮亡。

不忘亂,

日: 謂「 思患而逆防之」。〇翟玄

> 曰 : 在治而 慮亂。

是以身安而國家可保也。

虞翻 曰: 坤爲身。謂否反成泰,君

定於内而臣忠於外,故「身安而國家

位

可

保也」。

《易》曰: 『其亡其亡,

荀爽曰: 存不忘亡也。

繫于包桑。』」

荀爽曰: 桑者上玄下黄。乾坤相 正,故不可忘也。○陸績曰:

上皆謂否陰滅陽之卦。 五在否家,雖得

中正,常自懼以危亡之事者也。

子曰:「德薄而位尊,

虞翻曰: 鼎四也,則离九四凶惡小人,

故「德薄」。 四在乾位,故「位尊」。

知少而謀大,今本「少」作「小」。

虞翻曰: 兑爲小知,乾爲大謀。 四在

乾體,故「謀大」矣。

自

此以

包以

二八六

初

力少而任重,

「力少」也。乾爲仁,故「任重」,「以爲已虞翻曰: 五至初體大過,「本末弱」,故

尟不及矣。

任,不亦重乎」。

言不勝其任也。」《易》曰:『鼎折足,覆公餗,其形渥,凶。』《嘉时: 尟,少也。及,及於刑矣。

遇禍也,故引《鼎》九四以證之矣。 孔穎達曰: 言不能安身,智小謀大而

子曰:「知幾其神乎?

豫四知幾而反復初也。此謂豫四也。惡鼎四折足,故以此次言虞翻曰:「幾」謂陽也,陽在復初稱幾。

君子上交不諂,下交不瀆,

言且諂也,故「上交不諂」。「下」謂交瀆。「上」謂交五,五貴。震爲笑言,笑虞翻曰: 豫二,謂四也。四失位,諂

得正元吉,故「其知幾乎」。三。坎爲瀆,故「下交不瀆」。欲其

其知幾乎?

子上交不至諂媚,下交不至瀆慢,悔吝侯果曰:「上」謂王侯,「下」謂凡庶。君

幾者,動之微,吉之先見者也。无從而生,豈非知微者乎?

君子見幾而作,不俟終日。《易》曰:『介復初「元吉」,「吉之先見者也」。○韓康復初「元吉」,「吉之先見者也」。○韓康不可以名尋,不可以形覩也。唯神也,不疾而速,感而遂通,故能玄照,鑒於未不疾而速,感而遂通,故能玄照,鑒於未必。合抱之木,起於毫末,吉凶之章,此也。合抱之木,起於毫末,吉凶之章,始乎微兆,故言「吉之先見者也」。○韓康虞翻曰: 陽見初成震,故「動之微」。

孔穎達曰: 前章言「精義人神」,此明日,斷可識矣。

于石,不終日,貞吉。』介如石焉,

寜

,用終

子曰

「顏氏之子,其殆庶幾乎?

君子知微知章,知柔知剛,

萬夫之望。」

子則以得幾,不必聖者也。 此類,可謂「知幾」也。皆稱「君子」,君有見被髮而祭,則知爲戎狄之居。凡若周公聞齊魯之政,知後世彊弱之勢。辛曰: 言君子苟達於此,則萬夫之望矣。苗爽曰:「聖人作而萬物覩」。〇干寶

有不善未嘗不知,「殆庶幾」。孔子曰:「回也,其庶幾也?」❶「豬庶幾」。 我子曰:「回也,其庶幾也?」❶虞翻曰: 幾者,神妙也。顏子知微,故

明」。 假以自知」,《老子》曰「自知者

知之未嘗復行也。

「克己復理,天下歸仁」。 虞翻曰: 謂顏回「不遷怒,不貳過」

故有不善,知則速改,故无大過。也。在微則昧,理章而悟,失在未形。人耳。顔子亞聖,但冀近於知微而未得冀也。此明知微之難,則知微者,唯聖侯果曰: 復初九爻辭。殆,近也。庶,

易傳卷第十五

❶ 「也」,四庫本、照曠閣本作「乎」。

易傳卷第十六

唐 資州 李鼎 祚集解

周易繫辭下

天地壹壺,●萬物化醇。 若天地有心爲一,則不能使萬 若己能得 虞翻曰: 會,感應變化而有精醇之生,萬物自化。 无心,自然得一。 安身以崇德也」,安身之道,在於得 泰,故不説泰。 「化醇」。 一之事也。 孔穎達曰: 一,則可以安身,故此 謂 絪緼,氣附著之義。 泰上也。 「天地 唯二氣絪緼,共 之交,萬 先説 以前章「利 否,否 物 通」,故 物 章 言天地 化 相 明 反 用 和 得 成

翻

者也

男女搆精,萬物化生。 卦六三之辭,主於人事也。 干寶曰: 成益,萬物出震,故「萬物化生」也。 兑爲女,故「男女搆精」。 曰 不言陰陽而言男女者, 謂 男女猶陰陽也,故「萬物化 泰初之上成損。 乾爲精。 以指釋損 艮 八爲男, 損反

道 此明物情相感,當上法絪緼化醇致一之 人行,三則疑」,是衆不如寡,三不及一。 侯果曰: ,則无患累者也。 損六三爻辭也。 《象》云「一

虞 翻 曰: 謂反損成益, 君子益 初 也。 子曰:「君子安其身而

後動

壹 壺,四 庫本作「絪縕」。

《易》曰:『三人行,則損一人,

一人行,

則

得其友。」言致一也。」

己身,然後動也。子將動有所爲,必自揣安危之理,在於中爲安,身震爲後動。○崔憬曰: 君

易其心而後語,

定其交而後求。 事,心雖不可出語,必和易其心而後言。 事,心雖不可出語,必和易其心而後言。 語。○崔憬曰: 君子恕己及物,若於 虞翻曰: 乾爲易,益初體復心,震爲後

以事求之。 定其交,知其才行,若好施與吝,然後可定其交,知其才行,若好施與吝,然後可柔始交」。艮爲求也。○崔憬曰: 先虞翻曰: 震專爲定,爲後。「交」謂「剛

君子脩此三者,故全也。

道大光, 自上下下,民説无疆」,故「全虞翻曰: 謂否上之初,「損上益下,其

危以動,則民不與也,

也

虞翻曰: 謂《否》上九「高而无位」,故

「危」。坤民否閉,故弗與也

懼以語,則民不應也;

初成益,故「民不應」。坤爲民,震爲虞翻曰: 否上窮災,故「懼」。不下之

應也。

无交而求,則民不與也。

閉,故「不與」。震爲交。 虞翻曰: 上來之初,故「交」。 坤民

否

莫之與,則傷之者至矣。

虞翻曰: 上下之初,否消滅乾,則體剥

傷。臣弑君,子弑父,故「傷之者至」。

《易》曰: 『莫益之,或擊之,立心勿

恒,凶。」

物所不與,故「凶」也。身易心,則羣善自應。若危動懼語,則侯果曰:《益》上九爻辭也。此明先安

子曰:「乾坤,其易之門邪?

荀爽曰: 陰陽相易,出於乾坤,故曰

乾,陽物也, 坤,陰物也

荀爽曰: 陽物天,陰物地也。

陰陽合德而剛柔有體,

月戰, 乾剛以體天,坤柔以體地也。虞翻曰:「合德」謂「天地雜」,保大和,日

以體天地之撰,

受天地之數也。謂九天數,六地數也。《九家易》曰: 撰,數也。萬物形體皆

以通神明之德。

剛柔得以爲體矣。

《九家易》曰: 隱藏謂之神,著見謂之

明,陰陽交通乃謂之德。

其稱名也,雜而不越。

名。陰陽雖錯而卦象各有次序,不相《九家易》曰: 陰陽,雜也。「名」謂卦

踰越。

於稽其類,其衰世之意邪?

當名, 夫《易》,章往而察來,而微顯 意」耳。 世。 稽,考也。 虞翻 失爲主,則非淳古之時也,故云「衰世之 父,故爲亂世。 衰世之意邪」。 乾終上九, 日 言「邪」,示疑,不欲切指也。 易象考其事類,但 稽,考也。 陽出復震,入坤出坤,故 動則)侯果曰: 入坤 稱盛 闡 德,上 坤 幽。 以吉凶得 於,嗟也。 弑 其 開 一稱 君 末 而

初,故「開而當名」。
之,謂從姤之坤,是「章往」也。陽息出之,謂從復成乾,是「察來」也。闡者幽虞翻曰:「神以知來,知以藏往」,微者顯

辯物,正言斷辭則備矣。

經矣。 也。 -寶 曰: 斷 辭, 辯物,類也。 斷 吉 凶 也。 正 如 言, 此 則 言 備 正 於 義

其稱名也小,

小成,故「小」。「復,小而辯於物」者矣。虞翻曰: 謂乾坤與六子,俱名八卦而

其取類也大。

類而長之」,故「大」也。 虞翻曰: 謂乾陽也。爲天,爲父,「觸

其旨遠,其辭文。

虞翻曰:「遠」謂乾,「文」謂坤也。

其言曲而中,其事肆而隱。

未見,故「肆而隱」也。 震爲言,故「其言曲而中」。 坤爲事,隱虞翻曰: 曲,詘, 肆,直也。 陽曲初

因貳以濟民行,以明失得之報。」

爲行。行得則乾報以吉,行失則坤報以虞翻曰:「二」謂乾與坤也。坤爲民,乾

《易》之興也,其於中古乎?

凶

也。

經、繫庖犧於乾五。乾爲古、五在乾中,虞翻曰: 興《易》者謂庖犧也。文王書

上古。後世聖人,庖犧爲中古,則庖犧以前爲後世聖人,庖犧爲中古,則庖犧以前爲故「興於中古」。《繫》以黄帝、堯、舜爲

作《易》者,其有憂患乎?

凶與民同患」,故「有憂患」。 則天八卦,通爲六十四,以德化之,「吉不行禮義,茹毛飲血,衣食不足。 庖犧虞翻曰: 謂憂患百姓,未知利興遠害,

是故履,德之基也;

卦是復道之最,故特言矣。履,禮。蹈禮不倦,德之基也。自下九剛,故「德之基」。坤爲基。○侯果曰:虞翻曰: 乾爲德,履與謙旁通,坤柔履

謙,德之柄也;

謙所以持禮者也。皆陽爻也。○干寶曰: 柄所以持物,虞翻曰: 坤爲柄。柄,本也。凡言德,

復,德之本也;

二九二

虞翻 復初乾之元,故「德之本也」。

虞翻

日

謙與履通,

謙坤柔和,故

履

恒,德之固 也

虞翻曰:「立不易方」,守德之堅固

損 ,德之脩也;

荀爽曰:「徵忿室欲」,所以脩德。

益,德之裕也;

荀爽曰:「見善則遷,有過則改」,德之優

裕也。

困,德之辯也;

鄭玄曰: 辯,别也。 遭困之時,「君子

固窮,小人窮則濫」,德於是别也。

井,德之地也;

姚信曰:「井養而不窮」,德居地也。

巽,德之制也。

虞翻曰: 一德之制 也。 巽風 爲 孔 號令,所以 穎 達曰: 制 此上九 下,故曰

履,和而至; 卦,各以德爲用

> 和而至」。 「禮之用,和爲貴」者也。

謙,尊而光;

荀爽曰:「自上下下,其道大光」也。

復,小而辨於物;

虞翻曰: 陽始見,故「小」。 乾陽物,

坤

陰物,以乾居坤,故稱别物。

恒,雜而不厭;

荀爽曰: 夫婦雖錯居,不厭之道也。

損,先難而後易,

終反成益,得位於初,故「後易」,「易其 虞翻曰: 損初之上,失正。 故「先難」。

心而後語」。

益,長裕而不設;

虞翻曰: 益之道,與時偕行」,故「不設」也。 謂「天施 地生,其益无方。 凡

困,窮而通;

虞翻曰: 陽窮否上,變之坤二成坎。

坎爲通,故「困窮而通」也。

井,居其所而遷,

韓康伯曰:「改邑不改井」,井所居 不移

而能遷其施也。

巽,稱而隱。

崔憬曰: 言巽「申命行事」,是稱揚 也。

陰助德化,是微 隱也。 自此以下,明九

卦德之體者也。

履以和行,

虞翻曰:「禮之用,和爲貴」,謙震爲行,

故「以和行」也。

謙以 制禮,

虞 翻 曰 : 陰 稱禮。 謙 \equiv 以 陽 制 五

陰,萬民服,故「以制禮」也。

復以 自知,

虞 **翻**曰: 「有 不善未嘗不知」,故「自

知也。

恒 以 一德,

> 虞翻 曰:「恒,德之固」,「立不易方」,「從

一而終」,故「一德」者也

損以遠害,

虞翻 曰: 坤爲害, 泰 以 初 止 坤 上,

故

「遠害」。 乾爲遠。

益以興利,

荀爽曰: 天施地生,其益无方」,

興

利」也。

困 以寡怨,

折坤二, 虞翻曰: 故「寡怨」。 坤爲怨,否弒父與君,乾來 坎水性通

怨也。

井以辨義,

虞翻曰: 坤 ·爲義。 以乾别坤,故 辨

義」也。

巽以行權。

九家易》曰 巽 象 號 令,又爲 近利。

人君政教,進退,釋利 而爲權 也。 《春秋

二九三

故不

九四

離

己

一爲

日,入在中宫,其

處

空虚,

故

稱

不 也。 其 用 急行 此 傳 九卦之德,合三復之道 子之禮 失上下。 所 以詳 然其意義 也。 以 説 權 有常,故創易道以輔濟君父者 之 故先陳其德,中言其性,後叙 九 者,反於經然後有善者 也。 卦 廣遠幽微,孔子指撮 者,聖人履 西伯勞謙,殷紂 ,明西伯之於紂, 憂,濟民之所 解此 也

《易》之爲書也不可遠,

侯果曰: 居則觀象,動則玩占,故「不

爲道也婁遷。

可遠」也。

虞翻曰: 遷,徙 也 日月周 流 無

變動 不居,周流六虚, ,故「婁遷」也。

也。 日 日 謂 月周 甲子之旬辰巳虚。 變,易。動,行。 流,終 則 復 始 坎戊爲月, 六虚,六位 流六

昧

利

真,此

外内之戒也。

夷以

上下无常,剛柔相易, 虞翻 稱上,入地爲下,故「上下无常」也。 「六虚」,五甲如次者也。 曰 : 剛柔者,晝夜之象也」。

天

不可爲典要,唯變所適。 果 曰: 虞翻 可爲 所適,非有典要。 曰 : 典要,適乾爲晝,適坤爲夜。 謂六爻剛柔相易,遠近恒 典要,道也。 上下无常,故 唯

侯

不

其出入以度,外内使知懼 虞翻 懼 以 行 出 幺幺 人之度,使物 死,「使知懼」也。(度,故「出入以度」。 藏,外内 隱 曰 : 致 凶,漸 出乾爲外,入坤爲 猶 隱 知外内之戒也。出入 顯。 以 高 遯 顯 出陽知生,入 韓康伯 以 爲美 遠時爲吉,豐 明明

曰:

明

猶

内。

日

行

陰

又 明 於憂患與故,

乎。 藏往」,故知事。 翻 曰:「神以知來」,故明憂患。 故「作《易》者其 (有憂 「知以 患

无有師保,如臨父母

皆如 也。 乾爲 雖 厲 以戒懼爲本,所謂「懼以終始」,歸无咎 母之臨己者也 萬物,无有師保,生成之者。 0 无師保切磋之訓,其心敬戒,常如父 「外」爲丈夫之從王事,則「夕惕若 父母。 父,坤爲母。〇干寶曰: 「内」謂婦人之居室,則 臨 孔子曰「父母之道天地」。 見也。 言陰陽施行 无攸遂也。 萬物出生, 言易道 以 生

初 帥 其辭而揆其方,

脩辭 翻 初 日 帥 立誠。 其 辭 初,始下也。 而揆其方」。 「方」謂坤 也 帥, 以乾 侯果曰: 正 也 通坤,

> 而度其終末之道,盡有典常,非 方,道 也。 言脩易初 虚設也。 首之辭,

既 有典常,苟非其人,道不虚行

道 虞翻 遠,若非其聖人,則不能明其道,故 誠 故「不虚行」也。 之,存乎其人。 也。 不虚而自行,必文王然後能弘也。 曰:「其出入以度」,故有典常。 「其人」謂乾,爲賢人。 不言而信,謂之德 ○崔憬 曰 : 神 言易道深 知易 而明 行

易》之爲書也,

原始要終,以爲質也 干寶曰: 重發《易》者, 别殊旨 也

虞翻 終,謂 始 其 有 崔憬曰: 悔」,是「要終」也。《易》原始潛龍之 事之初,若初九「潛龍勿用」,是「原 也。 曰 : 原始及終,以 又要會其事之末,若上九「亢龍 質,體也。 質,本也。 以 言《易》之書,原 知死生之説 乾 原 始, 以 坤 窮 要

九六

是 也 勿 也 用 要終 諸 桂 亦 亢 然,若 龍之有 大畜 悔,復 圃 相 後 明 通 以 之 爲 類 體

爻相 雜 唯 其 時 物 也

時陰則 爻也。 爲 好 以 有八 陰 或若以甲壬名乾,以乙癸名坤也。 午位名 物。 物 衰 翻 卦之氣,若初九 曰 陰,故 刑 或若見辰戌言艮,巳亥言兑也。 : 〇干 來 离 陰陽 爲惡 ,以子位名坎。 寶曰: 「唯其 錯 物,王 居 時 爲震爻,九二爲坎 稱 物 一卦六爻,則皆雜 ___ 雜 相 爲 或若德來爲 乾陽 時 興, 陽則陽, 物 或若 休 廢 坤

不備。

其 初難 侯果 知 曰 : 知,其上易知,本末也 上則事彰 本末,初 7,故 上也。 易知 初 則 事

初 干 辭擬之,卒成之終。 寶曰 初 擬議之,故 難 知。 卒 終

噫 1

亦

要存亡吉凶

則

居可知矣。

若夫 移,是事之卒成之終,極凶 曰 : 成之, 九,猶可擬議 「卒成之終」。 在卒成, 雜物 失在 故「易知」。 撰德,辨是與非, 事之終極,非 初 而之善。 微 假 猶 如 乾 可 末 至上九則 之九 擬 勢 擬 然 議 議 不變 則 三,噬 而 也 所 非其 之福 也 及, X 中 災 嗑 故 侯 爻 初 禍 果 日

非 故非其中則爻辭不備。「道有變動 謂陽,「 虞翻曰: 合所主之事,撰 二爻,次又以 正,故「雜物」。 備在 爻」也。 四、上非 非 卦 撰德」 中 謂陰 正 明其 四 崔 · 交也。 「因而重之,爻在其中」, 集 憬 謂 也。 坤六爻,初、三、五非 四爻也。言中 所 曰 : 乾。 陳 中, 之德, 辨,别 上既具論 正。 能 也。「是 乾六爻 四 其是 爻 初 故故

雜 1 其 獨主 知矣。 唯其 乾 四爻矣。下論二、四、三、五 口 與非,要亡與凶 之撰德與是,要存與吉則可矣。若主物 撰德,是非存亡吉凶之事乎? 必不然矣。 爻亦能要定卦中存亡吉凶之事 虞 二五之爻,居中无偏,能統一卦之義事, 吉 也。 功位者也 翻 則存, 於物,豈可以二五之爻而兼其 時物」、言雖錯雜、而各獨 \exists ○崔憬 且上論 孔《疏》扶王弼義,以此「中爻」爲 何則? 謂 居 E E 知 坤 初 則非其所象,故知 存 上二爻,則此 X 知亡,要終者 則 上文云「六爻相雜, 噫,歎聲也。 亡,故曰 一,則是 「中」總言 居 會於時, ,居然可 且 二 五 言中 也 重述 其不 雜 可 物 四 知

之義 韓 康 觀其彖辭,則思過半矣 伯 ,約以存博,簡以兼衆,雜物 曰 夫彖舉立象之統, 撰 論 德 中 而 爻

> 可以 也。 所歸 理 彌 以 觀道。 約 貫之者也。 者 則 之爲用,同乎道矣。 轉近乎道 過乎半之益,不亦宜乎 其 事 形之所宗者,道。 彌 繁則愈滯乎有,其 形而上者 衆之

與四同 之位,佐於天子。 此 韓 夫位,佐於一國。 重釋中四爻功 康 伯 功 同 陰 位 皆同有助理之功也。

所

宜

也。

二主

士士大

功

也。

崔

曰

異也。 韓 士大夫位 康伯曰: 卑, 有外 四 内 孤 也。 公牧位尊 崔 憬 故有 曰

而

異位

其善不同。 二多譽,四 四 韓 康 近於君,故「多懼」也 伯 曰 : 二處 中和, 多懼,近 故「多譽」也。 也

柔之爲道,不利遠者。

四主三孤、三公、牧伯

二九八

崔 近 憬 比承陽、故「不利遠」矣。 曰 此言二四皆陰位,陰之爲道

要无咎,其用柔中也。

四 要或有 崔憬曰: 也。 无 咎者。 言二是陰遠 以二柔居 陽,雖 則 中,異於 不利,其

與五同功而異位,

三,諸侯之位。五,天子之位。 韓 人之功,而君臣之位異者也 康 伯 티: 有貴賤 也。 崔 同 憬 有 日 理

三多凶,五多功,貴賤之等也

故 若无「含章」之美,則必致凶。 爲一國之君,有威權之重而上承天子, 崔憬曰: 不偏,貴乘天位,以道濟物,廣被寰中, 「多功」也。 三處下卦之極,居上卦之下。 五既居中

其柔危,其剛勝邪?

侯果曰: 三、五,陽位。 陰柔處之則多

> 也 剛居而 凶者,失其應也

《易》之爲書也,廣大悉備

不定之辭

也。

或有柔居而吉者

X

危,

剛正居之則勝其

任。

言「邪」者

荀爽曰: 謂之大。「易與天地準」,固「悉備」也。 以陰易陽謂之廣,以陽易陰

有天道焉,有人道焉,有地道焉

之道也 兼三才而兩之,故六。六者,非它也,三才 崔憬 不被,大无不包,悉備有萬物之象者也 **三** 言《易》之爲書明三才,廣无

崔憬曰: 而 兩爻爲一才,六爻爲三才,則是「兼三才 兩之,故六」。六者即三才之道也 言重卦六爻,亦兼 天 地 人道。

道 有變動,故曰爻。

陸 善惡之變。 有剛柔燥濕之變,人道有行止動 績 E : 天道有晝夜日月之變,地 聖人設爻以效三者之變動,

故謂之爻者也

爻有等,故曰物。

形萬 《象》「頤中有物曰噬嗑」,是其義也。 集。五星四氣,六親九族,福德刑殺,衆 干寶曰: 等,羣也。 .類,皆來發於爻,故總謂之物也。 爻中之義,羣物交

物相雜,故曰文。

乾,更相 坤之時,未有文章。 虞翻曰: 雜成六十四爻乃有文章,故曰 乾,陽物。 陽物人坤,陰物人 坤、陰物。 純乾純

文不當,故吉凶生焉。

利貞」而穆姜以 考其事,令與爻義相 敗,是所謂「文不當」也。 雖有吉凶 君子吉,小人否」。於占則王相之氣君 ,則非今日之吉凶也,故「元亨 其辭 死,「黄裳元吉」南蒯以 爲 文也。 稱 也。 動作云 故於經 事不稱義, 則有

> 子以遷官,小人以遇罪 也。

邪? 當文王與紂之事邪? 易》之興也 , 其 當殷之末世, 周 之盛 德

虞翻 俗以文王爲中古,失之遠矣。 末世,乾上; 死,故「殷之末世」也。 而馬、荀、鄭君從 存而不知亡「知得而不知喪」,終以焚 至德矣,故「周之盛德」。紂窮否上,知 天下而有其二,以服事殷,周德其可謂 曰 : 謂文王書《易》六爻之辭 盛德,乾三也。文王三分

是故其辭危,

虞翻曰:「危」謂乾三。「夕惕若厲」,故 「辭危」也。

危者使平,

《否》卦九五「其亡其亡,繫於包桑」之屬 業,故《易》爻辭「危者使平」,以象其事。 於《易》辭多趨危亡。本自免濟,建成王 陸績曰: 文王 在紂世有危亡之患,故

是也。

易者使傾。

入于地」之屬是也。以象其事。《明夷》上六「初登于天,後平易而反傾覆,故《易》爻辭「易者使傾」陸績曰: 易,平易也。紂安其位,自謂

其道甚大,百物不廢,

五十」同義。物,故有「百物」。略其奇八,與「大衍之物,故有「百物」。略其奇八,與「大衍之虞翻曰:「大」謂乾道。乾三爻,三十六

福謙,故「易之道」者也。「无咎」。「危者使平,易者使傾」,惡盈虞翻曰: 乾稱易道。「終日乾乾」,故懼以終始,其要无咎,此之謂易之道也。

能悦諸心,

故「能説諸心」。 虞翻曰: 乾五之坤,坎爲心,兑爲説

能研諸侯之慮,

震爲諸侯,故「能研諸侯之慮」。 虞翻曰: 坎爲心慮。乾初之坤爲震,

定天下之吉凶,成天下之娓娓者。 逆 則八卦象具。「八卦定吉凶」,故能「定 虞翻曰: 者,陰陽之微,可 者,謂莫善蓍 天下之吉凶」。 時者敗也。 月生震 謂乾二五之坤成离 龜 初,故「成天下之娓娓」 娓娓,進也。 也。 成可 敗也。)荀爽 离爲龜,乾 順時者成 日 坎月, 娓娓

是故變化云爲,吉事有詳。

復 也。 初乾元者也。 陽出,「變化云爲,吉事爲詳」,謂 曰 詳,幾詳 也,「吉之先見者

事知器,占事知來。

適。 爲,求吉則未形 坤成象,故「象事知器」也。 「占事」 虞 知來。 翻 爲善 曰:「象事」 ○侯果日: 乾五 則吉事 動 可覩者 謂 成 必 坤。 离 易之云爲,唯變所 應,觀象則 也。 則翫其占,故「 坤爲器,乾 用 謂乾 五. 知 之 可

天地設位,聖人成能

言 乾爲聖人。 7,所以 翻 鬼謀,百姓與能。 易擬天地,設乾 侯之慮」,故「成能」也。 曰 : 成聖人伏羲文王之能事者也。 天尊五,地卑二,故「設 「成能 坤二位,以 謂 「能説諸 ○崔 明重卦之 憬 能 位 研

> 謀,百姓與能」。 坤,坎爲謀,乾爲 虞 庶民,故曰 謀及卿士。 翻 曰 : 「百姓與能」也。 乾爲 鬼謀、謀及卜筮也。 人,坤 百 朱仰之曰: 坤 爲鬼。 爲 姓、故「人謀鬼 乾二五 又謀及 之

卦以象告,

虞翻 卦象成。兑口震言,故「以象告」也。 曰: 在天成象,乾二五之坤則

爻彖以情言,

言。 辭》, 崔憬曰: 彖」謂 萬 物 而 桂 而 假爻彖以言,故曰「爻彖以情 下辭,皆是聖人之情見乎《繫 告於人 伏羲始畫 也。 八卦,因 「爻」謂爻下辭, 而 重 一之,以

剛柔雜居而吉凶可見矣。

虞 坎有震艮,八卦體備,故「吉凶可見」也。 离,故「剛 翻 柔雜居」。 乾二之坤成坎,坤五之乾成 艮爲居,离有巽兑,

三 〇 二

M 而 物 崔 可見也 雜 憬 居, 曰 得 理 言文王以六爻剛柔 則吉, 失理 一則凶, 故「吉 相 推

變動以利言,

翻 曰 : 乾變之坤成震, 震 爲言, 故

變動以利言」也。

吉凶以情遷。

虞翻 티 : 乾吉坤凶、「六爻發揮,旁通

情也」,故「以情遷」。

是以愛惡相攻而吉凶生,

虞 翻曰: 攻,摩也。乾爲愛,坤爲惡

謂 「剛柔相摩」。 以愛攻惡生吉,以惡攻

愛生凶,故「吉凶生」也。

遠 近相取而悔吝生,

虞 翻 曰 遠陽謂乾,近陰謂 坤。 陽 取

陰生悔,陰取陽生吝。 悔吝言小 疵

不 比。 憬 或取遠 遠」 謂應與不應,「近」謂 應 而 舍近比,或取 近 比 比 與 而

> 情 僞相感而利害生。

《繋辭》矣。

舍遠應,由

此遠

近 相

取

所

以生悔吝於

虞翻 日 情陽僞陰也。 情感 僞 生利

凡易之情,近而不相得則凶

僞感情生害。

乾爲

利,坤

韓 康 伯 曰 : 近況比爻也。 易之 情,剛

必有乖違之患也。 柔相摩,變動相逼者也。 或有 相 近 違 丽 而 无 不 患者, 相

事以考之,義可見矣。

得其應也。

相須而偕

凶,乖於時也。

或害之,悔且吝。

虞翻曰: 坤爲害。 以 陰 居陽, 以 陽 居

將叛者,其辭慚。

陰,爲「悔且吝」也。

荀爽曰: 謂屯六三「往吝」之屬也。

故 翻 叛。 坎爲隱伏,將叛,坎爲心,故「 坎人之辭也。近而 不相 慚

也。〇侯果曰: 凡心不相得,將懷叛

逆者,辭必慚恧。

中心疑者,其辭枝。

虞翻曰: 离人之辭也。火性枝分,故荀爽曰:「或從王事,无成」之屬也。○

枝疑也。○侯果曰: 中心疑貳,則失

得无從,故枝分不一也。

吉人之辭寡,

虞翻曰: 艮人之辭也。

躁人之辭多。

荀爽曰: 謂睽上九之屬也。○虞翻

虩,「笑言啞啞」,故「多辭」。○侯果曰: 震人之辭也。震爲決躁,恐懼虩

曰: 躁人煩急,故「辭多」。

誣善之人,其辭游。

荀爽曰:游豫之屬也。○虞翻曰:

兑人之辭也。 兑爲口舌,誣乾,乾爲善

人也。〇崔憬曰: 妄稱有善,故自叙

其美,而辭必浮游不實。

失其守者,其辭詘

矣。 既 也。 六子。此《易》之大義者也 止,兑見巽伏。 辭詘」。此六子也。 詘,陽在初守巽。 故「其辭詘」也。 荀爽曰: 濟未濟。 ○侯果曰: 虞翻 謂泰上六「城復于隍」之屬 上《繫》終乾 曰 : 上經終坎离,則下經終 爻有此象,故占辭亦從 初陽人伏陰下,故「其 失守則沮辱 离上坎下,震起 人之辭也。 坤 則下《繫》終 而不信, 良

易傳卷第十六

三〇四

易傳卷第十七

唐資州李鼎祚集解

周易説卦

昔者聖人之作《易》也,

謂文王也。「始作八卦」,今言作《易》,明是伏羲,非案下《繫》云「古者庖犧氏之王天下」,案下《繫》云「古者庖犧氏之王天下」,和領達曰: 據今而稱上代謂之「昔

幽贊於神明而生蓍,

蓍者,策也。謂陽爻之策,三十有六,天,明者在地。神以夜光,明以晝照。荀爽曰: 幽,隱也。贊,見也。神者在

靈者,始爲天下生用蓍之法者也。 得自然之神物,能通天地之精而管御 用明於昧冥之中,以求萬物之性 幽,昧,人所未見也。 生蓍者,謂蓍從爻中生也。 陰爻之策,二十有 千五百二十。 上配列宿 四 贊,求也。 一篇之策 ,下副物數。 〇干寶曰: 爾。 言伏義 萬有 乃 百

參天兩地而倚數,

數。 虞翻 以 配 從二起,以地兩配兑而立二數,以地十 而立 立五 於天數五 象爲三才,以地兩之,立六畫之數,故 倚數」也。 离 地六配坤而立六數。 九數。 起天三配艮而立三數,天五 而 數,天七配震而立七數,天九配乾 曰 : 立十數,以 地數五 倚,立; 此從三順配陽四 〇崔憬曰: 中,以八卦配天地之 地八 參,三也。 配巽而立八數, 從此兩逆配陰 參,三也。 ... 謂分天 立配坎 也。 謂 地 而

總 虚 几 挂 五. 而 + 不 也。 用。 而爲大衍 其 天 此聖人取八卦 一地 四四 一之數 配天 無 此 桂 説 地之數, 可 不 配,故 盡,

已釋在「大衍」章中,詳之明矣。

觀變於陰陽而立卦,

君二民,陰二君一民」,不道乾坤者也。 爻。三變三六十八,則有十八變 震、坎、艮,陰變成巽、离、兑,故立 乾 虞 卦、「八卦而小成」是 坤剛柔,立本者。卦謂六爻。 翻 曰 : 謂「立天之道, 也。《繫》曰「陽 日 陰 陽 與 十十六 丽 變成 陽」。 成

發揮於剛柔而生爻,

爻,以三爲六也。「因而重之,爻在其發,動。揮,變。變剛生柔爻,變柔生剛虞翻曰:謂「立地之道,曰柔與剛」。

和順於道德而理於義,

中」,故「生爻」。

虞翻曰: 謂「立人之道,曰仁與義」。

「和順」謂坤,「道德」謂乾。以乾通坤

謂之理義也。

窮理盡性以至於命。

變乾謂之「盡性」。性盡理窮,故「至於虞翻曰: 以乾推坤謂之「窮理」,以坤

命」。巽爲命也。

昔者聖人之作《易》也,

虞翻曰: 重言「昔者」,明謂庖犧

也

將以順性命之理,

是以立天之道,曰陰與陽, 立地之道,以陽順性,以陰順命。

曰

之義,故先明天道,既立陰陽,地道又立崔憬曰: 此明一卦立爻,有三才二體柔與剛, 立人之道,曰仁與義。

剛柔,人道亦立仁義,以明之也。何

亦有剛德。故《書》曰「沈潛剛克,高明

則 ?

在天雖剛,亦有柔

德。

在地雖柔,

柔 克」。 人禀天地, 豈 可不兼仁義乎?

所以易道兼之矣。

兼三才而兩之,故易六畫 而成卦。

虞翻 日 謂「參天兩 地」,乾坤各三爻

而成六畫之數也。

分陰分陽,迭用柔剛,

虞翻 曰 : 迭,遞也。 分陰爲柔以象夜,

分陽爲剛以象畫。 「剛柔者, 晝夜之

象」,晝夜更用,故「迭用柔剛」矣。

故易六畫 而成章。

虞翻曰:「章」謂文理。 乾三 畫成天文,

坤三畫成地理。

天地定位

虞 翻 티 : 謂 乾 坤五貴二賤,故「定

位也。

Ш 澤通氣,

謂艮兑 同 氣 相 成,故 通氣」。

雷風 相 薄

謂震巽「同聲相應」,故「相薄」。

水火不相射,

謂坎 离。射,厭 也。 水火 相通,坎戊离

八卦相錯。

己,月三十日一會於壬,故「不相射」也。

錯,摩。 則「 剛柔相摩,八卦相蕩」也

數往者順,

謂坤消從午至亥,上下,故「順」也。

知來者逆,

謂乾息從子至巳,下上,故「逆」也。

是故易逆數也。

易謂乾、故「逆數」。 此上虞義。

雷以 、動之,

荀爽曰: 謂 建 卯之月, 震卦用事,天地

和合,萬物萌 動 也

風以散之,

雨 以 謂建巳之月,萬物上達,布散田野。 潤之,

卦之功用

也。

四舉象,下四舉

謂 建子之月,含育萌牙也。

日 以 烜之,休遠反。

謂建午之月,太陽欲長者也。

艮以 企上之,

謂 建丑之月,消息畢止 也。

兑以 説之,

謂 建酉之月,萬物成孰也。

乾以君之,

謂建亥之月, 乾坤合居,君臣位得 也。

此上荀義。

坤以藏之。

《九家易》曰: 説 以義言之。 不常,而日月相推,迭有來往 任其才,往生物也。 包藏萬物也。 名矣。 〇孔穎 天地 乾坤交索,既生六子,各 謂建申之月,坤在乾下, 達曰: 山 澤,恒在者也, 又雷與 此又重明 風 ,是以四卦 雨 故直 八八物 變化

> 巽同用,乾坤與天地同功 者,王肅以爲互相 備 也,則 也。 明 雷 風 與 震

帝 出乎震,

崔憬曰: 帝者,天之王 氣 也。 至 春分

則震王 而 萬物出生。

齊乎巽,

立夏則巽王而萬物絜齊。

相見乎离,

夏至則离王而「萬物皆相見」也。

致役乎坤,

立秋則坤 王

而萬物致養也

説言乎兑, 秋分則兑王而萬 物所説。

戰乎乾,

立冬則乾王 一 陰陽相茲 薄」。

勞乎坎,

冬至則坎 王 而 「萬物之所歸 也

成言乎艮。

三〇八

義》也。 以其周王天下,故謂之帝。此崔《新立春則艮王而「萬物之所成終成始」也。

萬物「出乎震」,震,東方也。

虞翻曰: 出,生也。震初不見東,故不

稱東方卦也。

絜齊也。「齊乎巽」,巽,東南也。齊也者,言萬物之

與震同義。巽陽藏室,故「絜齊」。巽陽隱初,又不見東南,亦不稱東南卦,

离爲日,爲火,故「明」。日出照物,以日离也者,明也,萬物皆相見,南方之卦也。

相見。离象三爻皆正日中,正南方之

卦也。

聖人 此 也 南 面 而 聽 天 下, 嚮 明 而 治, 蓋 取 諸

坤,坎爲耳,离爲明,故「以聽天下,向明离,南方,故「南面」。乾爲治,乾五之

而治」也。

乎坤」。 坤也者,地也,萬物皆致養焉,故曰「致

役

坤陰無陽,故道廣布。不主一方,「含弘

兑,正秋也,萬物之所説也,故曰「説光大」,養成萬物。

言

平

兑,言從口出,故「説言」也。 爲雨澤,故説萬物。震爲言,震二動成見西,故不言西方之卦。與坤同義。兑兑三失位,不正,故言「正秋」。兑象不

薄也。 「戰乎乾」,乾,西北之卦也,言陰陽相

入坤,故「陰陽相薄」也。北之卦」。薄,入也。坤十月卦,乾消剥乾剛,正五月十五日,晨象西北,故「西

之所歸也,故曰「勞乎坎」。 坎者,水也,正北方之卦也,勞卦也,萬物

歸,藏 長,勞局衆陰之中也。 於坎,又陽氣伏於子,潛藏地中,未能浸 坎是正北方之卦,立冬已後,萬 之卦」,與兑「正秋」同義。 「正北方」。此上虞義。○崔憬曰: 也。坎二失位不正,故言 坎月夜中 正 物歸 北 藏 以 故 方

也,故曰「成言乎艮」。 艮,東北之卦也,萬物之所成終而 所 成始

虞翻曰: 之間,故「萬物之所成終而 成始,乾甲成終。 艮三得正,故 坤癸艮東北,是甲癸 復 成始」者也。 稱 卦。 萬物

神也者,妙萬物而爲言者也

能 火 物,妙萬物 動,變化推移,莫有使之然者。 韓康伯曰: (炎水潤,莫不自然相 萬物既成。 而 爲言也。 於此言「神」者,明 明則雷 與 而 爲變化,故 疾風行, 神則 卦 无 運

動 萬 物者,莫疾乎雷

> 崔 生,蟄蟲發起,所 慢日: 謂 春分之時,雷動則 動 萬物莫急於此也 草木 滋

燒萬物者,莫疾乎風

言風能鼓燒萬物,春則發散草木枝 秋則摧殘草木枝條,莫急於風者也

燥萬物者,莫熯乎火。

言火能乾燥萬物,不至 中,莫過乎火。 熯 亦 燥 也。 潤 濕 於陽 物 之

説萬物者,莫説乎澤。

言光説萬物,莫過以澤而成説之也。

潤萬物者,莫潤乎水

言滋潤萬物,莫過以水而潤之。

終萬物始萬物者,莫盛乎艮。 之神用而不言乾坤者,以乾坤 則叶夏正之義,莫盛於艮也。 始 言大寒立春之際,艮之方位,萬物 一、无爲 而爲今歲首,以之終而爲去歲末 而无不爲,能成雷 風 此言六卦 等有爲之 而發天 以之 此

Ξ Ο

取 於 橈 神 Ш 燥潤功,是雷風水火,至於終始萬物, 便而論也。 妙 義則不然,故言卦而餘皆 也 艮不言山,獨舉卦名者 此崔《新義》也。 稱物、各 以 動

故 水火相建,

成物之功。 孔 水火相逮者,既不相入,又不 穎 達 日: 明性雖不相入而氣相逮及。 上章言水火不 ·相及 相 ()則无 此 言

雷風不相悖,

傷害,亦无成物之功。 悖者,二象俱動,若相 孔穎達曰: 逆者也。 上言雷 風 薄而相悖逆,則相 明雖相 相薄,此言 薄 而 不 不 相 相

山 澤通氣,

崔憬曰: 言山 澤 雖 相 縣 遠 而 氣 交通

然後能變化,既成 萬物 也。

虞翻 各 正 曰: 性 命」, 謂 乾 成 變 既 而 濟 坤 定, 化。 故「 「乾道 既 變化, 成萬

物」矣。

乾,健也。

虞翻 曰: 精 剛 自 勝, 動 行不休,故「健

也。

坤,順也。

純柔,「承天時行」,故

「順

震,動也。

陽出動行。

巽,人也。

乾初人陰。

坎,陷也。 陽陷陰中。

离,麗也。

日麗乾剛。

艮,止也。

兑,説也。 陽位在上,故「止」。

震爲大笑, 陽息震成兑,震言 出 П

故

「説」。 此上虞義也。

乾爲馬。

孔穎達曰: 乾象「天行健」,故爲「馬」。

坤爲牛。

坤象地,任重而順,故爲「牛」。

震爲龍。

巽爲雞。

《九家易》曰:

應八風

也。

應

節

震象龍動, 故爲「龍」。此上孔《正義》。

也。 日剖而成雛。 變,變不失時。 二九十八,主風精,爲雞,故雞 二九順陽歷,故雞知時 雞時至而鳴,與 風 風 相應 十八 而 而

坎爲豕。

鳴也。

《九家易》曰: 四,主時精,爲豕。坎豕懷胎四月而生, 污辱卑下也。 六九五十

离爲雉。

宣時理節,是其義也。

艮爲狗。

孔穎達曰:

离爲文明,雉有文章,故

「离爲雉」。

艮

斗運行四市,犬亦夜繞室也。火之精畏 之則解也。 水,不敢飲,但舌舐水耳。犬鬬以水灌 犬十三日而開目。斗詘,故犬卧詘也。 《九家易》曰: 懷胎三月而生,斗運行十三時日出,故 三,七九六十三,三主斗,斗爲犬,故犬 犬近奎星,故犬淫當路不避 艮止,主守禦也。

兑爲羊。

人者也。

孔穎達曰: 兑爲説,羊者順從之畜,故

爲「羊」。

乾爲首。 乾尊而在上,故爲「首」。

坤爲腹。

坤能包藏含容,故爲「腹」也。

≡

震爲足。

震動用,故爲「足」。

巽爲股。

巽爲順,股順隨於足,故「巽爲股」。

坎爲耳。

坎北方主聽,故爲「耳」。

离爲目。

离南方主視,故爲「目」。

艮爲手。

艮爲止,手亦止,持於物使不動,故「艮

爲手」。

兑爲口。

兑爲説,口所以説言,故「兑爲口」。此

上孔《正義》。

乾,天也,故稱乎父, 坤,地也,故稱

乎母。

坤稱地母。 崔憬曰: 欲明六子,故先説乾稱天父,

之中男; 震 得女,故謂之少女。 艮三索而得男,故謂之少男, 得女,故謂之長女。 索而得男, 离再索而 故謂之長 坎再索 得女,故謂之中女。 男; 而 得男,故謂 兑三索而 巽 索 而

者也。 男_; 氣爲兑,故曰「少女」。 此言所以生六子 得坤氣爲离,故曰「中女」; 乾初得坤氣爲巽,故曰「長女」; 母,而求其子也。 孔穎達曰: 索,求也。 「長男」; 氣者爲女。 坤三得乾氣爲艮,故曰「少男」。 坤初求得乾氣爲震, 坤二得乾氣爲坎,故曰 得父氣者爲 以求 乾 乾三得坤 男, 坤 故曰 得母 乾二 爲 中 父

乾爲天,

宋衷曰: 乾動作不解,天亦轉運

爲圜

宋衷曰: 動作轉運,非圜不能,故「爲

虞翻曰: 乾善,故「良」也。

爲老馬,

圜。

虞翻曰: 貴而嚴也。

虞翻曰: 成三男,其取類大,故「爲

父」也。

爲玉,爲金, 崔憬曰:

天體清明 而剛,故「爲玉爲

金。

爲寒,爲冰,

孔穎達曰: 取其西北冰寒之地。

「爲寒爲冰」也。 憬曰: 乾主立冬已後,冬至已前,故

爲大赤,

虞翻曰: 太陽 爲赤,月望出 人時 也。

○崔憬曰: 乾,四月純陽之卦,故取盛

陽色「爲大赤」。

爲良馬

爲瘠馬,

當復消,故爲「老馬」也。

《九家易》曰:

言氣衰也。

息至已,必

崔憬曰: 骨爲陽,肉爲陰。

乾純陽爻

骨多,故爲「瘠馬」也。

爲駮馬,

宋衷曰:

天有五行之色, 故爲「

馬」也。

爲木果。

宋衷曰: 羣星著天,似果實著木,故

「爲木果」。

坤爲地,

爲母,

虞翻曰: 柔道静。

虞翻曰:

爲布, 成三女,能致養,故「爲母」。

駮

<u>=</u> 四

崔 憬 日 徧 布 萬 物於致養,故坤「爲

爲釜,

孔穎達 曰 : 取 其化 生成熟,故「爲

釜」也。

孔穎達曰: 取地生物而不轉移,故爲

「吝嗇」也。

爲均,

崔憬曰: 取 地 生萬物, 不擇善惡, 故

「爲均」也。

爲子母牛,

《九家易》曰: 土能生育,牛亦含養,故

「爲子母牛」也。

孔穎達曰: 取其能載,故「爲大轝」也。

《九家易》曰: 萬物相雜,故「爲文」也。

爲衆,

虞翻曰: 物三稱羣, 陰爲民。 三陰相

隨,故「爲衆」也。

爲柄,

崔憬曰: 萬物依之爲本,故「爲柄」。

其於地也爲黑。

崔憬曰: 坤十月卦,極陰之色,故「其

於色也爲黑」矣。

震爲雷,

虞翻曰: 太陽 火得 水有 聲,

雷」也。

爲駹,

駹,蒼色。震,東方,故「爲駹」。 舊讀作

「龍」,上已「爲龍」,非也。

爲玄黄,

天玄地黄。震,天地之雜,物故「爲玄

爲專,

故

爲

陽在初,隱静,未出 觸坤,故「專」,則「乾

静也尃」。 延叔堅説以 「專」爲「旉」,大

布,非也。此上虞義也。

爲大塗,

崔憬曰: 萬物所出在春,故「爲大塗」,

取其通生性也。

爲長子,

虞翻曰:「乾一索」,故「爲長子」。

爲決躁,

崔憬曰: 取 其剛在下動,故「爲決

躁」也。

爲蒼筤竹,

《九家易》曰: 蒼筤,青也。 震陽 在 下,

根長堅剛,陰爻在中,使外蒼筤也。

爲萑葦。

《九家易》曰: 在葦, 蒹葭 也。 根莖叢

生,蔓衍相連,有似雷行也。

其於馬也,爲善鳴,

虞翻 日: 爲雷,故「善鳴」也。

爲馵足,爲作足,

馬白後左足爲馵,震爲左,爲足,爲作。

初陽白,故「爲作足」。

爲的顙。

白,故「的顙」。《詩》云「有馬白顛」是 的,白, 也。此上虞義也。 顙,額也。 震體 頭,在 П

其於稼也,爲反生。

宋衷曰: 陰在上,陽在下,故「爲反

其究爲健,爲蕃鮮。

生。

。謂枲豆之類,戴甲而生。

虞翻曰: 震巽相薄,變而 至三, 則 下象

巽究爲躁卦,躁卦 究與四成乾,故「其究爲健,爲 「則震。 震 雷 巽 蕃鮮」。 風 無

巽爲木,

形,故卦特變耳。

宋衷曰: 陽動陰静,二陽動於上,一陰

三六

安静於下,有似於木也。

爲風,

故「爲風」。亦取静於本而動於末也。陸績曰: 風,土氣也。巽,坤之所生,

爲長女,

荀爽曰: 柔在初。

爲繩直,

僻,如繩之直。○孔穎達曰: 取其號翟玄曰: 上二陽共正一陰,使不得邪

令,齊物如繩直也。

爲工

曰: 爲「近利市三倍」,故「爲工」。子荀爽曰: 以繩木,故「爲工」。○虞翻

爲白,

夏

曰「工居肆」。

達曰: 取其風吹去塵,故絜白也。 《孔穎

爲長,

崔憬曰: 取風行之遠,故「爲長」。

爲高

穎達曰: 取木生而高上。○孔虞翻曰: 乾陽在上,長,故「高」。○孔

爲進退,

虞翻曰: 陽初,退,故「進退」。○荀爽

爲不果,

曰 :

風行无常,故「進退」。

荀爽曰: 風行或東或西,故「不果」。

爲臭。

艮鼻,故「爲臭」。《繫》曰「其臭如蘭」。虞翻曰: 臭,氣也。風至知氣,巽二入

其於人也,爲宣髮,

「宣」爲「寡」髮,非也。 虞翻曰: 爲白,故「宜髮」。 馬君以

爲廣顙,

上,故「爲廣顙」。與震「的顙」同義。震變至三,坤爲廣,四動成乾爲顙,在頭口

陽, 故「 的 顙」。 巽變乾二陽,故「廣

爲溝瀆

顙 0

爲多白眼。

爲白。 离 目 上 向 則 白 眼 見, 故「多白

眼。

爲近利市三倍。

變至三成坤,坤爲近。 四 動乾,乾爲利。

至五成噬 嗑,故稱「市」。 乾三爻爲三

倍,故「爲近利市三倍」。 八卦諸爻,唯震 動上成震,故 巽

變耳。 其究爲躁 卦。

其究爲躁卦。

變至五成噬 嗑 爲 市 0 動 上 成震,故「其

究爲躁卦」。 明 震 内 體 爲 專 ,外體爲躁。

此上虞義。

坎爲水,

宋衷曰: 坎 陽 在 中, 内 光 明, 有

似

於水。

虞翻 曰: 以 陽 闢 坤

, 水

性 流

通,

故

溝瀆」也。

爲隱伏,

虞翻曰: 陽藏 坤中,故「爲隱伏」也

爲矯揉,

揉。 宋衷曰: 水流 有曲直,故「爲矯揉」。 曲者更直爲矯,直者

更

曲 爲

爲弓輪。

月,月在於庚爲弓,在 虞翻曰: 可矯揉,故「爲弓輪」。 甲象 輪,故「弓

輪」也。

其於人也,爲加憂,

兩陰失心爲多告,故「加憂」。

爲心病,

坎二折坤爲心病。 爲勞而 加憂,故「心病」。 亦以 此上虞義 也。 坎爲心。

爲耳 痛

三上

坎爲

八

孔 穎 達 日 : 坎, 勞卦 也, 又主聽。 聽 勞

則 耳痛

血 卦,爲赤。

孔 血色也。 穎達曰: 八之有 十一月,一陽爻生,在 血猶 地 有水。 赤,

坎,陽氣初生於黄泉,其色赤也。

其於馬也,爲美脊,

宋衷曰: 陽在中央,馬脊之象也。

爲

亟心,

心也。

崔 一憬 曰: 取 其 内 陽 剛 動, 故 爲

吸

爲下首,

荀爽曰: 水之流,首卑下也。

爲薄蹄,

下, 《九家易》曰: 趨下 則流 散, 薄 流散 蹄 者,在下。 則薄,故「爲 水 又 薄 趨

爲曳。

蹄」

也。

宋衷曰 : 水摩 地 圃 行,故「曳」。

其於輿也,爲多眚

體,故爲車多眚也。 虞翻曰: 告,敗也。 坤爲大車, 坎折

坤

爲通。

水流瀆,故「通」也

爲月, 坤爲夜。 以坎陽光坤,故「爲月」也。

水行潛竊,故「爲盜」也。

爲盜

其於木也,爲堅多心 陽 此上虞義也。 剛 在 中,故「堅多心」。 ○孔穎達曰: 棘, 乾震坎皆 棗 屬也。

馬爲 以 离文明而柔順,兑柔説,皆无健,故不以 可以馬爲 (馬喻。 ,不取其健,故曰「牝」也。 喻 也。 喻 乾至健,震至動,坎至行,故皆 唯《坤》卦「利牝 坤則順,艮則止,巽亦順, 馬」,取其 其

坎亦

取

行,不取其健,皆外柔,故爲下首、薄蹄

曳 也。

离爲火,

崔憬曰: 取卦陽在外,象火之外照也。

爲日

荀爽曰: 陽外光也。

爲電

鄭玄曰: 取 火明 也 久 明 似 日, 暫 明

似電也。

爲中女,

荀爽曰: 柔在 中 也。

爲甲胄,

虞翻 曰 : 外剛,故「爲 甲」。 乾爲首 巽

繩 貫 甲而 在首上,故「爲胄」。 胄, 兜

鍪也。

爲戈兵。

乾爲金,离火斷 乾, 燥 而鍊之,故「爲戈

兵」也。

其於人也,爲大腹。

象日常滿,如妊身婦, 故「爲 大腹

乾

爲大也。

爲乾卦,

火日熯燥物,故「爲乾卦」也。

爲鼈,爲蟹,爲羸,爲蚌,爲龜。

此五者皆取外剛内柔也。

其於木也,爲折上稟。今本「折」爲「科」。

巽木在离中,體大過死。巽蟲食心

也。 **蠧蟲食口木,故「上稟」。** 或以 高火 則折

曰: 燒巽,故「折上稟」。 陰在内則空中,木中空則上科 此上虞義。 〇宋衷

桑也。

艮爲山,

象也。 土,陽爲木。 宋衷曰: 二陰 土積於下,木生其上,山之 在 下, 陽 在上。 陰爲

爲徑路,

t

虞翻 日 艮爲 山中徑路。 震陽 在 初則

爲大塗,艮陽小,故「爲徑路 也也

爲小石,

陸績曰: 艮, 剛卦之小,故「爲小石」

者也。

爲門闕,

虞翻 曰 : 乾爲 門,艮陽在門外, 故「爲

門闕」。 兩 小山, 闕之象也。

爲果蓏,

宋衷曰: 木實謂之果,草實謂之蓏,桃

李瓜瓞之屬皆出山谷也。

爲閻寺,

宋衷曰: 閽 人主門,寺人主巷。 艮爲

止,此職皆掌禁止者也。

爲指,

虞翻曰: 艮手多節 ,故「爲指」。

翻 曰 : 指 詘 信 制 物, 故 「爲 拘」。

> 「拘」舊作「狗」。 上已「爲狗」,字之誤。

爲鼠

虞翻 曰: 似狗而小,在坎穴中,故「爲

鼠。 晉九四是也。

爲黔喙之屬。

馬融 曰: 黔喙,肉食之獸,謂豺狼之

屬。 黔,黑也,陽玄在前也。

其於木也,爲多節。今本爲「堅多節」。

虞翻 曰: 陽剛在外,故「多節」。 松栢

之屬。

兑爲澤,

虞翻曰: 坎水半見,故「爲澤」。 〇宋

衷曰: 陰在上,令下濕,故「爲澤」也。

爲少女,

虞翻曰: 坤三索,位在末,故「少」也。

爲巫,

乾爲神, 兑爲通。 與神通氣,女,故「爲

爲口舌,

兑爲震聲,故「爲口舌」。

爲毁折,

二折震足,故「爲毁折」。

爲附決。

乾體未圜,故「附決」也。

其於地也,爲剛鹵

也。剛鹵之地不生物,故「爲剛鹵」者也。上虞義。〇朱仰之曰: 取金之剛不生乾二陽在下,故剛。澤水潤下,故「鹹」。此

爲妾

虞翻曰: 三少女,位賤,故「爲妾」。

爲羔。

世,守宗廟,主祭祀,故詳舉之。三女皆也。震已爲長男,又言長子,謂以當繼爲「羊」,皆已見上,此爲再出,非孔子意震「駹」爲「龍」,艮「拘」爲「狗」,兑「羔」羔,女使,皆取位賤,故「爲羔」。舊讀以

之,此其大例者也。此上虞義

言長、中、少,明女子各當外成,故别見

周易序卦

; ;

❶ 「讒」,原誤作「纔」,今據四庫本、照曠閣本改

盈 天 地 也 之間 者 唯 萬 物, 故受之以 屯。 屯

荀爽曰: 昧之中也 謂 陽 動 在 下, 造 生萬物於 冥

屯者,萬物之始生 也

乾 物之始生也」。 始生者,言「剛 第可知,而萬物之先後宜序也。 文王次卦之意。 而資 康伯曰: 生二,二生三,三生萬物」, 生於坤也。 屯,「剛柔始交」,故爲「萬 柔始交」,故萬物資始於 ○崔 不序乾坤之次者, 慢日: 此仲尼 則天地 萬物之 以 序 次

物 言 生必蒙,故受之以蒙。蒙者,物之穉 之貌,齊人謂「萌」爲「蒙」也 慢日: 物生必蒙」。 萬物始生之後,漸 ○鄭玄曰: 以長 蒙,幼小 羅,故 也

物 食之道也。 穉不可不養也,故受之以需。 需者,

飲

康

伯

曰

衆起

而不

比則争无

必

相

親

比而後得寧也。

和 荀 孩穉不養則不長 ?爽曰: 故爲 飲 坎在 食之道 乾上,中 也。 有 离 鄭 玄曰: 火交

飲食必有訟,故受之以訟。

興也。 韓康 之會,恒多争也。 伯曰: ○鄭玄曰: 夫有生則有資,有資 訟猶争也, 言飲 則 食 争

衆必有 訟必有衆起,故受之以師。 也。 《九家易》曰: 曰 : 次國二軍,小國一 千五百人爲軍。 五百人爲旅,旅帥皆下大夫也。 下皆衆,故曰「師」也。 二千五百人爲師,師 所比,故受之以比。 因争必起相攻,故「受之以 。天子六軍,大國三軍, 坤爲衆物,坎爲衆水,上 軍。 軍有 凡制軍,萬有一 師者、衆也 帥 皆中大夫。 將,皆命卿 師」也。

比 者,比 也。比必有所畜,故受之以 小小畜。

畜 康伯 ,以相濟也 比 非 由比而畜,故曰「小畜」 大通之道,則各有所

而 不能大也。

物畜然後有禮,故受之以履。 履者,禮也。

今本「履者禮也」四字入注。

韓 康伯 日 禮所 以 適 時 用 也, 故 既畜

則須用,有用須禮也。

履然後安,故受之以 泰。 泰者,通 也。 今本

履而泰」,衍「而泰」二字。

荀 爽曰 謂乾來下降,以陽通陰 也。

○姚信曰: 安上治民,莫過於禮

然後泰、泰然後安」也。

物不可以終通,故受之以否。

崔憬曰: 物極則反,故不終泰 通 而 否

矣,所謂「城復於隍」。

不可以終否,故受之以同人。

康伯曰: 否則思通,人人同志,故可

同 人」,不謀而合。

與人同者物必歸焉,故受之以大有

崔憬 티 : 以欲從人,人必歸己,所 以 成

大有。

有大有不 可 以盈,故受之以 謙。 今本「有 大

者」。

崔憬曰:「富貴而自遺其咎」,故「有大者

不可盈」,當須謙退,天之道也。

有大而 能謙 必豫,故受之以 豫。

鄭玄曰: 事恬豫。 「雷出地奮,豫。」豫,行出 言同既 大而有謙 德, 則 於政 一而喜

樂之意。

豫必有隨,故受之以隨。

韓 康 俗白: 順以 動者,衆之所隨

以喜隨 人者必有事,故受之以蠱。 蠱

事 也

《九家易》曰: 天下利,莫大於聖人。」子脩聖道,行父 而天下治也。 備 子行父事,「 物致用,立成器以爲 備物 致 用

之事以臨天下,無爲而治。

而大也。○宋衷曰: 事立功成,可推「大也」。○宋衷曰: 事立功成,可推荀爽曰: 陽稱大。謂二陽動升,故曰有事然後可大,故受之以臨。臨者,大也。

物大然後可觀,故受之以觀。

觀」也。〇崔憬曰: 言德業大者,可以虞翻曰: 臨反成觀,二陽在上,故「可

觀政於人也。

可觀而後有所合,故受之以噬嗑。 嗑者,

合也。

〇韓康伯曰: 可觀則異方合會也。 虞翻曰:「頤中有物」,食,故曰「合」也。

飾也。 物不可以苟合而已,故受之以賁。賁者,

康伯曰: 物相合則須飾以脩外也。 ○韓虞翻曰:「分剛上文柔」,故「飾」。○韓

致

加

後亨則盡矣,故受之以剥。

剥者

剥也

荀爽曰: 極飾反素,文章敗,故爲

物不可以終盡剥,窮上反下,剥也。

虞翻曰: 陽四月,窮上,消遘至

坤

者也。

故受之以復。

初,故剥之爲道不可終盡,而使之於崔憬曰: 夫易窮則有變,動極則反於

復也。

復則不妄矣,故受之以无妄。

崔憬曰: 物復其本,則爲誠實,故言

「復則无妄」矣。

▶ 「夫」,原誤作「天」,今據四庫本、照曠閣本改。

物 畜然後可養,故受之以頤。 頤者,養也

虞翻 曰:「天地養萬物,聖人養賢以及萬

民」。〇崔憬曰:「大畜剛健,煇光日

新」,則可觀其所養,故言「物畜然後可

養」也。

不養則不可動,故受之以大過。

虞翻曰: 人頤不動則死,故受之以大

過。 大過,否卦,棺椁之象也。

物不可以終過,故受之以坎。 坎者,陷 也。

陷必有所麗,故受之以离。 韓康伯曰: 過而不已則陷没也 离者,麗也

韓 康伯曰 物極則變,極陷則反所麗。

有天地,

虞翻曰: 謂天地否也。

然後有萬物。

謂否反成泰,「天地壹壹,萬物化醇」,故

有萬物」也。

有 萬物,然後有男女。

> 男,兑爲女,故「有男女」。 謂泰已有否,否三之上反正成咸。 艮爲

有男女,然後有夫婦。

咸反成恒。震爲夫,巽爲婦,故「有夫

婦」也。

有夫婦,然後有父子。

謂咸上復乾成遯。 乾爲父,艮爲子,故

「有父子」。

有父子,然後有君臣。

謂遯三復坤成否。 乾爲君,坤爲臣,故

「有君臣」也。

有君臣,然後有上下。

否乾君尊上,坤臣卑下。 「天尊地卑」,

故「有上下」也

有上下,然後禮義有所錯。

錯,置也。謂天君父夫象尊,錯上。 地

道」,故「禮義有所錯」者也。此上虞義。 婦臣子禮卑,錯下。 坤、「地道、妻道、臣

道之首 序,則 義 雎》爲國風之始,而《易》於咸恒備 成,相須之至,王教之端。 世」,有妲己之禍, 乾坤,有生之本也。 先王制作,蓋取之於情者也。 有君臣之位,故有上下之序。 以父立君,以子資臣,則必有君臣之位。 化生,血體 合之道,則自然 性,則自然 綱、六紀有 母之功。 所由生也 必禮以定其體,義以制其宜。明 曰 也。 有夫婦 自來 以言天不地不生,夫不 相 「《易》之興也,當殷之末 錯, 傳 有剛 也 施 則自然有父子之親。 配合之道。 也。 下經 當「周之盛德」,有 柔尊卑之義。 人有男 此 故《詩》以《關 始於咸 詳 言人道 女陰陽之 有上下之 有夫婦 上經始於 (恒,人 陰陽 論禮 -婦不 配

恒者,久也。 夫婦之道,不可以不久也,故受之以恒。

之道,謂咸恒也。鄭玄曰: 言夫婦當有終身之義。夫婦

者,退也。今本「久居其所」。物不可以終久於其所,故受之以遯。遯

時而遯者也。物之所居,不可以不恒,宜與時升降,有韓康伯曰: 夫婦之道,以恒爲貴。而

後通,何可終邪? 陽盛陰消,君韓康伯曰: 遯「君子以遠小人」。物不可以終遯,故受之以大壯。

勝

也。

進必有所傷,故受之以明夷。夷者, 物 傷於外者,必反於家,故受之以家人。 不可 《九家易》曰: 崔 藩,宜「柔進而上行」,受兹錫馬 言晉極當降,復入于地 憬日 以 : 終壯,故受之以晉。 不可以終壯於陽盛, 日在坤下,其明傷也 ,故曰「明夷」也。 晉者 進 自 傷 取 也 也 觸

子道

遯

而

虞翻 티 : 韓 康伯曰: 晉時在外,家人在内,故反 傷於外者,必反諸 家

内矣。

家道窮必乖,故受之以睽。 韓康伯 人之義唯 E 嚴 與敬。 室家至親,過在失節,故家 樂勝則 睽者,乖也 流 禮 勝 則

乖必有難,故受之以蹇。蹇者,難也。 崔憬曰: 曰「乖必有難」也。 二女同居,其志乖而難生,故

離。

家人尚嚴,其弊必乖者也。

物 不可以終難,故受之以解。 故言「不可終難,故受之以解」者也。 崔憬曰: 蹇終則「來碩吉,利見大人」, 解者、緩也。

緩必有所失,故受之以損。 於政刑,故言「緩必有所失,受之以損」。 崔憬曰: 宥罪緩死,失之則僥倖,有損

慢日: 不已必益,故受之以益

損

損終則「弗損益之」,故言「損

而不已必益」。

益 而 決」也 韓 不已必決,故受之以夬。 康伯 曰 : 益 而不已 則盈,故「必 夬者, 決 也

物相遇而後聚,故受之以萃。萃者,聚也。 決必有遇,故受之以遘。● 崔憬曰:「天地相遇,品物咸章」,故言 韓康伯曰: 「物相遇而後聚」也 以正決邪,必有嘉遇。 遘者,遇也。

聚而上者謂之升,故受之以升。 崔憬曰:「用大牲而致孝享」,故順天命

升而 崔憬曰:「冥升在上」,以消不富則窮,故 而升爲王矣,故言「聚而上者謂之升」。 不已必困,故受之以困

困乎上者必反下,故受之以井。

言「升而不已必

困

也。

遘 四 庫本、照曠閣本作「姤」。 下 一「遘」字同

憬 曰 : 木 及 (于 臲 卼 則 反下 以 求安

故言「困 乎上必 反 下。

井道 不可不革,故受之以革。

韓康伯曰: 井久則濁穢,宜革 易其

革物者莫若鼎,故受之以鼎。

故,則宜 康伯 日 制器 「革去故 立法以 治 ,鼎取 新 也。 新 鼎 所 既 以 以 和 去

主器者莫若 齊生物,成新之器也,故取象焉。 長子,故受之以震。 震 者

動

也。

崔憬 器者莫若長子」。 器者莫若冢嫡 曰 : 鼎所 以 亨飪,享於上帝。 爲其祭主也,故言「主 主此

物 止 也。 不 可 以終動,止之,故受之以艮。 艮者

當須止之,故言「 崔憬曰: 震極 則「征凶」,「婚媾 物 不 可 以終動」,故「止 有言」,

之」也。

物 不可 虞 翻 以終止,故受之以 日 否三進之四 巽 漸。 爲進也。 漸者,進 也

進必有所歸 ,故受之以歸妹。

得其 虞 翻 所 日 歸 者必大,故受之以 震嫁兑, 兑爲妹。 嫁,歸 豐。 豐者, 也。

大也。 崔憬曰:

九女,爲大援,故言「得 歸妹者,姪、娣、媵,國三人, 其 所 歸 者必

大」也。

窮大者必失其居,故受之以旅。

外也。 而 崔憬曰: 能 處 乎? 諺云「作者 故 必獲罪 不居」, 去 邦 況 羇 窮 旅 大甚 於

旅而无所容,故受之以巽。 韓康伯 티 : 旅 而无所容,以 巽者,人 巽 則 也。 得

所

人也。

入而後 翻 説之,故受之以兑。 曰 : 兑爲講習,故「學而時習之, 兑 者 说 也

不亦説乎」。

説而後散之,故受之以涣。涣者,離也。

虞翻曰: 風以散物,故「離也」。

物不可以終離,故受之以節。

韓康伯曰: 夫事有其節,則物之所同

守而不散越也。

節而信之,故受之以中孚。

韓康伯曰: 孚,信也。既已有節,宜信

以守之矣。

有其信者必行之,故受之以小過。

諒」之道,而以信爲過也,故曰「小過」。韓康伯曰: 守其信者,則失「貞而不

有過物者必濟,故受之以既濟。

矯世勵俗,有所濟也。 韓康伯曰:「行過乎恭,禮過乎儉」,可以

物不可窮也,故受之以未濟。終焉。

物窮則乖,功極則亂,其可濟乎? 故受韓康伯曰: 有爲而能濟者,以己窮物。

之以「未濟」。

周易雜卦

義,或以同相類,或以異相明矣。韓康伯曰: 雜卦者,雜糅衆卦,錯綜其

乾剛坤柔。

順,故「柔」也。 虞翻曰: 乾剛金堅,故「剛」;

坤

陰

和

比樂師憂。

虞翻曰: 比五得位,「建萬國」,故

臨觀之意,或與或求。

樂」。

師三失位,「輿尸」,故「憂」。

荀爽曰: 臨者「教思无窮」,故爲「與」。

屯見而不失其居,蒙雜而著。 觀者「觀民設教」,故爲「求」也。

虞翻曰: 陰出初震,故「見」。「盤桓,

利居貞」,故「不失其居」。蒙二陽在陰

三九

位 故「雜」。 初雜爲交,故

震,起也; 艮,止也。

損益,盛衰之始也。 震陽動行,故「起」。艮陽終止,故「止」。

盛之始。

損,泰初益上,衰之始。益,否上益初

大畜,時也, 无妄,災也。

者也。 也」。 无妄上之遯初,子弑父,故「災」 大畜五之復二成臨,時舍坤二,故「時

萃聚而升不來也

坤衆在内,故「聚」。 升五不來之二,故

「不來」。之内曰來也。

謙輕而豫怡也。

謙位三賤,故「輕」。 豫 薦 樂祖考,故

「怡」。「怡」或言「怠」也。

暰 嗑,食也; 賁,无色也。

頤中有物」,故「食」。 賁离日在下,五

動巽白,故「无色」也。

兑見而巽伏也。

乾初入陰,故「伏」也。 兑陽息二,故「見」,則「見龍在田」。 巽

隨,无故也, 蠱,則飾也。

否上之初,君子弗用,故「无故」也。

剥,爛也; 復,反也。

泰初上飾坤,故「則飾也」。

剥生於遘,陽得陰孰,故「

爛」。

到

晉,晝也; 反初。 明夷,誅也。

誅,傷也。离日在上,故「晝」也。 地中,故「誅」也。此上並虞義。○干寶 明人

曰 : 日上中,君道明也。 明君在上,罪

惡必刑也

井通 而 困相遇也。

困三遇四,故「相遇也」。 翻 日 泰初 之五 爲 坎, 故「 通」也。

咸,速也; 恒,久也。

相感者「不行而至」,故「速 也。 日月久

照,四時久成,故「久也」。

涣,離也; 節,止也。

涣「散」,故「離」。 節制數度,故「止」。

解,緩也; 蹇,難也。

雷動出物,故「緩」。 蹇「險在前」,故

睽,外也; 家人,内也。

离女在上,故「外也」。家人「女正位乎

内」,故「内」者也。

否、泰,反其類也。

否反成泰,泰反成否,故「反其類」。 「終

日乾乾」,反復之道。

大壯則止, 遯則退也。

大壯止陽,陽故止。 遯陰消 陽,陽故退。

巽爲退者也。

大有,衆也; 同人,親也。

> 五陽並應,故「衆也」。 夫婦同心,故「親

也」。

革,去故也; 鼎,取新也。

革更故去,鼎亨飪,故「取新也」。

小過,過也; 中孚,信也。

五以陰過陽,故「過」。「信及遯魚」,故

「信也」。

豐,多故; ●親寡,旅也。

豐大,故「多」。旅无容,故「親 十四象皆先言卦及道其指,至旅體离, 寡」。

寡」而後言旅。此上虞義。

四焚棄之,行又在旅家,故

先言「親

离上而坎下也。

韓康伯曰: 火炎上,水潤下也。

小畜,寡也; 履,不處也。

虞翻曰: 乾四之坤初成震,一陽在下,

0 故一下,四 庫本有「也」字。

故「寡也」。 乾三之坤上成剥,剥窮上失

位,故「不處」。

需,不進也, 訟,不親也。

「險在前也」,故「不進」。「天水違行」,

故「不親也」。

大過,顛也。

顛,殞也。頂載澤中,故「顛也」。

遘,●遇也,柔遇剛也。

坤遇乾也。

漸,女歸待男行也。

女歸待艮成震乃行,故「待男行也」。 兑爲女,艮爲男,反成歸妹,巽成兑,故

頤,養正也。

義也。故曰「頤養正」。與「蒙以養正聖功」同胡養三、五。五之正爲功,三出坎爲聖,

既濟,定也。

濟成六爻,得位定也。

歸妹,女之終也。

故「女之終也」。 歸妹,人之終始。女終於嫁,從一而終,

未濟,男之窮也。

來下陰。未濟主月晦,乾道消滅,故「男否艮爲男位。否五之二,六爻失正,而

之窮也」。

也。今本「消」作「憂」。 夬,決也,剛決柔也,君子道長,小人道消

消」。此上虞義。〇干寶曰: 凡《易》君子之決小人,故「君子道長,小人道象,兩體遘決,故次以遘而終於夬。言大過至此八卦,不復兩卦對説。大過死消滅,故「小人道消」,喻武王伐紂。自坤爲小人。乾息,故「君子道長」。坤體以乾決坤,故「剛決柔也」。乾爲君子,

三代損 秋》閲 百世 是以聖人之於天 卦之「姤」,鄭氏及古文作「遘」。此 者之佐,伊 姤」字皆從古文。 : 以俟聖人 弟子 故 諸 「行 益,以非其任 周 問問 自 尹之 夏 代 鬼以教文。 政 之 一而 丽 者數矣,而夫子不與言 時,乘殷 人 《下也,同不是,異不非, 損 不惑,一以貫之矣。 益之。 也), 故 也。 之輅,服 夫子及之焉。 口 文弊薄,故《春 顔 則備言,王 口 問 爲 周之

易傳卷第十七

帝皆繋

世

一象賢,

欲使天下世

有常君

也。

決斷

其

而

則

[變」,「通則久」。

總而觀之,伏羲、黄

周公

攝

政

了; 非

湯武之典,成王

幼

年

尹

廢

立

非

從

順之節,使太

甲

思

愆

也。

湯

武

逆取

非

唐虞之迹,桀紂之

不君

也。

而

堯

舜

禪

代,非黄農之化,朱均

頑

也。

凡

此

皆聖

賢

所

遭

遇異時

者也。

夏政尚

忠之弊野,故殷

自

野

以教敬。

敬之

三四四

李氏易傳後序

所 故異 策賢良六題 宫,學者誦焉。 氏爲異。 聖師殁,七十弟子喪,後出之師 古博雅,人間 以 細之鱗介之動。 同 爲《易》之意。 易》之爲書, 派馬。 摘去拘滯,特論 ,一出此書,素未嘗見,賢 鮮 晉魏之際,傳者尤衆,獨 諸儒 有 無 傳 是以歷代貴之,列諸學 數宜象索, 所 者。 章句遂廢 不 通 慶曆壬午, 人事,蓋 大焉天地之 不著, 各專其習 惟神之測 得 非好 2聖人 相 良 名 府 Ŧ.

所 安,太守平陽公館 儒宗,名爲 藏李氏《易》本,俾予與其子彦孚習焉。 是冬, 博 予 古 放 謪 因間 焉。 北 歸, 以 公先 請。 復 官 德學士 遂出: 漢 東, 先 一、蜀之 學 至 淮

> 刻, 意 明、虞仲翔爲多,而斥王氏、李氏之志也 異 其 彦孚既授卒業,且欲 悉,若何、范之爲《春秋》者。 因 者,家世變正、 書 ||會數 廣傳布 緘別本,屬 + 章 句, 所親眉陽孫景初募工 時 取 中都官文與先學士之 來 其合者著之。 旁 通 互采, 其所取 頗 其 荀 爲 解 刊 慈 煩 挂

也。 之能事 之學者,不能兼明 道,天、地、人、鬼、神,萬 書聖賢之遺旨所存乎? 尼之後, 綜者有理 得之怡然以 慶曆甲申七月計 亡佚者多矣,後或 1 師 證 此 師 一、似 書意 相 自 非 承,以及翻、 例 直 廣, 人之學所 雖異,其精者、 i 用章撰 順 斯 所 化 亦平 有惜之者,況 聞言之邪? 他 巨 一細無 日 陽 爽。 能 氏 有 舉。 不貫,後 之世 沉 豊 易 之 連 深 意 環 德 志 此 仲 古 錯

Document generated by Anna's Archive around 2023-2024 as part of the DuXiu collection (https://annas-blog.org/duxiu-exclusive.html).

Images have been losslessly embedded. Information about the original file can be found in PDF attachments. Some stats (more in the PDF attachments):

```
"before_pdg2pic_conversion": {
 "filename": "MTMxOTM5NzAuemlw",
 "filename_decoded": "13193970.zip",
 "filesize": 163547818,
 "md5": "00c1c89a167681bb84b15967cc283f4e",
 "header md5": "5081d6bfb736e5f4d09b441574a2d8a4",
 "sha1": "ee42437887b45cc396dd66ee05a16c81fd5ae854",
 "sha256": "ecce23b2e61524f966907205b6e32b40fe7b499870ecf33b57fe3ece683ab178",
 "crc32": 2671294757,
 "zip_password": "52gv",
 "uncompressed_size": 184712121,
 "pdg_dir_name": "\u255a\u03c3\u2593\u256a \u255b\u00bd\u2557\u00ac\u2592\u03b1 \u2562\u25a0_13193970",
 "pdg_main_pages_found": 612,
 "pdg_main_pages_max": 612,
 "total_pages": 628,
 "total_pixels": 3340786176
"after_pdg2pic_conversion": {
"filename": "MTMxOTM5NzAuemlw",
 "filename_decoded": "13193970.zip",
 "filesize": 163780121,
 "md5": "f6efa9d842ae1b2ea124b25be0f494b0",
 "header md5": "34efc67a015f4b4376ec483540413859",
 "sha1": "b26056ea7aec384908bf39d7220a2d1e7d55f9b9".
 "sha256": "62db0dfe2e806d3b769a6df16893756696cd32177905f8f3466ef1c5e715a4c0",
 "crc32": 1457077762,
 "zip password": "",
 "uncompressed_size": 184701799,
 "pdg_dir_name": "",
 "pdg_main_pages_found": 612,
 "pdg_main_pages_max": 612,
 "total_pages": 628,
 "total_pixels": 4081738752
"pdf_generation_missing_pages": false
```